

Saunoga Faataupou a Sui Usufono 1976-1978

PALEMENE VI 1976-1978

Afioga Hon LEOTA LEULUAIALII ITUAU ALE



Itumalo Faaalaalafaga:

Anoamaa Sisifo

Filifilia:

18 Mati 1976

Faatauto:

18 Mati 1976

Lauga Faa-Fofoga

Fetalai:

18 Mati 1976

Le mamalu e, ae ou te lei nofoia le Nofoa o le Fofoga Fetalai e avea ai ma Fofoga Fetalai o le Fono Aoao Faitulafono, ou te fia momoli atu lau faafetai tele i sui usufono mamalu ona o lenei mamalu tele ua outou faaee mai, i le tuuina mai lea o au i lenei tulaga aloaia. E mafai ona ou faaali tino atu i le Fono Aoao e faapea o le pule a le Fofoga Fetalai e faatoa mafaia lava i luga o le lagolago mai, ma le finagalo malilie o sui usufono uma o lenei Fono Aoao atoa. Ina ia maua la lea finagalo lagolago mai ma le finagalo malilie o sui usufono o le a avea lava lea ma mea ou te taumafai i ai. Ou te fia logo atu i le Fono Aoao e faapea ua ou faamoemoe ina ia tuuina atu nei loa lava au i le Lana Afioga Mamalu O Le Ao o le Malo ina ia tusa ai ma a tatou Tulafono Tumau. Ou te faamoemoe o le a matou malaga faatasi ma lē na faatuina au ma lē na faaluaina faapea foi le toatele o sui mamalu ina ia tatou au faatasi atu i ai.

O le mea la lea ou te faasilasila atu ai o le a faataatia ese nei galuega a le Fono Aoao Faitulafono ae o le a tatou malaga atu i Vailima i lana Susuga Mamalu O Le Ao Mamalu o le Malo mo le faatautoina o au.

Tofa Hon TUPUOLA EFI



Itumalo Faaalaalafaga:

Aana Alofi Nu.2

Filifilia:

18 Mati 1976

Tofia ma Palemia:

24 Mati 1976

Faatauto:

24 Mati 1976

Uluai Lauga Faa-

Palemia:

18 Mati 1976

Lau Afioga i le Fofoga Fetalai ma le mamalu o le Maota, faapea le paia o le tapuaiga a Samoa. Tatou te faafetaia le alofa o le Atua, e ui lava ina faaaoaga upu malolosi i lenei tausinioga, ae le o sailia i le toto masa'a, i le fono, i le malosi, tofi o le tatou Malo. O lo o sailia i le loto fuatia ifo o sui taitoatasi e faatino lea i le latou palota. Tatou te vivii ai i le alofa o le Atua pe a tatou faatusatusa i nisi o Malo o le lalolagi. Ou te fia momoli atu la'u faamalo i lau Afioga Tupua Tamasese ona ua e faaauau i le tofi Palemia, ina ua tuumalo Mataafa. Aua nei faitau lau Afioga Tamasese i lenei palota e faamaonia ai ua fulitua Samoa i Tama-a-Aiga po o ua faatuatuanai i le mea uliuli o ona fofoga. Faaupu ia i se upu faigofie ua saili e Samoa se fofo mo ona faafitauli, ae o mamalu ma paia o Tama-a-Aiga o lo o mamalu pea, ma e faaeaea foi i ai lenei Malo. Ma o le faatinoga o au upu Tamasese o le a e silasila i ai i se aso o i luma. Avea foi lenei avanoa ou te avatu ai lau faamalo i le Fofoga Fetalai, po o le ua lautogia e avea ma Fofoga Fetalai, faapea foi le Sui Fofoga Fetalai. Fai mai le tatou tala tuu i le tatou tu ma le aga i fanua, sa i ai se aiga sa tausi lo latou maumaga, vae atu le upu e to ia te au. I lenei maumaga e tausi ma le aoa ma o lenei aoa e faamautu lava i ai le lulu i le tele o aso. A galulue le aiga ona faapea lea o le tasi i le isi, aua e te soona lafo, aua e te soona tautala o la e faamalumalu mai le aitu o le aoa. O le aiga o lea e galulue i le maumaga, o sui a usufono lea e saili le manuia o Samoa. O le aitu i luga o le aoa lau Afioga i le Fofoga Fetalai, ia po o le Sui Fofoga Fetalai. O faitau a nisi atonu o le a vevesi taualumaga o le tatou Fono, ae ou te faapea atu i ou uso a sui usufono, tautuana ma outou o lea o lo o faamalumalu mai le aitu i le aoa. Mo e ua lautogia e avea ma aitu o le laau ou te faape atu, tautuana o lena ua outou nonofo uma i le matiematie, ia mamae la outou silasila ma ia faia ma le tonu la outou faamasinoga. Na o se motugaafa ou te tuu atu i luga o le laulau a lau Afioga i le Fofoga Fetalai, e fuafua i ai le tofa. O le tofilemue le afua mai lea i se tagata po o se tulaga, ae afua mai i le tofa mamao ma le utaga loloto.

Samoa atonu ua e faamoe ona ua ese lenei tausinioga ua silisili i matai, ua silisili i lagi, ua silisili i lotu. Ia ma ou te lagona e ao ona ou fai atu o lenei tala e faamanatu i finagalo o le Maota faapea ma le tapuaiga a Samoa. Ao vaeluaina le atunuu lenei i le Malo ma le Mau, sa fono ai le Itumalo o Aleipata, e iloilo se latou finagalo po o le fea o le a latou opogi. Pe opogi le Malo pe opogi le Mau, ona maua lea o le tasi o le a faapea ona fai. O Tafua ma

Saunoga Faataupou a Sui Usufono 1976-1978

le Itupa i Lalo o le a agai e opogi le Malo, o Fautaga ma le Itupa i Luga o le a agai e opogi le Mau. Aisea na mafua ai lea tofa? Sa manumanu le itu o Aleipata nei sei meamanu o i le Malo, matamata fua le Aleipata pe afai o Tafua ma Fuataga ua tofu i ai i le Malo. Afai foi ua tofu i ai i le Mau, ae manu o i le Malo matamata fua le itu o Aleipata. Ona maua ai lea o le tulaga faatamalii alu Tafua i le Malo ae alu Fuataga i le Mau. Afai o le Malo e i ai manū foi mai aua Aleipata. Afai o le Mau o i ai manū foi mai aua Aleipata. Ina o mau malo le Malo, a agai atu le taavao a le Mau i le itu Aleipata, e taulamua Tafua e tausi le Mau. Ina ua manumalo le Mau, faipule Tafua, faipule Fuataga. E lei lima tusitusi Fuataga o ai na i le Mau, ao ai nai le Malo. E ui ina ua le paau Tafua ma Fuataga ao lea e i ai sui o Tuimavave.

Samoa o le tofa lea o lo o tausi ai nei le tofilemu o le atunuu lenei, e le o se tofa lima tusitusi. Ou te manatu foi lau Afioga i le Fofoga Fetalai, o lea le tofa e ao ona avea ma taiala ia i tatou. Ona ou faapea atu ai lea i sui usufono sa latou lagolago Tupua Tamasese o lau aia tatau lea. O le faatinoga o lau aia tatau e le o se mea tatou te masesei ai, poo se mea e tala ai se tatou va. Aua foi lau Afioga i le Fofoga Fetalai, afai e le maua le avanoa e filifili ai e sui taitoatasi i lona loto fuatia ifo lana palota, e le se Malo saoloto le Malo o Samoa. Ou te fia faafetai atu i sui na latou lagolago ina au, ma ou avatu lau tuualalo faapenei, a ua i ai se upu ua malosi poo se fati ua faasala i o tatou sui usufono sa tatou tausinio, faagalo o lea. O le tofa e tausi ai Samoa e le o se tofa lima tusitusi, poo se tofa sau, po o sse tofa e tau faaleaga pe tau faifai, o le tofa e faamagalo, o le tofa e alofa, o le tofa e faamaoni. Aua nei maumau lo tatou malosi i lo tatou fetuitui ai ma lo tatou faatau ai loto. Ao lea e tuu mai faafitauli e anoanoai ma le fita, e ao ona agai i ai le atoa o le tatou malosi. Tau ia ina ou taua nisi o nei faafitauli, e 90% lo tatou laueleele e lei faatoaina, ae le mapu le fetuatuanai o nuu ma aiga i le tuaoi eleele. E oa lo taotu laueleele ae maumau le 60% o le tatou tupe maua e faatau ai le fofoga taumafa mai fafo. Tatou te taulagi le matagofie o Samoa, ae o a tatou fanau e saili lo latou lumanai i Niu Sila ma Amerika. E auma le matagofie o taulagi pe afai e le fia nonofo a tatou fanau i totonu o Samoa. Ona ou faapea atu ai lea Samoa e, ou te le lima tusitusi, o ai lou matai o le a lau lotu o ai na e lagolago. Afai o e alofa moni i le atunuu lenei, afai o oe o se Samoa e te naunautai mo le manuia o tagata lautele, tuu mai lou aso o lou lima lea ta limalima faatasi, ma lo ta faatuatua i le Atua e mama mea e mamafa, e faigofie mea e

faigata pe a tasi lo ta faatuatua tasi lo ta faautauta tasi lo ta faamoemoe. Soifua

Afioga AIOLUPOTEA FAIVA



Itumalo Faaalaalafaga:

Alataua Sisifo

Filifili:

5 Mati 1976

Faatauto:

18 Mati 1976

Lauga Faataupou:

3 Aukuso 1976

Faafetai atu i lau afioga i le Fofoga Fetalai e tusa ma le avanoa. Ou te faapai malu atu i le faafofogaaga a le Afioga i le Palemia faapea foi le Aiga Kapeneta e tusa ai ma le aso ma saunoaga ma fetalaiaga a Sui, ina ia lagapapale la outou faafofogaaga ma ia tuutuu i le loloto le tofa ina ia avea o se tu e tofilemu ai ma faasagatonuina ai atili le faamoemoe o galuega o loo outou feagai ai. Faafetai foi i Sui mamalu e tusa ma a outou saunoaga ma fetalaiaga o lenei aso. Ua matagofie foi i le faalogologo, atonu ua maua ai foi sina agaga masani laitiiti e mafai ai ona talanoa i lenei taimi.

Lau Afioga i le Minisita o Tupe, ou te faafetai tele atu e tusa ma le Tala Faatatau o le Tupe ma le lauga sa e saunia e tusa ua lua vaiaso ua tuanai na e faasilasila ai i totonu o lenei Maota, ma ua faamalieina foi le agaga. Ma le faaaloalo lava i lau Afioga i le Fofoga o le Fono, e pei ou te tu nei i le taimi nei ma vaai i tua ma mafaufau i le amata mai i le 1962 seia oo mai i lenei aso, ona ou tu ai lea ma vaai i tua i itu e fa o Samoa. Ou te faatusatusa lea itumalo ma lea itumalo ma lea nuu ma lea nuu ma o iina e aumai ai se ata faanoanoa i lou taofi, pe a ou vaai atu i le itumalo o loo ou sau ai. Talu ai le tulai mai o lau Afioga i le Palemia ma le Aiga Kapeneta, ua ou mautinoa ai le agaga poo le sini o loo i ai le tofa ma le faautaga i le Malo e faamuamua le atiina a'e. Ou te talitonu foi ma ioe lou sui ua tatau ma alagatatau lea itu.

I aso ua mavae, a o ou faalogo mai i tua i felafolafogaiga i lenei Maota, talu ona faatoa tutoatasi le Malo o Samoa, sa ou faalogo i faaupuga fesuisui ai a le Maota. Sa amata ona ou faalogo faapea i taumafaiga a le atiina a'e lenei, e i ai nisi saunoaga e faatusatusa faapea o "Samoa pepe", tulou o le upu e to ia te au. Ua faasolo mai ai ma agai mai ai ou te faalogo i nisi auga-sui o le tai tolu tausaga o faapea se isi faaupuga, "o Samoa sa pepe a ua amata ona totolo." Faasolo mai ai ma faasolo mai pea, sa ou toe faalogo foi o faapea i

Saunoga Faataupou a Sui Usufono 1976-1978

felafolafoaiga i lenei Maota, o Samoa sa pepe ma totolo a ua laa.” Nei la, ou te tu loa ma vaavaai, e pei lava o ou tu i se tumutumu mauga ma vaai i itu e fa o le atunuu. Ona ou fesili loa lea i lou mafaufau pe mata ua moni ia faaupuga. E masani foi ona ou faalogo i tua e i ai faaupuga faapea a nisi tagata: “Se o aso nei ua le o toe Samoa tumau ua Samoa laalaa.” Ia ou te faafetai atu. O lau tautalaga e agai mai i tua, e fausia mai i taimi ua tea i le taimi nei e fai ma auala i fautuaga i lo outou Aiga Kapeneta ma lau Afioga a le Palemia.

Lau Afioga i le Minisita o Galuega, e ui ina e le o nofoia le Nofoa ae ou te tautala faapea, pe mata e faamaonia le faaupuga lea ua i ai nei i le Malo, o Samoa ua laalaa? Ua uma le pepe, ua uma le totolo a ua laa. O le fesili e tulai mai ia te au po ua faamaonia e lenei Maota ua laa Samoa? Ou te talitonu ma le faamaoni ua ioe i ai i nisi itumalo ma nisi nuu, a o nisi nuu e le faamaonia. O nisi itumalo i totonu o le atunuu ua moni o Samoa ua laa; o nisi itumalo ma nisi i le atunuu ua ioe o Samoa ua totolo; o nisi itumalo ma nisi nuu ou te talitonu e lei totolo, e lei laa a o loo pepe pea Samoa, e afua mai i nisi itu i atiina a’ē. O loo tumau lava mai anamua e oo mai i le aso, e lei i ai lava ni mea ua faia i totonu. Afai la ou te vaavaai i le faagasolo mai o tausaga i le pasia o lea vaegatupe ma lea vaegatupe e fausia ai ala galue, ona faapea lea o lou taofi, poo fea o agai i ai nei vaegatupe. I nisi nuu ua uma ona fausia, i nisi nuu ua fausia nei, i nisi nuu ua toe foi faalua ma toe faaleleia foi, a o loo i ai pea nuu i totonu o le atunuu e lei alu ai lava sina sene a le Malo i le faiga o ni latou ala galue.

Lau Afioga i le Minisita o Atiina A’ē, ou te fesili faapea, pe mata o mafai i le manogi o le tauvaga ma le faatosina o le tauvaga o le popo o loo fai i le taimi nei ona aoao mai fua o faatoaga a nuu uma o le atunuu i totonu o lenei faamoemoe? Ou te talitonu e leai. E le mafai ona taumafai nuu e faatino lea faamoemoe pe a fai lava o loo “pepe.” O le uiga o le upu “pepe”, o loo amo lava i ua popo ma sua i aso uma; o le faaaogaina o manupapalagi tulou, o le upu e to ia te au. O le taimi lenei fai mai o “Samoa laa”. Ua i ai auala mo femalagaiga o taavale e faafaigofie ai galuega, a o loo tumau pea nisi nuu i le pologa. E pei ona ou tautala atu i le taimi ua mavae, o lau lauga e fausia mai tua ae fai ma fautuaga i le Malo. Lau afioga i le Palemia ma le Aiga Minisita, afai o le agaga lea faamolemole ia faamuamua nuu e lei i ai ni ala galue. Ou te talitonu foi o le isi lea itumalo e sili ona tele le tamaoiga i le mea tau popo, ae ou te molimau atu o loo lalau pea

popo ma faulalai i luga o le fogaeleele ona o faafitauli ia.

O le isi itu lau Afioga i le Fofoga o le Fono, o mea tau vaipaipa. Lau Afioga i le Minisita o Galuega, ou te faafetai atu. Tasi foi le itu ou te fia tautala i ai i le matua o lau lauga o “Samoa laalaa.” Ua i ai nei i totonu o nisi itumalo taumafaiga mo vaipaipa. O le mea moni ou te molimau atu i lenei aso ma le faaaloalo lava i lau Afioga i le Palemia ma le Aiga Kapeneta se o le Malo tau faaoleole le Malo nei. Ou te talitonu o le Malo tau faasee. E alagataua ona ou faapea aua o loo molimauina i le taimi nei. O le taimi ua mavae ua uma ona galulue le Malo i le fausia o vaipaipa, fausia faatanoa, faataoto paipa i luga o alatetele, fausia e nuu ma aiga o latou paipa tutu. O le upu to ia te au, tulou le mamalu o le Fono ma lau Afioga i le Fofoga o le Fono, na o atigi faatanoa ma atigi ogapaipa ae leai se suavai. O le moomooga o le agaga tulou, e moomia e nuu ma alaalfaga le suavai i totonu o faatanoa, ma totonu o ogapaipa aua le faaaogaina i le fofoga taumafa o le atunuu. O lea ou te talosaga atu faamolemole sei faatino ia ia mea. Ua na ona taatitia ma taoto ma tino mai ae le iloa pe fua afea. Na o se laau ua leva ona tu ae le fua. E fautuaina ai le Malo sei faafua ia ia laau ua leva ona faataoto i nuu ma itumalo e fia taumamafa i le suavai.

Lau Afioga i le Minisita o le Gataifale, ou te talitonu e o tutusa lelei taumafaiga i le elelee ma le gataifale. Afai e suamalie i le va o le au galulue ae a’ē mai i fanua e faamoemoe i ē o loo feagai ma le gataifale, e o faatasi mea ia e lua. Afai e le o faatasi e le manuia le soifuaga o le atunuu. O le tulaga faigata o loo i ai i totonu o le mea lenei, ua na ona fausia o vaafagota ma faigata ona faatino ona o le leaga o ava. Faamolemole ou te molimau atu o ia nuu i le itu mamao i le faatausiuga o Salafai o ni nuu alofitai leaga, tulou o le upu e to ia te au. A pe le tai e le mafai ona toe alu se faatautaiga. Afai foi e sao i tai, afai lava e sua le tai i le 12 i le po, o le taimi foi lea faatoa ofi mai ai foi i uta le faatautaiga. Faamolemole lau Afioga i le Minisita o Gataifale, sei e silasila totoa i lea itu. Ua taumafai i vaafagota ma afi taugata, ae le mafai ona faatino ia mea pe afai e le faia ava fagota. O le mea foi lea, lea ou te fia fautua atu ai i lau Afioga i le Minisita o Tupe. Ou te vaavaai i le Tala Faatautaiga o Tupe i mea tau ava, e faanoanoa lou taofi. Ou te talosaga atu faamolemole ia e alofagia ma ia faaopoopoina ma tuuina se tupe mo le faatinoina o ia galuega.

Lau Afioga i le Minisita o Atiina A’ē, e tele naunau le popo ia Salafai. Ou te le iloa pe sao lau faalogo e faapea sa talanoaina i aso ua mavae pe

Saunoga Faataupou a Sui Usufono 1976-1978

leai, ae ou te faaali atu ma talosaga atu ina ia alofagia sei fausia ia se falepopo i Salafai faatasi ai ma koko ina ia faafaigofie e le aufaifaatoaga o Salafai ona latou faatau le popo i ni ala pupuu ma le lē taugata i le feaveaiga o le popo ma le koko. Afai lava o le a i ai se fale faapea i Savaii o le a faafaigofie lava i le aufaifaatoaga i Savaii ona o ane fua ai ona faitalia lea o le Malo i ona tulaga o felauaiga ma tulaga faapena.

O se isi itu ou te fia fautuaina ai le Malo ona o tulaga ia i malaga i Savaii i le po. Ou te talitonu o se tasi lea tulaga pagatia o le motu ia Salafai. Afai e ta le 12 iina ona malaga lea o le pasi i Mulifanua. Ia e faasau mai lava i lena taimi seia oo ina ta le 6 i le taeao faatoa malaga le vaa. O fale o loo i ai nei i luga o na uafu, ou te molimau atu faamolemole, o nei fale poo le a ea le aoga na fai ai. E le iloa ni tausaga poo fea se taimi e maea ai a o loo puapuagatia pea le atunuu i le faasau i le po. Ma le faaaloalo lava i lau Afioga i le Fofoga Fetalai faapea le Palemene, e gata mai ai i se upu. Ia manuia le Fono.

Mrs ANNANDALE, SINA HOPE NELSON



Itumalo Faaalaalafaga:

Palota Taitoatasi

Filifilia:

5 Mati 1976

Faatauto:

18 Mati 1976

Lauga Faataupou:

4 Aukuso 1976

Lau Afioga a le Fofoga Fetalai, lau Afioga a le Palemia ma le Kapeneta faapea foi Sui mamalu o lenei Maota, e muamua ona ou faamalulu atu ma faapea atu, ou te lagona e le lava ia te au i lenei vaitaimi le poto masani i le faa-Samoa. Ou te lagona foi e le lava ia te au upu faaaloalo e feagai ma le mamalu o a outou Afioga ma le mamalu o lenei Maota. Ou te lagona foi matou te silafia foi, sa i ai nisi Sui mamalu i le faatoa ulufale mai i lenei Maota sa lagona le popole ma le faaeteete i lenei itu, ma ou te faamalo atu i na Sui ina ua matua maeu ma manino a latou saunoga i lenei vaitaimi. Atonu foi ou te oo i ai ae sau aso. O lea la ou te faapea atu ai ma le faaaloalo i a outou Afioga, ia outou malilie. Lau Afioga a le Fofoga Fetalai, ia e finagalo malie ma tuu mai le avanoa e fai ai lau tautalaga i le Gagana Peretania e tusa ma Tulafono Tumau o lenei Maota.

Lau Afioga i le Fofoga o le Fono ma le mamalu o Sui o le Maota, e taua tele ia te au lenei avanoa ua ou tulai atu ai mo le taimi muamua, ma o le upu moni ia te au, o se faatasiga mamalu ma le taua tele lenei. E pei lava ona silafia o au o se tasi o Sui o le vaega toaitiiti o le atunuu e i lalo o le lisi o Palota Taitoatasi, ae ou te lagona o se tasi lea o vaega taua tele i totonu o le soifuaga lautele o lenei atunuu. E pei lava ona i ai i le taimi ua tuanai ma faapea i le taimi nei, ae o le a faapea foi ona faaaau ai lo latou galulue malosi mo le atiina ae o lenei atunuu i le agai atu i le lumanai. Ma ona o i matou o tagatanuu o Samoa o loo matua naunau lava ma le agaga atoatoa e auauna atu i le atunuu ma tuuina atu lo matou sao i le tulaga e aupito sili ona atoatoa lelei. Ui i lea, o loo lagona pea sina faanoanoa poo se atuatuvalega foi ia i latou o loo avea ai au ma Sui, ona o se agaga e faapea ia faamutaina le toe i ai o ni Sui mai le Vaega o Tagata Palota Taitoatasi ma o lona uiga, ole a aunoa loa i matou ma se leo i totonu o le Maota lenei ma faapea ai foi ona leai se nofoa i lenei Maota. Ua ou faamoemoe i le avea o au ma Sui o le Palemene i lenei tolu tausaga ou te tuuina atu ni fuafuaga mo le iloiloia.

Ou te faamalo atu i le Minsita o Tupe mo lana saunoga manino ma le faamatalaga faamautuina lelei e uiga i le Tala Faaopoopo o le Tupe mo le 1976. Ua ou taua le faamautuina lelei ona e ui lava ina na lei matua taina le nota o le faanoanoa, ae ua faaalua manino mai ai e faapea o loo tatou o i ai i se tulaga e fai sina faaletonu ma le lē mautu. Ona ua sili mamao atu a tatou oloa e faaulufale mai i lo fua o a tatou faatoaga e auina atu i fafo, ma o loo faaalua ai le agai pea ina pau ifo fua autu o lo tatou lauelele, o lea ua leai ai se avanoa mo se uiga nofonoa pe faatalatalanoa mo i tatou. O le mea moni, o loo i ai lava se mafuaaga e tupu mai ai le popole. Ae peitai, ona o se Malo fou ma faamoemoega mo manatu fou ma auala fou e faatino ai, ua ou manatu ai ua tatou amatalia nei se vaitaimi fou. Ma o se mea lava e faalaeiaua ai le matauina e faapea ua silafia lelei e le Malo le tulaga ua tatou i ai nei ma o loo ia te ia ni fuafuaga tetele e sailia ai ni auala e foia ai lea tulaga.

O le toe taua o taimi ua tuanai, poo ni mea e ono mafai ona faatatauina o ni sese i taimi ua mavae atu, o le a le tele se fesoasoani e maua mai ai mo i tatou, ae vagana ai ona e mafai ona aoao mai ia sese ia i tatou i le fuafuaina o se lumanai e sili atu ona matagofie.

I le sili atu i lo le 100 tausaga ua mavae, sa saunoa ai Aperaamo Linikone: “E le mafai ona outou faamalosalia le e vaivai, i le faavaivaia o le e malosi”.

Saunoga Faataupou a Sui Usufono 1976-1978

ma ou te faasilasilaina atu ai ma le faamaualalo e faapea ua leva lava ona avea lenei uiga ma faiga faavae a le Malo, lea ua aliali mai ai se uiga pagatia i nisi o a tatou alamanuia tetele. O se tasi o sini autu o le Malo o le tataua lea ona tuuina atu ni avanoa tutusa i tagata taitasi uma, aepeitai e le masani ai ona avea le tuuina atu o avanoa tutusa ma mea e taunuu ai i ni taunuuga tulaga tutusa. O se tagata e faigaluega i le tolu poo le fa itula ae alu ese atu ma malolo i le vaega o totoe o lona taimi, e le mafai ona na faamoemoeina le maua e ia o le tulaga faamanuiaina poo taunuuga lelei e maua se tagata o ia lea ua nofo sauni e galue i le 8, 9, 10, 12 poo le sili atu o itula i se aso. O lea ua faamanatu mai ai ia i tatou le faataoto i le Tusi Paia e uiga i "taleni." O le tulaga faamanuiaina, tusa pe auala mai i se pisinisi, se faatoaga, se olaga tau le poto maoae faapitua poo le soifuuga tau upufai o Malo poo soo se tasi lava galuega tau le soifuuga, e fuafuaina lava lea i le aofaiga poo le tele o le galuega ua faia ma le lototele; uiga lototele lava ia e saga faaauuina ai pea galuega. Ma seia vagana lava ma seia oo ina ua mafai ona faamautuina lenei uiga ia i tatou, e le mafai lava ona ou vaaia se ata matagofie mo le lumanai. Ae peitai lau afioga, ou te manatu lava o loo ia i tatou lenei agaga e pei ona faaalua e la tatou au lakapi sa taamilo i Niu Sila, o le agaga naunautai lava lea ou te tautala i ai, o le agaga ma le loto e faaauu ai faasaga i e malolosi. Atonu e le tele ni taaloga na latou manumalo ai ae sili atu le tulaga sa latou i ai; sa latou manumalo i le viiga ma faaalaloga a tagata lautele o Niu Sila ona o lea lava agaga; ma taufai lagona o lea lava naunautai. Ma afai o le a mafai ona tatou faaaogaina ma le tataua o lea lava agaga ma tulaga taua o i ai i lo tatou soifuuga faale-tagata faigaluega, ona ou faapea lea, ua aunoa i tatou ma se mea e toe popole ai agai i le lumanai.

Ua ou vaaia foi i le Lipoti a le Minisita o Tupe, o le aofaiga o a tatou pusa fai na auina atu i fafo i le tausaga 1975 e 19,000; ma ua pau mai ai i le tulaga sa masani ai mai le tele o tausaga, o le latalata lea i le miliona pusa fai i le tausaga. Ma ou te faamanatu ai i Sui mamalu o le Maota, o le aofaiga o pusa fai o loo auina atu i fafo i nei aso ua matua laitiiti lava pe a faatusatusa atu i aso ua mavae. I ni tausaga ua tuana'i, o au o se tasi o tagata i Samoa sa tele pusafai sa auina atu i fafo, ae i le tausaga e 1970 ina ua tatou taunuu i le tumutumuga o o tatou faamoemoega, sa ou tuumuli ese loa ma lenei matata ona ua leai sou faamoemoega i fuafuuga faatino a le Malo ma sa ou valoia ai, o ia fuafuuga faatino e leai se mea e maua mai ai vagana le faaleagaina ai o lenei alamanuia. E

tóatele nisi e aafia i fefaatauaiga o oloa ma tagata faifaatoaga tetele sa lagona lenei lava mea e tasi. Sa matou iloa, e le gata ina le faaitiitia ai le soona faaaluina o tupe, ae sa leai se fesootaiga faifaimea faatasi poo le lagolagoina, ma sa aunoa ma le faalototeleina mai e le Malo. O mea uma ia ua faaagaaga lava mo le aufaifaatoaga laiti. Ma a o faasolo ona tuumuli ese faifaatoaga tetele ma le ata, ua le mafai loa e faifaatoaga laiti ona faaauuina lenei alamanuia ma oo ai lava ina malepe. Ana sei manatu lava le Malo i lona vaitaimi e lagolagoina poo le faamalosi o le aufaifaatoaga tetele, ou te manatu i lau afioga semanu ua olaola ma faamanuiaina lenei alamanuia o le fai i lenei vaitaimi. I le faatuina o le Komiti Faatino fou mo le fai, e i ai lava ia faamoemoega o le a toe faaleleia ai ia tulaga. O lea foi ou te faapea atu ai, ona ua ou lagona ua tatou oo nei i le amataga o se vaitaimi fou, o le a ou toe liliu loa i le itu tau fai ma lou faamoemoe o le a tausisi le Malo i ana folafolaga i lenei taimi.

O le fuafuaga mo le 15 tausaga o le totoina o niu ma le toe totoina foi ua le faamaonia sona lelei. I le uluai 10 tausaga pe afai e sao a tatou faamaumaga, e tusa ma le 76,751 eka sa totoina poo le toe totoina; ma e ui ina e le o avanoa nei ia fuainumera atoatoa o ia fuafuaga ae ou te faapea atu, ua tataua i lenei taimi ona oo atu i le 100,000 eka ua totoina. O se fua faatatau aupito maualalo la o popo e maua mai i le eka i le tausaga le 3 aneriuaeta, aua ua silafia lava e le aufai-popo e mafai ona faatoluina lea aofaiga i popo e maua mai i le eka. Ae pe a faapea la o le 3 aneriuaeta i le eka o le tulaga lea e i ai le popo mago e maua mai, o lona uiga sa tataua ona tatou vaaia se faaopoopoga e sili atu i le 9,000 tone i le tausaga. Ua manino ai lava le tataua i le Malo ona iloilo totoa lenei vaega o galuega ma e matua taua lava le faamaoni i le vaaia ma le pulea pe afai o le a tatou fia vaai i se faaopoopoga o popo e maua mai ai.

O se mea foi e faamalua lo tatou iloa o le faasolosolo atu lava ina faaitiitia koko e auina atu. I ni tausaga ua mavae, e itiiti lava se fesoasoani sa tuuina atu i le aufai-koko vagana ai le faaaogaina o le ituaiga koko e taua o le Lafi 7, e pei ona tatou malamalama i ai, e le o sologa lelei ma o se faafitauli ua faatuai ai le agai i luma o lenei atiina ae. Ou te malamalama foi, o loo i ai le \$.5miliona ua tuuina mai mo le faaleleia o le koko, ae ou te le o vaaia se tulaga manuia i lenei vaega e ono aliai mai i le lumanai. E le o se mea e ofo ai lou nei tagata le aliali mai o le pau matautia i le tele o laupepa e auina atu i fafo ona ua ou lagona seiloga lava e faaleleia atili le tulaga tau le gaosia o le tatou

Saunoga Faataupou a Sui Usufono 1976-1978

laupapa, ou te le iloa poo le a faapefea ona tatou mafai ona auina atu i fafo pe afai o i tatou lava ua leai se faalagolagomaga tele i le tulaga o laupapa e gaosia iinei, ma o loo talia lava le faaulufale mai o laupapa e sili atu ona lelei mai fafo ui lava ina maualuga lo latou tau.

O le mataupu i tiute o meatotino o e ua maliliu ma meaalofa, sa faaulufale mai i Samoa i Sisifo i le 1922, ae o le tausaga lava e 1955 i lalo o le tulafono a Niu Sila na faatoa aafia ai tagata Samoa i le totogiina o ia tiute. Ui i lea, sa maualalo lava fuafuaga tau le totogiina o ia tiute sa i ai. A o faasolosolo foi ina faatino ni suiga poo ni toe teuteuga o lea tulafono a Niu Sila e aofia ai na mea e le aafia ai, sa faapea foi ona tausisi i ai Samoa i Sisifo seia oo i lona tutoatasi i le 1962, ina ua matua maualuga lava fuafuaga ua oo i ai le tau o ia tiute. Mai lea vaitaimi, sa matua faaititia loa fuafuaga o tau o ia tiute a Niu Sila a o tausisi pea Samoa i le tulaga maualuga na i ai mai le 1962.

O le tulaga la o loo i ai nei e faailoga tagata ona e le o i ai ni tiute faapea e aafia ai eleele tau Samoa, vagana ai i latou e i ai eleele tumaoti a tagata taitoatasi faatasi ai ma fale mautu o fausaga faapapalagi e tatau ai ona totogi ia tiute. O loo malamalama lava e faapea, o le Kapeneta i lalo o le taitaiga a Mataafa i ni nai tausaga ua mavae sa faatonu ina ia tuu ese lea vaega ua taua o le tiute o meatotino o e ua maliliu ma meaalofa. E peiseai o lea faatonuga sa lei aloaia ma ou te talosaga atu ai i lau Afioga a le Palemia ma le Kapeneta ina ia faatino lea faatonuga ma ia soloieseina ia mea ua taua o tiute o meatotino o e ua maliliu ma meaalofa.

Ou te fia auai faatasi foi i le finagalo i Sui ua uma ona sausaunoa i le faasilasilaina atu o lou atugaluga i le saosaoa tele ona agaigai i luga le tulaga i le tau o le soifuaga, ma ou te lagona ua ao lava i le Malo ona faanatinati le toe iloilo ma toe sailia le tulaga tonu e tatau ona i ai le tau o le soifuaga. I ni nai vaiaso talu ai sa ou vaavaai ai i lona pepa matautia faale-Malo le Tulafono o le Faasologa o Tiute 1975 na pasia i le tausaga talu ai ma ou te fesiligia ai le atamai i lona faatinoina. Afai tatou te faamaoni i lo tatou atugaluga mo le manuia lautele ma le tulaga ua oo i ai le soifuaga o o tatou tagata aemaise i latou o loo i ai i le lio o totogi maualalalo ma i latou i nofoaga maotua. O lea ua tatau ai lava ona vave faatino se fuafuaga e suia ai le faatulagaina o tau ma tiute aemaise lava i oloa o meataumafa ma mea e fausia ai fale poo laoa foi ma maota; ma ou te toe avatu ai lenei talosaga i lau Afioga i le Palemia ma le Kapeneta ina ia tuuina atu le faamuamua i sa outou fuafuaga i lenei mataupu.

E i ai lava se atugaluga i le tulaga ua i ai e pei ona faaalua i le lipoti a le Matagaluga o Leipa e faapea, o pasene o tagata faigaluega mo totogi ua pau ifo i le 11% i le 2 tausaga talu ai ae ua i ai foi ma se faaititiga tele i le vaega tau faatoaga ma e atagia mai ai le faaititia foi o fua o le laueleele e mafai ona auina atu, ae o le tulaga tonu lea e faigata ona tatou talia. Pe le o se tulaga lea e mafua mai i gaoioiga a le Matagaluga o Leipa, o ē o loo faatinoina ni fuafuaga mo le lelei o se tagata faigaluega leipa ae avea foi ma mea e ono toesea ai ma le avanoa o loo faigaluega ai? Ua ou talanoa i nisi o tagata faifaatoaga tetele, ma ua latou faaalua e faapea, ua faamalositia i latou e faaititia a latou tagata faigaluega ona ua faafaigata ia te i latou ona talia atoatoa fuafuaga poo faatatau ua tuuina mai e le Ofisa o Leipa. Pe le o se mea lelei ea le faafaigaluega o tagata e tóatele i se totogi feoloolo nai lo le toaititi i se totogi maualuga?

O le tagata faigaluega i le faatoaga e lelei atu ona avanoa nai lo le tagata e faigaluega i le vaega o faioloa. A fia mau ai i le faatoaga e mafai ona tuuina atu se fale e nofo a o ia ma lona aiga o ē e masani foi ona faigaluega ai. O le a ia maua foi se fasi fanua e toto ai ana taro, fai ma fualaaui aina, ma o mea e totoe mai lona faaaogaina o le a mafai ona ia faatauina atu. O loo i ai foi asiasiga i masina taitasi a sui o le falemai faapea ma le fesoasoani latou te maua i mea e mananao i ai tau le soifua maloloina mai tamaitai tausimai o itumalo; e avanoa foi taavale e feoi ai i soo se faalavelave faafuasei. Afai foi e le fia nofo i le faatoaga, e avanoa lava taavale e aumai ai ma toe faafoi atu ai i aso taitasi. O le faaleaogaina o lea faiga, o le a se mea o le a tatou maua mai ai? O le a na o tagata faifaatoaga tetele e malilie ma tagata faigaluega i faatoaga le malilie ma o le tulaga e iu i ai, o le a tele se vaega tau le faaleleia o faatoaga e afaina ai ma faapea ai foi ona faaititi fua o maua mai ia tatou faaleeleaga. Ma o nisi faifaatoaga o le a sili ai le tuumuli ese lea mai sea taumafaiga le talafeagai ai a o nisi e faaauau pea o le a faamalositia ona latou faaaogaina ia masini ma faaititia ai le aoga o tagata faigaluega, ma faapea ona faaopoopo atu ai i le tatou mafatiaga i le itu tau le lē maua o avanoa faigaluega i le atunuu.

Sa ou talanoa i nisi o le vaega o faioloa ma o latou foi o loo faafeagai ma lenei lava faafitauli e tasi ma o loo faaititia a latou tagata faigaluega i le tuuina atu o masini e faagaioi ai i soo se matata e tatau ai. E ui ina ou lagona e faapea o loo faia i luga o faamoemoega lelei ia galuega a le Matagaluga o Leipa, ma e tatau foi ona ave i ai le faamalo mo nisi o galuega ua latou faia i le faaleleia atili o nisi tulaga

Saunoga Faataupou a Sui Usufono 1976-1978

e talafeagai ona faigaluega ai nisi o tagata faigaluega e i ai tagata faigaluega o le uafu e pei ona latou tausisi ai i le faaaogaina o ufimata i le lauina o nisi ituaiga o uta a vaa, ae ou te manatu i lenei lava taimi, e tatau ona tatou fai ma le faaeteete nei mea ua avea lo tatou naunau e faamutalia ai nisi o faafitauli e fai ma mea tatou te faafeagai ai foi ma nisi faafitauli tetele e i ai faatasi ma nisi aafiaga faigata.

E tusa ai ma le aofaiga o fesoasoani mai fafo ua tatou taulimaina, o se mea e ofo ai lou nei tagata ona ua le avea lea ma mea e faafeoloolo ai so tatou tulaga i lenei vaitaimi. E pei ona i ai le siisii i luga o le tau o le soifuaga, o le faamaualugaina o tulaga tau lafoga ma le faasolosolo ina faaititia fua o faatoaga e auina atu faatasi ai ma fesoasoani ua tatou maua, e foliga mai o lo tatou malosi ma lo tatou tomai ua le i faaaogaina i se tulaga atoatoa e lelei ai. E sili atu i lo le taimi le avanoa mo le Malo e gaoioi ai i ni fuafuaga mautu mo le faamaloloina o i tatou mai nei tulaga faafitauli ua leva ona tatou asa mai ai.

E peiseai ua umi ona ou tautala i le itu tau faatoaga, e le gata la ona o le vaega lea ou te auai, ae o le autu tonu lava lea o le tatou tamaoiga, o le faamoemoega o le tatou atunuu, o lo tatou vaa faaola ma ona o le faaolaolaga sili i le lalolagi e i ai lea i le laueleele, lo tatou vaega e fai faatasi, o le meaaloa a le Atua ia i tatou. E faapefea ona tatou faaaoga lea meaaloa? Po o le a atoatoa ona tatou faaaogaina, po o le soona fai? O lo tatou tiute le maua mai le eleele o mea uma e mafai ona tatou maua mai ai, o le onosai lava ma faalelei se olaga mo i tatou, aemaise lava o se olaga manuia mo i latou e mulimuli mai, ma o le vaega lea ou te tuuina atu ai lou nei Sui. Faafetai. Ia manuia le Fono.

Tofa APULU OPELOGE



Itumalo Faaalaalafaga:

Aana Alofi Nu.1

Filifilia:

5 Mati 1976

Faatauto:

18 Mati 1976

Lauga Faataupou:

3 Aokuso 1979

Faafetai i lau Afioga a le Fofoga o le Fono, faapea foi le mamalu o le Palemene. O au foi sa ou mafaufau i lau lauga o le a aafia ai ma le Tala Autu i mea o lo o fai sina faaletonu. O lenei la faatoa maua lau faaiuga e pei ona e saunoa i le Maota i le 30 minute, ma o le a faapuupu ai lau lauga. O le isi foi mafuaaga, ua

fou lenei tulaga ua i ai. Ua le o nofoi mai le Afioga i le Minisita o Tupe sa na fausia le Tala Autu o le Tupe. Pei la ou te lagona a ou fesili atu ona le talafeagai lea i se isi foi tulaga. Ona ou manatua ai lea o le tala foi lea ia Sina ma ona tuagane. A valaau atu Sina ia Tui ma Tui ae 'oe mai le isi Tui. O lona uiga e faapea foi le mamalu o le Kapeneta. Po o ai lava o le a fana tonu atu i ai ni mafaufauga, ia pe na 'oe lea o se isi tautai i lenei foi taimi. O lea la ua e saunoa mai i lau 30, o le a faapea loa ona fai.

O le a ou tautala na o nisi mea ou te faitioina i le saunoaga a le Minisita o Tupe, atonu e maua i ai so outou finagalo po o le lagolagoina foi po o le le lagolagoina, o so o se mea lava. O faaupuga ia i totonu i lau matau e tai uiga tutusa lava. A alu alu lea faaulutala faasaga i lea matagaluega poo lea matagaluega, po o a foi ni ona faigata o i ai ma ni ona faaletonu ae iu ane lava mulimuli ua faapea se isi faaupuga, ae ui o lea, o lona uiga ua tau mai ai le faamoemoe i le iuga o lenei tausaga i le mea o le a maua. Ma ou te tau atu lava ma lou agaga sao, ou te faale-talitonu foi i ia mea pe a manatu atu i nisi o valoaga sa fausia muamua ua le taunuu. O nisi la ia o mea ua ou manatua e faatepa i ai lo outou mamalu ma le Fono i mea e mafua ai ona ou mafaufau i lea tulaga e pei o le fa'i.

Sa ou faitau i le lipoti o le fa'i ma le faasoo mai i lea tausaga ma lea tausaga, o se taimi ua lelei o se taimi ua masei, o se taimi ua faaletonu. Ma ua oo ifo mulimuli ona faapea lea, pe afai i sou finagalo o le a ou faitau atu le faaupuga lea e pei e ootia ai lou mafaufau i le lelei o fua ia o le a sau – faapea i le itualu e 4 o le faa-Samoa: “Ua foliga mai la, atonu o le a toe maua sina faaopoopoga o pusa fa'i o le a auina atu i Niu Sila i masina o lo o totoe o lenei tausaga.” E aliali mai i lou taofi le matagofie o le faaupuga lenei. Ae a ou mafaufau atu i ni mafuaaga e aumai e le lauga lenei o le a maua ai le taunuuga lea, e leai i lou a tagata toatasi, e leai, e leai lava. Ona faapea lea o lou manatu, atonu ua na o le alaga-upu foi lea na fai na maua ai le isi igoa-ipu o le atunuu nei e faapea, “Sei iloga o manu e faaifo mai lagi,” tulou, ona faatoa maua lea o le taunuuga lea ua folafola mai. Ma o le mea lea i lou lava agaga faa-usufono ou te manao i le mea moni. Ou te manao e pei lava ona masani ai le atunuu i ana sauniuniga po o ni fonotaga po o a ni mea e fai. Afai o le a le fuafuaga, ona faapea lea o se isi faitau: “aua o lea ua i lalo nei le 17,000 o le a tali i ai le tulaga lea ua faamoemoe mo le faaiuga o le tausaga.” O le mea tonu lea ou te manatu ai; ao saunoaga ia e pei ona ou fai atu ua alu alu a'i, ia o lena ua ou tau atu lava ma lou faaloalo e le i ai lou

Saunoga Faataupou a Sui Usufono 1976-1978

taofi ma ou te talitonu foi o le a le taunuu le mea lea. Ae ui lava o lea, e lafo atu i lau Afioga a le Palemia, lau Afioga foi i le alii Minisita o Tupe ma lo outou vasega, - saili fofo ane i tulaga o Sa o Samoa e pei ona tatou i ai i lenei vaitaimi.

O le a ou see mai i le mea lea o lo o taua faa-Samoa i le itulau e 3. O lo o taua e faapea, o ia ma aano o manu-fasi, o isi mea ia ua tatau ona faatau atu i fafo. Pei e faapea le agaga o i ai, ia auina atu e faatau atu i fafo e maua mai ai ni tupe. O lau fesili, e fapefea ona avatu a tatou i'a i fafo? E tui ea ni a tatou tau'i'a ave ai i o pe tuu apa, aua e leai se mea o i ai o saunia mo se tulaga faapea? E pau lava le tulaga lea ou te lagona pei sa ou faalogo i ai i aso ua mavae, o le tulaga e tuu apa i'a iinei. A tuu apa i'a iinei e le atunuu ina ua lava ma totoe, ona mafai lea ona alu i pusa apa vaeane le mamalu o le Fono ma le faafofoga a le atunuu. A o le tulaga lea e aumai ai ii, ia o lena ua ou fai atu. Ou te le o mautinoa po o le tulaga lea sa ou faapea a ave i'a i fafo ma aano o manu, ona e ave a tatou tau'i'a. O le mea la lea sa i ai lou taofi, ia muamua fausia se tatou fale'i'a pe afai o lea le finagalo maualuga i lau Afioga a le Palemia ma le mamalu o le Kapeneta. E faapea foi i aano o manu e pei ona taua ai. Afai o le a lava ma totoe mo le atunuu i totonu i se taimi, ae ua i ai foi o tatou fale e tuu apa ai ia nei mea uma, ona taunuu lea o le faamoemoe e tatou fale e tuu apa ai ia nisi mea uma, ona taunuu lea o le faamoemoe e pei ona i ai nei i lumamea.

O le isi mataupu ou te fia taua, o le Atiina A'e o itumalo ma nuu. A ou faitau, e ese ma le matagofie i lau faitau o mea ia pe a taunuu, e auala mai lea i le saunoaga a le Afioga i le alii Minisita o le Tupe, ona o ni fuafuaga mo le agai i luma aemaise o le manuia lumanai o le Malo o Samoa. Ae atonu na o ni faaupuga e faatepa i ai le mamalu o le Fono. O lea la ua tuu mai le atiina ae o itumalo ma nuu ona ou fesili lea: O le a tonu lava le mea e fai? Aua o lea a ou faitau atu e ave lea vaega tupe, tuu ane lea vaega tupe, fesoasoani mai fafo i lea vaega tupe mo lea lava itu; ae a tuu atu foi, o paipa, o auala, o moli-uila. Ona ou faapea lea i sou manatu, e faaleai nisi o faupaipa i tua i alaalfaga ma afioaga o nuu. O lona uiga e toe fau atu iinei. E fau atu iinei e le tatou Malo. Ma o le mea moni lena o lea e i lou agaga. Ua matua fano le tatou malo i galuega totino e mafai ona outou faia mo le manuia o le atunuu; ae aua nei tuu atua lea tulaga i tua i a matou, aua o lea ou te faalogo atu i le isi faitau o lo o i ai i totonu e faapea, e mafua mai i afioaga ma alaalfaga i mea e manao ai.

O le ala foi lea ua tofia ai la outou Komiti, le Komiti e faapea e fesilafai ma le atunuu, ina ia outou silafia ai mea moni o lo o vaivai ai le atunuu. E oo mai le fesili i lou mafaufau. O le mea ea ua outou le silafia mea ia e vaivai ai le atunuu, ua outou le silafia vaivaiga o le atunuu? Ma lou faaaloalo lava. O au faatoa ou oo mai i le Maota Fono lenei ae ua leva ona tumu au i mea o lea e vaivai ai le atunuu. O mea lava ia e taua pea i tausaga uma ma nofoaiga ua tuanai. O vaipaipa, o auala, o faatoaga, o moli-uila, o mea uma lava ia. Ma ou te fai atu o nei atiina ae uma o lo o tatou talanoaina nei e leai se mea fou. Tulou pe afai e sala le gagana, a o lou lava mafaufau ma lou iloa e leai se mea e fou o mea nei. O mea ua leva ona tautalagia. Pau lava le mea lea e lei fou o le lei faatinoina. Ana faatino, atonu ua leai nisi tulaga faigata ma le mafatia ia tatou.

O le upu moni foi, ou te talitonu o lo o silafia e lau Afioga a le Palemia tulou, ma le mamalu i alii Minisita, o outou o Sui ua leva i totonu o lenei Maota. Ua leva ona outou faafeagai ma faafitauli o le atunuu lenei, a o lenei ua toe fau komiti e toe o atu i tua e toe sue mai ai nisi mea e faaletonu. Ou te le talitonu i se fuafuaga faapea. Ou te lagona o lea tou te silafia. O nisi aso ua sau le uta loli. E tumu i eleele po o maa. E alu i fea? E alu e tanu ai le auala lea. O lo o ave e fai ai le auala a le afioaga le la. Alu atu se isi loli o le a? O le uta paipa. O le a? O le vai paipa o lea afioaga ma lea alaalfaga. E le faapea ou te fai atu ona e i ai sou manatu e faaleaga i nisi vaega ia o le atunuu ua latou maua lea manū taeao. Ae pau o le mea i lou taofi, e pine mea ia e i ai. O lea foi e silafia e le Kapeneta. O le mafuaaga lava lea e ala ai ona toe fai nei mea uma aua e le fai i luga lo outou silafia o le itu o le atunuu o vaivai, o fea le itu o faaletonu. O lea e faatino atu e outou la outou galuega. O le mea lena e lagona ai i lou lava taofi, o lea lava e fai ma lo outou fiafia o mea uma. A o le toe faatali i le tatou Komiti, tulou le mamalu o le atunuu, e leai. Ae o le tulaga lava i le silafia ma le tatou iloa e ao ina fai. O lea la ua fai atu lou agaga. Atonu o lena e lava ma totoe le tofa ia outou e fai ai ma faataunuu e pei ona outou mananao i nisi tulaga vaaia.

O tulaga i vai-paipa. O nei lava mea e pei ona ou fai atu o mea ua leva. O le isi faaupuga lea sa ou faitau ai mo le faaleleia atili o le suavai. E tupu mai i lou loto le fesili, afai o le a faaleleia atili le vai-paipa o lona uiga o le a e maua le suavai. A o le faaleleia atili e mafua ai ona toe fai; ae pei ona ou iloa e leai ni suavai i nisi paipa. O lo silafia e afioaga o lo o alaala atu Sui mamalu ma e faapea foi

Saunoga Faataupou a Sui Usufono 1976-1978

lenei itumalo. Ua na o atigi paipa tulou, a o se upu o se suavai mo le taumafa e le atunuu, e leai. Ia silasila, o le isi mea lea na ou tau ane ai e faapea, o le isi lea vaega tupe m le faaleleia o le suavai e tai e faasusu ai faatoaga. E tupu mai i lou agaga o lea o le a tai i faatoaga a e a faafefea le soifua o le atunuu? O le a le mea o le a taumafa e le atunuu? O lea lava la ou te avatu ai lou agaga faamaoni e lagolagosua atu i lau Afioga a le Palemia ma le Kapeneta ma le tatou nofoaiga i lenei tausaga. Afai o i ai ni mea e aoga e pei ona ou tautala atu tulou, aumai e fau ai le tatou Sa aua Samoa ma lona Malo; Samoa ma lona Malo ia manuia.

O le fale gaosi-meaa. Ua ou faitau atu i nisi o faaupuga ua faapea, ua leai ni mea e faigaluega ai tamaitai ma tupulaga o le atunuu. Ma o lo o taua ai i totonu se isi fuaitau e faapea, e pei ua mafuli atu le atunuu i aoaoga o le poto salalau a ua ama i tulaga o galuega i totonu o le atunuu. Ona ou manatu lea e pei a faatuatuanai se finagalo pe a i lea itu taua o le atiina ae o le tupulaga o le atunuu mo le poto lautele. Sa ou faitau i se isi pepa ua leva, ma ou maua ai se ulutala e faapea: “afai e manao le tamaoaiga i totonu o le tausaga e tasi toto le isi: afai e manao i le tamaoaiga e ao i tausaga e 20 ona toto lea o laau; ae afai e manao i le tamaoaiga e aoga pea i le 100 tausaga ona toto lea o tagata, tulou. O le uiga o ia mea, o le faatuatua ma le manuia o le soifua lea o le atunuu.

O le mea la lea ou te iloa, ia fai ni fale gaosi-meaa e faaoga i ai tupulaga. Ou te fesili atu lava i le aafia tonu i le mataupu lea. E fia ni tamaiti aoga a tatou i le tausaga e mafai ona faa-faigaluega i fale gaosi-meaa ia i le tausag ae tasi? Mata e ofi uma ai tamaiti nei? Leai. E faapea loa lou taofi ma lou manatu, e sili pe a aumai fale gaosi-meaa e gaosi ai oloa e aoga lelei mo le atunuu i lona manuia nai lo le aumai o fale gaosi-meaa e tau faaoga i ai tamaiti ua leai ni galuega. Aumai fale e fau ai taavale, tulou, ona uma ai lea o le taugata o taavale ia e aumai mai fafo. Ua ou vaai atu foi i ai o la ua i ai nisi fuafuaga i totoga o taavale ma mea faapena, faafetai. O le mea tonu lena i lou taofi e aoga i le atunuu, ae aua le aumaia se mea e tau ina faapea e pupuni ai le tulaga lea i tamaiti o le a iu ae leai ni galuega. Ou te fai atu e fiu i iu tamaiti ae leai lava se mea o na mea. E uma atu lenei nofoaiga tulou ae e lei oo mai lava se fale gaosi-meaa. O le mea la lea, ua ou tautala atu i ou mafaufauga ma lou faamoemoe tatou te felagolagomai. A sala uta ia tonu tai e pei o le upu a le atunuu.

O le isi mea ua ou manatu i ai o le tatou ofisa lea i Niu Sila. E tupu mai i lou mafaufau e a pe a toe

faataatia le finagalo ua i ai mo ni nai aso. Sa ou faitau atu, o le tele o le taga tupe ua alu i le atiina ae i totonu o le atunuu le tupe lea mai fafo. E a la pe a aumai tonu lena tupe ina ia atiina ae ai le atunuu ma lona manuia, e pei ona outou maau nei i ai nisi o Minisita, ma lo outou tau malaga i fafo e saili manu. A o le tulaga i lo tatou ofisa lenei, a ou fuafuaina i lou mafaufau e pei e lua mea ia e mafua ai ona faatu. Ona o le numera o tagata Samoa ua sili ile 30,000 faatasi ai ma le tulaga aloaia o le va i fafo po o le tatou faiga-uo ma Niu Sila. Ona pau ia o mea o lo o ou matauina o lo o mafua ai ona tau faatu le Ofisa lea. Ae a ou manatu i le atunuu ma le mafatiaga o lo o i ai, ia o lea lava tou te silafia ma tatou iloa. O le mea la lea ou te lagona lava i lou agaga toatasi, e sili pe a tatou toe faataatia lea tofa ua i ai ma lea finagalo ua maua e sau aso. Tatou muamua ia ia i tatou lava ina ia manuia ona faasolosolo atu ai lea i fafo.

Ia faatai la so matou leo, a o au ia fautuaga ma sou sao e avatu i le Maota o Samoa o lo o iloilo ai upufai mo le manuia auilima o le Malo o Samoa. Soifua.

Afioga IIGA SUAFOLE



Itumalo Faaalaalafaga:

Faasaleleaga Nu.4

Filifilia:

19 Aokuso 1976

Faatauto:

6 Novema 1976

Lauga Faataupou:

2 Tesema 1976

Sa i ai lo'u faamoemoe ou te le fia faaalua sou manatu i lenei itula ona ua puupuu lo tatou taimi. Ae o le a taumafai atu ia se mafaufau po o se fautuaga foi i le Malo e tusa ai foi ma le lauga faalauaitela a le alii Minisita o Tupe. E ui lava ina e le o faatasi mai, ia ma nisi foi Minisita o le Kapeneta, ae o le a taumafai atu pea ma faaali atu se manatu.

E ui lava ina e le o faatasi mai ma nisi foi Minisita o le Kapeneta, ae o le a taumafai atu pea ma faaali atu se manatu.

E muamua ona ou faafetai i lenei vaitaimi ona ua tuuina mai se avanoa ou te tautala ai. E ui lava foi ina faalua ona ou tauto i lenei Fono, ae ou te manatu o le manuia foilena o le a i ai ia te au – ma na o au lava le faipule o lenei usugafono ua tauto faalua. E ui lava ina e lei faaalua sou manatu i lea fonotaga muamua a lenei Palemene, ae ou te talitonu o lea

Saunoga Faataupou a Sui Usufono 1976-1978

lava faamanuiaga i lea tautoga o le a fesoasoani mai ia te au. Faafetai foi i le Afioga a le alii Palemia, aua tou te silafia lava e leai lava sau faafetai i ai i le Afioga a le alii Palemia. E ui ina ou palota i ai ae leai sau faafetai e mafai ona toe avanoa ona ou tuuina atu i ai, faapea foi ma le vaega o alii Kapeneta, i lo latou tomai foi i le vaega foi o le latou taimi ua tuanai atu ma galuega atiina ae. E ui foi ina faafitauli nisi vaega o le tou galuega le Afioga a le alii Palemia ma le Kapeneta, ae ua i ai lava le faamoemoe o o outou mama na. O le a talosia lava e le atunuu aemaise foi o lou nei foi usufono fou ia le tou galuega.

Faafetai foi i le avanoa le Afioga a le Sui Fofoga Fetalai ua tuuina mai ia te au, e mafai ai ona ou faaali atu sina manatu o lenei itumalo po o le itumalo foi o Faasaleleaga aua e le faapito lo'u nei manatu. Sa tofia i tatou e fai ma faipule o tatou itumalo e 'aua ne'i tatou galulue faapito pe tatou te faasino lava i o tatou itumalo, faapea foi alii Minisita o le Kapeneta ma le Afioga a le alii Palemia. Ia faalauaitele la tatou galuega i o outou finagalo ma o matou mafaufau aua se atiina ae manuia o le tatou atunuu.

I lenei lava itula ou te toe fia fesoasoani i se tautalaga po o se lauga foi faalauaitele a le Afioga foi a se tasi o sui o le matou itumalo, o le Afioga lea ia Unasa ona o itu tau laueleele. E moni lava e pei ona saunoa atu le Afioga a le alii faipule. O le itumalo lenei e aupito i sili ona itiiti o latou laueleele tau atiina ae. Ua le po foi se lilo i le Palemene faapea foi le mamalu o le atunuu o loo faafofoga mai, o le nuu lenei o Puapua o se tasi nei o nuu e aupito i sili ona tele ona laueleele i totonu o Faasaleleaga. Sa taua foi i totonu o le Palemene i se tasi lava vaitaimi, na o Puapua lava, amata mai ai loa iina ua uma eleele o Puapua, amata ai loa lea ona maua e le Esetete Tausi a le Malo i aso nei ia eleele ia tau Faasaleleaga. Sei silasila foi le mamalu o le Fono lau Afioga a le alii Palemia aemaise le Afioga a le alii Minisita mo Eleele po o faafofoga mai, o le tausaga e 1892 sa fai ai le Komiti lenei o Eleele o Faasaleleaga, le va o le Malo ma alii ma faipule o Faasaleleaga ma e faasinotonu le tetee lenei i le itumalo lenei o Safotulafai. Ona faapea ai lea o se iuga o le a toe totogi atu e alii ia e toalua ia ni tupe ina ia toe maua mai nisi vaega eleele o Faasaleleaga, e le na o Faasaleleaga foi o loo aofia ai aua o laina a nei tagata sa faapea latou te faatauina le eleele o Faasaleleaga e pau mai Matautu. Sa tetee ai foi Matautu, sa tetee Safotu sa tetee Saleaula, sa tetee lo matou itumalo i lenei mea. O le a le tali ma le faaiuga a le faamasinoga na fai atu? Masalo o le

tóatele foi o latou e iloa ia iuga faamasinoga, aso na o Siamani, aso na o le Komiti foi lea e taua o le Komiti e toatolu. Sa faapenei e na o le 2600 eka o le a mafai ona tuuina atu i ai i le mea o loo ua avea nei e le Malo. Ae sei tagai foi le mamalu o le Palemene ma le mamalu o le atunuu, ailoga na o le 2600 eka le mea lenei ua ave e le Malo.

Sa ou fia tautala lava i lau lauga a o iinei se tasi o alii faipule o le itumalo lenei, le Afioga lea ia Lilomaiava Niko, ae peitai o lenei o loo afio mai le Afioga lena ia Asi Eikeni. O le Afioga foi lena ia Asi Eikeni o loo ona silafia lelei lava le tuaoi aua o e e tutupu mai ai i Safotulafai, sa latou tau faatau le eleele lenei o Faasaleleaga. O lenei ou te faapea atu ai i lau Afioga Asi Eikeni, se fai sou 'ai i le itumalo, toe aumai eleele o Faasaleleaga latou, toe aumai eleele o Faasaleleaga matou te galulue ai. Ae peitai, o lau tautalaga lava i lenei vaitaimi e faasino tonu ae mulimulitai atu i saunoaga a le Afioga ia Unasa Ioane le alii faipule a lenei itumalo. Ia outou talia le Afioga i le Palemia ma Minisita o le Kapeneta lenei itumalo o Faasaleleaga. E toalua Minisita o le Faasaleleaga o loo i le Kapeneta a o lenei o loo fao ia eleele o lenei itumalo.

Ae le gata foi i lea o auala o lenei itumalo. Ua saunoa atu foi le Afioga ia Tofilau le Tootoolii le sui o lenei itumalo e leai, e moni. Ua aveave foi lenei fuata pau i Tuasivi, e pau i Puapua, e pau i Puapua le itumalo lenei o Faasaleleaga. Ia malie lava lau Afioga Letiu le alii Minisita mo Galuega, o le a ou tau atu pea se ma feiloaiga ma le Afioga a Letiu. O le maua lava feiloaiga e le faapea o au e fai ma sui o Faasaleleaga, ae ona o lou faanoanoa ona o le pefu tele, pefu lenei itumalo o Amoa i Sisifo i tausaga uma tausaga uma lava. Sa ma feiloai i le aso 21 o Me i le tausaga nei, pei e lei avea ea au ma faipule i lena vaitaimi. Sa ou faatagi ai i le afioga a le alii Minisita, pe malie pe a ae faaauau atu ia le ta o Faasaleleaga agai i Puapua. O le tali a le alii Minisita, o lenei auala e le o se auala autu po o se auala foi lea aloaia. Oi a faapefea! O fea la o i ai le ala aloaia o Faasaleleaga lea o agai i le Itu-o-Tane? O le tali a le alii Minisita o Vaiaata. Ou te faanoanoa lava. Na ou tu loa i luga ma ma faamavae ma le alii Minisita aua ou te vaai atu e le amanaia mai lou sui. Na ou faapea atu lea auē, se mala ina a paga ma le le amanaia o lenei itumalo o Amoa i Sisifo. Asi Eikeni, o lena e te faafofoga mai i lou itumalo, paga le mafatia o le itumalo o Amoa i Sisifo i le pefu o nei auala. Ia manatua, e muamua le auala lea i Amoa i Sisifo alu atu ai i le Lava, ua tatou taua nei o le Alatele e sosoo ma Samalaeulu ae mulimuli atu Vaiaata; a o lenei ua taua ia Vaiaata o le auala autu,

Saunoga Faataupou a Sui Usufono 1976-1978

ae le autu le mea o loo afifio ai le toatele o le atunuu. E leai ni tagata o loo nonofo i Vaiaata ae o loo i ai e o loo afifio i Amoa i Sisifo o loo latou faafeagai ma le pefu i aso uma aso uma o lenei olaga. Masalo na o Aopo ma Amoa i Sisifo itumalo a timu ua fiafia aua e leai se pefu. E maua vai i Aopo ae leai se pefu i Amoa i Sisifo aua foi ua timu. O lea ou te talosaga atu ai lava i lau Afioga le alii Minisita mo Galuega.

O le isi mataupu ou te fia talanoa i ai o le Vaipaipa o Faasaleleaga. E moni e i ai nisi itumalo atonu ua taumamafa i ni vaipaipa i fesoasoani a le Malo, a o lenei itumalo o Faasaleleaga e moni lava e patino foi lau tautalaga i le itumalo o Amoa i Sisifo. Letiu, a'o e Tamatoa e te lei matai, o lau matafaioi lea sa fai. Ana faapea ou te pule i lenei vaiaata ao e faasaga ma tali fita foi i le taumafaiga o lenei vaipaipa o Faasaleleaga, ana faapea ou te i ai pe ou te pule i lea itumalo o faaigoa lea vaipaipa o le vaipaipa o Tamatoa ma Faasaleleaga. Aua e a? Aua o lau galuega lea sa fai. Letiu na e amata. O le a le mea ua le au atu ai se paipa ia Lano, Asaga ma Puapua? Ua saunoga atu le Afioga lenei ia Unasa, o le 12.00 i le po e tau i le ao poo le le tau foi i le ao sa maua le suavai, ae le malosi foi le suavai. Sa talosagaina lo matou nuu o le afioga lea i le Minisita, lea o loo aafia uma i nei mea aua o lona finagalo sa mafai ai ona matou gaoioi i nei mea tau vaipaipa. O le Afioga lava foi a le Minisita sa galue ma sosoo paipa i lea galuega tele sa faasaga i ai Faasaleleaga ma le itumalo o Palauli. Sa talosagaina e le Afioga a le alii Minisita a o Minisita le Afioga ia Tupuola Efi i le Ofisa o Galuega. Masalo o le lima a'i lenei o Minisita e le o inu vai a le itumalo o Amoa i Sisifo, e le o taumafa i ni vai e oo mai i lenei vaiaata. Sa talosagaina se fesoasoani a Puapua ina ia sue le vai e tau o le vai o Puna, ona o le a. O le finagalo o le alii Minisita ma le susuga ia Letiu a o Tamatoa i lenei vaiaata ina ia taumafai mai lava se vai e ui mai Puapua i uta i Vaiaata, ona sau lea faafesootai le vaipaipa o Faasaleleaga aua e leai ni vaipaipa. E lei taumamafa lava lenei nuu i se mea e tau o se suavai mai Palauli, latou te lei sogisogi a latou i se mea o vai mai Palauli, aemaise lava o le itumalo lenei.

Ia e finagalo malie lava lau Afioga a le alii Minisita o le a ou faamatala pea. Sa matou o e sue lenei vai sa matou momoe i uta, e lua po lua ao o matou moe i uta i le sailiga o lenei vai, le vai foi lea e tau o le vai o Puna, ona o le a? O le naunau o le alii Minisita lea o loo i ai nei ma le Afioga ia Tupuola Efi ina ia mafai ona faafesootai mai le vai lenei e faafetaui ai le vai e alu atu i Palauli, ona inu lea o Puapua ma Lano ma Asaga.

Faafetaui i lau Afioga a le Fofoga Fetalai. I le aso ananafi masalo na gata lau tautalaga i le mataupu lea tau vaipaipa. A'o le'i amataina lau faamatalaga, e i ai sina mea ou te fia faasao e tusa ai o se tasi o mea tau laueleele na ou taua i le aso ananafi. Sa ou taua i le aso ananafi le tausaga na fai ai le Faamasinoga o Komisi ia e toatolu ma sui mai Malo e tolu o Peretania, Amerika ma Siamani, e tusa ai foi o le faatau a Pa'u ma Lauaki o elelee ia o Faasaleleaga. O le tausaga la na ou taua e faapea o le 1892. E toe faasao atu pe afai o tusitusia foi lea faamatalaga leai, o Tesema i le 1891 na fai ai lea faatauga.

O le Vaipaipa. Sa ou tau atu ni faafitauli i lenei itumalo e tusa i vaipaipa; ina ia malie foi le faafofoga mai a sui, afai lava ua ou faaali faapito atu i lo matou itumalo leai, o le a i ai lava le vaiaata o le a faasolosolo lemu atu ai i mataupu lautele e aafia ai le atunuu atoa. Ae fia faamuamua atu nai a matou mataupu ia o loo i ai faafitauli i ona po nei. O le vaipaipa sa tele foi ni au faamatalaga i le Afioga a le alii Minisita mo Galuega i le aso ananafi ma o nai fautuaga nei i le Afioga a le alii Palemia ma le Afioga i le Kapeneta i le vaipaipa o Faasaleleaga. Afai ua le malosi i le alu i lalo i le itumalo o Amoa, e a pe a fai se faatanoa i se mea maua i le ogatotonu o lea itumalo e fai ai nai faatanoa se lua pe tolu, e pamu atu i ai le vai i le itupo lea ua po ua le faaaogaina tele e le itumalo o Faasaleleaga lea e aupito i luga, ona faaoga atu ai lea o le vai lea agai i lalo i le itumalo o Amoa. Atonu o le a matou maua ai sina suavai mai i lo tatou vaipaipa. Na o ni nai fautuaga lava i le Afioga a le alii Minisita, a ua i lau Afioga le poto masani ma le tomai tele i lenei foi tomai i le faiga o vaipaipa faapea foi ma auala.

Sa ou le taua ananafi le mea e tau o le amo o le pologa i lenei mea o le amo o le vai, ai lava o le mea lea na taua i le Tusi Paia e faapea o le amo o le pologa a tama fafine o Isaraelu, lea la ua faataunuu mai i lo matou itumalo i lenei vaiaata. Ailoga ua amo e se isi o le Kapeneta se pakete vai po o ni pakete vai se lua? Ou te masalo ana outou faia lea mea a o outou iti, sei vaeatu lava sei tulou le upu to ia te au, semeamanu ai ua outou matua faasaga e fai lea vaipaipa, e le gata ia Faasaleleaga a o itumalo foi o lo tatou atunuu o ē e le oo i ai le suavai aua o le mea lava lea o loo fai nei o le amo lava o vai. Ou te faaupuina lea mea o le amo o le vai ma e oo mai lava i lenei vaiaata o loo amo lava le vai e le itumalo lea. O lea ou te talosaga atu ai ma le faamaulalo lava, ia alofa mai le Afioga a le Minisita mo Galuega faapea foi Minisita e toalua ia o loo i ai o lo matou itumalo, sei lagolago ane lo tatou vaipaipa.

Saunoga Faataupou a Sui Usufono 1976-1978

O manatu lava e tele e pei ona tuuina atu e le tele o le Maota ua faafofoga i ai lau Afioga a le Fofoga Fetalai faapea foi le Palemia ma le Afioga i le Kapeneta, e na ona fai atu lava o fautuaga ae tetele lava pesega ae matua lava i le \bar{o} , pei o lea upu faa-Samoa. Ou te fia tautala i lenei vaitaimi i le atiina ae foi lea ua taua nei o le atiina ae o itumalo ma nuu. O le a foi nisi atiina ae o itumalo ma nuu a o lea ua ave lenei atiina ae i le Ofisa o Faatoaga? Ou te manatua i ni aso ua mavae sa faatuina ai lenei foi mea sa tau o le Pulega o Itumalo ma Nu. Masalo pe sa tali tutusa lava ma le faaupuga lea ua i ai nei o le atiina ae o itumalo ma nuu sa taua o le pulega faa-Itumalo ma nuu. O le a le mea na tatou oo i ai? E tele foi se isi vaegatupe na alu ai i le tau faatuina ma le tau faavaeina o lea matagaluega sa taitai ai se tasi o alii faufautua, le sa faufautua i le tatou Fono Faavae e Professor Davidson ma le susuga ia Eti Stehlin, lea o loo fai nei ma o tatou sui i le fefaatauaiga i Niu Sila i Aukilani. O lea ou te faafesili atu ai i le Afioga a le alii Minisita o Tamaoaiga ma le Atiina Ae, pe tali tutusa ia faiga e lua, o le atiina ae o le tamaoaiga i itumalo ma nuu ma le pulega faa-Itumalo ma nuu? Ona pau lea o sina au fesili aua afai o le a tuuina mai se tali o le a mafai foi ona ou te malie o le a ou le toe tulai e fai se isi fesili; ae afai o le a le faamalieina au atonu lava o le a toe faia foi se isi fesili i lau Afioga.

O le atiina ae lenei o itumalo ma nuu, masalo pe o le tausaga lea o le Malo o Tamasese a o Minisita o Tupe le Afioga ia Aumua, malie lau Afioga Aumua sei tau atu pea la taotu feiloaiga. Sa faasalalau i le Samoa Taimi i le Gagana Peretania i le Malo o Tamasese i lea vaitaimi, a o le a latalata lava o le a fai le palota lea faitele; sa faasalalau ai e le Malo o Tamasese na o le faa-Peretania ae lei aveina i le faa-Samoa, le atiina ae e fia sefulu miliona ua aiaia mo le atiina ae o itumalo ma nuu; e fia miliona tala ua tuuina mo le atiina ae o Falemai, Faleaoga ma le atiina ae o vaipaipa. Sa fai loa la matou talosaga i le Afioga a le alii Minisita. Faafetai foi o loo afio mai i lenei taeao le sa avea ma Minisita o Tupe. Sa fai la matou talosaga i le afa miliona aua foi o lea ua matou vaavaai i le pepa lea o le Samoa taimi, o loo i ai fuafuaga lea i le fia miliona. Ona ou faapea lea i si o matou nuu aua foi ona pau lava lea o le mea o loo fiafia i ai le nuu i tua, o le manao e avatu le tupe e atiina ae ai lea mea ma lea mea. Sa matou talosaga ai loa i se $\frac{1}{2}$ miliona tala mo le atiina ae o manu. E oo mai lava i le taimi nei matou te lei faalogo lava pe ua tiai e le alii Minisita lea o loo i ai nei o le Tamaoaiga la matou talosaga, a o le a foi se fuafuaga ua fai i ai. Faamolemole matou te fia iloa

po o ia foi faiga i le Malo o Tamasese po o ni mea foi ia e tau o kamupani po o le a lava ni fuafuaga o i ai? Faamolemole matou te fia malamalama lava aua o loo matou nofo faatali e tele foi o matou eleele e aafia ai le fia afe eka e tau atiina ae ai ia atiina ae fai tele e i ai mea o atiina ae o manu, aano o manu fasi ma ni mea lava faapena. O lea ou te fia fesili atu lava i le Afioga a le alii Minisita po o le a le tulaga ua i ai la matou talosaga; a fai mai lava ua tiai matou te le ita, aua e ese foi fuafuaga a lena Malo ese le fuafuaga a le Malo o loo i ai nei.

O le a ou toe fia taua lava sina vaega laitiiti e tau ai le vai lea i le malaga a le Afioga a Aumua ma le Ofisa i le vaitaimi lea, sa aafia ai foi le sueina o le vai lea, ona o lo matou naunau ia i ai lava se suavai e sau mai Puapua e faafetaui ma le vai lea e alu atu i Palauli. O le a le mea na tupu? Na alu foi i ai le alii e igoa ia Card na faimalaga atu ma le alii Minisita o Aumua. O loo i ai nei i le Ofisa o Vaai Fetu le alii pei o se Siamani na matou o foi i uta ma faasino i ai le vai. O le matua fita tele, ae na o lava lo matou nuu ma saili lea vai ma na maua, sau ma le lipoti e le lava le vai. O le a le lipoti a le Afioga ia Letiu i le vaitaimi lea? E lava le vai ma e maua lona tulaga e malosai ai lona tafe ifo mai vai lea o Puna. E le o se mea tatou te popole vale ai lau Afioga a le Minisita o Tamaoaiga, leai. Na ona fai atu lava o nai faamatalaga ona o galuega sa fai e lo matou nuu ma lea itumalo ona o le fia inu. O galuega uma na e ui ina faigata vai i le auala i le sueina o vai, ae sa matou taumafai lava.

Ou te fia toe taua le mataupu tau eleele. Ua uma atu eleele o Faasaleleaga; masalo ua faafiafiaina foi le itumalo o Falealili i se iuga a le Komisi i eleele lea o loo nofoia ai i Tiafau. Sa ou vaai i ai i aso anamua ma masalo e le po foi se lilo i le mamalu o le Palemene, o lou olaga tele sa ou ola i le nuu lea. Sa matou ola i Mulinuu. O se tulga sa i ai, sa mamalu tele i le amataina o Fono a Faipule ma le omai o itumalo iinei, ai ona o itu o le faaitiitia tau le laveaiina o le tupe alu e uiga i na itu.

E le gata i lea, e i ai lava i lou lagona sa mamalu tele le Fale Fono tuai ona o itu na sa i ai le tofa loloto ma le faautaga loloto i e sa latou amataina le Faigamalo o le tatou atunuu. A o lenei la vaitaimi, peiseai e moni e le mamalu la tatou Fono e pei ona afio ai le mamalu o le Palemene faapea le Afioga a le Palemia ma le Kapeneta ma le Fofoga Fetalai. Ou te faapea atu ai, o ia tulaga mamalu sa i ai i lenei laueleele i aso ua mavae ua le o toe i ai i le vaitaimi lenei, ona o lea ua le o tutusa tagata o loo nofoia. E le o nofoia mai le Minisita mo Eleele ae ou te masalo o le a faafofoga mai i ai le Afioga a le alii

Saunoga Faataupou a Sui Usufono 1976-1978

Palemia. O le a le tulaga o le nofoia o lenei Malae Fono o le Atunuu? O lona uiga pe a faaupuina lau tautalaga, o le a ni tuutuuga o loo i ai nei i e o loo nofoia le Malo Fono lenei o Tiafau? Aua o aso anamua sa faapea na o ē e faigaluega i le Ofisa lea o Mataupu tau Samoa, a o lenei la ua soo se matagaluega lava o loo i ai i Apia, o loo ua nofoia lava e soo se tasi o alii Ofisa o ia matagaluega – ma ua le lilo foi i le faafofogaaga a le Palemene faapea le mamalu o le faafofoga a le atunuu le uluai taimi lava na maua ai le eleele lenei. Masalo e malamalama i ai le Afioga a le alii Palemia, e le o ni eleele o Samoa le eleele lenei. O le faafesuaiga ma alii o Tuamasaga e pei lava ona outou silafia – ma o lea e faaeteete tele ai lau tautala i lea mataupu ona o lou fia malamalama lava, po o a ni tuutuuga ma ni aiaiga o loo ua i ai nei le nofoia o le Malae Fono o Tiafau.

E pei lava ona ou faasilasila atu i le mamalu o le Fofoga Fetalai ma le mamalu o le Palemene, ua ou tautala faapito i lo'u itumalo; a o lenei taimi e tele lava nai mataupu ua ou fia tautala ai e tusa ai o le laueleele mo Vailele e pei lava ona outou silafia ua ave uma foi e le Malo po o le Esetete Tausi ia eleele e i ai ma Faleata. E leai sou pito i ia itumalo ae ou te vaai ma le faanoanoa aemaise le nuu lenei o Vailele. E lelei Letogo o loo tele ma umi agai i tua o latou eleele. A o le nuu lenei o Vailele ua leai se laueleele e galulue i ai. E i luma le sami e i le isi itu auala le toganiu o le Esetete Tausi. O lea lau Afioga a le alii Palemia ma le Afioga i le Minisita mo Eleele, sei alofa ane i ia itumalo e lua. O le itumalo lea o Vaimauga e patino lava i le nuu lea o Vailele ma le itumalo lea o Faleata.

Faafetai. E le lava foi ni au upu e avatu ai le faafetai i sui mamalu o le Palemene e tusa ai ma le faaauauina o lau tautalaga, aua e leai sou leo, e leai foi sou manatu e faaali pe ana faapea e tetee se tasi i le faaauauina o lau lauga. Ua oo mai nei la nai ou mafauauga ma nai au fautuaga i le sui o Samoa i Niu Sila. Ua faaagaaga nei le \$139,450 i le tausaga e faaalu i le tausiga, totogi ma mea uma lava o ia Ofisa i Niu Sila. Ou te le o iloa foi ma e le o faaali mai i le Tala o le Tupe se tupe maua a tatou o maua mai i ia Ofisa ua tatou faatuina i Niu Sila; masalo foi o le a tali mai le Afioga a le alii Palemia ma faapea mai, o le tatou va fealoai ma Niu Sila. Talofa ua taugata tele le tausiga o lo tatou va fealoai ma Niu Sila o loo i ai nei, e \$139,450 i le tausaga e taugata tele. E leai lava sou manatu na o le faufautua atu lava i le Afioga a le alii Palemia ma le Kapeneta, ia faifai totoa ia uma lo tatou tolu tausaga

ua i ai sa tatou galuega iloga tusa lava pe le uma ae ua faataatia mea ua tatou mafaia.

O le isi manatu na ou maua nei i le taeao e uiga i le malaga lea e alu nei e faapea, o le faaupuga o le alii Hai Komesina ma le Konesula. Aisea ua ave ai i Niu Sila ia faiga a o lea e tapuai le atunuu? E le lelei ea le omai o sui ma Taitai o a tatou Ekalesia ua tatou tapuai ai ma tuu o latou aao i luga o e o loo tofia e le Palemia ma le Kapeneta? E le lelei ea lea itu sei silasila uma foi i ai le atunuu po o ai Misipita, a o ai Vaimasanuu? Sei tagai muamua i ai ma faaee i ai lima o o tatou Taitai o a tatou Ekalesia ma faamanuia foi i ai le Palemene ma le Kapeneta. A o lenei avatu i o, tatou te le iloa pe tatou te masani uma lava aemaise le mamalu o le Palemene i e pe a o e fagogota e tapuaia. A tapuaia se faiva e manuia; a le tapuaia e a'e fua lava. O le a le mea ua vaai atu nei i ai ma le manatu faanoanoa; ua o fai i o faauuga ma alu atu ai le alii Minisita a o lenei e fai lauga faalauaitete a sui e tusa ai o lana lauga. O se mea e faanoanoa ai ae peitai, leai Tupuola Efi, ua tuu atu lava i lau faatautaia o le vaa o Samoa. Ua e tomai foi, po o a ni uiga ua matou laulau atua, o fautuaga lava i lau Afioga a le alii Palemia ma Kapeneta. E le gata foi lana silasila foi ua atoa lelei lava tulaga o Pule i totonu o le Fale Fono, ua atoa lelei foi tulaga o Tumua i totonu o le Fale Fono. Aisea ea na e le valaauina ai se isi o nei tulafale faa-Faleupolu e faatautaia ma ave lo tatou sui agai i Niu Sila? O tulaga ia sa ou manatu ai o le a liuliu i ai le tofa i lau Afioga a le Palemia ma le Kapeneta. E mamalu lava e o loo fai ma sui o lo tatou atunuu aemaise lava o loo i ai tulafale tomai ma le agavaa i totonu o lo tatou Palemene. O le upu e to ia te au, e le faapea ua ou le malie ia Toluono Lama, leai. O lou manatu lava e mamafa lava i sui o le atunuu ua filifilia e le atunuu o le Palemene lava lea. Tupuola Efi o ou mama na.

O nai manatu e avatu i fesootaiga ma Niu Sila e tusa ai o e ua sili o latou aso e nonofo ai i Niu Sila. E faapea se isi faamatalaga o loo tele lava ona saunoga i ai sui ona o le faigata lava leaga ua tatou saina i le feagaiga lea na saina i le 1962 o le va fealoaloi ma Niu Sila. Ou te manatu e le o mafua i lena ia le mea o loo faafinagalo i ai le Afioga a le alii Palemia. E lei amata iina le va fealoai ma le fealofani o Niu Sila ma Samoa, na amata ua leva. Sei tagai foi i le tausaga e 1945 i le amataga, na ofo mai ai e Niu Sila ni sikolasipi e avatu i le Malo o Samoa, e tovalu i latou ou te manatua. Sa fai lava se aiga tele iinei a le atunuu; matau mai o le aiga a le atunuu e sue tupe ai ina ia fesoasoani i le fesoasoani lea a Niu Sila i le sikolasipi. O loo alaala mai foi nisi

Saunoga Faataupou a Sui Usufono 1976-1978

sui o le Maota o e sa aafia ai i lea faiga faa-sikolasipi. E le gata i lena a o isi lava faiga faameaalofa a le Malo o Niu Sila a o le'i oo i le 1962; e tele lava. E mai lena lava aiga ma lena faafiafiaga a le atunuu sa aafia uma ai le atunuu o Upolu ma Savaii, Manono ma Apolima, sa maua ai se tupe tele lava a o pauni la tatou tupe i lena vaitaimi – ma sa teuina. E lei teuina i totonu o le teuga tupe a le Malo. Sa ou manatu sa teu lava i le Falemeli le teuga tupe lea ma e lua tusitupe, o le tusitupe o le faaaogaina o le tupe ma le tusitupe e tuu ai lava mo mea e finagalo i ai le atunuu. O e sa saina ai i lenei tupe, o le afioga i le Tama-a-Aiga ua tuumalo o Tupua Tamasese, Malietoa Tanumafili II ma lona tolu, le Afioga ia Fonoti Ioane ua tuumalo. Sa ou le fia taua ia suafa e lua ina ua maliliu ma tuumalo ae peitai o lou fia malamalama lava i le Afioga i le alii Palemia, po o fea o i ai lenei vaegatupe e \$1,945 mai i lenei lava tausaga? Atonu pe o loo leiloa i le Tala o le Tupe o ia tausaga ua mavae le faaaogaina, pe ua toe aumai i totonu o le teuga tupe fai tele a le atunuu lea o loo pulea nei e le Faletupe? O lau fesili malamalama lava lena i lau Afioga a le Palemia. O so o se tali lava e tuu mai ae ia ou malamalama lava.

O Lafoga a Faifeau. Malilie lava le Afioga i le Fono ma le Palemene sei fai atu lava nai manatu. Ua tele foi tausaga e le o faaalai ni manatu o lenei itumalo e tusa ai o ia mea. O le fautuaga a le alii Palemia i nei lafoga, tailo. Ana o ita o se isi o alii o loo galue i le Ofisa o Lafoga, e tete lava o ta lima pe a ta tago i ai i le tupe lea e aumai e teu aua foi o le tupe ua faapa'ia, o le tupe ua avatu ma le finagalo loto i ai ae e foai, ina ia tausaga e o loo faia le finagalo o le Atua i totonu o alaafaga uma. E le faapea na o se vaitaimi lenei ua tautalagia ai lenei lafoga, e tele tausaga i Faigamalo foi a lo tatou atunuu talu ai i le tausaga e 1894, masalo po o le masina o Ianuari sa i ai foi le vevesi faapenei ona o le lafoga foi lenei a le atunuu i le Malo o Malietoa Laupepa, na le malie ai lea o le isi vaega o Aana ma Atua. Sa taitai la e le Afioga ia Tupua Tamasese Lealofi III ia Aana ma Atua e faasagatau i le Malo o Malietoa Laupepa, ona o le le malilie i tupe o lafoga e lafo i le Malo. E le iloa e Samoa po o fea o alu i ai nei lafoga.

I le vaitaimi lea a o faaunuua ia Mataafa Iosefo i Sailusi ona o le taua foi lea o le Tu'iamanu. Ia o le atunuu foi i lea vaitaimi ma lea vaitaimi, a tutupu mea faapea o mea e tutupu i o latou soifuaga, ona faamau lea i pese pei o pese o taua e i ai le pese o le Taua Faitasi; e i ai le pese o le Taua Taumua-Fa lea sa i Vaiusu. Na manatu ai loa lea o se tasi fai pese tautaua e suafa ia Tolo mai le itumalo lea o Falelatai

e fatu le pese ona o le ita i faipule nei e i Mulinuu. O le faaupuga la o le pese a Tolo i Falelatai e faapea – “Aue musu e faalogo i lena tala fai mai pule ua alu ae, o loo ua moe aea le sami atonu ua toatamai. Aana mau au nofo, atonu e faatau popo ai tupe o le lafoga e faaputu atu ae gogolo”. O le isi fuaiupu o lenei pese e malie foi – “Oi, oi le tulafono e ua tagi ai si ou loto i le Malo faaloloto; Faipule fili o se tonu ae tatou taotooto sei logo o le Tumua, Aiga ma le nofo a too”. A o le fuaiupu mulimuli lenei ua matua toatamai ai le itumalo o Falelatai ma le atunuu fai ma e sa ‘au ia Tupua Tamasese Lealofi III. O le fuaiupu la lenei e faapea: “Faipule o i Mulinuu sei filifili a outou amio faalililo; Ua fiu Samoa o maini fai mai o lafoga fai soo, e maua ai a outou soasisi; e le o ni aga a Sufia a o aga a le povi a Misi”.

Faipule, le Afioga a le Palemia ma le Afioga i le Kapeneta, o le lafoga lava lea a Faifeau. E ui ina faapea e le logo lelei i la outou Afioga le tu'itu'i atu pea a sui o le Palemene, leai; o lena ua faaali atu o matou manao. Ua faaali atu mea o loo le malilie ai le atunuu. Tautuana ma oe le tatou vaa Tupuola Efi, ia fai ni ai ma ia tau lou Malo o le Malo o Tupuola Efi fai mea mafai.

O Saina Komunisi i Samoa. Atonu e leai se tupe e alu ai, atonu foi o le a afaina tapuaiga a le atunuu i le Atua. E tele foi mea ua vaai i ai i le pepa ma atonu foi o le a tali mai le Afioga ia Tupuola Efi. E i le tagata lava ia lona faatuatua ma e lei omai ia Saina po o ia foi atunuu tetele e suia lo tatou talitonuga i lo tatou Atua pei ona tusia i lo tatou Faavae – Faavae i le Atua. Ae ou te fautua atu i lau Afioga a le alii Palemia ma le Kapeneta, e lei faigofie ona fesootai i ni pepa. Atonu a fai mai Tupuola ma lou Malo ou te manao i lea, e tali atu leai, ae te le o tagai i ai i le tino aua le va fealoai lenei. A o lenei vaitaimi o lenei lava ua omai tatou te faafesagai ma sui o ia Malo. Ou te le faapea o le a afaina ai sou nei faatuatua i ai ina ia suia i ai i le faatuatua o lea Malo tele o le lalolagi, leai. E tupu ae lava le Samoa ia ma soifua mai i lana tapuaiga ma ou te manatu o le a le mafai ona suia – ma o lea ou te faaali atu ai, ua na o ni fautuaga lava. Le Afioga i le mamalu o le Palemene ma le Fofoga Fetalai ma lo tatou atunuu o loo faalogologo mai, leai. Afai lava o se faatuatua e le matua ona fausia, o le faatuatua lava lea o le a falala gofie agai i ia tapuaiga. Afai lava o le faatuatua ua mautu e soifua ai le Samoa i le faatuatua i le Atua e soifua, o lea lava o le a tatou i ai.

O le a toe agai lau faamatalaga i Moliuila. E lelei iinei i Upolu ua tali tofua lava, ua au i Faleolo,

Saunoga Faataupou a Sui Usufono 1976-1978

masalo foi o le a i ai se fuafuaga a le alii Minisita e faaau i lea faaitu i Sasae moliuila. Lau Afioga a le Minisita mo Galuega ma le Minisita mo Atiina Ae, sei oulua alolofa ane i se Moliuila o Faasaleleaga, atonu lava o loo i ai ni palaga masini, sei alolofa ane. Ou te talitonu foi o loo tele fesoasoani o loo aumai i fafo e le gata i masini a o le fesoasoani tau tupe mo loo tatou Malo. O lea ou te talosaga atu ai i se moliuila i Savaii, amata ia i le itumalo lea e aupito mai aua o lea e aupito mai i Apia ia Faasaleleaga ona faaauau ai lea i isi itumalo.

O le tatou Telefoni. E le o afio mai le Afioga a le Minisita e tauaveina lea matagaluega, ae ou te faafesili atu faamolemole, o lea o le a otometi nei telefoni a Apia nei po o Upolu, ae ou te masalo foi o le ituaiga lea o loo faaoga nei, masalo o le a faapea le Minisita e tiai ona tiai atu lea i Faasaleleaga. Faamolemole lau Afioga a le Minisita, po o le tiai atu i Faasaleleaga po o se mea fou, ae matou te mananao lava ia matou pei o le itumalo lea o Asau, manaia tele lea itumalo i mea o telefoni ua pei lava o loo i Apia i le faaogaina o telefoni i Asau. Ou te masalo o le malosi faaetise o loo maua i le Potelate, ae ou te mautinoa e mafai faamolemole lau Afioga Letiu ma Asi sa tatou Telefoni amata ia i Faasaleleaga ae tuu pea ia le Itu-o-Tane ma Salega e mamao ma Apia.

O le Popo ma le Koko. E faapena foi lou manatu i le Popo ma le Koko e pei ona saunoa ai se tasi sui o loo amo foi i ua o le atunuu. E lelei lava fai oloa e la'u i a latou taavale a o le vaitaimi nei o loo amo foi le popo ma le koko e isi e le o mafai ona latou faatauina ni taavale. O loo fautuaina foi le Afioga i le Palemia ma le Afioga a le Minisita o Tupe ma le Kapeneta i le siitaga o le Popo, aua o le Koko ua lelei i lenei vaitaimi; ae ou te manatu o loo faaopoopoina foi i se isi tupe alu a le faipopo ia le tau e aumai ai i totonu i Fale Popo ia e i Matautu o le Popo ma le Koko. E a ea Tupuola Efi ma lau Malo pe a faapea ane lau Afioga, o se Fale Popo o Savaii ia tu i Faasaleleaga, tainane na o le lua ni uamea e faalalava ma faatuina ai i Salelologa, ae ua tilotilo i ai Savaii o le Fale Popo lea o Savaii, e taofia ai le aumai iinei ma le tele o tupe e totogi e le fai popo agai i le falepopo lea i Matautu. Pei ona ou fautua atu lava i mea o loo manaomia e le atunuu ma ni mea e tataua ona fai i ona po nei mo le atunuu.

O le tatou Kamupani foi lea o le Potelate o loo i Asau. Lau Afioga a le alii Palemia, o le a ea se tulaga ua i ai nei le Kamupani? Na ou faalogo faapea o le masina o Iulai i le 1977 o le a tuua ai e lea Kamupani ia Samoa. E faanoanoa lou loto toatasi, e le faapea ona sa ou faigaluega ai, leai; ae

ona o lou manatu alofa lava i le atunuu. Sei silasila foi i Savaii, masalo e molimau faipule. E alu atu lava i Asau e tau lava i le Faasaleleaga ma le Itu-o-Tane e sili atu fale o loo fai i Savaii i loo fale o loo fai i le itumalo o Falealili. Ou te masalo o le mea faamaoni pe ana iinei le Afioga ia Te'o, masalo foi e faamaonia mai au e le Afioga ia Fuimaono, e moni ma sao lau faamatalaga. O le toatele foi o le atunuu o le mamalu o le Palemene ua taamilo ia Savaii ma vaaia ma tagai i ai i le lelei o nofoaga o loo ua nofoia nei ma afio ai le motu i Savaii, ona o le a? O le latalata ane i le Potelate. E le tele sa latou tupe alu i le felauaiga mai i vaa ma taavale e tusa ma le e fai lona Maota iinei i Upolu ma e o loo fai o latou Maota i Savaii. Ona i ai lea o lou mafaufau faapenei. Le Palemene lau Afioga a le Fofoga Fetalai, o le a ea le mea e le fai ai sa tatou sea ma se isi kamupani mai fafo e faatau lea kamupani? Aua talofa i le atunuu, e ui lava ina toeitiiti tutusa ma a tatou laupapa mai fafo a o le a toe mafatia foi le atunuu i le toe lauina atu o le laupapa lea mai fafo. O le mea moni lava lea i lou agaga lau Afioga a le Palemia ma le Kapeneta ma la tatou Palemene, na o sina ou manatu faufautua lava. O le a ea le mea tatou te le faatauina ai po o lava ni a tatou tupe. Ou te le o vaai foi i le Tala o le Tupe o loo i ai i se tupe faaagaaga mo lea faafitauli ae o le a o atu lava le Kamupani. Ua i ai foi ē e agavaa latou te galulue o alii mai fafo ma alii o loo ua pulea lelei ma latou iloa lelei le faavasegaina o laupapa i lea vasega ma lea vasega o loo i ai i Asau. Na ona tatou o atu lava faapea, galue e outou la tatou kamupani ae ia 'aue ne'i mafatia oe ma au o le e le maua tele se tupe. O le a lelei atu ai i lea kamupani pe afai e tuu mai i o tatou lima.

O le a sosoo ane ai ma le Malae Vaalele i Asau. E pei lava ona ou fai atu, e le faapito lau tautalaga i loo matou itumalo. Ua uma foi ia taimi sa ou tautala atu ai i le Afioga i le Minisita ma le Palemia e tusa ai o le atiina ae o le Faasaleleaga, a o lenei taimi o le Malae Vaalele lea e i Asau. Ou te vaai o se malae Vaalele lelei lava. O lenei foi o le a tuua e le Potelate Asau a o loo tulaga lelei le Malae Vaalele; vagana ai ua oo i aso e galua ai tuua ona tau iloa lea ua le lelei le auala i tai i le Malae Vaalele. Sa ou faalogo i se tasi o alii sa avea ma Minisita, sa faaagaaga le tasi tupe po o le \$10,000 i lea foi foi vaitaimi ua tuanai atu mo le faaleleia o mea o loo gata ai nei le malae agai mai i le matafaga i le mea lea e amata atu ai. Ou te fai atu ma lou faamaoni, atonu e mafai ona taunuu i ai ni vaalele o le DC3 aua a outou tagai i ai i lea Malae Vaalele, e lelei tele pe ana faataunuina fuafuaga foi a lea Malo ua

Saunoga Faataupou a Sui Usufono 1976-1978

tuanai, pe ana faapea e faaoga lelei lea \$10,000 e tanu ai lea avanoa ma uta i le matafaga. O lea ou te fautuaina faamolemole lau Afioga a le Palemia ma la outou Kapeneta, o outou lava, a outou fai mai leai, e leai; a outou fai mai ioe, ia ioe.

O lenei foi atunuu i le Uafu. Afai o le a tatou tuu lenei kamupani e alu a ua uma ona fausia a tatou uafu lea e i Asau na alu ai le fia afe ma afe o tupe a le atunuu, ae sa tagitagi atu lava le itumalo o Faasaleleaga i se Uafu tele e tu ai ae ua ave lava i Asau, o le a le mea ua tupu? E leai lava se isi mea na ala ai ona faavae le uafu lea i Asau, o le kamupani lava lenei a le Potelate. A o lenei la ua tago atu le Malo e faaloloto le ava e le mafai foi – ma e leai ni vaa tetele e ofi ai. E gata i le 21-23 futu le loloto o lenei ava. E le ofi i ai ni vaa tetele ma na o le Niuvakai lava se vaa ua ou vaai ua ofi i totonu o le taulaga lea i Asau. O lenei la o le a tuua e le Potelate ia Samoa ae o atu. O le a le mea o le a tupu i le uafu lea? E leai lava se mea o le a aoga i ai. O tupe e to i moana ia tupe na faaalu i nei uafu. Aisea ea e le toe liuliu ai le tofa ma le faautaga? O lenei ua tulai mai lau Afioga Tupuola. Ou te iloa e te le'i fiafia i le fautuina o lenei uafu; ou te iloa lelei lava e te le'i fiafia foi i le sainiina o le feagaiga ma le Potelate.

O lenei ua tulai mai lau Afioga Tupuola Efi, na o le faatagi atu lava a le pumate i le itumalo o Faasaleleaga o le a ea sou finagalo, pe le'i a'e ea le tofa ma le faautaga i lau Afioga ma le Kapeneta faapea foi le mamalu o le Palemene i sa tatou uafu tele i Salelologa. E le gata i le felata'i a o le lelei o le tulaga o loo i ai; e le gata i le loloto ae a outou faitau i le lipoti a le vaa lea o le HMS Lockland, lea na sau e suesueina le mea e fai ai le Uafu i Salelologa le nofoaga sa tataua ona fai ai le uafu tele e pei o le uafu i Asau – ma o lea o le a tagiūū ai le agaga e ui ina ua tuai, ua uma lea vaitaimi ma ua uma le uafu i Asau, ae toe tuitui atu lava po o le a se finagalo? E umi foi ia gaoioiga. E fia foi ni nonogatupe se fia afe ma afe e toe fai ai se isi uafu.

E leai sou manatu e toe fai i le tulaga lea e i ai tuu pea tulaga i vaa e i ai le Salamasina ma isi vaa laiti a'o o loo i ai le itu mai i Saute e ta'u o I'umea. O le mea tonu lea na fai ai le lipoti a le vaa Lockland i le tausaga e 1951 o loo ia te au foi le lipoti lenei. O le mea tonu lava lenei o loo manaia tele e fai ai se uafu i Salelologa e pei o le uafu lea e i Apia. E le o le mea o loo i ai nei aua e toe avatu le palolo toe aveese le oneone, a o le mea lea e tau o Iumea. Ou te fai atu lava a outou silasila i ai e na ona tui lava o le aau o loo i ai ona ofi lea o vaa tetele – ma o se faamatalaga sa'o ua maua faapea i aso la o taua, sa sulu mai foi iina nisi manuao Siamani i le mea lea

ua ou taua nei e latalata agai i Tafua. O fautuaga lava na i le Afioga a le alii Palemia i so tatou uafu.

O le aufaigaluega a le Malo. O le a ea le mea ua tele ai nei faamavaega mai Ulu o Matagaluega, e le gata i le Komesina o Lafoga a o le Faatonu Sili o le Falemai, ia na faamavae foi le Pule o le Malosi Faa-Eletise ae ou te faalogo i le Afioga a le alii Minisita ua toe foi mai. O le a ea le mea ua ala ai ona faamavae nei alii popoto? O le a toe alu atu foi se tasi e tau a'oa'o i faiga sa masani ai nei alii.

O le Matagaluega o Fanua ma Suafa. Sa i ai lava lou manatu a o faia le Fono Faavae e faapenei, se mea leaga o le laitiiti i aso na a'o usua le Fono Faavae. Sa i ai lou manatu faapenei, aisea ua tuu ai i totonu le Faamasinoga o Fanua ma Suafa; aua silasila foi o lenei ua fesuai e tusa ai lava foi o le mataupu lea tau suafa o matai. Ua faasalalau atu e lea matagaluega ma lea alii Minisita e fai suafa matai ae faatoa ofi faalavelave pe a uma saofai ma uma ona faasalalau i le Savali. E tonu ea lea mea? E tonu ea lea mea ma sao i lau Afioga a le alii Minisita, o le alu o tupe alu mea e tele, alu ietoga i le faiga o le saofai ae avatu le savali faasalalau atu ai ae ave i le faamasinoga, ua taofia le tagata lea ua fai le saofai. O le mea e oolo i le ua le lusi le tupe, e tiga. E faapena foi ona tiga ia te au aua tatou te oo uma lava i ai. O le a le mea e le toe oo ai i faiga tuai, toe fai pea le faiga tuai o le faalavelave i le taimi o le saofai ona uma ai lea ma taofia ai nisi mea e tele e alu i le saofai.

E le gata foi i lenei, o lou lava manatu sa tataua ona 'aua le faia lea matagaluega o le Faamasinoga o Fanua ma Suafa; aua o le a omai nei Famasino mai Savaii, Aleipata ma Falealili ma iloilo faamasinoga o isi itumalo, ae faavae lo latou malamalama i luga o tala. O nisi tala ou te fai atu e le faamaoni, ae moni foi nisi tala. Sa i ai la i lou mafaufau faapenei, aua le faia lea matagaluega o Faamasinoga o Fanua ma Suafa ae tuu pea le faamasinoga i lalo ifo o le Faamasinoga Maua i le Faavae, aveese le Faamasinoga o Fanua ma Suafa ae tuu pea i le pulega a alii ma faipule o nuu ma alaafaga ma itumalo latou te foia malie ni mea i totonu lava o lo latou nuu. Atonu o le a fai mai le Afioga a le alii Minisita sa fai foi faapena ae lei mafai; leai e lei faia faapena i na vaitaimi. Na faavae lava le faamasinoga lea aua ou te iloa i lou lava vaitaimi a o ou ola iinei i Mulinuu nei, sa fai lava lea. Masalo ou te faamaoni foi e le sao nisi faaiuga ae sao nisi faaiuga, ae le faapea o se faamasinoga sa ou i ai ua aafia ai i na faamatalaga ua ou fai atu. Ae o lau fautuaga lenei ma nai ou moomooga lava i le faiga o la tatou faavae. E a pe a toe tuu ese lea Ofisa 'aua le faia ae tuu pea i

Saunoga Faataupou a Sui Usufono 1976-1978

le aganuu. O le tatou faavae na faavae i le Atua, faavae i luga o le aganuu. O le a la le mea ua tatou tausisi ai i papalagi latou te omai e fai faaiuga o igoa matai ma eleele o lo tatou atunuu? O le tele o nisi eleele ua alu ona o faaiuga a alii papalagi; faaiuga ae e le o malamalama lelei i totonu o alaalfaga i totonu o lo tatou atunuu.

Masalo ua tele naua, lau Afioga a le Fofoga Fetalai, nai ou mafaufauga ma nai au faufautuaga foi i le Afioga a le alii Palemia ma le Afioga i le Kapeneta ma le mamalu o le Fono; ae i ai foi nai isi mafaufauga ae ou te manatu masalo ua lava lou taimi; ua toeititi atoa le itula ma le afa o ou tautala. Ona ou faapea atu ai lea lau Afioga a le Palemia ma le Afioga i le Kapeneta, o le Tala ia Gaiuli ma Gaisina, ma Tae o Tagaloa ma la latou malaga na alu. Na folau nei alii e toatolu o Gaiuli ma Gaisina o Tae o Tagaloa, na alu faatatau lava le folauga a nei alii i Fiti ma o le tapasa o la latou malaga sa tapasa e le fetu e igoa o le Amoga. O le tapasa lea sa faatautaia le malaga a Tae o Tagaloa, Gaiuli ma Gaisina, masalo o ia tagata o ni tagata Savaii foi.

Ua o le Tagaloa ona taunuu atu lea i Fiti o le faigamalaga, ona fai atu lea o Tagaloa i tama, “Sole, a tatou oo atu i le ava o loo i ai le tupua a Tuifiti, o le tupua a Tuifiti o le anae e oso. A faapea e oso mai le i’a i le vaiiliu o matau ma ua tumu ai le vaa, ona ufiufi lea o le vaa ina ia ‘aua ne’i toe oso mai i ai nisi anae. Ae afai e oso a’e le i’a i le vaiiliu i ama ua tumu ona toe ufiufi foi lea o le vaa. Na oo lea o lenei faigamalaga ua taunuu atu i le ava lea, ona faapea atu lea o Tae o Tagaloa ia Gaiuli ma Gaisina, ia sauniuni la lua alo i matau ma le lua alo i ama.

O lenei ua lata mai le ava tatou te ofi ai i totonu i Fiti pe a tatou fia oo atu i le nofoaga o Tuifiti; ae lei iloa e Tae o Tagaloa o loo i ai Tuifiti i le ava. Ona oo atu loa lea, ua oso ae ia i’a ua oso ae anae i le vaiiliu i matau, alo i matau tama, ufiufi; ae ua tumu lo latou vaa. Ua oso ae anae oso mai i le itu i ama ua alo i ama Gaiuli ma Gaisina ae tusi mai loa Tuifiti. O le tusi a Tuifiti e tusi tonu i tama ia e toalua ina ia ‘aua ne’i mafai ona ‘alo. O le tusi mai lena o Tuifiti i le itu i matau ae ‘alo loa tama; o le mea lea na le oti ai tama pe pa’u i le moana ae pa’u ai loa i lalo Tuifiti i le ava ma oti ai. Ona sao loa lea o le vaa i uta i Fiti ma le apoapoiga a Tae o Tagaloa i tama o Gaiuli ma Gaisina, o le a tatou nonofo nei, o le a i ai se vaitaimi lua te toe foi i Samoa.

E lei atoa le tolu tausaga ae toe vina ia tama o le a toe foi mai i Samoa. Ona fai atu loa lea o Tae-o-Tagaloa, ua lelei, o le a oulua o ma le ‘aulosoloso ma le lala ulu; ae tautuana ma oulua a oo atu i Samoa ‘aua le tataina lo outou vaa i le sami ae ia

toso lelei i le pau matu ona tata ai lea. Oo atu loa le folauga a nei tama, ua oo mai i le matafaga o Samoa. O le a le mea na tupu? E le’i usiusitai nei tama. Na tata loa lo la vaa. Ua tata i le sami ua vaelua le sami ma le matafaga ae tata ai. Ia manatua foi, ua tata uma ai ma anae ma le lala ulu ae galo ai i totonu o le vaa le ‘aulosoloso.

Ia o le tala e umi Tupuola ma le Afioga i le Kapeneta ma o le faaiuga lena o lau lauga. Ia tapasa lo outou vaa ma lo tatou sa i le amoga. O le a le amoga? A foi lo tatou Faavae, o le Faavae i le Atua. A tata o outou vaa, ‘aua le tataina i le sami ae ia tata i le pa’u matu ina ia maua mai uma a tatou faiga meaalofa, faaunegatupe aua lo tatou Malo, aua le mea e te tago i ai. O le vaitaimi nei e pei lava ona ou tau atu i lau tala, o le talafatai o Samoa e tele lava niu o tutupu i le matafaga. O le mea lea na faasaoina mai ai na o le ‘aulosoloso i lea faigamalaga.

O lau fautuaga lea Tupuola Efi ma le Kapeneta faapea foi lau Afioga a le Fofoga Fetalai ma le mamalu o le Palemene. O sina au fesoasoani ma sina au fautuaga poo lau lauga foi e tusa ai o le Tala o le Tupe ma le lauga faalauaitete foi a le alii Minisita o Tupe. Ia manuia lava la tatou Fono.

Afioga UNASA IOANE



Itumalo Faaalaalfaga:

Faasaleleaga Nu.3

Filifilia:

5 Mati 1976

Faatauto:

18 Mati 1976

Lauga Faataupou:

2 Tesema 1976

Lau Afioga i le Fofoga o le Fono, faafetai lava mo le avanoa. Ou te lagona e maua loa le tonu e leai se toe alo. Ou te manatu foi ua atoa i tagi le paia o le Maota pei foi o le fale na i Fogafua. O le a ou le faapopole le paia o le Maota pei foi o le fale na i Matautia ma lana maimoaga, nei sala se leo pe moomia se fautuaga a le sui fou. Ma le faaaloalo ua le faagaloina e lou tootoo le Malo na sei tuanai atu nei i lea tolu tausaga ua mavae, lea sa taitaiina e le afioga a le Tama Aiga. I le valaau paia a le Atua na mafua ai ona tuua le Malo, to mea masei ae pogisa Samoa i lea vaitaimi. Ona soloai ane lea i le nofoaiga le tasi Tama Aiga, le afioga Tupua Tamasese Lealofi IV, le sa na tauaveina ma na faaiuina. E fia momoli atu ai se faafetai ma se faamalo i lea pulega Malo matagofie ma e sa latou lagolagoina, tele lelei tele manu o Samoa na maua ai. O nisi foi o mea sa latou tapenapenaina ma

Saunoga Faataupou a Sui Usufono 1976-1978

fuafuaina ua faatino nei ma ua faatutumai e le Palemia ua filifili nei ma le Kapeneta. Ma le faaaloalo atonu ua tele ni mataupu ua aafia ma ua sau i Tootoalii ma tulaga i Faleupolu o lenei Maota, ae o le a le mafai foi ona tootoo ua uma atu, ona o le lava ma totoe o le aoga.

E muamua o le a ou tautala i mea tau auala. Lau afioga a le alii Palemia ma le mamalu o le Aiga Minisita, ua le po se lilo o le Sui lea e tautala e mai le itumalo o Faasaleleaga Nu.3. O lenei itumalo faa-faipule o loo i totonu o se itumalo o mavaega, lea o loo tausia e Safotulafai, ua ou taua nei ona o tulaga i mea taua auala. O le faataina o le auala o loo amata atu nei i Salelologa ae pau mai i Tuasivi, a o Tuasivi ma lona itu i Sisifo o loo taoto atu ai le itumalo lenei o Faasaleleaga Nu.3 o loo oi ma mafatia i le pefu, ma maua ai i nisi o faamai eseese ona o le le oo atu i ai o le faataina o auala, vae atu le Fono.

O se tasi vaega o le lava Matagaluega e aafia i lou leo, o mea ia tau taligalu. A silasila le mamalu o lau afioga ma alii o le Kapeneta, le paia foi o le Maota, o nei auala ua ou taua ma taligalu ua faalemanuia. O le alatele lenei e amata atu i Faga e oo i Saipipi sei paia foi le Faasaleleaga Nu.4 i Amoa i Sisifo, e aafia tele i nei ituaiga faafitauli. O le mea lea o loo i ai le va o le alatele o le Malo ma le taligalu e tau lua pe tolu futu le va ma le sami. E aafia tele la ia tagata feoai i le vaiti o le auala ma tulaga ia o le taligalu. Ua ou taua ua faafitauli ma le agaga e faatalosaga atu i le paia o le afioga i le alii Palemia ma le Kapeneta, sei fuafua se vaegatupe a lea Matagaluega po o le Malo foi e foia ai lenei faafitauli. O le pine o lau faamatalaga, o le tausaga na sei mavae atu nei i lona toe masina na i ai se afiafi na tupu ai se faalavelave i le taavale a le Ofisa o Galuega i Salelologa. O le mea na oo i ai ou te manatu po o le ave taavale e ona, na alu le taavale tei ua pau i le sami. O le tulaga la na i ai na tau faaola le avetaavale i le falemai. O faafitauli ia ua mafua ai ona taua lea vaega.

O le isi mataupu tau i le Matagaluega a le Ofisa o Galuega, o mea lava ia i vai paipa. I le vaiaso na sei mavae atu nei lau afioga a le alii Minisita o Galuega, sa faafofoga le atunuu i se talanoaga a se alii ofisa o lau Matagaluega ma le sui o le 2AP. Sa taua ai tulaga nei e faapea, o vaipaipa nei o itumalo o loo i lalo ifo o le tausiga a le Malo po o le Matagaluega lea e \$6 le laisene i le tausaga. Ae ou te manatu o lea e silafia e lenei Maota ma le atunuu le tulaga lea o loo i ai le vaipaipa i le talafatai i Apia nei, e \$3 pe \$4 i le tausaga le laisene. O lau fesili la ma le faaaloalo pe ua mafua i se a ona eseese? A o lenei foi vaipaipa o lou itumalo aemaise le Faasaleleaga

ma nisi nuu o Savaii, atonu foi ua aafia ma nisi itumalo o Upolu nei, o vai sa gaosia i le malosia o itumalo ma o latou tagata, tulou. Ona maea lea tuu atu i le Malo, o le tautua i le Malo ma ona tagata. O lea ou te faasilasila atu ai ma le faaaloalo e ala atu i le fautuaga se vaegatupe a lea Matagaluega sei foia ai lenei faigata, lea e feagai ma nei tagata o le atunuu aemaise lenei itumalo aoga i le Malo, o Faasaleleaga.

O le isi vaega ou te fia taua i lau tautalaga o mea tau le eleele o le Malo lea e i gauta o le Faasaleleaga. O le 1967 i se tasi o nofoaiga sa tuuina atu aloaia ai le talosaga a le itumalo lenei o Faasaleleaga Nu.3 i mea tau eleele, ae ou te manatu sa faapea foi i isi itumalo o Faasaleleaga Nu.3 i mea tau eleele, ae ou te manatu sa faapea foi i isi itumalo o Faasaleleaga. O lea la ua ou tuu atu ai le fesili ma le tumu o au i le agaga faaaloalo, ou te moomia ai se faamalamalama i se taimi o muamua. A o lenei foi itumalo poo lenei itumalo mavae, atonu ua i ai foi ma se talosaga faitele i lenei lava eleele o loo fai ma tuamaota o le Faasaleleaga ina ia tuu aloaia mai e le Malo e galue ai ma faatoaina e tagata o lenei itumalo aua le manuia o le Malo ma lona atiina ae. Na ona ou faapupula atu atonu ua sau i le tele o tootoo o le Fono, ae nuunuu atu pea i la outou laulau auro e iloilo ai.

O se tasi vaega e fia sau i lou leo o le tulaga lea i lafoga a le aufai lotu. O lenei foi tulaga ou te taofi ua lava ma totoe tootoo o le Fono na sei mua atu sa sau ai. Atonu e le o po se lilo i lenei Maota le silafia, o le aufai lotu ua le o ni tagata totino o nuu ma alalafaga. O tagata ua atu e aumau e fafagaina i upu faale-lagi le paia o le atunuu, ao lea ua tulai mai e pei o tagata faigaluega a le Malo. Ma le faaaloalo i le alii Palemia, atonu ae saunoa i le vaega lea o le a manino foi ma malamalama le atunuu ina nei ioe ma tatou sesea i i lea vaega.

O le tulaga tau le tauvaga o le popo lea o loo i ai nei e pei ona taua i le tele o nisi o tootoo i saunoaga ma fetalaiga. O lenei itumalo o Faasaleleaga Nu.3 o se itumalo tamaoaiga tele i le popo, ae a silasila ma faafofoga i le tulaga lea o loo i ai nei, e pito pau pauna popo a le Faasaleleaga Nu.3 lea e sau i le tauvaga lea ona o mafuaga nei. E le o manatu tele le itumalo lenei i le tauvaga lea, aua foi leaga o lea e i ai le isi taofi faapea o le au sali popo, tatou te fiu e galulue ae aumai foi fai e le au sifi, le au tipitipi foi lea e taua nei e le atunuu. Ae a pau a lea o lau fautuaga i lau afioga a le alii Minisita o le Atiina A'e poo le Minisita o Faatoaga, sii le tau o le popo. Avane le tupe e fai ai le tauvaga e faaopopo i ai ina ia tufatufa atu i le au sali popo. Atonu e le fautuaina

Saunoga Faataupou a Sui Usufono 1976-1978

lau tautalaga sei faataitai la ona faatino i se tolu masina – sii i le \$4 le fua mata ae pe \$6 le fua mago, talitonu i ai e tolu masina ua sili atu i luga le tulaga lea lua te manao i ai.

O le isi vaega lea o le a saua i lou leo ma le faaaloalo o tulaga ia tau le pulenuu pei ona silafia foi e le atunuu le Komiti lea sa taamilomilo atu e fia feiloai ma alalafaga taitasi e aumai ni o latou finagalo. Ia ou te tautala lava au i luga o le tulaga o le mea lea ou te iloa. O le tulaga lea na i ai le malaga a le Komiti, e faapea ia tasi le pulenuu i le nuu, pe tasi le pulenuu mai le 500 tagata i le afe, ao le totogi e \$600 i le tausaga faatasi ma alauni e \$200 i le tausaga. O lou itumalo lenei o Faasaleleaga Nu.3, a fuafua atu i le taimi lenei e lima ia pulenuu ia o loo i ai. O le aofai o tagata ia o loo soifua ma ola i lenei itumalo e sili atu i le 6,000. O nisi la nuu o lou itumalo atonu a faafofoga mai i lou leo, ona afaina lea faapea ai e faapito lou leo o le matou faipule i le nuu tonu lea o loo ou nofo ai. Ou te manatu e ioe lou taofi i le taofi o le Komiti lea ua i ai nei, e tasi le pulenuu i Saipipi, tasi le pulenuu i Saasaai, a o le nuu lenei o Faga ou te lagona o le nuu lea o loo sili atu pe 4,000 tagata o loo soifua ai ia tolu pulenuu. A o le tasi e pei ona finagalo i ai le Komiti po o le Malo, ou te manatu ua le mafaia e lenei tasi ona fuafuaina 4,000 tagata. O lea ou te fautuaina ai lau afioga i le alii Palemia ma le mamalu i le Malo, toe liliu ane le tofa. Atonu o a lava ni tulaga e i ai ni o matou manatu e faaali atu, ia e aumai lava iina la outou faaiuga.

O se tasi vaega o lau tautalaga o mea tau autalavou. Atonu e le umi foi sau tautalaga i ai. E i ai lou taofi i tulaga tau autalavou, o i e fofoa atu ai se teine po o se tama i lona tuputupu a'e. ae ua potu ma masani i lana aganuu. O lea la e aumai ai i le tulafono, tau Autalavou, Taaloga ma Aganuu ma ua ioe foi lou tootoo i le tuuina mai o lenei tulafono taua. Ia atonu o lea e saunua i se taimi mo sau faapupulaga i le Maota e manino ai mea uma o loo i ai.

O le isi lea vaega e pei ona ou faamalo atu o le tulaga lea tau N.P.F. I le motu i Savaii i le aufai N.P.F. lea o loo i ai nei, faiaoga ma leoleo ma tagata faigaluega faapena, o loo taia pea i lau faalogo le oi lea e i ai. Ia atonu ou te le auiliili atu foi pe ou te laulauina faamea-aano i le Maota a matou talatalanoaga ma nei tagata. Ae pau lava le mea o le tali na ou tuu i ai, o lea o le a ou alu ou te fesili i le alii Palemia ma le Malo a matou talatalanoaga ma nei tagata. Ae pau lava le mea o le tali na ou tuu i ai, o lea o le a ou alu atu ou te fesili i le alii Palemia ma le Malo e aumai se faamalamalama o lenei tulaga;

aua o le mea lea e i ai e faapea, ua fiu latou e o mai e nono ni a latou tupe i le N.P.F. e faigaluega ai i le Ofisa lea o loo mafai ni a latou nogatupe. Pau lava fautuaga i lana afioga, ana e finagalo i ai ou te le faatonu atu foi. Faavae se Komiti e iloiloaina le tulaga lea. Atonu e maua ai se ula leaga o auala mai ai ia faafitauli.

O le tasi vaega e fia saua i lou leo o mea tau Falemai, e le o lava lou iloa i le falemai tele i Motootua, pau lava le mea lea o le falemai lea o loo i Tuasivi ma lou faaaloalo ou te faapea atu ai, o se mea e tei ai lou mafaufau ma ou te taofi foi e te le o silafia aua o lea e te afio pea i lou ofisa. A o matou lea o loo i tua o loo fai i ai faiga a le vaega. Sa i ai se mai na ou sii mai ai le falemai ia Me i le tausaga nei lava. O le mai lea o se mai matua mafatia tele ma tigaina. Na ona taunuu mai lava o le mai i le falemai sau le teine fai le tui. Na ona sau lava o le fomai fai mai ua lelei o le a fai togafiti. Faatali ai lava alu le po ta le 12 e lei toe oo ane le fomai a o la e tigaina le mai. Na ou faatonuina lea le teine sa tausimai ai i le mai lea, ia logo le fomai fai mai ua lelei o le a fai le togafiti. Faatali ai lava alu pe po ta le 12 e lei toe oo ane le fomai i le mai lea, ia logo le fomai mo se pepa faamaoni e avatu ai le ma'i mai Tuasivi i Motootua. O le tali a le fomai na fai i le teine, e leai se togafiti e avatu fai i ai i Motootua. E pau lava le ituaiga togafiti i le mai lenei, na ona faafilemu ma aua le faaita.

O lau amiotonu. Ou sau lea ou toe alu i le teine tiute ma fai atu i le teine poo fea o i ai le Fomai, ae faapea mai, o la e malolo. Na ou fai i le teine ou te fia talanoa i le Fomai ona ua ou manao e ave lau mai i tua. Na alu le teine ma tau i le fomai sa aumai loa lana ioega e pule au pe ave i tua. Na ou sau loa lea aumai le mai lea, aumai lea tuu i tua i aso e lua ave loa i Motootua, ma ou te fia faailoa atu o le la ua toe soifua nei le mai. Ua ola ma malosia ma ou te manatu ana tuu i Tuasivi ia e faapenei ua faasalalau atu e Lavea. O lau afioga ma le faaaloalo sei e silasila totoa i lea vaega. Pau lea o si faafitauli o loo i ai i totonu o le falemai lea i Tuasivi. Le paia o le Maota ma le faaaloalo, atonu nei maua gata ni upu ou te faaliliuina ai, a o fale ia o loo faaaogaina e gasegase i totonu o lea falemai, o se mea e mafatia ai le mafaufau pe a vaai i ai. E tiga le mai vaivai ma poo le a se tulaga e i ai e savali lava. O tulaga foi i ia ituaiga fale faapea vae atu le Fono, e le o manuia ona e le o maua se vai. Pau la le vaega ou te tatalo atu ai ma lau amiotonu i le alii Minisita, sei silasila lava i ai.

Na saunua foi nisi tootoo i tulaga ua oo i ai fale i uafu i Salelologa ma Mulifanua. Ia ou te faapoopo

Saunoga Faataupou a Sui Usufono 1976-1978

atu i tootoo na sau a ai, o fale ia na amata mai i le tausaga po o le 1973 a o lenei e lei maea lava. O lau tau vaai i ai i amio a aufaigaluega ia e fai nei, vae atu le paia o le Maota, ou te iloa pe tali tatala faalua se laupapa i le aso atoa. I se isi faaupuga, o la lava e faifailemu a o le tupe a lo tatou Malo lea e alu, a o tatou foi o lea tatou te fia fai tupe i Malo mai fafo.

O le mataupu e uiga i tau o oloa e pei ona sau i le tele o tootoo, atonu e lavea ai foi ma ni oloa a le Malo i lea mea. O le tulaga lea tau i oloa, atonu e le lava lou malamalama ou te faapupulaina ai ae pau lava le mea ou te tautala ai, o matou lea i tua o loo faatietie i ai e le aufai-olua le avega mamafa ma o loo matou amioina nei. O le tau o le apa eleni lea e i ai o le .45sene i le apa e tasi. O lea ou te faitala atu i lea tulaga ma atonu e faafofoga mai le aufai-olua i Savaii, ia ailoga e toe fia sau faatau i se faleoloa. O lea ou te fautua atu ai i lau afioga a le Palemia ma le mamalu o le Kapeneta, ina ia outou silasila poo fea le Komiti e pulea ia tau o oloa na filifilia?

Ou te faafetai mo le avanoa. Ia mafuta mai le Aagaga Paia e faafoeina upu faalelagi na puipuia ai le Maota, e ala lea i le tatalo i le Atua sa tatou aufaatasi ai.


O le taimi nei, e i ai foi ni ou manatu sa totoe mai i le aso ananafi aemaise lava o tulaga tau le Matagaluega o Galuega. O lea la ua faateleina lou fiala e faaali lea tulaga sa totoe mai ona o lea faatoa ou vaai atu ua tala aao mai le afioga a le alii Minisita. I lou itumalo faa-faipule lenei o Faasaleleaga Nu.3 i le nuu lea o Saipipi, o loo i ai se vai e taua o le Mulifusi. Ua ou taua lenei vai ona o le vai e le o i totonu o le auala ae ou te manatu ua fai ma faafitauli i le feafioaiga o le atunuu i o latou taavale vae atu le Maota. O le vai lenei e le tafe, ae a oo ina tele timuga ona oo lea o le pa agai i le vai, ua le toe uia loa le auala lea o se taavale. E pau lava le mea e oo i ai e fai ma fesoasoani a tagata o lea nuu o lou itumalo i taavale po o e e feoai, o le faaoga lea o paopao poo vaaalo e feoai ai le atunuu i le sami i le agai i le isi ituvai i le isi ituvai. O le mea lea ua ou faasilasila atu ai ma le faaaloalo i lau afioga ou te fautuaina se vaegatupe e fuafua ai lea tulaga. Ou te manatu e le o se mea e taugata; ae pe a e faafinagaloina, ou te fautuaina se auala laupapa, ia po o se auala foi e faasima vae atu le paia o le Maota ma le faafofoga a le atunuu.

Pau lava lea o le manatu sa ou tau fuafuaina ou te tautala i ai ona o le taimi ua utiuti. O le aso ananafi na amata lau tautalaga i lau faamalo i le Malo tuai, lea sa tauaveina e Tama a Aiga. Ma o lenei foi taimi ou te manatu ia avea ia o nei minute o lau tautalaga e avatu ai sau faamalo i le Malo fou i lau afioga a le

alii Palemia ma le Kapeneta. I le masani a Samoa e faasau a latou pepe i le sau a Samoa i ia ona po. O le faasauga tama meamea la a le fanau a le alii o Laulumoeva, ua uma faasauga a tamaitai ona tago lea ua faafetolofi a latou tama i le mulivai o le vai sã i le itulagi. E faafofoga mai la le alii o Laulu, ua tagi atu le isi, ona faapea lea o le upu a le alii, "Suga teine ia, o le a le mea e tagi ai le teine lena? O le tamaitai lea na tagi, o ia lava lea na tali i le fesili, "O lau afioga Laulu, o le au tamaitai lea e toẽ i lau tagi, i le faatotolo atu ma tau pau o lau pepe ona o le ulu ina lapoa," Ona faapea lea o le upu a Laulu: "Ia ua lelei; a o ona tau, o lau tama, pei ona e tali o lau tama, ua mau pea nei; o le a sasaa ese lava i latou, a o le tamaitiiti lea sa oulua toẽ i ai o le a sasaa tonu ona sua aua le faleupolu o Samoa."

Ia Tupuola, sau laia o oe o le aumoana lea ua faatatau atu i ai lau tala. Ia Kapeneta lea ua e filifilia nei, alo laia i lo outou faiva. O a noã manu o a niã lelei, o a faigata, o a faafitauli ae e te silafia e manuia ai le atunuu, aumai i toonu; aumai e sasaa i le Maota o le atunuu. Ia o manu na; o manu e te tiu ai; o manu foi e te folau ai. O manu e te alu ma oe, o manu foi e te foi mai ma oe. Ia pupula lou tino, ia malamalama lau vaai, ia malosi lou tootoo, ia ta tagata lau laau. Lau afioga le Fofoga o le Fono, ia maua le tofa aua le faatautaiga o le Maota o le atunuu. Ia manuia le Fono.

Tofa FAAMATUAINU TALA MAILEI



Itumalo Faaalaalafaga:

Anoamaa Sasae

Filifilia:

26 Iulai 1976

Faatauto:

3 Aokuso 1976

Lauga Faataupou:

5 Aokuso 1976

O lau Afioga a le Fofoga Fetalai ma le mamalu o le Palemene. Ou te tu atu foi ma le faaaloalo e fia faaali ni nai manatu pe lua e fai ma sao o lenei itumalo i le fonotaga a le atunuu. Muamua ona ou faafetai atu i le avanoa ua tuuina mai, ae ou te faafetai ai foi i le matou itumalo, ona o so latou finagalo ua faaalua ina ia mafai ona ou oo mai e faaali atu se manatu, atonu pe fai ma fesoasoani faa-fautuaga i le Malo fou. Ma ou te faapai malu atu foi i lau Afioga a le Fofoga Fetalai ma le mamalu o le Palemia ma le Kapeneta ma le Maota Fono, pe afai foi e i ai nisi fautuaga o le a paopapa pe le lelei foi i la outou faafofogaaga. Ia ou

Saunoga Faataupou a Sui Usufono 1976-1978

te manatu lava o le a teu ane ai iina pe aoga pe leai, ae tau ina tuu atu pea.

E ui la ina tele saunoga ma fetalai, ae ona o le taua o le mataupu lenei, atonu foi e aoga pe a faamamafaina i sou manatu, o le mataupu e uiga i le Atiina A'e. Soo se taumafaiga o loo alo atu i ai lo tatou Malo ma le Palemene, soo se taumafaiga lava ou te manatu o atiina ae uma ia mea. Ae ua i ai atiina ae faapitoa, atiina ae o nuu ma itumalo, atiina ae o le Aualavou, Taaloga ma Aganuu, atiina ae o le toe fuafuaina o le tulaga o Pulenu. Soo se mea lava ua taumafai i ai le Malo, ua atiina ae uma lava mea. Ma o lea ou te manatu ai e tatau ona tatou sailiili poo a lava ni mea e ono mafai ona faatino ai ma tino mai ai soo se atiina ae o ia atiina ae.

Ou te faafetai ai i le Afioga a le Minisita o Tupe. E moni lava o au nei o se Sui fou ae ua lava ni nai itula sa faitau ai i le Lipoti manaia. A o loo taulai pea lou manatu i se itulau o lea lipoti i le malosi ma le tosina atu o le finagalo o le Malo mo le atiina ae o nuu ma itumalo ua fuafua i ai le tele o tupe, ma atonu e le gata ai i ia fuafuaga ae o le a faifaiepa, e tasi lava le mea ou te le o vaai ai i le Lipoti, e le o fuafuaina pe faapefea ona faatosina ia loto o tagata e galulue. Pau lea o le mea e le o lavea, ma le faaaloalo. Ua fuafua tupe fuafua auala, o a mea uma, ae le o lavea se tulaga pe faapefea ona faatosina finagalo o tagata faifaatoaga e fia galulue. Ia ma lou faaaloalo a o se upu e to ia te au e faafoliga i le tala masani, tulou le paia o lau Afioga ma le mamalu o le Fono, o le a saga taitai ea le solofanua i le vai, ae le fia inu? O nei fuafuaga ua leva ona i luma o le mamalu o le atunuu ma le Malo i fuafuaga tai tolu tausaga o le atiae o atiina ae. Ou te tau tomanatu pe ua tolu ea ni fuafuaga faapea o le tolu tausaga o le atiina ae ma le fia afe tala e alu ai. O lenei ua tatou i ai i lenei foi vaitaimi o le tolu tausaga o le atiina ae, ae poo a ni fua o aliali mai? Ia sa ou maua i se saunoga manaia a se tasi Sui e faapea, e talia le fua o koko mata, e talia aua ua fua koko mata. A faapefea la le atiina ae o koko. Ua manatu tele tagata e fua pea ina ia maua le tupe, pe mata pe le mata fua pea, ua manaia foi le tau o le koko.

O lea la ua i ai lava se manatu po ua i ai ni taumafaiga mo loto o tagata ma finagalo o tagata ia fai mea lelei, ia faamaoni, ia loto galue, ia loto atunuu. Tatou te fiu e fau auala, taotu te fiu e faata auala, ae a mumusu e galulue; a mumusu e faamaoni e le faamaoni, a paie e paie lava, ma le tino mai ai ia atiina ae. Ona tatou toe manatu foi lea ua uma atu lenei nofoaiga ae poo fea le anoano o tupe ua avatu. Ona ou manatu lea ma le faaaloalo lau Afioga a le Fofoga Fetalai ma le mamalu o le Malo ma le

Palemene, ona o ni manatu vaivai ae avatu faafautuaga i le Afioga a le Palemia ma le Kapeneta, o lou taofi soo se atiina ae, e tatau ona faafouina manatu o ē o loo atiae, ē o loo latou fuafuaina lea atina ae ma lea atiina ae.

Muamua la ona ou manatu faapea i Komiti o le Atiina Ae, aua o mea ua uma ona silafia e le Malo ma le Palemene i a tatou tai tolu tausaga o atiina ae ia ua tea atu. Sa tatou aumaia ai i fafo tagata atamamai faapitoa i ni totogi mauuluga, e pei o se alii e poto i mea tau tupe poo nisi lava matata, ona ua naunau lava ia lelei fautuaga, ia lelei ni mea e maua mai, ma ia aliali mai ni fua. O loo fautuaga la i lau Afioga a le Palemia ma le Kapeneta, toe fuatai lo outou finagalo. Ia maua i le finagalo fuataiina. Ua uma a tatou faiga palota ua tea ma nisi faaituau sa fai. Aua nei filifilia se Komiti e ala i luga o se fautuaga i tulaga na. E faapea o oe sa e fesoasoani mai i lau taumafaiga mo le tofi, poo oe lea sa e fesoasoani mai i lau taumafaiga mo le tofi, poo oe lea sa e taulamua i le mea lea sa ou loto i ai, lou totogi lena. Alu e saofai i le Komiti lena.

Lau Afioga ma le faaaloalo lava ou te faapea atu ai, ou te le lotovale i Sui mamalu o soo se Komiti. A ua avatu faafautuaga ona o le a? Ia na tatou maua i le saunoga a le Sui, o ai e fia faalogologo i se manatu o se tagata fautua i le faifaatoaga, ae leai sana faatoaga? O ai se tagata e fia faalogu ua faapea atu se fuatuaga, aveese ou koko ia, ae toto ai fai, a o lea e malamalama e leai sana togafai, leai se togakoko? A faapefea nei la ona fai? O lou manatu o iina lava e pei ona saunoga se tasi Sui mamalu, o ni teuteuga mo le lumanai e afua i le aoaoina o le fanau, aoao le fanau ia fiafia i le eleele, ia fiafia e galulue i le eleele. Peitai, atonu a faatino lea manatu poo le isi sefulu poo le sefululima tausaga o i lumanai, a o le tiami nei o le a la tatou mea o le a fai? Ia o lena ua ou fai at una o se fautuaga, tatou o tatau, tatou o totoa i soo se mea; aua o soo se mea lava i Malo e pei o le Malo o Samoa i Sisifo, ou te faaigoaina o le atiina ae.

O loo tatou o i ai i tausaga o le atiina ae. O lea la ou te fautua atu i lau Afioga a le Palemia ma le Kapeneta, tautuana ma a outou afioga le faatosinaina o manatu o tagata, ia fiafia e galulue, ia fiafia e atiina ae le eleele. I ia lava fautuaga ia tatou filifili tatau ai poo ai e ono aumai ai le fautuaga lelei ma le matagofie i le mamalu o le aufaifaatoaga. Ia ua taua foi gagana. Tasi lea mea, sei silasila ane i ai Minisita e pulea ia Matagaluega. Afai ua le iloa faa-Samoa i le faa-Samoa aloaia, Samoa faaaloalo lelei, saunoga ma fetalai lelei, fai ni aoga e aoao ai le gagana moni faa-Samoa e logo leleia ma taliagofie.

Saunoga Faataupou a Sui Usufono 1976-1978

O le mea e tatau ona fai pe afai lava ua tatou faasaga atu i le atiina ae ina ia manuia.

Se tasi itu e taua pea ma ua faalogoina pea, o o tatou eleele aemaise afioaga ma alaalfaga ua tua i eleele o loo pulea e le Esetete Tausi. O lou a manatu toatasi, fautua atu i le Malo pe lei alagataua ea ona faavae se Komisi e susesueina ia mea o eleele? E le gata foi i lea itu i le Esetete Tausi ae a faapefea isi ituaiga eleele o isi nuu ua toetiiti a maua uma e lotu ma Ekalesia? Ia tailo; ae pe lei alagataua ea ona sailiili maeaea, tuu mai se fautuaga tatou filifili faatasi i ai i le Maota nei? Ou te manatu foi lau Afioga a le Palemia ma le Kapeneta, o le fili lava o soo se mataupu tau atiae tatou te filifili i ai, ia o le upu e to ia te au o le tagata lava, o le tagata lava. Toe foi atu lou manatu i le tatou atiina ae. Ia o le a tau atu pea. O le aso na tatala ai lena Fono ma i le malologa o le 10:45 i le taeao, ae tufaava se tasi alii pei sa taitaifono i se Komiti e atiae ai ia nuu ma itumalo, i le tanoa ava a le Maota Fono. O le mea lea e mamafa lava i le manatu o le filifili tatau, filifili lelei, filifili i le agavaa, aua o iina tatou te manuia ai.

O ni upu faafautauga i le Minisita o Faamasinoga, Leoleo ma Falepuipui ma le Komisi o le aufaigaluega a le Malo. Ou te manatu e manaia le finagalo na faaalua e lau Afioga, e te fia maua faafitauli o loo tutupu i lea Matagaluega ma lea Matagaluega, ona e finagalo lea o soo se tasi lava e faigaluega i lea Matagaluega, ia faaoo atu i lau Afioga faafitauli uma ua na iloa, e aunoa ma le ui atu i le Faatonu Sili o lena Matagaluega. O le faaleleia o le aufaigaluega a le Malo, tasi lena atiina ae. O se atiina ae ua feagai pea ma i tatou i aso uma. Peitai ou te fautua atu ma le agaga faaaloalo atonu e sese le auala lea, aua afai e le iloa e se Faatonu Sili o se Matagaluega ni lipoti o ni faafitauli ua saunia e se tasi e maua ae ua faasao atu i le maua i le Afioga a le Minisita, o le a i lou finagalo se mea o le a tupu i le lotu o sea Faatonu Sili? O le a tupu mai ai se vevesi ma o le a felamatai le aufaigaluega. A faapefae la ia galuega a le Malo? A faapefea lo tatou atiina ae? O le a le atiina ae ia lelei ona fai o galuega a le Malo? O lea la ou te fautua atu ai i lau Afioga e sili ona tuu lea auala, aua e le o se auala e ono faaleleia atili ai le aufaigaluega a le Malo. A sailiili lau Afioga i Tulafono o loo tausii ai lena Matagaluega poo le aufaigaluega atoa a le Malo, ona e silafia ai lea e sese lea auala ona ua le ui i le tulafono. E fautua atu ai e lelei pe a tausisi pea i upu a le toaina matua o Paulo: A fia manumalo se atiina ae fai i luga o le tulafono.

O lena la taimi i le mamalu o lau Afioga a le Fofoga Fetalai, Palemia ma le Kapeneta, o lau uluai lauga lea ae ua uma ona saunoa atu i le mamalu o le Maota i le tele o mea sa i ai foi ia te au; a o lena taimi faafetai lava i lau Afioga mo le avanoa. Ou te faamanuia atu i le tatou Malo fou, le Afioga i le Palemia ma Minisita. O outou mama na. Ia manuia ma ia malie la outou tia; ia saga mai le lagi manu e tele i la outou nofoaiga. Soifua.

Tofa LAGAAIA FAAMAGA



Itumalo Faaalaalfaga:

Palauli

Filifilia:

5 Mati 1976

Faatauto:

18 Mati 1976

Lauga faataupou:

8 Aokuso 1976

Faafetai lava mo le avanoa i lau Afioga i le Fofoga o le Fono. Ua lagi ui ua lagi tutui ona o le taofi lava o le a le mafai ona popo ia paia. E muamua lava lau Afioga ou te fia tautala i le mataupu o Aoga a le Malo i nuu i tua. Ou te faatagisia le alii Minisita sei silasila totoa ane lava i tupe a aoga ia e i tua pe lelei ona fai se Tulafono e puipuia ai. Ona o enei ua maua i oa ua mama i taloa, a le mama i faiaoga ua mama foi i Komiti o Nuu poo faleaoga. O lea la ou te tatalo atu ai i le Minisita pe le lelei onafai se Tulafono e puipuilu ai lea vaega aua le oi o matua i le taumafaiga o alo ma fanau.

O lona lua, oute talosaga ma le faaaloalo i le Afioga i le Minisita o Aoga, pe le mafai se lala o le Ofisa o Aoga ona faatuina i Savaii ina ia faafaigofie ai le galuega i le Ofisa o Aoga. E faigata nei aso ma le taugata o le soifuga, lau Afioga ia malie le faafofogaaga i le Maota le Minisita o Aoga, o loo matou moomoo lava i le matou afi moli o le matou faleaoga. Ua lua nei tausaga talu ona tea mai i lo outou ofisa, a sue mai ae tali mai e leai e leai maea, O le mea lea ou te faailoa atu ai ma le ava ma le faaaloalo i lau Afioga, o loo manaomia le afi moli o le matou faleaoga, o le mea foi na alu ai a matou tupe.

Lau Afioga i le Palemia, ou te faafetai tele mo letofi Pulenuu ina ua tulai mai i se tulaga matagofie. Ou te le natia i le mamalu o le Fono, e le iloa foi pe tuu tutu atu iinei ae o atu foi fia pulenuu, ma o au foi ou te fia pulenuu pea lelei ona fai. O lea ou te faatagisia ia faia se Tulafono e faamamaluina ai le tofi Pulenuu ma le faaaloalo lava.

Saunoga Faataupou a Sui Usufono 1976-1978

Faafetai mo ala galue i le afioga i le Minisita mo Galuega. O lau fesili poo i ai ea se lola i Savaii, aua o matou nei auala e lei lolaina e lei maea foi e lei uma ona tanu. Ou te faapea ane o le vaiaso e tasi ua e filifilia mo auala, e lua ou auala e lei atoa le 5 aso, e tolu afa aso o loo i ai; ma a ou faitau i ai toe tasi le aso ma le afa aso. Ou te manao ia faauma ia aso pea e finagalo i ai.

Ou te talosaga ma le faaaloalo ona o vaipaipa. Ou te talosaga atu foi ona o le matou paipa sa tatou galulue ma matou tagi atu sei faamaea le tatougaluega. O lea la ou te toe faamanatu atu ina nei galo i lau Afioga ni nai ofe lava e le toe tele. O lena lava paipa sa tagi lava i lima o lenei itumalo, na o sina fesoasoani lava. Ou te talosaga atu foi ia alofa lau Afioga i le Minisita o le matou moli pe mafai ona e fesoasoani atu i le matou uaea, e le alofia i luma o le Fono lena itu, aua foi le faaleleia o itumalo ma nuu e pei ona outou taumafai i ai.

Lau Afioga i le Palemia ou te fia fesili atu lava ma le faaaloalo i le Taitaifono o le nofomau i totonu o le atunuu, poo faapefea ona fai? Afai e te fesili mai poo ua ou iloa nisi ua nofomau i totonu o le atunuu, masalo poo le a ou tali atu i ai i se taimi. Ou te fia malamalama pe faapefea ona fai? O alo ma fanau a Samoa o loo i Niu Sila afai foi o le a fia omai e muamua ona talosaga alo ma fanau, ao lau matau i ai poo ua ou lavea faalua foi i lena mea ou te tau atu, a ou tilotilo la i ai i le au nofomau o loo i ai nei o le ala lea o le fesili. Ma le faaaloalo lava ia tofia malie i ai a outou Afioga.

Lau Afioga i le Minisita o Falemai. Ou te tatalo atu ma le faaloalo sei ta le muafale o le matou falemai, masalo na o lo matou falemai e lei taina lumafale. Afai foi ua e le finagalo ane sei avatu sa matou fomai ae sei faamatagofie luma o le matou falemai. E nanati mai ea fomai i uta i Motootua o a? Leai, o au foi lenei sa ou i ai ua ou nofonofo vaeatu le Fono na iu lava ina ou toe sau ina ua ou vaai atu ua latalata le 12.

Ma le faaaloalo lava ou te talosaga atu i le Minisita o Autalavou, o le a ea se mea ua tulai mai i Autalavou, aua o matou foi ua fai autalavou?

Afioga LAMOSITELE SIO



Itumalo Faaalaalafaga:

Falealupo

Filifilia:

5 Mati 1976

Faatauto:

18 Mati 1976

Lauga Faataupou:

3 Aukuso 1976

Faafetai lava i lau Afioga a le Fofoga o le Fono. E muamua ona ou avatu le faafetai i le Afioga i le Minisita o Tupe ma Minisita faapea foi le Palemia i le lava sauni o le Tala Faaopoopo o le Tupe lea o loo i lumamea nei, aua o le gaogaosa o lea galuega e pei o manatu lava ma tauiviga mo le faafoeina mo se lelei o le atunuu i ana galuega fai. O lea la e avatu ai lau faafetai ma o le a i ai foi se taimi o le a auiliili ai lenei Tala Faatatau ona silafia lea e sui mamalu tulaga o gaioioiga o loo i ai i totonu o le Tala Faatatau o le Tupe. Ui i lea, e fia faaali se manatu i nisi vaega o loo aafia i tupe a le Malo.

O le mea muamua lava o auala. Lau Afioga atonu e fou lou silasila mai i lou tulai atu ae pei foi ona saunoa se tasi sui mamalu, e le fou la matou faalogo, e le fou foi mea matou te iloa. I le lima tausaga talu ai pe a, sa ou iloa ai na pasia e le Maota lenei se polokalame mo faaunegatupe e fausia ai auala. O le faasologa o lea polokalame e faapea: Apia i Mulifanua, Apia i Falefa, Mulifanua i Falelatai, Apia i Safata ia poo Apia i Leulumoega ma faasolo seia uma Upolu ona faatoa oo atu ai lea i Savaii. O le mea la lea ou te iloa nei, masalo pe tasi le tausaga na fausia ai le auala lea e sau i Apia i Mulifanua, a o lona lua o laasaga o le polokalame mo Apia i Falefa ua uma lelei nei le tolu tausaga, lenei ua savali le fa a o le galuega masalo pe faatoa tea mai le afa. O lona uiga, afai e alu alu lelei lava, o le fa i le lima tausaga ona uma lea o lona lua o laasaga o le polokalame i mea sa ou iloa. Afai la o le a alu ai pea i le fa tausaga, ia o le a liliu mai nei i Mulifanua i Falelatai mo se isi foi fa tausaga, ona toe liliu mai lea i Aleipata i Safata mo se isi foi fa tausaga, toe liliu atu i Apia i Leulumoega i tua, ia ai pe 10 tausaga. O lona uiga e oo mai lava i le gataaga e le i fausia auala o Savaii latou. O le mea ou te popole ai i lea itu ona o faaupuga lava sa fai e le Maota lenei i lata faalogo mai, faapea ona pau lava lea o le mea e sili ona taua i se atunuu i lona atiina ae o auala. A le lelei auala pe leai ni auala, e leai foi se atiina a'e e maua. O le mea la lea ua toe manatu ai i lenei taimi, e tatau ona toe faalogo atu i le Afioga a le Palemia

Saunoga Faataupou a Sui Usufono 1976-1978

fou ma le tulai mai, aua e leai se aoga o le taulagi o le atiina a'e pei foi ona i ai i isi atiina a'e lea e tau avatu i nuu ma itumalo, ae o le mea lava e tasi e leai ni auala e fai ai.

Lau Afioga, poo ai tonu le Minisita o loo faafoeina lenei mataupu. E i ai lava lou manatu ou te fia malamalama lava lou Sui i fuafuaga o le taimi nei, poo le a lona tulaga o le a i ai le lumanai o lenei atiina a'e, aua o le mea ou te iloa e mafua i le tuai. E pei e i ai se tulaga e aafia ai mea tau tupe. O le mea ou te fia iloa, poo aumai tupe sa faaagaaga mo faiga o auala nei, ae nofo le Malo poo le Ofisa o Tupe ma fai ai isi mea ae tuu galuega o auala? E mafua ona ou fai atu aua ua ou iloa lelei, e alu alu galuega ma tele tagata faigaluega ae te'i lava ua leai ni tagata faigaluega. Fesili atu pe aisea, ua leai ni tupe. Ona nofonofu foi lea i lona taimi, pe tai fia masina o nofonofu, ta vaai foi ua toe fai galuega a o le mea lava lea e fai ma auga o le leai o ni tupe. Atonu e i ai nisi taimi e tuuaia ai le aufaigaluega poo e pulea galuega ae pei o lona mea ua fai pea ma foia, a o le mea lava lea o le leai o se tupe, e leai se togafiti a le aufaigaluega. Sei silasila ifo lava le Malo i lea tulaga poo fea o fai i ai tupe e pasia nei i lafoga ma tupe mai fafo ma fesoasoani mai fafo mo le polokalame lenei o auala. Pe mata o le a se tulaga o tulai mai ai i lenei lava taimi? Ma le faaloalo i lau Afioga, e fia malamalama i ai i se taimi o lumanai.

O le isi mataupu lau Afioga, atonu e aoga foi i lou lava atugaluga o loo i ai le tulaga lava lenei i le upu lea ua masani ai pea ma oi le atunuu, o le leai o ni galuega ma nisi lava faafitauli. E i ai la si ou manatu vaivai, o se tasi o mataupu e foia ai ia faaupuga, o le koko ma le popo. O lou lava manatu, o le tele lava o le gaogaosa o isi tamaoiga lea ua tau atiae nei, ua na o ni mea faaopoopo. Ae ou te talitonu lava mai le amataga i aso o Siamani, na pau lava ia o fasi auro o le Malo o Samoa na o le lua, o le koko ma le popo. E leai ma se isi mea i ona tala atu. O taumafaiga ia e taumafai nei i isi atiina a'e pei o le fai, o a uma lava fualaau nini, o a uma ma nisi mea, o mea e faaopoopo a o le popo lava ma le koko ona pau lava ia o tamaoiga e ala ai ona maua se tupe mai fafo o Samoa. A o le tulaga lea ua i ai, i le matau atu i le amata mai i le mea lenei, o le alu i lalo alu i luga o le tau, e moni o le tau e pulea mai fafo, ae mafai lava e le Malo o Samoa ona pulea e latou se lotu tau.

Ou te faatusaina le mea lenei i aiga foi nei e nonofu i Apia e toatolu tagata faigaluega e ola ai. Ona te'i lea ua le faigaluega le isi ua tea ma lana galuega, ona faapea lea o le tala a le olomatua, "Sole, sei faifai lelei a tatou mea; ua tea foi lea tama ma lana galuega." E le pine foi, ae toe tea ma le isi,

faapea loa le tala a le olomatua: "Sole, se o le mala le mea! Ua na o le toatasi lenei tagata faigaluega, pe faapefea nei? E le ola tatou i lenei totogi e tasi." E faapea lava la mea e tutupu i le koko ma le popo. A alu alu i luga, pa'u: Faapea le olomatua: "Oi se fai faalelei. Ua pa'u foi le tau o le popo." Ua pa'u tele i lalo, toe faapea le olomatua: Se ua mala tatou, o le a le mea o le a mafai atu nei i ai, o lona ua leaga le tau o le popo."

O tulaga faapea, pe i ai se togafiti a le Malo ina ia foia lea tulaga o le alu i luga ma alu i lalo? O lou la manatu, e ui lava ina vaivai ae faaali atu pea, ia taumafai le Malo ina ia faamalositia le tupe faaleoleo pei ona sa sau ai. E le mafai ona faaleleia le tau pe a pa'u ona e laititi le tupe faaleoleo. Afai o pai atu le tupe faaleoleo i le \$2miliona, e le mafai ona toe eseese mamao le tau.

O le tasi la fautuaga i le tau, e pei o le faiga o le koko i taimi lata mai nei. Poo le a lava le tau e i ai nei, ae afai e amata mai i le 25sene i le 30sene i le pauna, o si tau lea pei e manaomia e tagata e tusa ai ma le tau o le soifuaga i lenei taimi. Afai la e toe sii i le 34sene, aua la le avea i ai le 4sene ae sau le 4sene lea i le tupe faaleoleo ina ia vave ona tupu le tupe faaleoleo ia pa'u i le miliona poo le sili atu. O a lava faaleleiga o le tau e sau i fafo, ae fuafua lava e le Malo i le tau e manaomia e tagata. E faapena foi la i le tau o le popo. O le tulaga lea ua i ai nei le popo, o le matua le taulia lava. O le tauvaga foi lea e fai, e le manaomia tele e le atunuu. E tasi lava le tauvaga sili, o le lelei o le tau, ona mautinoa loa lea ua alu uma popo i fafo. A faapea e mafai ona toe faatulai mai e le Malo se vaegatupe e faalelei ai le tau o le popo ina ia oo atu i le 6, 7, poo le 8sene i le pauna ma faatumau ai faapena i sina taimi poo ni nai tausaga, o lona uiga e mautinoa lava le auina atu i fafo o popo uma a le atunuu.

O mea la ia o le a mafai ona tutupu mai. Muamua, o le a le toe tuua se togakoko e tagata faifaatoaga laiti pe afai e mautinoa o le tausaga lea o le a sau nei e toe fua ai ana koko i le 25 poo le 30sene i le pauna. O le uiga o lau tala, o le a le gata ina teu pea laau o i ai, ae o le a mafai foi ona toe faateleina. O le a le toe lalau le popo pe a alu ai pea le tau lea e manaomia e tagata. O lona uiga o le a alu uma lava popo i fafo i taimi uma lava.

O le lē faigaluega o le a le afaina lea, aua o lau faaupuga i le tele o tupe pe a lelei le tau o le popo ma le koko, tusa lava pe toalusefulu le aiga, o le latou tupe maua lava lona mai le popo ma le koko e aai ai ma ola fiafia ai. E le faapea seiloga e omai i Apia e sue ni galuega. Pe toafia lava ni tagata o lona aiga, ae a tumau lava le tau o le popo ma le koko i le

Saunoga Faataupou a Sui Usufono 1976-1978

lelei, o le a lelei mea uma. E ala ona tau ua matua oi le atunuu ona ua leaga le tau o le popo. O le mafatiaga i le lē faigaluega pe a fai suesuega a Samoa o nuu i tua e mafua ai, a o iinei i Apia na o si vaega laitiiti lava lea e i ai. A tuu atu la i ai a latou galuega nei, ia e le toe oia na itu. O le tulaga i falefaigaluega, e le taitai omai Savaii e faigaluega vagana ai ni tagata lava i Apia nei, a o le mea lea e taumafai atu i lou manatu ia aafia uma le atunuu.

O lona fa, o fua o le laueleele e lauina atu pei o le koko ma le popo, o le a tumau pea i le faaeaea pea i luga lona laasaga e lau atu ai i fafo. E le toe i ai se fuafuaga e faigata i alii Minisita o loo faafoeina ia itu, aua o lona uiga, o le a tumau ona alu pea le gasologa o le auina atu i fafo o popo ma koko. O lona lima, o le a tumau foi le fuafuaga o tupe maua i fafo i le atunuu. O le a sololelei lava i tausaga uma i se fuafuaga mautu; ae le pei o le mea lea e i ai nei, pei ona ou taua muamua e uso i luga oso i lalo, tei lava lea ua faaitiitia vaegatupe e tusi ai oloa a pisinisi ona ua leai ni tupe faaleoleo i fafo aua ua pau le tau i maketi i fafo ma ua leai ni mea e toe tuina atu. O le popo lava ma le koko le mafuaaga o ia faafitauli uma i tupe faaleoleo i atunuu i fafo.

O se tasi o mataupu o le tulaga lea i le Ofisa o Femalagaaiga ma mea tau femalagaaiga. E i ai lava lou manatu pe afai e tusa ai ma le finagalo o le Palemia o loo ona faafoeina lea Matagaluega, pe mata e lei oo i le taimi e tatau ai ona faatu se lala o le Ofisa lea i Savaii, ona e i ai ni mafuaaga e matua tatau ai sea fuafuaga. O loo tatou faalogo pea i le taloina o tagata o le atunuu e malaga mai i le Ofisa lea o Femalagaaiga. O nisi e malaga mai lava i Asau i Apia, ae na o le faatumuga lava o pepa talosaga, o se mea faigofie e mafai ona fai e soo se isi i Savaii. A na faapea e malaga ifo i Tuasivi e faatumu le talosaga e le tigaina le Savaii, aua e tasi lava le malaga e tatau ona sau ai i Apia, na o le sau i le Ofisa o Niu Sila, aua e le mafai ona tatou faia se Ofisa o Niu Sila i Savaii. A o mea uma nei e talo atu ai, e i ai foi ma le alu i le falemai e fai ai isi pepa, ia o la foi e i ai falemai i Savaii. Poo le a la le mea e le mafai ai ona fai i Savaii ia mea, aua o lea ou te iloa ua atia'e uma le tele o Matagaluega tetele i Savaii. O le a le mea e omai ai fua Savaii e fai a latou lipoti iinei ae le faaoga Tuasivi e fai ai ia feuaiga uma o pepa mo femalagaaiga i fafo.

Lau Afioga, ou te fia tautala ma avatu le faafetai i le Afioga a le Palemia e uiga i fuafuaga e tusa ma le sainia o le "Feagaiga" ma Rusia. O sea ituaiga feagaiga e tatau lava i soo se Malo ona latou faia. Ou te iloa foi o loo tele nisi Malo e pei o Niu Sila ma Ausetalia ua uma foi ona sainia ia feagaiga ma

Rusia. Ou te lagona e tatau ona i ai ituaiga feagaiga faapenei e i ai mea e aoga ai ia Samoa ma mea e le aoga. Mo se faataitaiga; o ni mea o le a toe faia e Rusia ae aafia ai Samoa poo le Pasefika, o iina la o le a mafai ona tuuina atu ai le talosaga a Samoa i luga o le feagaiga lea. Ae ou te manatu lava au o se upu i se fesoasoani a Rusia ia Samoa atonu e leai se lelei o i ai. E pei e i ai lou mafaufau i le upu foi lea e masani ai le atunuu: "E oso-a-paga". Ia pe o le isi foi upu lena: "A uo le le gaoi ma le gaoi e iu lava ina gaoi." O ituaiga mea ia ou te popole au i ai aua o la foi e fai e Niu Sila ma Ausetalia ae leai se fesoasoani e tasi o fesili atu ai na Malo ia Rusia. Na pau lava lea o le mea, e faaleoleo le feagaiga mo tulaga tau aloaia o le Malo i le Malo, a o se upu i tulaga faapena e mumusu tele ai nisi Malo.


E le gata foi i lea, o le uiga o lea upu e oso-a-paga i lou manatu, e le taitai paga tatou ma Rusia. E eseese a tatou faautautaga e eseese faigamalo. O le tatou Malo o le saolotoga a o le Malo o Rusia ia o le Malo Komunisi. E pei lava la e talafeagai lava o tatou manaoga e avatu tonu i Malo e tutusa a tatou faiga, ae le talafeagai i lou manatu i nisi Malo.

O le tasi o mataupu ou te fia tautala i ai o a tatou femalagaaiga foi ia i le va o Savaii ma Upolu. O lea foi tulaga ua matua leaga tele i lenei taimi. Po o le a le silasila i ai a le alii Minisita o loo ona faafoeina foi lea mataupu ona ua toeitiiti ato le lua itula o alu le vaa lea pe a alu i Savaii i nei aso. I le ma le isi, o le tulaga o loo i ai le faimalaga atu lea i Savaii pe a e fia alu ma sau taavale. O se matua faiga le mafaufau o loo fai ai nei i le ofisa. I le tausaga nei lava na ou malaga ai i Savaii, e 19 itula na ou faatalitali ai i luga o le uafu ona faatoa ou alu ai lea i Savaii. E mafua mai ona e le manao le ofisa lea e tusi pasese ma totogi i le ofisa. O le manao o le ofisa e o lava i o e faatalitali ai, ae a le maua le avanoa ia ona e toe foi mai lea a ua gau au penisini ma lou taimi. E tusa la e 19 itula na ou faatalitali ai ma faatoa maua ai le avanoa ma ou alu loa. E pei la ou te manatu, o atunuu uma i fafo o le lalolagi e agaigai i luma le mea lea e igoa o le auaunaga i tagata aua le lelei mo tagata, a o le atunuu lenei ma lona faiga e agai i tua. E pei ua toe foi i aso anamua le faiga lea e fai ai nei.

Sa ou talanoa foi i le alii pule o le vaa ae aliali mai i le finagalo o le alii, e fia faamalieina e ia lona manao ma tagata faigaluega, ae na te le o fia faamalieina le lelei o le atunuu. Na ona fautua atu i lau Afioga a le Minisita o loo feagai ma lea itu, sei e toe silasila ane lava i ai. Ona gata ai lea o se matou manatu.

Saunoga Faataupou a Sui Usufono 1976-1978

Afioga LEAUPEPETELE TAOIPU

**Itumalo Faaalaalafaga:**

Aana Alofi Nu.1

Filifilia:

5 Mati 1976

Faatauto:

18 Mati 1976

Lauga Faataupou:

5 Aukuso 1976

Lau Afioga i le Fofoga Fetalai faapea foi le mamalu o le Palemene, faafetai lava mo le avanoa ua tuuina mai ia te au. A o lei faia sau faamatalaga e tusa ai ma le Tala Faatatau o le Tupe, ae tatau lava ia te au ona ou faafetai muamua i le Afioga i le Minisita o Tupe e tusa ai ma galuega fita ma le mamafa o loo faafeagai ma ia. E le gata foi i lea o lana saunoga faalaeiau ma le faafiafia loto e pei ona o loo ua tauaaoina nei e le Maota. Ae avea ia lenei avanoa ou te faatalofa atu ai i lau Afioga faapea foi le Afioga i le Palemia ma le mamalu o le Kapeneta i Afioga a Minisita faapea foi le mamalu i ou uso a faipule. A o le i faia sina au faamatalaga, o le a ou le asaina le tele o mataupu ua uma ona faaalua e Sui mamalu, ae ou te faalalolalo atu mo lenei taimi nei i ai se upu e sasi vaeatu le mamalu o le Maota. O lea ou te faamalulu atu ai.

O le a ou faatalatalanoa atu muamua le Komiti Faatino o le Popo ma le Koko. Ua mafua ona ou taua lea itu, e le faapea ona o le fesiitai poo le sii i luga poo le pa'ū ifo i lalo le tau, ae o loo i ai ni mea taua ma le aoga e tatau lava ona tuuina mai i luma o le mamalu o le Maota lenei, aua o lea ua i luma nei o le Maota le lipoti faatino a le Popo ma le Koko o loo faagata mai i le tausaga e 1974. E ui la ina e le o i ai le 1975 ma le 6 masina ua tea, ae le faapea o le a ou faapea atu ai, ia faanatinati ona tuuina mai i luma o le Maota ae na ona ou taua lea itu ona ua taua tele, ina ia silasila i ai le mamalu o Sui a Usufono o le Maota ina ia latou silafia ai le taua ma le aoga o lea lava lipoti o loo faatulai mai ai alatupe eseese aemaise lava le tau i nuu mamao, le tau la lea o loo faatauina ai le tatou koko ma le tatou popo i tulaga faa-konekarate. O tau ia ua uma ona fuafuaina e le tatou Malo e faatauina atu ai le popo ma le koko i maketi i fafo.

O le mafuaaga la o lou taua o le aoga ma le taua o lea lipoti, ina ia faafiafiaina ai finagalo o Sui mamalu i se tupe mama ma se tupe maua, ae le gata foi i lea, e tatau ona i ai ni tupe faaagaaga o loo teuina i le fale teutupe aua faafitauli faapenei e pei ona aliali mai. Ua uma foi ona saunoa nisi Sui e tusa ai ma le tau o le popo ma le koko, ae ou te manatu o

loo i ai iinei nisi o le mamalu o Sui o loo mafuli atu o latou finagalo i mea tau faatoaga, aemaise lava le popo ma le koko. O le ala taua lea ia te au ma e tatau lava ona faafiafiaina ai Sui ma afio atu ai i o latou afioaga ma alaalaafaga i nuu i tua ma latou faamatalaina i ai le lipoti lea ua tuuina mai ina ia fua faatatau i ai le latou galuega ma faafiafiaina ai i latou ina ia totoina le koko faapea ma le atiina ae o faatoaga niu.

Sa ma talatalanoa ma se tasi alii o lou itumalo. Sa ou faapea atu i ai, e tatau lava ona outou maelega i le toe totoina o le koko, aua o lea e pei ona outou silafia o le tasi lea o tamaoaiga e sili atu le taua i le lalolagi atoa. Pe a fuafua atu i le tatou atunuu i Samoa nei, e laitiiti lava ni nai koko e auina atu i fafo na i lo le tele o atunuu. Peitai e tatau lava ona outou maelega ina ia outou totoina koko ma ia faateleina foi le niu. Sa faapea mai lea alii ia te au ua lelei. Sa ou toe alu atu ma vaai e lei tagofia lava e lea alii e tusa ai ma le ma talanoaga. Peitai, sa ou fesili loa i ai, alii o le a le mea ua e le tuuaulafo ai e tusa ma le ta talanoaga. Sa faapea mai le alii lea ia te au, ia e malie ua ou matua leiloa lava. Ailoga a toe aoga ia te au na fuafuaga. Ona ou faapea atu lea i ai, ia vaai oe, o le mea sili ona taua, afai o le a le faaaogaina oe o le a faaaogaina e ou alo faapea foi lou auaga. E le gata i lea, o le a faateleina ai fua o le lauelele e auina atu i fafo. O lea la lau Afioga, ou te manaomia lava i se tauaofiaga o lumanai ia tuuina mai ai le lipoti lea e pei ona talosagaina.

Lau Afioga, ua ou taua nisi o mea aoga ma le taua e ui lava ina ua uma ona saunoa i ai le tóatele o Sui Mamalu, ae ao lava ia te au ona ou faaopoopo atu i ai. O le a ou talatalanoa atu i le tau o oloa. O loo sau pea i lau faalogo le tóatele o le atunuu ua le malilie i le siitai o tau o oloa. O le mea la ua tupu, ua tatou lafolafa ma ave le faasea i o tatou uso faipisinisi. Ua faapea le tatou manatu, o i latou ia ua latou siitai le tau o oloa, a ua silafia lava e le mamalu o lenei Maota, o loo i ai lava le tatou Komiti e pulea tau o oloa. Peitai, o le mafuaaga ua feeseeseai ai le tau o oloa i lea vaitaimi ma lea vaitaimi, ona e mafua mai i atunuu mamao. O le fesiitai la o tau o oloa e mafua mai i atunuu i fafo. Ua aumai nei le isi uta o oloa, ua ese le tau. Ua fai sina pau e pei o le pusa eleni vaeatu le mamalu o le Maota. Pe oo atu i le isi lua masina ona toe aumai lea o le isi uta ua fai si maoae teisi. Ua mafua mai lea tulaga i tagata faigaluega, aua o le mea o loo tupu nei i le tele o atunuu o le lalolagi, o loo fetagisi pea tagata faigaluega i le fia sii o o latou totogi. O le mafuaaga lea ua aumai ai le isi uta o oloa i le isi masina ua sii foi le tau, ona e mafua mai i le toe

Saunoga Faataupou a Sui Usufono 1976-1978

faapoopo foi e ia kamupani poo ia falefaigaluega ia totogi o tagata faigaluega e pei ona talosaga ai, ona faapoopo foi lea i totonu i le tau o oloa ia e pei ona auina mai iinei i Samoa faapea foi le lalolagi. Ona aumai lea ma taunuu mai i le tatou atunuu ua fai sina eseese ma le tau sa i ai muamua.

O le mea la lea ou te fautuaina lau Afioga i le Minisita i se vaifofo poo le a se fofo o le a foia ai ia faafitauli i le mamafa o le tau o oloa. E pei ona i ai i lenei vaitaimi ua oi le tele o le atunuu i le taugata o le soifuuga. O le mea lea lau Afioga, e tasi lava le fautuaga ou te tuuina atu, o le faapa'u lea o le tiute aemaise lava i meataumafa, aua o loo i ai nei le tiute o meataumafa i se tulaga ua fai lava sina maoae. O lea foi ua i ai le 10% ma le 7½%. E a la pe a tuu i ai na o le 5% i meataumafa ina ia faataugofie ai le tau o oloa ina ia foia ai le faafitauli lea ma le oi o le atunuu; aua o lenei vaitaimi ua fai lava sina taugofie pea o fua o le laueleele, a o oloa ia mai fafo ua fai sina maoae o tau ona o le tiute. O lea la e talosaga atu ai ma faufautua atu ai i lau Afioga i le Minisita, ina ia fai sau fuafuaga e faapau ai le tiute o meataumafa ina ia faafiafiaina ma faataugofieina le soifuuga o loo oi ai le mamalu o le atunuu. Silasila foi i le tatou motu lea e i Tutuila, e le tiutea a latou meataumafa ma le tele o nisi oloa ona e fuafua ina ia taugofie ma faafaigofie ai e tagata o le atunuu ona faatau e tusa ai ma le latou tupe maua. O lea la lau Afioga, o se fautuaga lea ou te tuuina atu ma lou faaaloalo lava.

O le isi itu ou te fia taua lau Afioga, o le itu lava lenei i le faatauina mai o taavale afi vaeatu le mamalu o le Maota. Ua fai si maoae o le tele o taavale ua aumai mai fafo. O le mafuaaga ua ou taua ai lea itu, ou te talosaga atu ina ia fai lava sina faaitiitia o mea tau taavale afi aua ua faalelava foi auala e feoi ai taavale mo lenei vaitaimi. Ou te manatu foi, o le mafuaaga foi lea o faalavelave i taavale ona ua tele naua taavale afi ua faaulufale mai i totonu o le atunuu. Ae le gata i lea, o taavale ia a le Malo vaeatu le mamalu o le Maota, ou te le malamalama poo fea o kamupani latou te tusiina ia taavale ma faaulufale mai i totonu o le atunuu. E aofia ai la ma masini ma mea eseese faapena o loo faaaluina ai tupe e tele, o tupe ia o loo faasaoina mo oloa o loo tusi atu i fafo. O lea la ou te talosaga atu ai i lau Afioga i le Minisita e aafia i lenei lava mataupu, sei e silasila ane i ai poo le a lava le tulaga o loo i ai le tusiina o taavale afi.

O le a ou talatalanoa atu lau Afioga ma le mamalu o le Palemene i le NPF. E pei foi ona taua e le tóatele o nisi sui faapea le Sui mamalu na sei mavae atu nei, atoa ma nisi Sui i le faafitauli o i ai i lea lava

faaputugatupe. O lea faaputugatupe o le NPF ua ou taua ona o le aoga tele ma le taua. E faapea foi i nuu ma atunuu i fafo. O loo i ai foi faaputugatupe faapea o le NPF ua faasaoina ai tupe a le tóatele o le atunuu e pei foi o le tatou atunuu. O loo avea lena ma ivitu poo faamoemoega autu e tatau ai lava i lau Afioga i le Minisita ona sei e silasila totoa i ai ma apoapo lelei ma taumafai ina ia faatulaga lelei le NPF, aua o se tasi lea o faaputugatupe e sili atu ona maoae lana tupe maua. A fuafua atu i le faitauaofai o le atunuu, ou te masalo i lau lava fua faatatau masalo poo le 10½% pe a i latou o loo totogi le NPF. Ou te masalo o le tausaga ua tai lata atu i le \$6miliona le tupe ua faasaoina ma o loo teuina i le NPF, e le taulia ai a latou tupe maua poo tupe faasili mai tupe nono atu i fafo i le atunuu faapea foi tupe o loo faatupeina ai le faletupe o le Atiina A'e. Talu ai ona o le taua tele ia te au o lenei faaputugatupe, afai o le a faautagia lelei mai e lau Afioga faapea foi le Palemene lenei lava faaputugatupe, ou te manatu lava o le a fai ma toomaga i lau Afioga. O le a le toe faatiga ulu foi i lau Afioga ona e toe taumafai e aumai ni tupe mai fafo, aua o le a avea lava le NPF ma ou toomaga e aumai ai tupe e faatupe ai le faletupe lenei o le atiina ae, ona avatu ai lea i tua i ē o loo manaomia le fesoasoani mo a latou galuega tau atiina ae.

E le gata foi i lea lau Afioga, ua ou maua le faataotolia o la outou lipoti lea mo galuega fai i totonu o le Atunuu, e tele galuega mamafa ma galuega e faaono alu ai ni miliona e pei ona i ai le polokalame lea ua taua i lau saunoaga i le Tala Faaopoopo o le Tupe aua o le tele lava o lau saunoaga o loo faaupuina mai ai ni faaunegatupe mai atunuu i fafo o le lalolagi. Talu ai i lou lava manatu lau Afioga, afai o le a e matua pulupululima ma faapoopo lelei ma taumafai ia puni ia malu ina ia lelei lenei faaputugatupe o le NPF, ou te manatu lava o le a le toe taumafai e nono mai ni tupe mai fafo. O le a le toe faatiga ulu foi i lau Afioga le tele o tului o totogi atu i nonogatupe e pei ona e taua. O lea ua silasila foi le mamalu o le Maota i le tele o miliona ia e pei ona e taua, ae ui i lea, faafetai atu lava i lou maemae ma lou taumafai ina ia foia ia faafitauli. O lea o loo aumai aloaia le lipoti e pei foi ona faagasolo mai plokalamae a lo tatou Malo e tusa ai ma fuafuaga mo le atiina ae. E le gata i le atiina ae a o galuega o loo fia tau faamaea. O loo fia fausia foi ni fale gaosimea i totonu o le atunuu. O lea la lau Afioga ma le mamalu o le Palemene, e fia fesili tasi atu lava i lau Afioga i le Minisita o Fale Gaosi Mea ia e pei ona taua o a lava ituaiga fale gaosi mea, ma o a foi ituaiga mea o le a gaosia ai? Aua e pei ona silafia e le mamalu o le Maota, o loo i ai nisi o fale

Saunoga Faataupou a Sui Usufono 1976-1978

gaosi mea i totonu o le atunuu o lea o loo gaosi ai le apa. Ua i ai foi le fale e gaosi ai le fao, vaeatu le mamalu o le Maota. O lea la, o le tele lava o mea e le o maua iinei i le tatou atunuu, vagana la ua tusi mai fafo ni oloa ona faatoa gaosia ai lea o oloa ia e pei ona ou taua. Atonu o le a le au atu lau faamatalaga i le faaunegatupe lea ua taua mai o le \$300,000. O lea ua tuuina atu le \$200,000 e fausia ai le fale e gaosi ai le ava malosi. O lea la o le a le oo atu i ai lau faamatalaga aua o lea ua uma ona faatu mai i le Tala Autu o le Tupe.

Lau Afioga, o le a talatalanoa atu i le Fono a Sui Tofia. O lenei lava mataupu ua ou faalogo pea o taulagi o le Fono a Sui Tofia. Mai le tele o tausaga ua mavae talu mai le amataga o le faavaeina o lenei Malo e le o faataunuuna lava. O lea la ou te fia fautuaina ai lau Afioga i le Palemia aua ou te manatu lava o lau Afioga o loo fitoitonu i ai le mataupu lenei. O lea ua tofia nei le Afioga a Tamasese e avea ma Sui Tofia, a o lea la e i ai i le tatou Faavae. Ou te manatu ua tataua lava ona faataunuu ai ma ia faia ina ia faatino le faaupuga lea o loo i ai i le Faavae ina ia faia se latou fonu.

O le isi itu taua ou te fia taua lau Afioga, o le itu lava lea i le Sui Ao, aua o lea o loo faaupu mai o le Fono a Sui Tofia, ae lei faia lava se fonu ona e talu ai e le mafai ona faia toatasi se fonu, sei vagana ona ua atoa le aufono lea e toatolu. Ou te manatu ai la afai e le mafai ona faataunuuna sui ia e toatolu, e a pe a aveese i le fuaiupu lea o le Fono a Sui Tofia. Ae lelei pe a faaupu Sui Tofia, pe faaupu faapea Sui Ao. O lea la lau Afioga i le Palemia, ia malu foi le vai i lou finagalo.

O le isi foi itu ua avea lava ma atugaluga ia te au o le itu lea faapea ua e tofia le Afioga i le Sui Ao e avea ma Taitaifono o se tasi Komiti. Ua fai lava sina ou faanoanoa i lea itu, aua o le a fai lea ma mea ua aafia ai le Sui Ao i upufai o le Malo. O le mea lava lea e tataua lava ona tatou faaeteete i le amiotonu ua tuuina atu i le Afioga a Tama a Aiga, ina nei aafia o ia i upufai o le Malo. O lea la lau Afioga ma le mamalu o le Palemene, ou te talosagaina lau Afioga i le Palemia ia e alofagia ma ia toe tuuese le Afioga a Tama a Aiga ma le galuega lea. E le o se galuega e tataua ai mo ia, aua afai o le a toesea le Ao o le Malo, o le a see atu loa i ai le Sui Ao. O le mea la lea lau Afioga, ma lou faaloalo lava, ou te talosaga atu ai ina ia alofagia ia tuu ese le Tama a Aiga ma le galuega lea e pei ona e tofia i ai.

I lenei lava taimi, ou te avatu ai lau faamalo ma lau faafetai i taualumaga o le lipoti lea ua tuuina mai i luma o le Maota. Ae peiseai e tataua lava ona ou taua i sau faatalatalanoa atu i luma o le mamalu o le

Maota le tatou fale teutupe tele foi lea o Samoa i Sisifo. E manaomia ni lipoti e tuuina mai sei silafia ai e le mamalu o le Maota le tulaga ua i ai lea fale teutupe, aua o loo fai sea tai afaafa i ai lo tatou Malo ma le Malo o Niu Sila. O lea la, o se mea taua tele ia te au ina ia silafia ai e le mamalu o Sui le tulaga o loo i ai lea faletupe. O le tele o a latou galuega o loo faia e fia silasila foi i ai le mamalu o Sui, poo faapei le tulaga o loo i ai, aua o la e ua maua foi le isi vaega ua i ai foi ma le fale teutupe e faasaoina ai tupe a le atunuu. O lea la e moomia ai se lipoti ina ia tuuina mai i le Maota ina ia silafia ai alatupe eseese aemaise foi tupe o loo nono atu foi i fafo e le aufaipisinisi ma le aufaioloa ina ia silafia ai e le mamalu o le Maota le tupe ma tulaga o loo i ai ia aitalafu poo ia faiga pisinisi. E aumai ai foi oloa ma fefaatauaiga eseese faapena o loo manaomia ai ina ia silafia ma faafiafiaina ai o latou finagalo i tulaga o loo i ai lenei lava fale teutupe. O lea la lau Afioga e moomia ai ni lipoti o ia lava Matagaluega e pei ona talosagaina. E faapea foi ma ni lipoti mai Komiti Faatino o le Popo ma le Koko.

Lau Afioga, e avatu lava lau faafetai ma lau faamalo i lau Afioga i le Palemia faapea foi le mamalu o Sui o le Kapeneta ma le mamalu tele o Sui o le Maota Fonu. Soifua.

Susuga LEIATAUA IOSEFA



Itumalo Faaalaalafaga:

Aiga i le Tai

Filifilia:

5 Mati 1976

Faatauto:

18 Mati 1976

Lauga Faataupou:

4 Aukuso 1976

Lau Afioga i le Fofoga o le Fono, lau Afioga i le Palemia ma le Kapeneta, o lenei ua tatou i ai i le Palemene o Samoa i Sisifo, ma o loo tatou tausaili i ni fuafuaga lelei ma le mautu ia tatou felafolafoaiga mo le manuia lautele o le lumanai o Samoa i Sisifo. Ou te talitonu foi, o failauga ma tamalii ma le atunuu atoa ma vasega eseese o loo avatu talosaga ma le faamoemoe o le a tatou gafatia se lumanai manuia mo le Malo o Samoa i Sisifo. O lea e ao ai lava ona tatou fesiligia le taitaiga mai le Atua e fesoasoani i la tatou felafolafoaiga.

Ua tatou faafofoga foi i finagalo ua tuuina mai e Sui e pei ona i ai i le aso ua mavae, le aso ananafi, ae pau lava o nai nisi mea ou te manatu e tataua ona faailoa atu i lau faitau mai i tausaga ua mavae ma

Saunoga Faataupou a Sui Usufono 1976-1978

aso ua alu. I le tele o nogatupe e tuuina atu i fafo, ma le faaupuga mo le atiina ae o Samoa, atonu e le o laugatasia Samoa i ia lava nonogatupe, pe na o se vaega e pei ona i ai, ae o le igoa o loo avatu i fafo o le igoa o Samoa. O lona uiga o Samoa atoa. E pei lava ona saunoga se tasi o Sui i le aso ananafi i lenei lava mea o le faailoga tagata i totonu o tatou Faletupe, ae le gata foi i lena, afai o le a mafai mai se tupe ia o le malosi lava lea e oo i ai, aemaise lava ia matou mai tua, pe na o se \$100 a o loo i ai se faamoemoe mo se atiina ae e pei ona taumafai i ai. O le mea lea na ona fautua atu ina ia tutusa le faasoasoina o a tatou tupe o loo nono mai fafo, aua o se manuia lautele o Samoa.

E i ai nisi tulaga e pei ona matau i le Tala o le Tupe, ia atonu e i ai se taimi ona malamalama lea. E pei ona ou matauina ma faalogologo i le aso ananafi ma tulaga o loo i ai, le faamoemoe o Samoa mo lona lumanai o ana atiina ae. Ia amuia lava ia itumalo poo nisi vaega o Samoa o loo lava ni eleele e galulue i ai, ae a manatu i le matou lava itumalo ma nisi foi o itumalo, ia talofa. A soso atu i tua o le eleele o le Esetete Tausi, a soso atu i autafa o le eleele o le Malo. Ua matua faigata lava ia tulaga o loo i ai. Ua i ai le agaga ua fia atiae, ae paga lava lea ua leai ni eleele e galulue i ai. O le mea lea e talosaga atu ai i lau Afioga i le Palemia faapea le mamalu o lenei Fono, o le a se tofa, ina ia tuuina mai ia eleele sei o matou galulue ai. E le gata i lou itumalo ae faapena foi nisi o itumalo o loo fetai ai ma le tele o faafitauli i lenei lava mea tau eleele. Aua ou te manatu poo le afa o le aoga o eleele o le Esetete Tausi poo eleele o le Malo o loo aoga i le Malo, a o le tele o vaega ia o le tasi foi lena mea o loo faatupu agasala i totonu o nuu ma alaalfaga e lata i ai. E faasoosoina pea latou ina ia faaogaina fua o ia fanua, ae le o ni o latou fanua, o fanua tau Esetete Tausi. O le mea lea ou te talosagaina ai lava e tusa ma lea vaega.

I le vaega lea tau auala, e pei e matauina atu o le tele lava o vaegatupe e faalelei ai auala o le itu lea i Sisifo. Ma o tulaga o loo matauina e pei lava e gata mai Upolu i Sisifo i le malae vaalele, poo le uafu foi. Ia ae talosagaina ina ia faaoo atu i tua poo Falelatai i le mea e gata mai ai ia Upolu i Sisifo ona faaleleia, aua e lelei lelei lava le tietie atu i le taavale i le alu atu lea ae oo atu loa lava i le uafu, ona malaga loa lea e pei lava o la e malaga i se sami louloua ma le sou. O le mea lea e talosagaina ai ina ia faamaea ia tulaga e pei ona i ai le faaletonu o loo i ai nei auala.

O le isi vaega ou te fia tautala i ai, o le vaega lea e tusa ma le eletise. Faamolemole a ta malaga atu i le

itu lea i Sisifo i se taimi o le po, e ese le manaia o le malamalama o moli o maota ma laoa ma e faapea foi i le auala. Ia e talosagaina poo le a se finagalo o ē o loo fitoitonu i ai lea vaega ae faaauau atu pea i le itu i Sisifo. Afai lava o le a mafai sei tuu atu i si motu i tai, aua e matauina atu peiseai ua i ai ni finagalo a maea Upolu ona laa lea i Savaii. Ia e pei e le matagofie i le tatou aganuu le tufalaaia o se tatou tulaga faapea, ae a pe a faasolosolo lelei a uma Upolu o atu i Manono ma faasolo atu ai i Savaii. O lea lava e talosaga atu ai e tusa ma ia tulaga.

O le isi vaega o le vaipaipa. Ia sa mimita lava i tausaga ua alu ina ua faasalalauina ua maua le vai i Manono poo le Aiga i le Tai foi. Ia ae paga lava lea, e pei foi ona taua e nisi Sui i le aso ananafi, ia tulou o le upu e to ia te au, na o atigi paipa ua tusa nei ua atoa le tausaga o faapea lava ona i ai. I se isi itu, e na ona oo mai i le Ofisa o loo latou galueaiina, a o le tali o le a fai, o le a fai. Ona pau lava lea o le tali o le a fai ae leai lava se mea ua faia. E talosagaina ai e tusa ma lea vaega sei alolofa e faataunuu ma faaleleia tulaga e pei ona i ai aua le soifua maloloina.

O le vaega lea i le Falemai. Ou te manatua pea i tausaga ua mavae, malaga atu lea Minisita ua folafola atu o le a aumai le fomai, ae a silasila le mamalu o le Maota, e tele faafitauli o loo tupu pea i totonu o lenei motu ona o ia lava tulaga o le leai o se fomai. Ua tele foi ni faalavelave ua tutupu ona o le faigata o auala, aua a oo ina sou le vasa, ia ua matua faigata lava pe afai o le a i ai se isi o le a mafatia pe tigaina e taumafai e tuli mai i Apia nei. O le mea lena, afai ua mafua ona ua le lava ia fomai, poo le a le mea ua le toe i ai se tatou avanoa e pei ona tatou sau ai i aso ua mavae, sa o atu ai ia alo ma fanau i Fiti e aoaoina ai faafomai ina ia maua mai ia lava fomai? Ua le gata i le matou motu poo le matou itumalo ae faapena foi ia Savaii. A faitau atu e fia afe tagata o loo i ai, ae peiseai o loo maua pea i le faafitauli o le lē lava o fomai. O le talosaga ina ia alofa le mamalu o le Fono i se fomai mo lo matou itumalo.

I le vaega lea e pei ona ua taua i le aso ua sola e uiga ia Niu Sila, ou te manatu lava au atonu e lei lava tapena lea osigafeagaiga e pei ona i ai. Sa tatau lava ona tatou aiaia lelei tulaga uma e pei ona aliali mai nei; aua pei lava ona saunoga i ai i le aso ua mavae i le tele o faafitauli mo se tasi o foufou e malaga i Niu Sila, ua le gata ina tele o le tupe ua faaluina, ae ua faapena foi ona tele o auala e uia e pei o le saunia o se pepa faigaluega ma talosaga i ē o le a vaia. O ia lava auala ua fai ma faafitauli, fai ma faaumiumi i ē o loo sauni e malaga atu i Niu

Saunoga Faataupou a Sui Usufono 1976-1978

Sila. O lea, poo le a se finagalo ina ia uia ni auala tatau ma ni auala e faafaigofieina ai o tatou manaoga e pei ona tatou o i ai mo le malaga atu i Niu Sila.

O le isi vaega e pei ona mafaufau i ai, o le vaega lava lenei ia Rusia. Ou te matua popole lava ma ou te matua fefe foi, ae siligia au e se tasi o le atunuu – o le a ou sou manatu ia Rusia? Atonu o lenei ua tatou fetai ai ma o tatou faafitauli ia Niu Sila o le sa tatou aumeamamae, o le sa fai ma o tatou tama, o le sa ia tausia ia i tatou, ma ou te manatu foi o tulaga na o le a tatou oo i ai pe afai o le a tatou taliaina Rusia. O le a tatou toe manatunatu foi e pei lava ona tatou toe manatu atu nei ia Niu Sila. O le mea lea, afai lava o a ni tulaga o loo fuafuaina mo Rusia, ia o le talosaga lava ina ia aiaia lelei ma tapenapena maea mea uma mo tulaga faapena, ina ia tatou agai tonu i ai i se taimi mulimuli ane pe a oo ina tatou afaina.

O le tasi lenei mataupu ou te lei malamalama poo fea tonu e agai i ai. O le mataupu ua loa ma ua leva ona ou mafaufau i ai, ma ua leva foi ona talanoaina e lou itumalo. I lau vaai i le itumalo, ua silia nei i le 7,000 ona tagata. Pe le i alagata e ona faaopoopo o se isi Sui i lo matou itumalo. O le mea lea ou te talosagaina ai lenei Maota. O le a se finagalo, o ai foi latou te aiaia, ia o le talosaga lea ua tuuina atu i luma o le Maota ma lou faaloalo lava. Soifua.

Tofa Hon LETIU TAMATOA



Itumalo Faaalaalafaga:

Aleipata Itupa i Lalo

Filifilia:

5 Mati 1976

Faatauto:

18 Mati 1976

Lauga Faataupou:

10 Aukuso 1976

Lau Afioga i le Fofoga Fetalai ma le mamalu o le Maota, a o lei tali atu i fesili poo ni fautuaga foi a Sui sa tuuina mai, e muamua ona ou faamalulu atu ona sa i ai se taimi sa toesea ai au mai lenei foi fonotaga. Ui i lea, o le a ou taumafai e tali atu i fesili sa tuuina mai e Sui mamalu.

O Ala Galue. E pei lava ona silafia e le mamalu o le Maota, e i ai lava le talitonuga o le Palemia ma le mamalu o le Kapeneta e faamamafaina lava lenei mataupu i ala galue. O le Tala Faaopoopo o le Tupe lenei a o le Tala Autu o le Tupe i le tausaga talu ai sa tuuina mai ai le \$40,000 mo le 10 ala galue i

Upolu ma le 10 ala galue i Savaii, lea la o loo faia ai nei fuafuaga. Pau lava lea o se vaegatupe o loo mafai ona matou faagaioia ai ia vaega o le polokalame tau galuega o ala galue. E pei ona saunoa atu le Afioga a le Minisita o Atiina Ae, o loo i ai lava le faamoemoe i se taimi o lumanai i le Tala Autu o le Tupe mo le tausaga a sau o le a maua ai se tupe e ono mafai ai ona faatino ia fuafuaga e le Matagaluega.

O le isi vaega e tusa i ala galue, o le faia lea o galuega e pei ona i ai nei, poo le faatinoina o auala galue, e 10 i Upolu ma le 10 i Savaii. I le tausaga ua mavae, sa i ai fuafuaga a Minisita sa faatino ai ma tofia ai ala galue e tatau ona fai i le tausaga lenei. Peitai ane, ona ua oo mai i lenei tausaga ua i ai fuafuaga a le Matagaluega o le a ave le faamuamua i alaalafaga e lei i ai ni o latou ala galue, aua e le po se lilo i le mamalu o le Maota o loo tele alaalafaga e le o i ai ni ala galue. Atonu ona o le faatamala o nisi o nei alaalafaga ua le oo mai ai e talosagaina; ae o loo i ai lava le talitonuga o lenei Matagaluega o le a le avea foi lea ma mea o le a taatia ai pe faagalogalo ai e le Malo ia tulaga. E i ai foi le manatu i le atina ae o le atunuu, o lenei manuia i ala galue e tatau ona galueaiina faatasi ai alaalafaga uma ina ia tutusa le manuia o le atunuu atoa.

O le faagasologa la o nei ala galue o le 10 i Upolu ma le 10 i Savaii, ua i ai le fuafuaga a le Matagaluega e na o le 2 lava vaiaso e tuuina atu i le ala galue e fausia ai. Ou te faatepa le mamalu o le Maota na o le 52 vaiaso o le tausaga ae 20 ala galue ia e manao e fausia i le tausaga lenei. O lona uiga na o le 20, aua afai e sili atu i le 3 poo le 4 vaiaso, o le a i ai ni ala galue o le a le faataunuuina o le 20 lenei. E i ai la le fuafuaga a le Matagaluega ina ia tuu atu le avanoa i afioaga, e lua lava vaiaso. Afai lava o le a lagolagoina e afioaga le taumafaiga a le Matagaluega i lo latou papale mai e taumafai faatasi ma le Matagaluega, o lona uiga o le a vave ona faataunuuina. O le a leai foi se tapulaa e pei ona i ai i tausaga ua mavae, sa fuafua faapea e lua maila ala galue e fai i le tausaga. O le tulaga lenei, afai lava e papale mai le afioaga latou ma lagolagoina le taumafaiga a le Matagaluega e ono mafai ona faatino i le 2 vaiaso lenei se galuega e tusa i le 2 i le 5 maila. E talosagaina ai le mamalu o afioaga, afai o le a lagolagoina malosi taumafaiga a le Matagaluega, o le a maua ai foi la se faatinoga e sili atu i lo le mea sa fuafuaina i tausaga ua mavae na o le 2 maila e tatau ona fai i le ala galue. O lea la e avea ai foi lenei taimi e talosagaina ai le mamalu o tamalii ma failauga ina ia tatou galulue faatasi e

Saunoga Faataupou a Sui Usufono 1976-1978

faatino ia fuafuaga aua le agai i luma ma le solosolo manuia o taumafaiga o nei lava vaega o ala galue.

Faafetai atu i le faauilavea a le Sui. O le tulaga lava lea ua i ai ma ou te le toe taea le taimi ua mavae. O lenei ou te taumafai lava i tulaga ina ia solosolo lelei ma agai i luma le taumafaiga o ala galue. O isi la vaega e pei ona ou fuafuaina ma le Matagaluega i le faagasologa o nei mea o ala galue, afai loa o le a maea ona fausia uma auala o alaafafaga e le o i ai ni o latou ala galue ona faasolo loa lea o le polokalame e pei ona taua e le Minisita o Atiina A'e. Afai loa ua taunuu mai ia masini ia, tasi mo Upolu, tasi mo Savaii, ona faasolo loa lea i afioaga. O le a le toe i ai se mea faapea e osooso loloto ae o le a faasolo. A uma le isi nuu see i le isi afioaga. E faapena lava ona faasolo sei maea lelei ma tofutofusia uma afioaga e pei ona talosaga mai.

O le tulaga e uiga i le tausiga poo le faaleleia o ala galue pei ona taua e nisi Sui. E i ai lava le talitonuga o le Matagaluega o le mea e tatau ona fai. E tatau ona vaaia e le Matagaluega ala galue ua maea ona fai ma ni ala galue foi o le a fai, aua e le o po se lilo e leai ni meafaigaluega e faalelei ai ia vaega a nuu poo alaafafaga vagana lava le Ofisa o Galuega. Ae paga lea e tele le manao e faataunuu ia fuafuaga, ae afai nei o le a tuu mai i le Matagaluega lea matafaioi, o se vaegatupe tele o le a faaluina ai. E oo mai la i le taimi nei e le o i ai i le Matagaluega se vaegatupe mo lea faamoemoe. E i ai le faamoemoe afai lava o le finagalo lea o le Maota Fono, ia o le a taumafai lava le Matagaluega e talosagaina se vaegatupe mo le tausaga a sau ina ia mafai ai ona tausia le vaega e pei ona saunoa i ai nisi o Sui.

O le isi vaega o ala galue e pei ona i ai nei le polokalame a le Matagaluega e faasolo atu i le faaleleia o auala tetele e taamilo i Upolu ma Savaii. O loo i ai la le fuafuaga a le Matagaluega o le a faataamilo atu masini ia e faaleleia atili ma tau faasaosao auala taamilo i Upolu faapea ma Savaii. A i ai foi la ni avanoa, e ono mafai foi ona fesoasoani ai i le fausia o ni ala galue o tau latalata ane i le mea o loo galulue ai.

O se isi vaega na taua e se isi Sui, poo se alatele poo se auala e agai atu i le ogatotonu o le motu i Savaii i Salelologa lea sa taua e se isi Sui. Ou te faamalulu atu i le Sui, o lea ala sa gaoioia i lea vaitaimi ae lei i ai ni suesuega maumaututu a le Matagaluega. O se tala faatusa i ai, sa na ona tagai lava i le ata ona tusi ai lea o le lima i le mea e alu ai le auala. Peitai ane ina ua faataunuuina ma amata, o se galuega e matua maoae lava lona tau. O lea la ua i ai le fuafuaga sei faapafala faapea lea galuega sei

matua iloilo lelei poo a ni faafitauli e aliali mai, ae poo a foi ni manuia e ono aliai mai ai.

Faafetai lava i le faauilavea a le Sui, ae faapea ia ona ou tau faamalamalama atu. O le fuafuaga lava a le Matagaluega ia faasolo, aua e le o po se lilo, masalo ua tali uma mai Sui i le talosagaina e avatu le faamuamua i o latou afioaga. Ia ae le mafai e le Matagaluega aua na o le tasi le Matagaluega. O lea la e faamalamalama atu ai faapea, o le fuafuaga lava lea o le a faasolo nai lo le osooso loloto pei ona faitio mai ai le mamalu o Sui, pe aisea ua faapea ai ona fai? O le tali atu i le galuega lea ua taua e le Sui, ia ona o le lē lava o masini a le Matagaluega. Sa i ai le fuafuaga ona o se galuega faafuasei ma le tatau ona faia, o lea na sii ai i Asau e faataunuu nisi fuafuaga ua faafuasei mai a le Malo, ae o se taimi o i luma o le a toe oo mai lava e faaauau e pei ona i ai le fuafuaga.

O le a oo ane lau talanoaga i le alatetele poo ala taamilo. Sa lavea i saunoaga a nisi Sui le auala lea o loo galueaiina nei i Sasae, i le alu atu lea i Apia i Moataa e tau i Falefa. O loo i ai lava le faamoemoe o le Matagaluega pe afai e tusa ai ma fuafuaga ma finagalo o le Atua, ia faataunuuina ia galuega poo Fepuari poo Mati i le tausaga a sau. Pau lava le mea, afai lava e lagolagoina e afioaga o lea faa-itu i Sasae le taumafaiga a le Matagaluega, atonu e mafai lava foi ona tuutuu mai i luma se taimi e ono faamaeaina ai ia galuega. O lona uiga o lau faamatalaga, afai e lagolagoina ina ia aua le taofia le tele o taimi e maumau ai le tele o taimi o masini i le taofi i mea toto poo a ni faafitauli e aliali mai, afai e tuu mai pea le avanoa i le Matagaluega e faatino ai ana galuega, atonu e mafai ona faatino i le tausaga nei.

Faafetai lava i le Afioga i le Fofoga Fetalai ma le faauilavea foi a le Sui. E sao lava foi le atugaluga o le faipule. E pei lava ona ou fai atu, o ni taimi ua tuanai e faigata ona tautala i ai lou nei Sui, ae ou te tautala i mea o loo taumafai e faatino; ma o le agaga lava lea ina ia faatinoina i lo le tautala atu i o outou luma i ni mea e le maua mai ni tino ma e faigata ona faatinoina. Atonu foi sa i ai se atugaluga o le Sui i tulaga o ia faasologa ua i ai, ma ou te talitonu foi o le Sui o se Alii Faifeau. A tatou vaai atu lava ua pau se mamoe i lalo, ae a tuu ai lava la e taafifili ma le lua ae le o tatou e sii i luga e taumafai mo le atiina ae? O le agaga lea o loo i lou nei tagata.

O lea ou te tau faamalamalama atu. E lei oo i ai lau faamalamalamaga a o lea ua toe faauilavea le Sui. O le atugaluga o le Sui i tulaga faapea e faasolo e pei lava ona taua e le Minisita o Atiina Ae, o loo i ai le vaega o masina ia pe maua le 6 ma mea uma lava e aumai e faapitoa mo ala galue. O loo i ai la le

Saunoga Faataupou a Sui Usufono 1976-1978

talitonuga o le Matagaluega, afai ae i ai lava se vaega o masini e i ai masini sua eleele, masini faamolemole, masini lau uta ma loli; atonu o le a vave ona faataunuuna ia galuega i lo le tulaga lea e i ai nei, aua silasila o masini lava ia e fai ai le galuega mo auala tetele ma isi galuega a le Malo.

Lau Afioga i le Fofoga Fetalai ma le faauilavea a le Sui, o lea lava sa ou taumafai e faamalamalama atu ae ona o le vavevave mai foi o le Sui. O le tulaga ua toe lavea i le tautalaga a le Sui e faapea, e mafai ona totogi nei e latou tupe e fai ai a latou auala, o loo i ai le Matagaluega o le SPDC o latou na e tauaveina mea tau totogi. Afai ua tele ni tupe a afioaga ia na taua, ia o loo i ai masini a le SPDC e avatu e fai ai le latou ala galue. A o le Ofisa lenei o Galuega na o galuega lava ia e 10 na faataga mai e le mamalu o le Fono i le tausaga lea.

O le Taitaifono o le Matagaluega lea o le Faatonu Sili o Galuega ae le o le Minisita. Na ou faaali atu foi o lea Matagaluega e totogi i ai tupe e faatino ai se galuega faapea. A faapea e te manao e fai ai sau galuega e totogi, soo se isi lava o le mamalu o le Maota e fia faia sana galuega, ia ona afio lea ma totogi i ai tupe.

Faafetai lava i lau Afioga i le Fofoga Fetalai. O le a ou taumafai lava e tali atu i le faauilavea a le sui. Tatou te malolo o ou taumafai lava e tali atu fesili a le Sui e pei ona saunoa i ai. O le mea muamua, o auala o nuu e le o mananao e fai. O lona lua, o auala o nuu ua uma ona fai ae lei i ai ni faatoaga po ua faaaogaina. O lona tolu, o auala o nuu ua malosi le atiina ae e lei maea po ua fai foi ae lei lava. E pei lava ona ou taumafai e faamalamalama i le taimi ua mavae i fuafauga faapenei, o le manatu o le Matagaluega, ia laugatasia tagata uma o le atunuu.

O loo i ai nei foi ia te au i le Ofisa ni talosaga. Ou te faamanino atu e leai lava se nuu e lei talosaga mai i se ala galue, o le mea moni lea. Ou te faasilasila atu i Sui mamalu o loo ua tumu nei toetitiiti afa le tusi i ni talosaga na amata mai i le afioga ia Tofae i le taimi ua mavae, e oo mai foi i lou taimi. Ua ou le iloa fuafua le tele o talosaga ae le mafai ona faatino ona ua puipuia lava le Matagaluega i ia mau talosaga poo le 20 ala galue i lenei tausaga.

O nuu o loo ua i ai ala galue ae lei faaaogaina, ia atonu o se taimi ua tuanai lea vaega ma e faigata ona ou oo atu i ai ona e lei lava sou iloa i lona taimi sa fai ai ia ala galue, pe sa fai i ni tulaga sao pe na fai i nisi tulaga. Pau lava le mea o i ai lou manatu, e tataua ona faasolo lelei ina ia aveeseina ai le manatu i tulaga faapea e fai ona e masani pe faauo.

Lau Afioga i le Fofoga Fetalai o lea lava. Ae pei ona ou taua o talosaga uma ia ua i ai nei i le ofisa, o lea e faasolo ai. A o le agaga lea o lau faaaliga.

Lau Afioga i le Fofoga Fetalai, o le tulaga i ala galue e pei ona taumafai mai le Sui ou te faapea atu ai, o auala ia e i ai le 10 i Upolu ma Savaii ua uma ona fuafuaina e tala mama atu e le o i ai le auala o le Sui lea, ina nei faapea i se taimi ua ou pelogia le mamalu o le Fono.

Lau Afioga, ou te tali atu i le Sui e lei amataina le auala lea e pei ona taua e le Sui. E lei amataina foi se auala o le 10 lea na ou taua. E faigata foi ona ou tali atu i le taimi ua tuanai ona e le iloa e au lona tulaga ma e le tataua ai foi ona lafo mai le faasea i le taimi nei ma lou tulai atu.

Ae ou te lei nofo i lalo i le taimi ua tuanai, sa ou i le vaega lona lua, o auala o nuu ua uma ona fai ae leai ni faatoaga. E pei la ona ou taua muamua o se vaitaimi ua tuanai e matua faigata ona ou tali atu i ai i ia tulaga. Ae o le fuafuaga ua i ai ia te au nei, e le mafai le mafai ona toe faia se auala galue i se vaomatua vagana lava ia mea o loo i ai ni faatoaga. Ua i ai le talitonuga afai ua manao ia afioaga e au i taloloa mamao a latou auala galue, faatino mai muamua ni o latou mafai, aua pei o le atugaluga lea o le Matagaluega, e ese le manao e ave i uta i le vaomatua, ae leai se atiina ae o i ai. O le ala lea i lou i ai i le Matagaluega, ua i ai le faatonuga e le mafai ona oo se auala galue i mea e lei faatoaina ona e gata lava i mea ua faatoaina ma ua faaaogaina. Afai la o i ai se afioaga e manao e tuutuu atu i uta i le vaomatua, muamua faatino mai ni a latou faatoaga ina ia mafai ai ona iloa, ma ia talafeagai ai foi ma le atugaluga o Sui, e pei ona taua ua oo i uta i le vaomatua ae leai ni faatoaga o i ai.

E i ai lava le talitonuga o le Ofisa, afai lava ua sii mamao se faatoaga i uta, ona o le naunau lava o sea tamalii poo se tulafale ua taumafai ai e faatino lea faatoaga. Ae i ai lava le talitonuga afai ua faatoa, ia faasolo poo le a se tulaga e mafai ai; aua pei o le atugaluga lea e i ai, e faigata ona faapea e tuu atu i le vaomatua ae le mailoa pe faatoa pe le faatoaina. Ia o lau toe faaopoopo atu lea.

O le isi vaega sa atugaluga i ai le Sui o auala o nuu ua taumafai malosi a latou atiina ae ae lei maea pe lei faia ia auala. Pei lava ona ou taua i le taimi ua mavae, o le agaga lea ua i ai le manatu, atonu lava foi e silafia e Sui o le Maota, ua ave le faamuamua e le Malo mo lenei foi vaitaimi i ala galue. Afai la o le a maua mai ia masini ua faatalosagaina, o le a tele atu ma totoe ia taimi e taumafai ai foi auala e pei ona latou talosagaina.

Saunoga Faataupou a Sui Usufono 1976-1978

Ou te muamua ona ou tali i fesili a le Sui o Mapuilesua. Ou te faamalamalama atu faapea e lei i ai se iuga a le Kapeneta i ia tulaga e pei ona fesiligia. E na o le Palemia ua uma ona ma talatalanoa i ia fuafuaga ae lei i ai se faaiuga a le Kapeneta e tusa ai ma le fuafuaga.

O lona lua o le tali atu i le Afioga ia Sala. O loo i ai lava fesootaiga vavalalata a le Minisita o Galuega ma le Minisita o Eleele i tulaga faapea.

Faafetai atu i le faafesili; ma o le tulaga lea e pei ona fesiligia e le Sui i le fale lea i Vaitele. O le fale lea e fausia ma faalelei uma ai masini a le Malo. Ae o le vaega lea e pei ona taua e le Minisita o Atiina A'e, o se mea fou lava e ese mai ai i lea vaega. O lona uiga la e faapitoa lava mo ala galue. O le fale lea ma masini ua i ai, e faapitoa mo galuega tetele, ala tetele soo se galuega lava a le Malo. A o fautuaga ia poo taumafaiga ia na saunoa i ai le Minisita o Atiina A'e, e faapitoa mo ala galue. E lei i ai la se fuafuaga faapea i le taimi ua mavae. O lea ou te faamalamalama atu ai faapea, o masini ia ua faatagisia mo ala galue, o lona uiga e le mafai ona faaogaina mo ala tetele a le Malo, ae a uma lea ala galue sii i le isi ala galue. E le mafai lava ona ave ifo ia masini i soo se galuega a le Malo ae faapitoa lava mo ala galue. O lau toe faaopoopo atu lea i le fesili.

E faasolo atu la lau tautalaga i ala tetele. Sa taua e nisi Sui le taumafaiga ua i ai nei e pei o le faataina o auala tetele. Ia ou te folafola atu o le agaga foi lea o le Malo e faataina ma faaleleia ia lumafale o maota ma laoa o le atunuu, ina ia taofia ai le pefu e pei ona silafia, vaeatu le mamalu o le Maota, i lenei foi vaitaimi; a o le tele o vaega o le atunuu o le a taatia lea sei maua foi se vaegatupe, ona faataunuu ai lea o ia fuafuaga e pei ona silafia. Ua i ai la le faaunauga o le Malo ina ia taumafai e faataunuu le faataina o aai tau lava o aai ina ia taofiofia ai le pefu e pei ona ou faailoa atu muamua.

Sa i ai isi Sui sa talosagaina mai le auala lea i Lemafa ma Fagaloa ona o tulaga faigata ma matautia. E faailoa atu ai e faapea, e le o i ai se fuafuaga a le Malo i lenei vaitaimi, ona o fuafuaga uma nei o fuafuaga o le faataunuuina o le Tala o le Tupe mai le tausaga ua mavae. Ae i ai le faamoemoe i le Tala Autu o le Tupe mo lea tausaga, atonu o le a i ai se faatatau mo le faaleleia o ia auala i Lemafa ma Fagaloa, ina ia foia ai faafitauli e pei ona silafia e le mamalu o le Maota.

O loo i ai foi le fuafuaga a le Malo e pei ona silafia, ina ia ave le faamuamua i atiina ae, lea ua i ai le faatatau e fausia le auala e sau mai Falelatai sei tau mai Faleaseela; aua e i ai le talitonuga o le Malo e tele ni atiina ae o le a maua mai ai i lea auala e pei

ona i ai. Ua i ai la le fuafuaga ma ua amataina nei le galueaiina o lea vaega; e sosoo ai le va i Falelatai e tau i Faleaseela. Ua i ai foi le fuafuaga a le Malo e faafesootai foi nisi auala i le sau mai Samusu i Aleipata e tau i le Vaipu ina ia mafai ai lava ona maua mai nisi vaega e fesoasoani i le tatou atiina ae. O le isi vaega na taua e se isi Sui o le agai atu lea mai le malae vaalele poo le uafu e tau i Falelatai. Ia o le agaga lava lea e pei ona tau faaali atu i le taimi ua mavae.

Ia masalo sa ou taua le tulaga lea i le auala i le alu atu lea i Salelologa i le ogatotonu o le motu. Ua taofia i le tausaga ua mavae ona e lei lava ni suesuega a le Matagaluega e tusa ai o lea auala. E pei ona ou taua i le taimi ua mavae, ai lava sa na ona vaavaai i pepa ma faataatia le auala, ae oo i le taimi e faatino ai, ia o se matua auala lava e maoae sona tau. E le gata i vanu tetele o i ai e fai ai ni auala laupapa ia ma nisi lava tulaga ae matautia se vaegatupe e alu ai. O le ala lea ua faapafala ai i lenei vaitaimi, sei toe sailiili poo le a se tulaga e tatau ona fai. O lau tali atu lea i le Sui mamalu.

O le mataupu e uiga i taligalu ou te tali vave atu ai e faapea, o le galuega tauave lava lena a le Malo i tausaga uma. Atonu e faamalieina le Sui lea i lou faapea atu ua i ai nei se faatonuga ina ia tagai i ai le Matagaluega poo le a se tulaga e tatau ona fai.

Ou te tali atu i le Sui o Lamositele. Atonu o lou nei foi tagata e fou, ma e pau lava le galuega lea o loo i ai ia te au ma le Matagaluega e faataunuu, o le alu atu lea i Moataa e tau i Falefa, ma le alu atu i Vailima e tau i Siumu. E le o i ai la ni fuafuaga e pei ona taua e le Sui lea; peitai ane o loo i ai lava fuafuaga faalauaitetele e pei ona tauave pea lava e le Matagaluega, e i ai le faasologa i le faataina o lumafale o aai ma alaafaga. A o galuega faapitoa ia e pei ona ou taua, o le itu lea i Sasae ma le alu atu i Tiavi. O le tali atu foi lea i le Sui, le Afioga ia Teo.

Lau Afioga a le Fofoga Fetalai, na ou taua lea vaega faapitoa ona e silafia lava e le Maota, o ia auala na aumai faapitoa lava le vaegatupe mai fafo e fausia ai. E le o po se lilo na aumai le tupe i le faletupe o le lalolagi e fai ai ia galuega i le alu atu i Moataa e tau i Falefa, ia ma le alu atu i Vailima. O le ala lea ua ou taua faapitoa ai, ona e ese le vaega e sau ai.

O lau tali i le fesili a le Afioga ia Teo, lea sa ou faapea ua ou tali atu. O le galuega lea e lavea i le galuega lenei e pei ona ou taua, ua i ai le tupe faapitoa mai o i le Faletupe e fai ai.

O le tulaga lea ua i ai le faamoemoe poo se vaitaimi o Oketopa poo Novema i le tausaga lenei ua tatau ona amata le galuega lea.

Saunoga Faataupou a Sui Usufono 1976-1978

O le Sui lea o Taliaoa na laga maia le tulaga i mea o ala galue i le faaupuga faapea, e le tatau ona fausia ni auala i le vaomatua. Sa ou taua lea vaega ona o mea o ala galue, ae tagai lau Afioga a le Fofoga Fetalai, o auala ia o auala tetele e pei ona ou taua, e le ni auala e faapitoa na o se nuu. O auala ia e faapitoa mo le atunuu atoa, e ala ai lea taumafaiga.

Faafetai lava i le faauilavea a le Sui. O le auala lea e pei ona silafia e nisi foi Sui o le Maota, o loo i ai fuafuaga a le Malo mo le faatinoina o afi o moli, aua le fesoasoani foi i mea tau moli o le tatou Malo. O le ala lea o le faagaioia o lea auala e pei ona tautalagia e le Sui.

Sei ou tali atu muamua i le faauilavea a le alii matua o Timu. E pei foi ona silafia o le ala galue o le afioaga lea ua tea i tai le lava i le galuega. Ua mafai foi ona oo atu lava i luma o le ‘mata o le afi’ tulou o le upu e to ia te au, e pei ona saunoa i ai le Sui. Atonu e lei oo lava i le mea o loo faafinagaloina ae faamalamalama atu, o le galuega lea toeitiiti lava maua le 2 masina o i ai le afaigaluega. E pei la o le atugaluga, afai o le a tai lua masina e fai ai le ala galue, o lona uiga na o le 6 ala galue e ono mafai i le tausaga. O le ala lea ua ou toe faaopoopo atu ai faapea ona o le vaai ina ia lava ma faataunuuina taumafaiga a le Matagaluega mo le galueaiina o auala galue. O lau toe faaopoopo atu lea, ae sei toe tagai i ai le Matagaluega poo le a le tulaga e ono mafai ona fai, ona toe fesootei foi lea ma le tama matua.

Lau Afioga i le Fofoga Fetalai, e leai se lisi o ia te au. O le Afioga foi i le alii faipule sa Minisita foi i le taimi ua mavae. Atonu foi e faigata ona ou avatua se lisi i lumamea nei e avea ma mea e atagia ai foi taumafaiga a le Matagaluega mo le agai i luma.

Afai e finagalo malie, e maua le avanoa e mafai ai ona oo atu e tagai i le lisi ma faamalieina ai.

Ua ou oo atu i mea tau eletise. Sa taua e nisi Sui le nofoaga o le Malo e pei ona i ai i le taimi ua mavae i Savaii ma Upolu nei. E i ai le fuafuaga i le itu o Asau ma le itu o Faasaleleaga e tatau ona oo atu i le faaiuga o le tausaga a sau i le 1977 ua maea ona faatino ia fuafuaga.

E faapena foi i Upolu i le alu atu i Mulifanua e tau i Falelatai e lavea ai ma le alu atu i Letogo e tau i Falefa. O ia vaega sa i ai le vaegatupe sa faatagisia i le taimi ua mavae ma ua i ai nei le ioega a le Faletupe e pei ona maua mai ai lea vaega e faataunuuina ai le fuafuaga. E i ai le talitonuga e tatau ona maea i le faaiuga o le tausaga, ae oo atu i le faaiuga o le 1977, poo le amataga o le 1978 ua mafai ona faaogaina.

E mafai ona ou faamalamalama atu i le mamalu o le Maota, o le faatanoa lea sa fausia i le afioaga o le alii faipule mo suesuega pe mata e lava ma totoe se suavai aua le fuafuaga a lea Matagaluega o eletise mo le agai i luma e pei ona silafia, masalo pe atoa se 5 tausaga o tau faamaopoopo ia tulaga ina ia mafai ai ona iloa e le Matagaluega poo le a se mea e tatau ona fai. O lea la e faamalamalama atu ai faapea, o lea faatanoa e mo suesuega mo le agai i luma o le moli eletise.

Lau Afioga i le Fofoga Fetalai, o le tulaga lea e pei lava ona ou fai atu, o nei fuafuaga uma na maea ona fai i tausaga ua mavae. O le faataunuuina la o nei fuafuaga e le o aafia ai le motu e pei ona talosagaina e le Sui.

E lei maua i ai se fuafuaga a le Matagaluega, ae tuu maia le finagalo sei matou feutagai foi ma le Matagaluega, ona maua ai lea o se tonu.

Le Fofoga o le Fono, e muamua ona ou tali atu i le fetalai a Manuleleua. O ia tulaga e pei ona taua sa ou taua lava ona o galuega ia e faatino i le taimi nei. O nei foi fuafuaga o fuafuaga na fai mai ma pasia i le tausaga ua mavae, ma e lei taua lava se isi vaega e le o i ai ni alagatupe. E pei foi ona silafia, o le Matagaluega lenei e faataunuu ai fuafuaga, ae le o se Matagaluega e aafia tele i le saili mai o tupe aua le faafoeina o galuega fuafuaina.

O le faauilavea a Seuamuli ou te faapea atu ai, o le tala lenei o le Tala Faaopoopo o le Tupe, ae le se Tala Autu na pasia ia Novema i le tausaga lea. O lenei la fuafuaga, ia e na ona ou taua lava galuega o loo taumafai le Matagaluega e faatino. Ae faafetai atu foi i le Sui ona ua laga mai lea vaega. Atonu o le a sei vaai foi ma tagai lelei i ai le Matagaluega, poo le a se fuafuaga o le a mafai i ai mo nisi foi alaafaga poo nisi itumalo o le motu i Salafai, atoa ma le motu i Upolu.

Faafetai i le faauilavea a Toailoa. O ala galue e le o maua poo i ai le nuu lea i le lisi o ala galue e pei ona ou taua. Ae o le a sei ou vaai i ai i se taimi ona maua atu lea o se tali i le Sui.

O le tulaga i le faauilavea a Mapuilesua, ia o loo i ai ni vai ua taua e le Sui a o loo fai i ai ni fuafuaga a le Matagaluega i le ono tatau ona fai, ma o le a faatino i se taimi o i luma. E le mafai ona faatuina i le taimi nei ona e lei lava se malamalamaga i ai o le Matagaluega.

E tóatele ni sui sa tuuina mai ni faasea, ma ou te manatu e faamalulu atu ai ona e i ai lava le vaitaimi e le maua ai se suavai. O le tele lava o alaafaga e lava ma totoe le suavai o loo faaogaina. O le mea la lea o loo fai ai nei ni fuafuaga i le totoi ma le aua le

Saunoga Faataupou a Sui Usufono 1976-1978

totogia, ae ou te manatu lava o ē lava o loo latou mauaina le suavai ua tatau pea lava ona totogi.

O le isi vaega sa taua e nisi Sui, o le vaegatupe lea mo vai e faapea o loo i ai i totonu o le Tala o le Tupe. Ou te lei matua mauaina se mea faapea i le Tala Faaopoopo lenei o le Tupe poo le Tala Autu i aso ua mavae; ae atonu o le a i ai se fuafuaga i le Tala Autu o le Tupe mo lea tausaga. O isi itumalo e i ai Siumu o loo i ai lava le fuafuaga a le Matagaluega, afai tatou te galulue faatasi ma tatou tauave faatasi le avega i lea vaega, e le taumate o le a manuia fuafuaga ma o le a mafai ai ona maua se suavai i soo se taimi. Atonu o le a mafai ona i ai se feutanaiga ma le itumalo ma o lea foi e lei matua mautu lelei ai i le Matagaluega e faatino.

Lau Afioga ona o se fautuaga i le itumalo o Falelima ma Neiafu. E pei ona silafia sa i ai le fuafuaga i le vai e taumafa ai ia le falelua o Falelima Neiafu. Peitai ane ua le talafeagai ai ona ua tóatele ua maua le suavai a ua le mafai ai ona oo mai i le itu i luga e i ai Falelima ma Neiafu. O lea foi ua i ai le fuafuaga o le a fai se fesootaiga ma alii ma faipule ina ia taumafai le isi vai ina ia faamanuiaina ai fuafuaga mo le vaitaumafa o lea itumalo.

O isi vai sa taua e nisi Sui, o le vai lea i Palauli i Sasae. Sa ou tali atu ai i le taimi ua mavae o loo fai ai nei fuafuaga ae lei maua se tonu maoti.

Sa taua e nisi Sui le vai lea i le agai atu i Sisifo o Apia. O le tasi lenei vaitaumafa ua atoa nei le 6 tausaga o taumafai lava e le Matagaluega. Sa taumafai lava i le vaitaimi a o i ai le Afioga i le Palemia poo Tupuola ma e oo mai lava i le taimi nei e lei faataunuina ona o loo i ai mafuaaga. Ou te folafola atu i luma o le mamalu o le Maota, e lei lagolagoina e le tele o afioaga le taumafaiga a le Matagaluega. Ua i ai nisi afioaga ua sagai mai e fai faatasi ma le Matagaluega a o isi afioaga e lei maua mai lava se fesoasoani.

Lau Afioga a le Fofoga Fetalai ma le mamalu o le Maota, ou te fia tali atu i le faafesili a le Sui mamalu. O le tulaga i pili ia ua tufa atu, e i ai lava le talitonuga o le Matagaluega, afai lava e faamaonia tulaga e le o maua se suavai, e mafai lava ona fetuunai ma le Matagaluega. A o ē lava o loo taumamafa ma maua le suavai, e tatau lava ona fesoasoani mai foi i le Malo i se vaegatupe e taumafai ai ana galuega tau atiae. O le tali atu lea e tusa o le fesili.

Faafetai i le faafesili a le Sui mamalu. Ou te tali faapea atu, o le lisi o loo i ai, masalo e pei o le Tusi Paia le tele o talosaga o loo i ai nei. Ou te lei vaai i ai ae atonu o loo i ai le igoa o le alaalfaga o le Sui lea, ae le o i ai i le lisi o le faagaoioiga e pei ona i ai

le sefulu o Upolu ma le sefulu foi o Savaii. O lea la e faamalamalama atu faapea, o loo tele lava talosaga ae na o le sefulu lava ala galue o Upolu, sefulu Savaii e mafai ona galueaiina i lenei vaitaimi. E le mafai la ona sili ane i nisi fuafuaga a le Matagaluega aua e faatatau lava i tupe ua tuuina mai e le Fono Faitulafono i le tausaga ua mavae e faatino ai ia galuega.

Faafetai i lau Afioga a le Fofoga Fetalai, ou te taumafai e tali atu i fesili a Sui mamalu. O le fesili a le tofa a Fatialofa e uiga i le lisi. Pei lava ona ou taua, o lenei lisi sa faaupu mai lava i le tausaga ua mavae. O loo i ai lava le lisi pei lava ona silafia e le mamalu o le Maota, e pei foi ona ou tali atu i le Sui mamalu o Tofilau. E mafai lava ona tagai i ai i lea lisi.

Ua ou tali atu i le Sui mamalu o Leiataua. O loo ua uma ona saili i Mulifanua ua maua le suavai. I le taimi nei la ua maea ma ua uma le eliina o le vai a o loo fai nei suesuega poo le a le malosi o le vai, ona faatoa mafai lea ona tusa ni pamu e talafeagai mo le malosi o le suavai aua le faatinoina o lea galuega. O lea la ou te faamalamalama atu ai faapea i Sui mamalu, ua maea na galuega ma o loo faatali nei ni suesuega e tusa ai ma le malosi ma le tele o le suavai, ina ia fuafua i ai nisi e aafia i lea galuega. Masalo lava pe o le faaiuga o le tausaga poo le amataga foi e maua ai se tulaga maoti.

Ou te tali atu i le Afioga a Vaai. I le tulaga o le faagaoioiga o le viliina o vai, ou te faaali atu ma lou fiafia lava, o le masina a sau o le a oo atu ai le faagasologa o le viliga o vai i le alaalfaga o le Sui mamalu pe afai ae tusa ai ma le faamoemoe o le Matagaluega. I se vaitaimi o le masina a sau o le a faagaoioi loa lea vaega pei ona sa faia i Upolu. O lea la ua maea le isi vaega o Upolu ae ua i ai le fuafuaga ua sii atu nei i Savaii.

Faafetai atu lava lau Afioga a le Fofoga Fetalai. O lau tali atu i le fesili a le Sui mamalu o Leiataua e faapea, o lenei ua fesootai lava le faataatiaga o paipa, ae afai lava o le a faamanuiaina taumafaiga o loo i ai i le vai o loo agai atu nei i Sisifo mai Apia, o le a faapea lava ona faamanuiaina ai ma le agai atu i le alaalfaga o le Sui mamalu pei ona atugalua ai.

O le Sui mamalu o Unasa na ia faafesili mai pe i ai se auala e mafai ona silafia ai e le Minisita vai o loo le suasua poo le maua se suavai? Ou te faapupula atu e faapea, o loo i ai lava le aufaigaluega i Savaii latou te tagai lelei i ai ma oo ifo foi i ai se faatalosaga a ni Sui i ē o loo iloa lelei e le o maua se suavai, ona o atu lea o le aufaigaluega e matua vaai lelei ma mautinoa ai e le o maua se suavai. O lau tali atu lea i le Sui mamalu.

Saunoga Faataupou a Sui Usufono 1976-1978

O le vaega la o le vai i Apia, sa i ai isi Sui sa talosagaina mai le tulaga o le suavai e le o lelei ma mama i Apia. O lea ou te faamalamalama atu ma faapupula atu i le Maota, o loo ua i ai nei gaoioiga a le Matagaluega e faatino ia fuafuaga i se vaega e faamama ai le suavai faatatau mo le Falemai atoa ma le taulaga i Apia. O lea fuafuaga e ala mai i le meaalofa a le Malo o Niu Sila, ma o le taimi nei o loo faatali meafaigaluega ma totoga o ia vaega e faatino ai lea galuega. Masalo pe o se vaitaimi o le faaiuga o le tausaga o le a taunuu mai ai ma faatino ai ia fuafuaga. E i ai le isi Sui mamalu sa oo mai ma faafesili i tulaga o tane i Tanumalala, ma o loo i ai lava taumafaiga a le Matagaluega e sailiili tonu se tulaga ma se vaega tonu e tatau ona tu ai pe faavae ai lea galuega.

E i ai se Sui mamalu sa faafesili mai i se fuafuaga a le Matagaluega e uiga i le alavai i Vaisigano, ma ou te faapupula ma faamalamalama atu i le Maota; ua i ai nei ma ua amataina i le vaiaso na tea nei fuafuaga e faaloloto ma tau faasaosao ai le alavai i Vaisigano, ina ia faaitiitia ai le pa o le vai mai ona autafa ma faaleagaina ai isi mea aoga a ē o loo alaala e latalata i lea vai.

Sa i ai le isi Sui sa faafesili mai i se faiga e mafai ai ona faalaulelei le malae o le aoga i Vailima. Ou te faapupula faapea, e ao lava ina faaoo atu i le Matagaluega e feutagai ai ona o ia tulaga ma e tatau lava ona totogi se vaegatupe e faatino ai ia galuega.

Sa i ai le Sui mamalu sa fesiligia le tulaga o loo i ai le fale o loo taunuu i ai femalagaiga i le uafu i Salelologa ma Mulifanua. Ou te faasilasila atu faapea, o le faaiuga o le masina nei ua tatau ona faaaogaina ma maea ai le fausia o ia fale vagana ai nai mea laititi o loo faatali mai mo nuu mamao e lei taunuu.

E i ai Sui mamalu sa laga mai le tulaga o loo i ai le Maketi tuai e tusa ma le tulaga o pasi. Ou te faasilasila atu faapea, e oo mai i le taimi nei e lei i ai se fuafuaga a le Malo i lea tulaga aua e le mafai ona fai i ai se galuega maumaututu ona e le iloa poo fea e faaoga e le Malo e fai ai le tulaga o pasi. O le ala lea ua le toe i ai se fuafuaga a le Malo e faatatau i lea vaega. Ona pau ia o nai mea sa fesiligia ai lenei Ofisa e Sui mamalu ma ou te faafetai atu lava.

Lau Afioga a le Fofoga Fetalai, e ese le alii Minisita lea e vaaia, o le Minisita lea o le Gataifale. Atonu e i ai se taimi ona faasilasila atu lea e le Minisita o le Gataifale. Ae faaiu atu lau tautalaga i lou faapea atu, e talia lelei e le Matagaluega fautuaga ma timaiga foi sa tuuina mai e Sui mamalu, ma e taumafai lava lou nei tagata ma le Matagaluega e faia se mea e gata mai ai lo matou mafai i luga o

mea ua fautuaina e lenei Maota mamalu. O lea e faagata mai ai sau upu ma e faamalie atu foi, a i ai se mea ua sese, ia pau o le tagata vaivai, a o le agaga e tumu i le fia tautua ma fia auauna mo le tatou Malo. Ia manuia le Fono.

Tofa LIO TUSIOFO



Itumalo Faaalaalafaga:

Siumu

Filifilia:

9 Novema 1978

Faatauto:

14 Novema 1978

Lauga Faataupou:

29 Novema 1978

Faafetai mo le avanoa lau Afioga i le Fofoga Fetalai. Ona o a'u o le sui usufono fou i totonu o lenei Maota, e tatau ia te a'u ona amata faapenei la'u lauga. Lau Afioga i le Fofoga Fetalai. Lau Afioga i le Palemia ma le Kapeneta, Sui Usufono o le Palemene o Samoa ma le Ofisa o le Fono Aoao Faitulafono.

Faafetai i le Atua ona o lenei tauaofiaga a Samoa ma lona Malo, ua tatou laulua fesilafai i lenei taeao i le Lagi e mama talu mai le malologa o le aso 29. Ae ui o lea, sa tatou le iloa le finagalo o le Atua i sui usufono e to'alua o lenei Maota, o Mapuilesua ma Timu Kolio ua tuua le malo ma le fiafia, a'o faagasolo le tatou fonotaga mulimuli mo lenei tausaga. Ia 'aua tatou te soona faanoanoa ona o lea itu, ae lafo i le Atua o tatou alofa ma faamafanafanaga mo i la'ua ua tuumalo ina ia mafai ai e Ia i Lona lava alofa ma le agalelei, ona tafiesea le loto faanoanoa ua ufitia ai lenei Maota.

Ae mo la tatou galuega i lenei taeao, e momoli atu la'u faafetai ona o le tele o le galuega ua faia. Malo lava. I le tolu tausaga talu ai, sa silasila Samoa i le vao o galuega ua mafai ona faatino, e ui i fita ma faigata. O se galuega fita le fai o faaiuga i totonu o lenei Maota. Sa faigata ona toe talatala le upega ona ua lavelave, ae ona o le fesoasoni mai o le Atua, o lea na faigofie ai mea uma e pei o lenei taeao pe a tatou toe tepa i fita o tausaga ua mavae.

E momoli atu le faafetai ma le faamalo i lau Afioga le Fofoga Fetalai ona o lau matafaioi i totonu o le Fono Aoao Faitulafono. E faapea foi ona momoli atu le faafetai ona o talosaga a le Ao Mamalu o le Malo ma lona Sui, le paia o Samoa i ona Aiga ma Tama Aiga, Tumua ma Pule o loo faatinoina o latou tiute ma le filiga. E lelei ona faafogafoga mai le atunuu i galuega tetele ua mafai ona faatino. Faafetai tele lava. Atonu o loo i ai isi

Saunoga Faataupou a Sui Usufono 1976-1978

galuega e lei mae'a, peitai o ia galuega e mana'omia le 6 tausaga e faamae'a ai. O lea la o le a faamuta taualumaga a le Fono Aoaofa faatulafono ae ua 'ou matauina mai le tele o lipoti ia, e le mafai ona tagofia i totonu o le tolu tausaga. Ona o lea itu, ou te fautuaina ai le pulega ina ia tuuina atu i lenei faigamalo se vaitaimi e 6 tausaga.

E muamua lava ona ou faafetai atu i le Minisita o le Soifua Maloloina ona o lo tatou Falemai Tele i Motootua atoa ai ma le aufaigaluega o galulue ai. Mo le Falema'i i Siumu, maumau pe ana faapea o le Afioga a Tofilau Eti lea o loo Minisita ai e pei foi ona sa Minisita ai i taimi ua fano. Sa ma galulue faatasi i le atiina a'e o le falemai o Falealili. Ua uma ona tuli'ese ma'ua talu mai lena taimi ma o lo'o ma galulue faatasi pea mo le falemai o le itumalo o Safata ae ua uma ona ma faia se galuega tele mo le faavaeina o le falemai o Falealili. Ua mautu ma lelei.

Faafetai tele i le sui usufono. E le afaina ia te a'u lona tete'e mai, ae o lea ou te faamatala atu le mea moni sa talanoaina i lea taimi. Masalo o le faaupuga talafeagai e mafai ona faapea na faataape e le Minisita lo matou itumalo mai Siumu i Safata, ae malolo Saaga. O le tulaga lava lea o loo i ai nei, ae le faapea na pogai ona o so matou mana'o. Ua uma ona ou tali atu i le fautuaga a le Minisita i lea taimi, ma na matou malilie ina ua finagalo malie i ai. O le mea lea, faato'a matou taunuu atu i Safata a ua eli le faavae o le falemai fou, ona sosoo ai lea ma le tatalaina ma isi lava sauniga uma. I le avea la o a'u ma sui usufono i lenei taimi puupuu, o lea e tatau ai ona 'ou talosagaina le Minisita ina ia tuuina atu se foma'i tane e nofomau i le falemai i Siumu ona sa tuuina atu e lenei itumalo se tautua aoga i nei falemai e lua o Falealili na Safata.

E taua Siumu ona o le mea moni e faapea ua uma ona faamaninoina Siumu o se itumalo mavae. E faapena foi Falealili ma Safata i le tulaga o loo i ai. A nofo se tamaitai tausimai i Siumu e ono tulai mai ai ni faafitauli. A tulai mai ni faalavelave faafuase'i ma tuuina atu ia te ia, e leai se mea na te mafai ona fai vagana ai le tuuina atu i se fomai o le falemai i Falealili, ma afai e le o i ai le fomai, ona faanatinati mai loa lea o ia gasegase i Apia e togafiti ai mo le faasoina o latou soifua. O le aano moni lena o la'u talosaga i le Minisita ina ia silasila toto'a i ai. O falemai e lua i Falealili ma Safata ua mautu., ae o le Falemai i Siumu ua na o le tamaitai tausimai o loo i ai. E ui lava la ina puupuu se faamatalaga, ae o lea ua amata ona 'ou faataavale atu le polo e ala i le fofoga atu o finagalo o lenei itumalo.

I le Afioga a le Minisita o A'oga, ou te fia faailoa atu o loo loma se fonu a lo matou itumalo e faatatau i se falea'oga fogafale lua. O se taumafaiga lea ua matou faia e faaitiitia ai faafitauli o loo feagai ma matou fanau e ala i le savavali i Falealili i aso uma. O lea faafitauli o loo feagai ma le fanau ua latou le maua ai se taimi faaopoopo e fai ai meaa'oga i le aiga pe fesoasoani foi i tiute faale-aiga pe faale-lotu. Sa matou vavaai foi i se tasi faiga e pei o se taavale e feoa'i ai. E totogi e a matou fanau o loo i le Form IV ma le Form V le ta'i \$8 i le masina mo pasese i pasi e ese mai totogi o latou pili a'oga i le ta'i 3 masina e \$6. Ua matou matua lagona le 'faigata'. O lea matou te talosagaina ai le Afioga i le Minisita ina ia tuu mai ia i matou se avanoa e faatu ai vasega Form 3 ma le form 4 i la matou lava a'oga i le taimi nei, e na o le Form 2 lea e o'o i ai matou. O lo matou faamoemoe ia faamae'a lo matou falea'oga fogafale lua i le amataga o le tausaga fou faale-a'oa'oga. Matou te talitonu o le a e talia la matou talosaga ona o le to'atele o a matou tamaiti e le o a'o'oga, ona o le toatele o matua ua fiu i le finau atu i uiga le talafeagai ma totogi ia ua fai ma ma'a faalavea aao i le tulaga auiluma o le vaega toatele o le fanau. O le a matou lafo atu pea lenei mataupu i le Afioga i le Minisita ina ia silasila toto'a i ai mo le manuia o Samoa aemaise ai lava le atunuu lautele ma o tatou itumalo.

Lau Afioga Lilomaiava, aisea ua leai ai se fesoasoani a le Malo mo falea'oga? E le gata i le leai o se aiaiga aloa'ia e mana'omia ai lo matou tausia ma vaaia faia'oga, ae ua una'ia lava o matou loto e fai lea tulaga e tusa ai ma a tatou aganuu. O loo matou tausia a matou faia'oga, ma o nisi taimi, ua matou faatuatua'i le aufaigaluega. Peitai, e leai se fesoasoani a le Malo. E ui lava ina leai se aiaiga aloa'ia e noatia ai matou mo le tausiga ma le vaaia o faia'oga, ae ua faamalositia o matou loto ina ia faapea ona fai ona o a tatou tu ma agaifanua. O lea e tausi a matou faia'oga, ma o nisi taimi, e pei ua matou faatalale ia matou faife'au, ae leai lava se fesoasoani mai le Malo. O le mea lea lau Afioga, matou te talosagaina ai se fesoasoani tau tupe mo la matou a'oga fou lea o le a amata pe a tuua a'oga. Matou te le iloa pe e te toe afio mai i le tausaga fou, ae tatala maia se fesoasoani mo la matou a'oga fou.

O le a o'o atu se faamatalaga i le Afioga i le Minisita o Femalagaiga. Ou te fia tautala i le \$250 o tupe alu tau faigamalaga lea e mana'omia e Niu Sila mai tagata Samoa e malaga i fafo. E sa'o lelei le saunoaga a se tasi o sui usufono ua mavae e uiga i amio faale-lalolagi nei a Niu Sila; ae o la'u tala e faapea- o le amio faale-lalolagi nei a Niu Sila ua

Saunoga Faataupou a Sui Usufono 1976-1978

noatia ai lima ma vae o Samoa. O lenei la aiaiga faapitoa, e le taitai ona afaina ai le 'au-maumea, ae matua afaina ai le tagata mativa. E leai se mea e mafai ona tatou faia aua e pule lava lena malo. Afai e le mafai ona 'ou totogiina, o loo i lena malo le pule e taofi ai a'u leaga ou te mativa. Lau Afioga, o lenei faafitauli e tatau ona matua iloiloa i le loloto. O le suiga la ua fai i lenei aiaiga, e mana'omia e Niu Sila se faamaoniga tusitusia o le tausiga mai se tagata e nofo i Niu Sila. Ae mo le faamalalamaina o lenei mataupu, e mafai e o tatou tagata i nei ona faaoga se faiga tau faasese e sao ai. O le mea lea e fautuaina ai lava le toe silasila toto'a ia tatou sootaga ma le tatou uo, ona ua foliga mai ua se'e ese ma tatou.

Lau Afioga i le Palemia, o le mataupu e uiga i Ata Tifaga. E lelei e pei ona fuafuaina e le Malo i ana fuafuaga aoao mo le atiina a'e. Ae ia te a'u lava ia, ua faia e o tatou tupulaga talavou se solitulafono aua ua fetuleni mai i Aso Gafua ma Aso Lua o vaiaso taitasi i Tifaga i Apia ae le o e galulue. O tupulaga talavou nei e mai nuu i tua, e aofia ai foi ma o tatou itumalo. E o mai a vaega e peiseai e o e faigaluega i Apia, ae o i tifaga; a uma le tasi ata sosoo ma le isi ata ma faaalu ai lo latou taimi i mea e leasi se aoga. O loo feagai pulenuu ma faafitauli tau le faamaopoopoina ma le faaogaina tatau o lenei malosi mo le manuia o le atunuu e ala i atiina a'e tau faatoaga. Ae ua na o le alu lava o le talavou i le tifaga. O le tifaga faasolo atoa i le vaiaso ua matua faateleina ai le leaga. E a pe a tuu na o le lua aso i le vaiaso e o ai i le tifaga? E aoga ata tifaga mo a latou a'oga. E tatau ona tatou maua mai ia i latou ni mea lelei, ae lafoa'i mea e le mana'omia.

O le isi faatosina o ata tifaga o faasalalauga i Leitio fai mai- o tamaiti e i lalo ifo o lea tupulaga ma lea tupulaga, e le faatagaina. O le faauigaina o sea faasalalauga e faaosofia ai tama, ae fe'atai ai teine aua latou te iloa le pogai. O le mea lea, ua tatau ai ona faasa ia ituaiga o ata tifaga. Talu lava ona tatou fananau mai, ua tatou iloa lelei lava le uiga o ia ituaiga o ata tifaga. O ata tifaga ia e tatau ona faasa ona aumai i totonu o le atunuu, poo le matua faasa lava mai Samoa. O le itu le lelei, e faaali nei ata tifaga i le Aso Sa. E le umi lava ona uma le lauga o le afiafi, ae vaaia loa ni piki'apu se fa'ua tumu i tagata, ua alu ane faanatinati i ata tifaga ia ua faatulaga e faaali i le itula e 8 i le po o le Aso Sa. O le ata muamua e vaaia e nei tagata o le a faaleaogaina ai itu lelei o le lauga a le faife'au. O le mea mata'utia e uiga i lenei tulaga ona o nei vaega o tagata e masani ona ta'ita'i e a'oa'o fesoasoani o ekalesia. O le mea lea e talosagaina ai le Komiti Pasi

Ata ina ia alofa ma silasila i le tulaga faafitauli o ia ata tifaga. O le itu ua tatou iloa, o ata tifaga nei e maua ai tupe, ae o tupe palapala.

O le a 'ou te tali atu i le fesili a la'u uo i le taimi e tatau ai. . Ae o lo'u lava lagona, e matua mata'utia lava nei ata tifaga.. Ou te faatusaina i se fatu o se la'au oona ua pa'u i le eleele lafulemu, e vave ona totogo ma lausiusi. O le taunuuga tonu lena o ata tifaga nei ia tatou fanau le ta'usalaina; o le afaina o i latou o le a vave ona maua'a e pei ole afi musaesae e le matineia. O ata tifaga nei e fai i le tulua o po ma ao, ma e tumutumu i ai tagata. Peita'i, ua latou faatupu se leaga tatou te le o iloa i mafaufau o a tatou fanau, o le lumana'i lea o Samoa. I le faaaloalo e tatau ai i le paia o le Maota, o nai o'u mafaufauga na e uiga ile mataupu.

Ou te le fia ta'ua nisi lava mataupu, vagana ai faamanuiaga a le Atua i felafolafoaiga a le Maota; e le o toe umi ae faamuta, ma o le a le toe maua se avanoa e fai ai se sao e fesoasoani ai i le Fono Aoaofaitulafono. Faamolemole le Atua e, o vaega o totoe o le galuega a le Maota lea o le a faamae'a e le Malo, ia faamae'a e tusa ai ma le finagalo o le Atua.

E faai'u atu ai, ia mama le Lagi i lau Afioga i le Fofoga Fetalai o le Maota, le Afioga i le Palemia ma le Kapeneta, aemaise o le mamalu o sui usufono o le Palemene, ma ia fesoasoani mai le Atua ia te a'u, ma lo'u toe foi mai i lea tausaga. Faamanuia atu le Aso i le Fono Aoaofaitulafono.

Tofa MANULELEUA FOUVALE



Itumalo Faaalaalafaga:

Faleata Sasae

Filifilia:

5 Mati 1976

Faatauto:

18 Mati 1976

Lauga Faataupou:

5 Aukuso 1976

Lau Afioga i le Fofoga o le Fono, ou te faafetai atu mo le avanoa ua tuuina mai i lou Sui ina ia mafai ai ona tuuina atu se sao o lou itumalo o Faleata i Sasae. Ou te faafetai atu i lau Afioga ona ua ou mautinoa nisi o taleni ua avatu e le Atua i lau Afioga, i le agavaa ma le poto faapitoa e tusa ai ma feau e taitaiina ai le Maota i le mamalu o Samoa i ana fonotaga. E le seluselu atu i lau Afioga, ae pau lava lea o le mea ia tului pea e le Atua lou soifua ma ia foai atu pea le tofamamao ina ia taitai i le amiotonu le Fono mamalu a Samoa.

Faafetai atu foi ina ua tofia lau Afioga Tupuola Efi e avea ma Palemia poo le taitai o le tatou Malo i

Saunoga Faataupou a Sui Usufono 1976-1978

lenei vaitaimi. E le o i le tagata se faamanuiaga a o le Atua e faatuatua i ai le atunuu aua o Ia e aumai ai manuia uma; o Ia e aumai ai le moe ma le tofa e mafai ona tauaveina ai le galuega mamafa. E mamafa le avega e fita foi le ala a o le Atua e māmā ai mea uma i lana taitaiga ma lona faamalosi mai i lau Afioga. Faafetai atu foi i le Aiga Kapeneta, e pei ua ou talitonu i lau vaavaai atu ua tonu pea lo outou tofiga. Ua outou fofoga mataalia i lau vaavaai i faiva ma galuega ua tofia i ai outou e le Afioga a le Palemia. E ui lava ina e lei aliali mai se mea e mafai ona outou fai mo le manuia o le atunuu, ae ou te lagona e tele lava se laasaga i luma o le atunuu e tusa o lo outou taumafai. E faatalofa atu foi i le mamalu o Sui o le Palemene.

Lau Afioga, ua tele lava nisi o itu taua ua laga e Sui o le Maota e faatatau mo le atiina ae o Samoa ma lona lumanai. Atonu a ou toe tautala i nisi o ia mea, ua le tonu lea ia te au, ae afai foi o le a lavea i sau tautalaga i lau Afioga o nisi o itu ua uma ona laga e sui, e le taumate ona o le taua tele.

O le itu muamua, e peiseai e tatau ona fai i ai sou mafaufauga vaivai, o se tasi lea o itu sa laga mai e nisi o Sui ua leva ona tautua i totonu o le Maota o le atunuu. Sa fetalai i ai le tofa ia Tofilau faapea foi ma le Afioga ia Vaai, sa faapea mai nisi o a la faaupuga na aumai i luma o lau Afioga ma le mamalu o le Maota. O se vavalalata lea o le Malo ma nuu ma itumalo mo le tau atiina ae o galuega ma polokalame fai o le tatou atunuu, aemaise lava lona atiina ae. Ou te nofonofu pea lava lau Afioga ma mafaufau i nisi taimi, pe mata o uluulugatasi le finagalo o le Malo i lea tausaga ma lea tausaga e tusa i ana fuafuaga ma lona atiina ae ma finagalo o loo oo ifo i lagona o nuu ma itumalo. E mafua ona faapea ou mafaufauga lau Afioga, poo fea e oo i ai le malosi o le a foi le mauuluga o se taumafaiga i le Palemia ma lana Kapeneta, o le a foi se tomā i lau Afioga ma le Maota lenei, ae afai e le galulue faatasi ma le pule i alii ma faipule i nuu ma itumalo, e galulue fua le atunuu lenei. O lea la sa ou mafaufau ai faapea pe mata o le a se finagalo o lau Afioga i le Palemia. E ui lava ina ua ou iloa ua e tofia se isi o Komiti taua lava e faamoemoe e toe silasila totoa i le itu lea, ae ou te manatu e pei e sili pe a ou faamalosi lea finagalo ina nei ave ave mate lau lamepa ae le faataunuuina lea faamoemoe taua; aua e pei ona ou fai atu, afai e galulue faatasi le atunuu lenei ina ua galulue ona itu uma i le mamalu o le atunuu faatasi ma le mamalu o le Maota lenei, e leai se mea e mata o le a faigata.

A ou mafaufau i faigamalo i ona po ua mavae, na amata ona pulea le Malo o Samoa e le Malo o

Siamani. O le alii fomai o Dr Solf sa avea ma Kovana o Siamani i na ona po. A ou faitau ifo i tusitusiga o tualumaga o Tala Tuufaasolo o le atunuu, ua avea ma mea uliuli o ona fofoga le pule a alii ma faipule. Atonu e lei faapea na fai fua e lea alii lea uiga ma lea amioga, aua foi, atonu sa silafia e lea alii Kovana, afai e le lagolagoina se finagalo o le Malo e alii ma faipule o le atunuu e maumau lo latou malosi. Ina ua oo mai i ona po o Niu Sila, o le tulaga lava lea sa i ai. Sa vaelua atu e le Malo o Niu Sila nisi pule e tauaveina e alii ma faipule o itumalo ma nuu ina ia mafai ona lagolagoina pulega a le Malo tutotonu. O se mea e sili ona ou faanoanoa ai ona ua tulai mai le Malo Tutoatasi o Samoa i Sisifo ua le taualoa le lautele o le atunuu i lea tulaga, a o le foliga lea ua aliali mai, a tau le Malo ua na o le Fofoga Fetalai ma le Palemene, o le Palemia ma lana Kapeneta ma Matagaluega a le Malo. O le tulaga lea ua i ai nei e peiseai ua avea nuu ma itumalo ma le mamalu o Samoa o ni auauna ae avatu i ai tagata asiasi a le Malo e asiasia. O lea ou te mafaufau nei i le galuega o loo fai e tagata ia o le Ofisa o Faatoaga o loo taua o Alii Asiasi. Pau lava le latou galuega o loo fai i le taimi nei o le o e asiasi. E peiseai o latou ua i ai le pule, a o itumalo ma nuu o ni tagata faigaluega ma ni tagata tautua, a o le mamalu o le atunuu lea e i fafo. O lea ou te mafaufau nei i Alii Asiasi o le Ofisa o le Soifua Maloloina. Ona pau foi lea o le latou mea o loo fai, na ona o e asiasi le atunuu, vaeatu lava le mamalu o Samoa. Ua fai o ni tagata e faigaluega a o le latou pule o le Palemia ma le Kapeneta ma a latou Matagaluega.

Ou te tautino atu Tupuola ma le Malo fou faapea foi le mamalu o le Palemene, afai o i ai se finagalo ina ia faagaetia ma gasolo i luma le atunuu lenei, e mafai ina ua lagolago mai le pule a nuu ma itumalo i alii ma faipule ma le mamalu o le atunuu. Ou te mafaufau atonu pe le o se mea e afaina ai le manuia o Samoa pe afai e faamatuu atu e le Malo tutotonu nisi ona tiute o loo galue ai nei ina ia tauaveina e alii ma faipule e pei ona sa i ai i ona po ua mavae. Atonu poo lea foi itu e oo ifo ai le lagona i finagalo o le atunuu ma faapea ifo leai, e le na o latou le tatou Malo. O lea foi ua tuuina mai le tatou avega e tauave, o si mea itiiti mai iina, o si mea itiiti ma iinei, o le a faamanuia ai e le Atua ia Samoa.

Ou te mafaufau ai i le Ofisa o Faamasinoga ma Suafa. Atonu o loo silafia lelei e le mamalu o Sui o le Maota lenei ma lau Afioga, o lenei Matagaluega, e faaulu le talosaga i le 1976 ae faatoa fofoga i ai le Faamasinoga i le 1977 poo le 1978. O lona uiga e tuai ona ua tele galuega a lea Matagaluega. Ae ou te

Saunoga Faataupou a Sui Usufono 1976-1978

iloa foi nisi o galuega o loo faafeagai ma le Faamasinoga lenei, o ni mea faatauvaa lava e mafai ona auli ma faamafolafola, tulou o le upu to ia te au, i luga o le mamalu o pulega a alii ma faipule i nuu ma itumalo, a ua maumau ai taimi o le faamasinoga talu ai ona o lea ua taofi uma e le Malo tutotonu le pule, ae le amanaia le pule mamalu a alii ma faipule.

O se isi itu moni ou te mafaufau i ai lau Afioga, o le tele o nisi mataupu o tuuina mai i luma o le Faamasinoga lenei, e leai lava ma se faamasino agavaa na te silafia le tala tuufaasolo poo se igoa matai i totonu o se nuu, sei vagana i latou e fitoitonu i le suafa poo sea fanua atoa ma alii ma faipule ma tagata o sea alaalfaga, a o lenei o le a tuuina mai i luma e fai e nisi e le o silafia. A fai fai la ae sese, oi talofa! O ai a pa'ū i ai le mala lea? O ai a silasila i ai fofoga o le Atua i lenei itu? Atonu e faapea mai nisi o le Faamasinoga; atonu e faapea mai foi la nisi ua sese le itu tagi poo le itu tetee ina ua le lava a latou molimau; ae ou te manatu lau Afioga, ana sagatonu ona tufatufa le pule o le Malo o le a le taumate le faaitiitia o ia tulaga faafitauli.

Atonu o le mea lava lea e tasi e aafia ai foi nisi Matagaluega a le Malo. Ou te mafaufau i le Matagaluega o le Falemai. Sa masani ai ona tauaveina e Niu Sila le puipuiga o le tatou atunuu i lalo o le feagaiga ma Malo Afaatasi ma faatupe e le Malo le tau o le Falemai. E le gata i lea, e le mafai ona tuulafoaiina e le Malo tutotonu lana tiute tauave o le puipuia lea o itumalo taitasi i a latou galuega. O le taimi nei, ua aliali mai e peiseai ua matua tuulafoaiina e le Malo ona tiute. O lea foi e faafofoga lau Afioga, ua le na o lou Sui ua avatu lea mataupu i luma o le mamalu o le Maota, ae ua i ai foi nisi Sui ua talosaga mai ma le agaga maualalo ina ia alofagia e le Malo tutotonu lana tiute ma lana galuega faapitoa mo lea lava itu. O le tulaga foi lea ua i ai i le Ofisa o Aoga ma ofisa uma lava o le tatou atunuu. E peiseai ua na o le o lava e asiasi, poo faapefea ona faataunuu galuega i tua i nuu ma itumalo. A o le fesili, mata la o ia i tatou agaga o le atunuu talu ai ia faiga? Ou te matua tautino atu i lau Afioga ailoga o faapea. Atonu pe ala ona alo mai ona o le ava ma le faatamalii ma le aganuu masani, e pei foi ona faafofoga o saunoga se tasi o Sui i le aso ananafi i nisi alii asiasi na o le gagana lava i lalo o le pulu e masani ai ae o atu faafeagai ma le mamalu o alii ma faipule. Atonu pe mama ia te au lea itu, a o le fua aliali mai o le teena e alii ma faipule ma o le a solo i tua le atiina ae o le atunuu. O le mea tonu lea e peiseai o loo agai i ai lou mafaufau ma ou faapea ifo, lau Afioga i le Palemia ma le Malo fou, afai e mama i se finagalo ae le mafai ona tuua le leo o

Ioane e alaga pea i le vao ma teuteu le ala aua Samoa ma lona taeao. O le fautuaga lea ma le faaaloalo lava i lau Afioga i le Palemia ma le Kapeneta ina ia e silasila totoa i lea lava itu.

O se tasi itu ou te fia tautala i ai lau Afioga, o se itu foi ua uma ona laga e Sui mamalu. O le itu lava lea i eleele o loo umia e le Malo. E le o po se lilo e lua lava vaega ia o loo umia nei e le Malo; o eleele e umia e le Esetete Tausi ma eleele o loo umia i lalo ifo o le pule a le Minisita o le Matagaluega o Eleele ma lana Komiti. Ua saunoga le mamalu o Sui, atonu o fuafuaga foi ia i lau afioga i le Palemia ma le Kapeneta ina ia punou ifo Samoa e atiae laueleele o Samoa aua o lana meaalofa lea mai le Atua ma le faamoemoe ina ia tuuina atu ia lava i fafo fua o le laueleele o Samoa ina ia mafai ona lava ni tupe aua fefaatauaiga ma atunuu i fafo. Ae paga lea lau Afioga, talofa ai a punonou ifo Samoa a o lea ou te iloa e i ai nisi nuu ma nisi itumalo o le a le punonou. E le mafai ona punonou le Vaimauga, e mautinoa e le mafai ona punonou Faleata, o lea lava e silafia. E le mafai ona punonou le Aiga i le Tai e faapea foi ia Falelatai ma Samatau atoa ma nisi o nuu o le atunuu. Afai la e faataunuu nei e tatou galuega mo le atiina ae o le laueleele, o fea o le a faasino i ai nuu nei ma itumalo lau Afioga? Ou te lagona e faapea, o nisi o fuainumera e faamaumuina ma lipoti e sailia, ua mautinoa ai o le eka e tasi le povi ma niu o loo i le Esetete Tausi, atonu pe maua lava le \$100 i le tausaga pe sili atu foi. A o lou manatu ana fai e tuuina atu i se matai ma sona auaiga le eka lea e tasi latou te galueaiina i le tausaga, e le na o le \$100 e maua ai e le atunuu i le eka lenei ae sili atu i luga o le afe pe a ou fuafua i nisi o atiina ae e i ai le itu tau le talo, fai, atoa ma meaituaolo, tulou o le upu e to ia te au ma le mamalu o le Maota. O lea la e faapea ai lou taofi, e a pe a faia se fuafuaga e le tatou Malo fou ua tulai mai nei, aua afai tatou te faapalapala pea ma faatuutuu atu i nei tagata ma nei itumalo ua leai ni o latou eleele e le mafai ona le gaioi, tulou o le upu e to ia te au. E gaioi aua o la e fia ai. O lona uiga, o meaai e alu e gaioi o mea a le Malo o loo i totonu o laueleele ia. Ua mafua i se a? Atonu po ua faatamala tatou i o tatou tiute, aua o loo umia e la outou pule ia meatotino a lo tatou Malo.

Sa saunoga mai se tasi Sui i le aso ananafi ina ia tuuina atu avanoa tutusa e mafai ai ona tatou tauva agai i luma mo le manuia o le tatou atunuu. A faapefea nei ona tutusa pe afai e umia pea e le Malo nei eleele. Ou te manatu e le taitai uma eleele o le Malo pe afai e tuuina atu sina tai 100 eka i nuu ia ma itumalo aua o loo tele pea ma totoo eleele o le

Saunoga Faataupou a Sui Usufono 1976-1978

Malo, a o le itu e aupito sili ona taua, o lea o le maua ni mea e galulue ai tagata nei, ona le fai lea ma faalavelave i le atiina ae o le atunuu, a o le a fai ma faapoopoga o le malosi o le atunuu ina ia mafai ona agai i luma lona atiina ae.

Lua, o lea ou te iloa o loo tele nisi eleele o le Malo i Savaii. O loo i ai eleele i le va o Asau ma Falelima faapena foi i le eleele o loo i Salailua, atoa ma Vaiaata i Faasaleleaga. E 18,000 eka o loo ia Cornwall i Asau, 14,000 eka o i totonu o Lata, 18,000 eka o loo i totonu o Vaiaata. O a mea a le Malo e fai i nei eleele i le taimi nei? Lau afioga e leai ma se mea. O le upu moni ma upu sao. Ua na ona taofiofi e le Malo eleele nei e le tufatufaina atu i nuu ma itumalo e tusa o a latou talosaga ma toe nofonofu ma le Malo e le atiina ae. O le a lea ua fai e le Malo a o tausaga uma tausaga uma fai mai e atiae le laueleele, atiae le laufanua? O le meaalofa a le Atua ia i tatou e leai se mea e faia e lau Afioga. O le mea lava lea ou te lagona o se mea matua tatau lava. Ou te tautala atu ma lau amiotonu a ia magalo le leo i le faafofoga ma le silafaga a le Maota, ua tatau ona fai se faatatau a lau Afioga i le Palemia ma le Aiga Kapeneta i lea lava itu.

Ou te fia tautala puupuu i le feagaiga foi lea ua vevesi ai le atunuu ma Niu Sila. Ou te manatua i le feagaiga se tasi upu, ua moa moa lulu, niu niu pulu. A o le feagaiga lenei e le o se feagaiga faale-uo i lou taofi, a o se mailei ua lave nei i le aao o Samoa ma o lea ua lafotu. Ua leai se isi mea e mafai ona toe fai. O le mea lea e mafua ai ona ou fai atu o le mailei, ina ua iloa e Niu Sila o le a tutoatasi Samoa, sa vave ona faapea mai ia sau la ia e faalelei le ta misa ma mea sa eseese ai, a o lea o le a fai le ta faauoga. Saini lou aao aua o lea foi o le a saini lou lima o taua ua uo. O le a le mea lea ua tupu nei? Na alu lea o Niu Sila fai le la uo ma fai le la va fealoaloai ma Siamani ma le tele o atunuu i tua atu o le Taupulega a Peretania ae a tau gaoioi atu Samoa ae fai mai Niu Sila, oi a faapefea foi le ta uo. A uo ua tuli i maile. Ou te ofo i le lē migao le anoano tulou lau Afioga ma le mamalu o le Maota. O lea ou te lagona e le tatau lava lau Afioga ona musu e faauo Samoa ma nisi Malo o le lalolagi, aua foi o tagata soifua o loo fai foi o latou Malo e pei o lo tatou Malo. O le a se mea o ia Rusia? E leai se malosi o ia Rusia aua e ma Rusia e fai se mea i se atunuu laitiiti e pei o Samoa. E silafia uma e le lalolagi e leai se malosiaga faaaupega o ia Samoa. O le a ma ia Ausetalia, e ma foi ia Amerika ma nuu malolosi pe afai e vaai mai ua faatamatama i se atunuu e tapuai i le Atua.

O lou lava la lagona lau Afioga, sei fai lo tatou va fealoaloai ma Malo o loo fia va fealoaloai ma i

tatou, aemaise lava i atunuu i Sasae e i ai Arapi, Aikupito, e pei o atunuu na ua solo nei i ai le auro a le atunuu. E leaga ea pe a tei ua faapea mai le \$5pilionā lona Samoa e fai ai lou Malo. E leai ni manoa e noanoa ai poo ni polofiti pe toe totogi. Tau lava ina atiae ai lou atunuu. E leaga lea mea i lau Afioga ma le mamalu o le atunuu? O le meaalofa faale-Atua. Ma le isi, afai atu nei ia Niu Sila na o le \$500,000 ae fai mai o lea foi ou te mativa au, o lea e tau sue sau tupe, a o la e silafia ma iloa e lau Afioga le matua valavala o le tulaga o le atiina ae o loo i ai ma le soifuaga. E maualuga maualuga lava le soifuaga o loo i Niu Sila pe a faatusatusa mai i le mea o i ai le soifuaga o tagata Samoa. O lona uiga o lea mea, e faauo ma Samoa i le isi itu ae tau fetui mai le isi lima i le isi itu. O lea ou te manatu ai au, afai e fefe lo tatou atunuu e faauo ma nisi Malo o le lalolagi, ua le faia le isi o tatou tiute mai le Atua. Ua tatou fai fili. Ua amata i le Malo lenei e faavae i le Atua ona le faauo a ua amata ona fai fili. A i ai se atunuu e manatu e fia ofi mai i totonu o le tatou atunuu ma fai se va fealoaloai, o le faatamalii moni lona ma le aganuu a Samoa. O ai lava le matai o le nuu ou te le fiafia i ai, ae a ou vaai atu ua afe mai i lou fale e fofola le fala ma ou fai atu, tala mai aao, afio maia lau Afioga, maliu mai lau tofa ona fai lea o upu, aua o le faiva o tamalii o le atunuu lenei o le fetalai. Ae afai la o le a tausolomua ia Samoa o le atunuu e faavae i le Atua ona fai atu nofo i o, a o le isi foi tagata na faia e le Atua, o le a le uiga o lea mea? E le faavae i le Atua Samoa. Atonu e faavae i se isi atua a o le Atua lea ou te tapuai i ai e le faavae ai.

Faafetai atu i lau Afioga mamalu o le Maota. E le o toe umi foi se mea e fia tautala i ai lou Sui. O loo totoe pea sina vaega itiiti mo le tatou feagaiga faauo ma Niu Sila sa ou taua. O lea ua aveva nei ma mailei ua le manuia ai Samoa. Ou te manatu lau Afioga, o le tulai mai o le Malo fou o Niu Sila lea e taitai nei e le Palemia o Muldoon, o se tagata masalo na te le iloa le Atua.

O loo vevesi nei Niu Sila atoa foi ma Malo o le Taupulega a Peretania ona o pulega a le alii lenei e faatatau mo au taaalo a Niu Sila o loo avatu i fafo. O lea la ou te manatu ai, afai e tulai mai se taitai faapea i se Malo e faauo ma Samoa poo atunuu Polenisia o le Pasefika, o se mea ou te matua faanoanoa i ai; aua a ou mafaufau ifo ma ou mafaufau i tua, ona ou manatu lea i le faatulai mai i le amata mai o le taumafai o Samoa ma lona Malo Tutoatasi, amata mai i le Palemia o le Vaega a le Leipa o Fraser sei faasolo mai ai i nisi taitai tautaua e oo mai i le taimi lenei o se mea e ofo ai le loto. Ou

Saunoga Faataupou a Sui Usufono 1976-1978

te le iloa ia Muldoon poo ona silafia le uiga o le mea lenei ua tupu.

O le tasi itu ua ou iloa, o Samoa o loo i lalo o le puipuiga i itu tau taua. E i lalo o le puipuiga a Amerika, Niu Sila ma Ausetalia i taimi e vevesi ai le lalolagi. Ua ou iloa foi sa i ai se fautuaga a Amerika ia Niu Sila ma Ausetalia ina ia vave ona omai e faalelei ma teuteu le va ma Samoa talu ai le malaga lea a lo tatou Palemia talu ai nei na tautino atu ai i luma o Niu Sila ona sese ma le va ma Samoa. O le mea la e fai foi sina ou ofo ai i le alii Peresetene o Amerika ma lona Malo tele, ona e pei e ui mai i tua o Niu Sila ma Ausetalia sana fautuaga. Ou te fialia lava pe afai o faafofoga mai le alii Peresetene ma lona Malo ma le Malo atoa o Amerika i au upu nei. Afai e i ai sona manatu mai ia Samoa, ma e moni foi lea manatu, se a le mea e le sau ai i luma e pei ona auala mai ai Rusia? Se a le mea e tauala mai ai i tua o Niu Sila ma Ausetalia sana fautuaga? Aisea e le sau ai i luma, sei feiloai ma Samoa, aua o lea foi e i ai tulaga vavalalata ma lona Malo i lalo o le feagaiga lea o le puipuiga o atunuu o le Pasefika i le taimi o le vevesi o le lalolagi?

O lea la o lou lava taofi lau Afioga i le Palemia, aua le tuuina atu le avanoa i tagata faagutugutulu faapenei, tulou lau Afioga, ma Malo e le moni lo latou alofa ia Samoa. O lona uiga ua na ona tele senituri ma tausaga o tatou faifaimea a o lea e aliali mai foi i faiga a Amerika e le o sau sao foi ia i luma. Ua ia te ia le malosi, o loo ia te ia foi le tautua a Amerika Samoa ma o tatou uso i lona itu o le atunuu. E sili atu i le 20,000 Samoa la o loo i totonu o Amerika ma Hawaii. Atonu o loo faapea le Malo o Amerika, o latou o loo tigaina e totogi i le itu tau tamaoaiga tagata ia. O le mea moni lau Afioga ou te tautino atu, o le tautua ma le afu o o tatou uso i Amerika Samoa o le atiina ae o le Malo tutotonu o Amerika. E mafai faapefea ona totogi le afu lea? E faapena foi le va o tatou ma Niu Sila. E sili atu i le 30,000 tagata Samoa o loo i totonu o Niu Sila. O lea e aumai e Niu Sila fai mai o le latou fesoasoani lea ia Samoa.

Lau Afioga i lou lava lagona toatasi, e le o se fesoasoani. O le fesoasoani lona a Samoa ia Niu Sila mo le atiina ae o lona atunuu i le itu tau leipa. Na o ni totogi e gafatia ai e Samoa i totonu o Niu Sila le soifua ma faatau ai se ofu ma totogi le fale o loo nofo ai, ae leai se Samoa ua mafai ona oo atu sona totogi i luga o le \$10,000 poo le \$15,000 i le tausaga aua o loo galue pea i galuega e totogi i le totogi o le leipa. O lona totogi o loo faapooopo i ai mal afoga. E le tasi se ituaiga o lafoga a Niu Sila o loo fai i tagata nei, a o lea ua liliu mai Muldoon ma lona

Malo fai faapea. Ou te manatu o se uo ua sili ona agaleaga. O Muldoon o se uo ua sili ona le alofa. O lea la ou te manatu ai lau Afioga, afai o i ai nisi Malo e fia faauo mai ia Samoa o i ai le alofa moni faale-Atua e pei o au upu, e sili la ia te au i lo le aumai o se Komiti poo ni agelu mai Niu Sila e faauo ma le atunuu lenei, aua ou te iloa o agelu uma.

Lau Afioga ou te usiusitai i so o se mea. Sa ou manatu ou te tautala i nisi mea se lua sa laga e nisi Sui, ae ui i lea o lou finagalo lava e fai. Pau lava le mea ou te toe faamanatu atu i lau Afioga i le Palemia atoa ma le Malo, i se fautuaga a se tasi o Sui sa taua ai le tatou Tusi Paia ma le tatou Faavae. Ua vave ona ou manatua se tasi upu faa-Peretania e faapea "Your son becomes what he reads." O lona uiga o tusi lava e faitau ai loa atalii o tusi lava na e mulimuli ai lona olaga. Pe ni komi, o ni fagogo, o lona uiga, e fai fagogo pe a matua. Ae a faitau i le Salamo ma faitau i le Tala Tuufaasolo ma le Alofa o le Atua ia Isaraelu, ia ua maua taitai lelei o le atunuu. Ia manuia lava lau Afioga i le Fofoga o le Fono, manuia foi le Palemia ma le Kapeneta, Sui mamalu o le Palemene.

Afioga MULIAGATELE VENA



Itumalo Faaalaalafaga:

Safata

Filifilia:

5 Mati 1976

Faatauto:

18 Mati 1976

Lauga Faataupou:

5 Aukuso 1976

Faafetai lava i lau Afioga i le Fofoga o le Fono i le avanoa ua e tuuina mai. Lau Afioga i le Palemia ma le Kapeneta faapea le mamalu o Sui filifilia o le Maota, ua ou tulai atu e faaali atu se manatu e uiga i felafolafoaiga o loo alo atu nei i ai le Maota. E maumua lava ona ou momoli atu lau faafetai i le Afioga a le Minisita o le Tupe i le galuega fita sa alo atu i ai i le Tala Faataupu Faaopoopo o le Tupe o le 1976. E momoli atu ai lau faamalo i lau Afioga i le Minisita. O le a ou le agai tele i lea itu, ae pau lava lea o sau fautuaga i le Minisita, ia tautuana oe tulaga tau tupe, aua o le fatu lea ma le olataga o le Malo. Nei ave ave tupu mai se pefea i le lumanai ona faatietie atu lea i luga o lau Afioga i le Minisita.

Lau Afioga i le Palemia ma le Kapeneta, o le mataupu lenei o le a agai i ai se tautalaga ua le o se mataupu fou. O se mataupu ua au tausaga ma ua leva ona tuuina mai i le Maota lenei. O lenei foi

Saunoga Faataupou a Sui Usufono 1976-1978

mataupu ua uma ona tautalagia i lenei Maota ma ua uma foi ona fai ai se faaiuga. O lea ou te valuvalusia ai aa o le fau i la outou tofa ona o le Sui Faaopoopo o le itumalo lea o Safata ua uma ona pasia i lenei Maota ae lei faatinoina lava. O lea la ou te toe faamanatu atu ai sei outou toe silasila totoa i ai poo le a se tulaga o i ai. O lenei lava mataupu o se mataupu e taua tele i lenei itumalo o Safata. Ua fai i lagi le folauga a nisi o Sui o lenei itumalo sa latou tuuina mai lenei mataupu i le Maota nei. A outou silasila ane i le faitauaofai o tagata soifua o lenei itumalo sei tulou, ua sili atu i le 10,000 tagata. A fuafua atu foi i le aofai o matai o loo mafai ona paloga e latalata atu i le 600 tagata. A faatusatusa atu i nisi itumalo sei tulou o le upu to ia te au, o le mea moni ua tataua ona toatolu ni sui o le itumalo o Safata. O le mea lea ou te talosaga atu ai i lau afioga i le Palemia ma le Kapeneta, sei outou silasila ane poo fea ua fai i ai le Sui o lenei itumalo.

Lau Afioga i le Fofoga o le Fono, ou te fia tautala foi i le Ofisa o le Soifua Maloloina i lau Afioga i le Minisita. Sei e silasila totoa ane i le falemai i tua e le gata i Savaii ae faapea foi ia Upolu nei, ona o falemai o Upolu e i ai Lefaga, Safata ma Aleipata ua leva ona leai ni o latou fomai ae vavamamao tele ma Poutasi e i ai le fomai. O se mea e sili ona faigata le tutupu mai o faalavelave faafuasei ae faigata ona faafesootai Poutasi poo Apia nei. Atonu o le tulaga foi lea o loo i ai le motu i Salafai. O lea ou te fautua atu ai i lau Afioga i le Minisita sei e silasila totoa ane i mea a foia ai lenei faafitauli, aua le soifua manuia o le atunuu.

Lau Afioga i le Fofoga o le Fono, e fia faaalua foi se manatu o le Ofisa lea o Galuega. Lau Afioga i le Minsita ua sau lau faaloga a o faagasolo atu le faaleleiina o auala, e faapea a uma le auala lea e fausia nei i Falefa ona taliu mai lea i le auala lea ua taua o le "Falealili Road" i le agai atu lea i Afiamalu. O lea ou te talosaga atu ai i lau Afioga i le Minisita, sei e silasila ane i le ala lea e alu atu i Leulumoega, Lefaga, Safata ma Siumu, ona o lenei auala o loo faaogaina e le atunuu i le latou femalagaai, ma o loo i totonu o aai lenei auala a ua sili ona leaga. O lea ou te fautua atu ai i lau Afioga i le Minisita ina ia vave foia lenei faafitauli ona o loo feagai pea itumalo ma le pefu ua mafua ai ona pesi faamai. E le gata i lea a o atiina ae o loo moomia e le Malo mai fua o eleele ae ua faigata ona ua leai ni ala galue e lau mai ai fua o faatoaga, aua le manuia o tagata uma.

Lau Afioga i le Fofoga o le Fono ma le mamalu o le Maota, e fia faaalua foi sou taofi ona o mataupu tau vaalele atoa foi ma le malae vaalele. Ua laga sou

manatu ona o le afio atu o le Palemia i Niu Sila mo se faatagaga o lo tatou vaalele ina ia tulaueleele i Niu Sila. O lau la fautuaga i le mamalu o le Malo ma le Maota nei, afai e teena e le Malo o Niu Sila le finagalo o lo tatou Malo e pei ona fai atu ai le Palemia, o lou la taofi vaivai lava o se avanoa lelei lea ua ao ai loa ona tatou faafesootai atu i nisi Malo ina ia fai ai loa ni feutagaiga e mafai ai ona tulaueleele ni o latou vaalele i Samoa nei, ma mafai ai foi oe o tatou vaalele ona o atu i nisi Malo. Ua na o se fuatuga i le mamalu o Sui, ae afai e faatau mai se vaalele o le ituaiga lenei o le 737 e fai ai le taimi nei ua lelei; a o lou lava taofi moni mo le lumanai o le Malo o Samoa, ia faalauteleina le malae vaalele lea o loo i ai nei ma le faaumi, ona mafai ai lea ona oo mai vaalele tetele o ituaiga o le 747 aua o ia vaalele tetele e tusa e faafaina ia vaa laiti ona maua lea o le aofaiga o lana pasese. E le gata i lea, e tele foi le avanoa mo le felauaiga o fua o le eleele i maketi i fafo. Atonu o lea tulaga o le a mafai ai ona foia ia faafitauli o femalagaiga ma maua vave mai ai se tupe i fua o le eleele e faapea foi ma tagata tafafao mai fafo.

Lau Afioga i le Fofoga o le Fono ma le mamalu o le Maota, ou te fia tautala i le vaega lea o le NPF. O lau fautuaga i lau Afioga i le Palemia ma le mamalu o loo Kapeneta, sei outou silasila ane lava i le tupe lenei a le atunuu o loo tuuina atu i le NPF. A fuafua atu i lenei tupe o loo tuuina atu i le NPF, atonu o loo faafaigaluegaina lenei tupe ina ia toe maua ai nisi tupe. A fuafua atu i le pasene lea o loo tuuina atu ia i latou e ana ia tupe ua le taitai ona talafeagai. O lea la ou te fautua atu ai sei outou silasila maea lava i lenei mataupu. O se tasi itu taua lava o lenei mataupu o le NPF o le tulaga lea i tupe nono. O loo maua tele tulaga o loo i ai tupe nono, ae le o mafai e le tóatele o le atunuu ona o le maua o ia tulaga. O lea ou te fautua atu ai i lau Afioga i le Minisita o loo fitoitonu i lenei faaputugatupe, sei toe fai sau fuafuaga ae toe tuu ifo i lalo i le \$5,000 poo le \$10,000 ina ia mafai ai e le tóatele o le atunuu ona nono mai ni tupe mo lo latou lumanai.

Lau Afioga i le Fofoga o le Fono ma le mamalu o le Maota, e tele ni mea ou te fia tautala atu ai, ae peitai atonu ua lava ma totoe saunoga a le Maota i le Sui ua uma ona saunoga atu. Ia faamanuia atu le Atua i lau Afioga i le Fofoga o le Fono ma le mamalu o le Maota.

Saunoga Faataupou a Sui Usufono 1976-1978

Afioga SALA SUIVAI

**Itumalo Faaalaalafaga:**

Gagaemauga Nu.1

Filifilia:

5 Mati 1976

Faatauto:

18 Mati 1976

Lauga Faataupou:

3 Aukuso 1976

Lau Afioga i le Fofoga o le Fono ma le mamalu o le Palemene, ou te tulai atu foi e faaali se manatu e tusa ma le lauga a le tatou Minisita o Tupe na tuina mai i le Maota Fono mo le Tala Faaopoopo o le Tupe o lenei tausaga. E ui lava ina ua aliali mai ni nai suiga laitiiti ua i ai le Malo i lenei vaitaimi, ia ae ou te talitonu o le a le mafai ona tosina atu lou agaga i le Malo aua e lei i ai se latou galuega tele ua fai ona o lenei faatoa amata.

Ae o le saunoaga a le Minisita o Tupe i lau vaavaai ane i le parakarafa e 8, o le saunoaga a le alii ua matua saunoa ai faalauaitele ma tautino mai le tele o tupe ua fuafuaina e le Malo, o le atiina a'e o le atunuu. O le Faletupe lenei o le Atiina A'e, ou te taua o le Faletupe o Fefaatauaiga, o le Faletupe o le Aufaipisinisi ae le o se faletupe o le atunuu. Aua a ou mafaufau atu i le faavae o le Faletupe ma le tupe e aumai i fafo mo le faavae o lenei Faletupe, e 1% na aumai ai le pasene o nogatupe a o lenei ua oo atu lava i le 10%. Ou te talitonu o le agaga sa i ai le faamoemoe o lenei Faletupe i aso ua mavae ma le fuafuaga, ia fesoaoani atu ai le Malo i le atiina ae o le atunuu. Ae o lau lava mautinoa i le Faletupe lea i le taimi nei, talofa i le atunuu.

O le tele o tagata o le atunuu e nono tupe i le Faletupe lea o le Atiina A'e, e le tele se tupe e tuuina atu i ai sei vagana lava i latou e tetele faatoaga ma tele ni meatotino e faamau ai ia nogatupe; a o le to'atele lava o le atunuu vaivai, ia o le amata lava i le \$100, \$200 ma le \$500 ae seasea lava oo atu i le \$1,000 se isi. E le gata i lea, a o le faiga faavae o lea Faletupe e auauai ona tuu atu. O le mea ou te iloa e uma lava le fia tausaga o tau totogi e le tagata le tului, a o loo taatia lava le tupe faavae lea na aitalafu, ona e le lava se faatoaga i le tupe e avatu. Ua outou silafia ma tatou iloa a avatu se tupe e laitiiti e laitiiti foi le galuega e tatau ona fai. Na ona oso i luga o le tului, ua le taitai talafeagai ma le mafatia o le atunuu. Afai na ona tatou alaalaga nei vaeatu lau Afioga ma le mamalu o le Fono, atiina ae, atiina ae, atiina ae, atonu e tatau ai i le malosi faale-soifuaga i nei ona po, ae le taitai ona talafeagai ai ma le manuia o le atunuu. A

faatuatua nei la i le Faletupe lea o le Atiina A'e, o le a le manuia e maua e le atunuu? Na o le pologa e totogi le tului ua tele naunau, ae le lava ni tupe e avatu i le atunuu.

O lea ou te talosaga atu ai ma le faaaloalo lava i lau Afioga i le Minisita e aafia i lea Matagaluega, ia e alofa ma silasila totoa ane i lenei faafitauli ma fuafua se isi fetuunaiga. Na aumai lenei tupe mai fafo e 1% le tului ina ia aoga. Tusa lava pe toe totogi e le Malo nisi tupe, tusa lava pe foai atu e le Malo nisi tupe ua le mafai ona maua mai le aufaifaatoaga, ae tatau lava ona faamama le avega i tagata faifaatoaga o le atunuu. O lea e tatau ai ona fai se fuafuaga vave aua le atiina ae o le atunuu.

O le Matagaluega o le NPF. Masalo e leai se isi na te le o silafia lea Matagaluega ma mea o loo aliali mai ai. Sa ou fia maua pe o aumai se lipoti a lena Matagaluega i lenei tausaga. Ua uma ona faasalalau le Tulafono e ui lava ina vaivai le atunuu ma tau le maua ni mea pei o le faasalalau o le Tulafono, sei vagana ona ua \$27,000 se tupe o le tau o meatotino ona mafai lea o ni aitalafu e amata atu i le \$20,000. O le a le mea o loo aliali mai nei i lena Ofisa? Ua fai lava ma mea a nisi, pei e faaleaiga pe faalanu poo le a le tulaga o loo i ai? Ou te tautala i mea moni ona o le mea na oo mai foi ia te au ma le to'atele o le atunuu o loo aafia ai. Sa ou oo foi i le afioga i le Minisita o loo feagai ma lea mataupu ma faaali i ai le mea moni. Na avatu lau talosaga e \$30,000 mo le fia faamaeaina o lau galuega i mea tau faletalimalo ma le faaumaina o lou fanua. Na amata ia Novema fai mai ua lelei o le a iloilo, Tesema ua lelei o le a fetuunai mea uma, Ianuari, Fepuari, Mati, ae aumai le tali ua le talia le talosaga. I totonu o na masina o loo ave ai lava i isi. E le galo ia te au le isi faaunegatupe e valalata lava masina ua uma ona avatu nei le \$160,000 e lei uma atu ae ave i ai le \$150,000. O le a le tali a le Pule ina ua ou alu atu i ai, fai mai e faigata. O le mea lena tau faletalimalo matou te le fesoasoani i ai. O mea foi tau fanua e faapena foi ia matou. Na ou fai atu i ai e le fesoasoani outou i mea tau faletalimalo, na outou ave i le isi faletalimalo le isi \$120,000, ave i le isi faletalimalo e fesoasoani i ai le \$40,000, ave i le isi faletalimalo le \$60,000. O fea la le faletalimalo lena tou te le fesoasoani i ai? Afai o le fanua na outou ave i le isi tagata e toatasi e \$101,000, ave foi i le isi tagata toatasi le \$40,000, ave i le isi tagata le \$39,000, e fia ni mea faapena ia outou? A o le a le mea ua faapea ai ia te au? Ona o au ea o le Samoa e leai sou toto papalagi vaeatu le paia, poo ona o au tou te le aiga i ai.

Saunoga Faataupou a Sui Usufono 1976-1978

Taatia la au ae a faapefea le atunuu, o le mea lava e tasi o loo alalaga ai le atunuu. O a ea nei faiga e fai i lea Matagaluega lau Afioga i le Minisita e pulea lea Matagaluega? E faapefea ona fai nei faiga? A suesue atu i tagata e ave i ai ou te le fia fai atu, ae tou te silafia lava tagata o loo ave i ai nei nogatupe. A faapefea la le atiina ae o le atunuu ma mea o loo fuafua mai nei e le Malo e fai. O lea ou te fautua atu ai i lau Afioga, ma ou te talitonu o se taimi ou te faatuina ai se lafo ina ia faatuina se Komiti e suesue ai lea Matagaluega poo faapefea ona fai a latou galuega.

Ou te manatu lau Afioga i le Fofoga Fetalai, o se mea e le talafeagai foi ia te au ona ou toe tautala i nisi o mea ua saunoa i ai Sui. Ae ui lava i lea ou te talitonu e te au faatasi ma au i le lagona mafatia i lenei mataupu e tatau ona fai atu i ai sou leo. O le mataupu lea e uiga ia Rusia ma le tatou va ma Niu Sila. Sa saunoa se Sui ua mavae atu nei, e le manao lava ia ia Rusia. E moni, ma o lou foi lena lagona. Ou te matua le taliaina Rusia iinei ona o lena le agaga i le eseese o talitonuga. Ae ui la i lea, a mafaufau atu i le mea ua faia e le Taitai o Niu Sila, o le a le mafai ona taua faalauaitetele Niu Sila aua lau Afioga ma le mamalu o le Palemene faatoa ou foi mai Niu Sila i le malaga na tofia ai au e ave ma sui o le tatou Malo, e ese le agalelei o le tele o tagata Niu Sila. E ese le alofa ma le fesoasoani mai o faalapotopotoga i fafo ma le tele o tagata Niu Sila i lo tatou atunuu e pei o le Iuni Lakapi, e pei lava ona silafia lo latou ofo mai e avatu le tatou au ma le tele o fesoasoani na tuu i ai e le Iuni ma mea eseese faapena. A o le Malo lava ma le taitaiina o le Malo e le susuga ia Muldoon, o se mea e ofo ai; e momono le agaga pe a vaavaai i le faiga o o tatou tagata o loo fai ai, e fesuluai solo vae atu le tatou paia. E pei foi ona saunoa se isi Sui vaeatu lava, e faapea ua sue i taifau ma o le mea moni. Na ona lagona lava o le ootia o le agaga. O nisi aiga Samoa e tetei lava ua tapena atu i nisi aiga i le po. Ua faalogo o le a sau le suega a taifau i le latou pitonuu ma o lea ua sosola ese ai. E ofo i nei ituaiga faiga, e ofo lava i le Taitai o Niu Sila i le fai o nei faiga. E pei ona taua e se isi Sui, e 50 tausaga talu ona tatou faatamā ia Niu Sila. A tatou fuafua i se taimi faatauvaa o Siamani, o a mea o alia'i mai. O se taimi faatauvaa o Siamani o lea e alia'i mai, a o a mea sa fai i lenei 50 tausaga. Ia e silafia lava e lau Afioga ma le mamalu o le Palemene mea sa faia e Niu Sila ia i tatou.

Ou te manatua i se isi vaega o le atunuu sa pulea e Niu Sila le Esetete Tausi o Samoa. I le tausaga e 1950 a o ou faigaluega, e miliona pauni le tupe

mama na avatu i Niu Sila na maua mai iina. Afai e faapena i nisi tausaga se tele o le 40 i le 50 tausaga, o le a le faitau a le atunuu i ia mea? A o le faiga ua fai mai nei e ofo. Na pau lava lea o mea ou te faamalo atu ai i lau Afioga i le Palemia. Ou te fia faalogo i tala i lou afio atu i o i la outou feiloaiga, tautino i ai i nei alii le Palemia o Niu Sila ma le Taitai o le Itu Tetee. Tautino i ai mea o loo aafia ai lo tatou atunuu. Maumau lava e pei ona saunoa se isi Sui pe ana i ai se laau faalogologo a Muldoon sei faalogologo mai ai ae sei fai atu i ai ni upu, tailo pe i ai se isi e faatuiese o lenei Palemene, aua o ai, o ai o fai i ai?

Ua tatou mautinoa afai e faasaga ni a latou faiga ia Toga, o Toga lava ia na soifua mai lona Malo o faifaimea ma Peretania. Afai e le manatu mai ia Fiti ona o Fiti lava latou e faifaimea ma Ausetalia, ae a fai mai ia Samoa sa fai ma ana tama faapelepele, sa fai ma tatou tama sa faalagolago i ai, o le mea foi lea ou te le talitonu ai i uiga faa-temokarasi fai mai e alofa, alofa mai faasaga mai toe fai i tatou. Tailo i ai aua tatou te lei faifaimea ma ni komunisi, a o nei alii tatou te faifaimea nei o Niu Sila, ia o le a le mea o fai mai nei e Niu Sila? O le tau lea o mea a tatou na lelei ona fai i le 50 tausaga ma tautua ia Niu Sila ae tua i le tuli i taifau vaeatu le paia o le Maota. Ou te ofo au ma ou te taua na faiga o faiga faatufanua. O lou talitonuga la, e ui lava ina ou musu ia Rusia ae ou te fai atu lava au, fai nei ni fesoootaiga fai ma Rusia ma Saina Komunisi poo ai e fia omai e aumai ni fesoasoani i le Malo ma fai lelei Samoa. Aua a tatou le faifaimea faapea ona o le manatu ia Niu Sila, ia e le o manatu mai Niu Sila ia i tatou. A tatou faatali foi e pei o le Taupulega a Malo o le Faalapotopotoga a Peretania, o le a le mea o fai mai e nisi Malo o le Taupulega? E moni lava i ni nai fesoasoani a o a ni a latou faiga lelei o fai mai, e leai.

E pei foi ona taua i le fonotaga na mavae atu nei a Taitai o Malo, o lou lava manatu lau Afioga a le Palemia, soia le toe afio i na fonotaga. O le a le mea o maua mai i nei fonotaga a Malo faafesootai? Faalogo atu o le a faia o tatou vaa, faalogo atu o le a faatasi i vaalele, faalogo atu o le a fai le a? Ua fia nei ni tausaga o faatu na mea o le a se mea o fai? Ua na o le oleole mai e isi, pepelo mai e isi, ae felamaai lava faapena ona fai. O le mea ou te talitonu i ai, afai o faiga ia o loo fai ai le va o Malo, tausii pea lo tatou vafealoaloai ma na Malo ae tatou o tatou ia Saina Komunisi ma Rusia e aumai ai ni o tatou vaa ma ni mea faapena e fesoasoani i le atunuu. O lou lava lena talitonuga faa-usufono. E pei lava ona ou taua, e ui ina ou le fiafia i faiga faa-Komunisi a o

Saunoga Faataupou a Sui Usufono 1976-1978

fea o le a tatou tua i ai? O le a le mea o le a tatou faia? A tatou apata apata vaeatu le paia ona taunuu lava lea e pei ona ou talitonu i le tulaga na o i le isi alii sa masani ona fai i faalapopotoga a tagata pagatia, vaeatu le paia o lau Afioga ma le mamalu o le Fono.

O se ulugalii sa o i Aferika e tafafao. O le agaga o lenei ulugalii le o e saili pe maua se manuki e ave e taus, vaeatu le faafofogaaga a le atunuu. Savalivali, savalivali, taumafai ona fuafua, tetei lava ua vaai atu i luga o le vaitafe o taalo mai le manuki fafine ma le tamai manuki. Taaalo, taaalo faapea loa lea o le alii ua maua le ta manuki, vaeatu le faafofogaaga. O le a fana nei le manuki tele ae tuli e taua le tamai manuki lea e ave ma taua. Tetei lava ua pau ifo le tamai manuki i le vai, ma ua osooso loa i ai le toeaiina ae faatali atu le loomatua ma le fana i luga o le vai. Oso atu le toeaina e taumafai mai le manuki ae malos, foi le tamai manuki ia. Iu loa ina vaai ifo le manuki lapoa lea oso loa lava i ai au toalua ma le manuki laitiiti ae tau lelemo ma le toeaina. Taumafai, taumafai e le toeaina ua fiu i apata solo ua leai se mea e mafai ua faalogo atu lava o le a oti. Ua apata atu ii, lelemo e le tamai manuki, apata atu ii lelemo e le manuki tele, na ona ea ae lava fai atu i lona toalua e fana. Fai mai le fafine, aumai i luga e fana ai. Fai mai le toeaina, se fana pea soo se isi o matou a oti foi au ua lava lea.

Lau Afioga i le Fofoga Fetalai ma le mamalu o le Fono, o le mea lava lena ua tatou oo nei i ai. Ua tatou mana mana i se tamai manuki, ia o lea ua tau fai lolomi tatou. O le a le mea o le a fai i ai, ua tatou apata nei i Komunisi. A tatou oti ai, oti ai, aua o le a se isi mea o le a tatou tua i ai pe afai o le iuga lea o le tatou faa-tama ia Niu Sila ua 50 tausaga.

Lau Afioga ma le mamalu o le Palemene e tele ni mataupu taua sa fuafua e fai atu ai se tautalaga e fautua atu i lau Afioga, aua e pei lava ona silafia ma tatou malamalama i taualumaga i nei fonotaga, o nei lava lauga vaeatu i saunoga ma fetalaiga i le Maota, o fautuaga i lau Afioga i le Palemia ma le Kapeneta, fautua mo le tatou atunuu, fautua i la outou taitaiga. Ou te le tau fai atu foi o lena e silafia e lau Afioga i le Palemia. Ua oo atu lava i lau Afioga ni muimuiga a le atunuu faatatau i nisi o Minisita, e pei foi ona saunoga se tasi o Tootoo i le Minisita sa taitaia fuafuaga faafiafiaga o le Tutoatasi. O matou o sui o le atunuu. Poo le a le lē malilie, e aumai ia i matou e tau atu aua e leai so latou leo. Ou te le faapea atu o Pai poo Lafai i la outou Afioga i Minisita, aua ou te musu e fai atu nei ona o lea faatoa amata la outou galuega. E ui lava ina taua mai nisi fuafuaga ma muimui nisi i ni faiga

a alii Minisita, o le mea lava e sili o le lagona e le Minisita lava ia o lona tiute i le atunuu, lona tiute i le alii Palemia ma le Malo.

Matou te le aoaia la outou afioga ae na ona matou faufautua atu. O a ni mea ua silafia ua sese i le amataga o la outou nofoaiga, o outou lava ia alofagia a tatou fuafuaga. E pei lava ona saunoga nisi Tootoo, aua nei o tatou manatu poo ai e lei lagolagoina tatou poo ai ua lagolagoina. O le aiga e tasi i tatou i le tatou atunuu ma le tatou Malo. Tatou te faifaimea faatasi ma galulue faatasi mo le lelei o le atunuu. Ou te talitonu i nisi tausaga o muamua o la outou nofoaiga, e tele ni mea o fuafuaina mo le lelei o le atunuu. A i ai ni mea matou te fautua ai ma tau atu ia alofa lau Afioga talia a matou fautuaga. A i ai ni mea matou te tetele atu ai poo le a ni tulaga o upufai e avatu, ou te talitonu e le tetena i lau Afioga ma Minisita aua o le lelei lena o le atunuu ma o le manuia lena o le fonotaga a le atunuu. Ae afai na ona tatou milimili-aluga o le a le mea o le a mafai ona fai? O le a le mea o le a tatou oo i ai? Na o le fefaaleleiai, faamalie e le isi le isi e pei ona taua, pe avatu e nisi mea a le Malo e faamalie ai nisi a o le iuga e leaga ai le atunuu atoa. E aafia le atunuu atoa i ni faiga a ni tagata toaitiiti vaeatu le paia i lau Afioga i le Palemia ma le Malo, le Fofoga o le Fono ma le mamalu o le Fono. E ui ina tatou toaitiiti ae ou te fai atu e sese loa le faatautaiga o le atunuu, pagatia le atunuu atoa. O le ala lea o le matou avatu, tetele atu, aua o outou ua tu i le foepuni i le faatautaiga o le Malo i lenei tolu tausaga. Pau lava le mea ailoga o ai se Sui mamalu e faapea ifo, talosia ia leaga le mea lea e fai e le Malo, ia leaga ai le nofoaiga i lenei tolu tausaga. Ailoga e i ai se isi e mafai ona faapena, aua a leaga le faatautaiga o le Malo ua leaga le Fono, leaga le atunuu atoa. A o le a le mea o i ai? Tapuaia o outou faiva, tapuaia la outou nofoaiga, talosia ia alofa le Atua faamalosia o outou finagalo i le faiga o le tatou Malo.

O le mataupu e uiga i auala e pei ona taua e nisi Sui, e matautia. Ou te le tau fai atu. Ua outou silafia le faafitauli o loo aafia ai le atunuu i tua ae le o tatou i le taulaga. Amuia i tatou a o itumalo i tua i tagatanuu, e lei oo i ai ia fuafuaga. O le motu tele i Salafai ta te le toe fia taua, e pei foi ona saunoga se isi Sui o lenei motu, masalo o lona 30 o tausaga poo le tausaga lava amuli e fetau ma le oo mai o Rusia ma uma atu ai tatou iinei, faatoa maua se faiga o ni auala i Salafai. E ui lava ina ua tau fai a o loo faamuamua pea Upolu ma o lena lava le agaga. Matou te talitonu o le tele o a tatou atiina ae o auala lava, o auala i faatoaga, o auala i tai i aai, auala esese o le manuia lena o le tatou atunuu.

Saunoga Faataupou a Sui Usufono 1976-1978

O le tasi lenei o mataupu ua tele le fia tautala i ai ma e fautuaina ai le Komiti o Galuega, sei fuafua lelei se avanoa e talanoaina auiliili ai ia lipoti a Matagaluega. Ua ou fiu i fesilisili i le taimi ua tuanai atu nei i se lipoti talu ona aumai le tatou vaa lea o le Limulimutau. Sa faapea foi o le a oo mai o le a fesoasoani tele i le itu tau femalagaiga. Faamolemole lau Afioga i le Palemia ma lē e fitoitonu i ai lea mea, o le a le tulaga ua i ai lena vaa? Ua fai ea mo se isi aiga poo se isi o le atunuu poo le a? Se talofa i le atunuu! O lena lava mea ou te talosaga atu ai i lau Afioga, afai e faaletonu fuafua se isi vaa, ou te le manatu faapea o le tele o tupe e alu i vaa, ae ou te manatu i le taua o lana galuega tele e fai aua le tatou motu tele i Salafai. Ua tele se suiga ua i ai talu ona aumai le tatou vaa lea i Salafai. Ua outou silafia lava ua faigofie felauaiga, ua faigofie mea uma, a o le faalavelave e na ona faamalie lava e le auvaa latou ae le faamalie le atunuu femalagaai.

O le isi mea pe le malilie ia Kapeteni poo ai ona nofo lava lea o le vaa, ae faapefea le atunuu o mafatia i luga o le uafu? O se mea matautia lena mea. Lau Afioga a le Minisita e faatatau i ai lea tulaga, ua ta fia vaai lava i se lipoti a lena Matagaluega talu ona faatu. Tailo i ai nei sese lou taofi aua ou te lei iloa lava, ou te lei maua se lipoti a le kamupani lena a le Limulimutau talu ona faavae. Atonu o le mea lava lea ua aliali mai i le tatou atunuu. Afai atu lea kamupani ma nei mea ona faapea lava lea o tagata, o a latou lava meatotino; ua le toe manatu mai i nisi ma le atunuu na auala atu ai ia mea ua saoloto i ai. O lea ua aliali mai i lena kamupani e faapea ua manaia ua tele tupe a le vaa. O fea ea o i ai ia tupe? O fea se lipoti? O lenei e pei ona saunoa se tasi sui, ua sili atu i le lua itula, toetiiti tolu itula o alu le Limulimutau. O a ea ni faaleleiga o i ai? O a ni tupe o maua ai? O a ni mea a le atunuu o lelei ai?

Lau Afioga ma le mamalu o le Palemene, amuia lava outou i Upolu. Amuia lava lo outou motu o fifilemu aua na ona oso ae lava i le taavale ma sau iinei, a o matou nei i Savaii ia o lena ua outou silafia e le tau fai atu. O le mea foi lea a outou saunoa mai ma faapea mai o Savaii o le motu saili malo, ua tatau ma onomea lena upu. Aua e a? O le tele lava o o tatou malo ia e sue nei o Savaii lava vaeatu outou Tumua. O le mea lea sei alolofa sei tau faifai tutusa a tatou fuafuaga. Afai ua fai fai o le a mamafa tele i Upolu, ia tuutuu i Savaii nisi fuafuaga nai lo le saga mamafa lava i Upolu ae faatalale i Salafai. Ua faali atu lena tulaga ona o lau Afioga i le Palemia ma le Kapeneta aua e ui lava i Minisita, ae faafetai i le sui

o Savaii lea e Minisita o Tupe. Tautuana ma lau Afioga i le Minisita, faanatinati mea a Savaii manu o e i ai i lena tulaga aloaia. Ia uma ae na fuafuaga a ua tatau ona mautu nisi mea i Savaii; ae le faapea o le a e nofonofu atu foi oe ma faapena atu ai lava e oo i le gataaga e faapena. Ia alofagia e a outou afioga na fautuaga, aua o le mea lea na ona avatu lava o fautuaga.

O le tele o nisi mea o manatu ai e tautala atu ai e tele naunau, ae pei lava ona ou fai atu: Paga lea, o lea faatoa outou amata, ma e faigata. Aua o mea lava nei na amata mai lava o sasa e pei o le tala a si tama matua ua mavae atu nei vaeatu le Fono, e toe sasa atu o le solofanua ua mate, vaeatu le paia o le au faafofoga. Ae faatalitali lava outou i le isi tausaga lea o le a sau poo a ni a outou galuega e fai. Le mea foi la ina nei fai atu foi ae faapea mai o matou nei faamolemole matou te lei iloa lea fuafuaga. O lea ua i ai nei a outou fuafuaga, ma o lea e talosaga atu ai i lau Afioga ma le mamalu o le Kapeneta sei alolofa sei o tatou fetuutuunai i lena mea, sei faatino ni mea i le motu tele i Salafai. Na ona fai fai ma ou faalogo atu o le a ave le afi moli i fea, ave i fea, ae o lea lava e leai se mea. Alolofa ia ma avatu tupe na ua fuafuaina mo le atiina ae o nuu, afioga ma alaafaga e amata ai ona fai Savaii ae sei malolo foi Upolu. A lelei mai Savaii ua lelei foi ma Upolu. O le mea moni lena mea. Lau Afioga i le Minisita o Atiina A'e, ia o oe foi o le Savaii. Fai na mea e pei lava ona ou fai atu. O upu sasao aua ua leva ona pologa le tatou motu i Salafai.

Lau Afioga ma le mamalu o le Fono, e tele ni mea e fia tautala i ai i lipoti a Matagaluega ae ona ua uma lou taimi, ma le faaaloalo lava. Ia manuia lau Afioga ma le mamalu o le Palemene, le Palemia ma le Kapeneta.

Tofa SEUAMULI KURENE



Itumalo Faaalaalafaga:

Gagaemauga Nu.3

Filifilia:

5 Mati 1976

Faatauto:

18 Mati 1976

Lauga Faataupou:

4 Aukuso 1976

Faafetai i lau Afioga i le Fofoga o le Fono mo le avanoa ua tuuina mai mo lou foi tootoo i lenei itula. O sa ma faiga o Samoa o le a ou le toe agai atu i ai, aua ua lava ma totoe saunoaga ma fetalaiga ua tuuina mai i tualumaga o le mataupu o loo tauaoina e lau Afioga ma le

Saunoga Faataupou a Sui Usufono 1976-1978

mamalu o le Fono. Ou te faafetai i lau Afioga i le Fofoga o le Fono ona o le avanoa ua tuuina mai ia te au o se Sui fou o le Palemene. O lea o le a agatonu ai loa lou tautala atu i lenei itula ina ia mafai ai ona avatu sou mafaufau ma se manatu ma ni fautuaga e faatatau i le Afioga i le Palemia faapea le mamalu o le Kapeneta e auala atu i lau Afioga i le Fofoga o le Fono.

Muamua, o saunoaga a le Afioga a le Minisita o Tupe ua opea i le Maota. Ou te momoli atu lau faamalo ma le faafetai i lau Afioga i le Minisita ona o le galuega fita ma le faigata sa lua feagai ai. Sa tau faatulaga ma tau faasao le faatulagaina o alagatupe a le Malo o Samoa aua o oe o le poututoa ma le ivitu o le Malo o Samoa i mea tau tupe. Afai o le a lelei ona faafoe tulaga i mea tau tupe o le a sololelei foi le tatou Malo. O a uma faafitauli i mea tau tupe o le a le mafai ona manumalo pe afai o le a le tonu ma sao lau fuafuaga i le tulaga o mea tau tupe a le tatou Malo. Ua manino ma malamalama le Maota Fono i lau saunoaga faatatau i tupe maua ma tupe faaalu ma o lenei foi ua faatulaga mai le tupe faaagaaga mo le atiina ae a lo tatou atunuu. O lea ua maea ona talosagaina e itumalo ma alaalfaga atoa foi ma tagata taitoatasi ona o le fia faatinoina o atiina ae aua le manuia mo le atunuu a taeao. Ou te talosagaina ai lava lau Afioga a le Minisita o Tupe ina ia e silasila totoa ma ia vave ona faatinoina ia fuafuaga e pei ona e faatuina mai i le Tala Faatatau o le Tupe mo lenei tausaga, ina ia vave ona faamalievina finagalo o itumalo aemaise alaalfaga ma tagata taitoatasi i mea ua fuafuaina mo le manuia o le atunuu mo lenei tolu tausaga.

Ou te fia tautala e uiga i tiute e taunuu mai ai oloa i totonu o le atunuu. Atonu sa taua e se tasi Sui i le taimi ua tuanai ae ou te lagona lava e tatau ona ou tuuina atu sina faamatalaga e uiga foi i lea tulaga, aua o loo i ai le mafatiaga i le atunuu. O loo oi le tóatele o le atunuu e uiga i le taugata o le soifuaga o loo tatou i ai nei. A faatusatusa atu i le tausaga ua tuanai ia Aokuso i le 1975, o le pasene o tiute sa i ai i lea vaitaimi atonu o le 15%. A faatusatusa i le taimi nei e tusa e 11 masina ua 34% le tiute o loo i ai nei. Pei la a fuafua atu i tulaga, ua ova i le 100% le tiute lea ua i ai nei, pe a fuafua atu i le mea ua i ai le tausaga talu ai 1975 seia oo mai ia Aokuso i le tausaga nei. Ou te fautuaina ai lau Afioga i le Minisita o Tupe ina ia e silasila totoa i lea faafitauli, poo le a se fuafuaga a le Malo mo se toe faaitiitia o tiute, aua le fofoga taumafa o le atunuu atoa foi ma faafitauli o loo feagai ma le atunuu i lenei vaitaimi.

Ou te fia tautala i le Afioga i le Minisita o Atiina A'e, ona o le tulaga i mea tau atiina ae i le atunuu.

Ou te talosagaina ai lau Afioga ina ia faataunuina fuafuaga ua uma ona faataotolia e le Afioga a le Minisita faapea le Aiga Kapeneta mo le manuia o le atunuu, aemaise o mea tau faatoaga. Aua afai o le a le mafai ona faataunuina nei faamoemoega e pei ona i ai nei i le Maota ona o se atiina ae o loo manaomia e afioaga ma alaalfaga aemaise itumalo, o le a mafai foi ona faafiafiaina tagata o loo mananao e fia faia a latou atiina ae. A o le mea moni ou te talosagaina ai lau Afioga ina ia mafai ona e faatinoina ma faavavevave i se taimi ua tatau ai ona faatinoina nei fuafuaga. Atonu e le aafia i lenei foi taimi o le nofoaiga a le Kapeneta i le mataupu lenei o le a ou tuuina atu, ona e pei o le mataupu ua uma ona fuafuaina ma pasia e le nofoaiga talu ai, ona o loo i ai se fuafuaga a le Malo e faatatau i fale telefoni ia ua pasia mo loo itumalo. Lau Afioga i le Minisita o Uaealesi poo Falemeli, ua maea ona fausia fale e tuu ai le afaigaluega mo le faafesootaia o telefoni ae lei faataunuina ia fuafuaga, aua ua tele foi tupe a le Malo ua uma ona alu mo ia fuafuaga e pei ona fausia le fale ma e tuu ai le telefoni.

O le mea lea ou te talosagaina ai lau Afioga i le Minisita o le Falemeli, ina ia e silasila totoa i lea vaega ina ia vave ona faatinoina, atoa foi ma ala galue a loo itumalo. O se itumalo e sili atu ona faigata ona ua muta le tele o eleele sa galulue ai i le tele o tausaga ua mavae. A o le taimi nei ua amata ona savalia i luga o le lava mo le faamoemoe i le eleele i tuā lava. O lea ou te talosagaina ai lau Afioga i le Minisita o loo fitoitonu mo lea tulaga o mea tau atiina ae ina ia e alofagia ma faavavevave ona faatulaga se tulaga manuia mo loo itumalo ina ia mafai ona faia faalelei auala o loo talosagaina mo le fia faaleleia o le tamaoaiga o loo taumafai i ai loo itumalo.

O lenei taimi ou te momoli atu lau faafetai i lau Afioga i le Palemia Tupuola Efi ona ua e tu nei matagiolo i le faatautaiga o le Sa o Samoa mo lenei nofoaiga. O le mea lea, o lelei ma masei o le a i ou luga. O a foi ni faasea a le atunuu ia te oe, o a foi ni faafitauli o le a matagi-taumuaia ai le Sa o Samoa i lenei tolu tausaga, ia e lavapapale ae ia sao ma uli lo tatou Sa mo lenei tolu tausaga. Ia ni gasegase i lau Afioga i le Palemia, lagimama i Sui o le Palemene, alofagia e le Atua lau Afioga i le Fofoga o le Fono, ina ia maua se manatu aua le Maota o Samoa. Ia manuia.

Saunoga Faataupou a Sui Usufono 1976-1978

Tofa SITAGATA LIAINA

**Itumalo Faaalaalafaga:**

Lotofaga

Filifilia:

5 Mati 1976

Faatauto:

18 Mati 1976

Lauga Faataupou:

4 Aukuso 1976

Faafetai lava i le avanoa.

Lau afioga i le Fofoga o le Fono faapea foi le paia i Sui mamalu o le Palemene, ia te outou tupu ma tamalii faapea foi ponaoo o Samoa, o sui na filifilia mai itumalo taitasi. O lenei itula ou te tulai atu ma le faaaloalo e fia faalia sou taofi poo ni fautuaga foi i le Afioga i le Palemia faapea foi le Afioga i Minisita. Ae ou te lei see atu i sou taofi, e muamua lava ona ou faafetai i lau Afioga i le Fofoga o le Fono ona o le avanoa e pei ona e tulei ma saunoa i sui mamalu o le Palemene aemaise lava sui fou. Ia manuia lau galuega ma lou i ai i le tofi.

Lau Afioga i le Palemia, ou te toe fia agai lava i tua lau tautalaga i aso o lou taumafai e fia maua le tofi Palemia. O le tolu lenei o taumafaiga poo tausinioga foi, o lea ua e tulai mai ai i le tofi Palemia. Atonu o loo i ai ni fuafuaga loloto i lau Afioga e fia faatinoina mo si o tatou Malo o Samoa. O lea la ua e tauaa nei le tofi, ia alo ia i ou faiva aua le faafoeina o si o tatou Malo o Samoa, aua o le Palemia o le tapasa lea poo le foeli foi o si o tatou vaa aua lenei tolu tausaga. O lou taofi e faapea, ua tulai mai le Afioga i le Palemia, o le Palemia fou, ou te taofi foi la e tatau ona fou le mataupu.

Mai le uluai aso lava na e tauaaoina ai le tofi, sa e tulai ae ai ma e saunoa faapea i le mataupu lava e tasi, o le fua faatatau o le atiina ae o Samoa ma lona eleele. Atonu o le mea lea o loo i ai lou finagalo o le finagalo foi lea i le Maota ma Sui mamalu, ina ua atoa nei le 14 tausaga, talu ona tutoatasi le Malo o Samoa, o le mea lava lea e taumafai pea i ai. Peitai o lenei foi ua e toe tulai mai, ua e saunoa foi i le Maota e le o talafeagai le fua faatatau o le tamaoiga o Samoa ma lona eleele. Ona ou faapea lea lau Afioga i le Palemia o le a lava se faiga, atonu o ou aso nei e talafeagai ai le tamaoiga o Samoa ma lona malosi.

O se isi mataupu ou te fia tau atu, pe lei tatau ea ona fai se tatou malae vaalele tele. Sa ou faalogo i le tausaga e 1970 sa taua ai le mataupu lea. Sa pasia ai foi ma sa nonoina mai se tupe mo lea lava faamoemoe, peitai ua le taunuu. Lau Afioga i le Palemia, e tatau ona faataunuu. E tele le aoga pe a

tatou manatunatu i le faatauina atu o a tatou oloa, o fua o faatoaga a Samoa i fafo aua e faigata le felauaiga. Ina ua ou faalogo nei i le taumafaiga i le Minisita o le Atiina A'e i le sailia lea o maketi i fafo, ua tele ni maketi ua maua, ae paga lea, e faigata le felauaiga. O lea e tuuina atu i lau Afioga i le Palemia ua tatau ona faataunuu lea fuafuaga.

O se isi mataupu taua, pe lei tatau ea ona tatala kamupani mai fafo e faaulufale mai i si o tatou Malo. Atonu o lea le alamanuia o le a maua ai e lo tatou Malo se tupe tele. E le gata i lea o le a manuia lautele le Malo, o le a maua galuega a tagata. Silasila foi i lenei vaitaimi, e le lava galuega. Silasila i alo o le atunuu, ua na ona iu i aoga ae le mafai ona faaogaina, e le lava galuega. Lafo atu i lau Afioga i le Palemia.

E i ai se isi mataupu sa taua e nisi tootoo ma o le taofi ma le agaga moni afai e tele ni Sui i se mataupu, e silafia ai o le finagalo lea o le Malo. Pe sa talanoaina i la oulua feutanaiga lau Afioga i le Palemia ma le Palemia o Niu Sila le itu lava lea i femalagaaiga? Sa i ai se mea sa taua ai le pemitā lea o le 3 ma le 6 masina sa o atu ai o tatou tagata e faigaluega ma toe foi mai. Atonu o lea lava le manuia ua manuia lautele ai Samoa. E le gata i lea, e maua ai foi se tupe a le atunuu. O le agaga moni ma le talosaga, ia toe maua lava le pemitā lea o le 3 masina ma le 6 masina.

O le mataupu e uiga i lafoga a faifeau, na ona ou faaopoopo atu. Silasila i auauna a le Atua e talafaauto ia Samoa, e le o ni tagata o ni afioaga ma alaafaga a o tagata ese. I lo outou finagalo malilie lava tou te tuuina atu ai se meaalofa ia i latou. Afai e leai, e leai lava. E leai ni a latou galuega e maua ai ni a latou tupe maua vagana lo outou alofa. Silasila i le tatou faavae, faavae i le Atua Samoa. A o lea foi ua tatou toe faasaga i ana auauna. Ou te fautuaina ai ma ou te faaopoopo i Sui i lea lava mataupu ona ua matua matuia tele lea mea. Afai ua faamauiina po ua faatulafonoina, ailoga e tatou te agasala ai, aua e le o se tulafono a le Atua. Lau Afioga i le Palemia, alo ia i ou faiva, ia manuia lou seei i le tofi aua le faafoeina o le Sa o Samoa mo lenei tolu tausaga.

Ou te fia tautala i le itu tau auala galue. Sa ou faalogo i se tasi tootoo i le aso ananafi faapea e lelei Upolu ua maea auala ma auala galue. Ona ou faapea lea; e toe sui lava e au le faaupuga. E lelei le talafatai i Apia nei ua maea lelei auala, soo se auala i soo se vaimea, a o nuu i tua ma Savaii o loo faaletonu. E mafua lau tautalaga pe a ou vaai i le agai mai i Lefaga e tau i Aleipata, pe tolu ni auala o loo i ai, a o ia foi auala sa saili i se isi tulaga. O lea ou te talosagaina ai le Minisita o Galuega, e a pe a

Saunoga Faataupou a Sui Usufono 1976-1978

fai se aiaiga faasolosolo lelei ina ia laugatasia ai alaafaga ma afioaga ma itumalo. Aua afai nei e fai i se isi auala e maua ai auala galue e le lava le malosi o itumalo e tauave ai le atiina ae o Samoa. Lafo atu i lau Afioga.

O le mataupu i auala tetele o le Malo. Ina ua tutoatasi le Malo o Samoa ona ou faapea lea ua ou vaai faale-mafaufau e lua lava mea, o le vasa e i ai Savaii ma le agai i tua. O mea lava ia e tataua ona silasila i ai le Malo o Samoa. Faafetai ua maua le vaa e femalagaai ai alii Savaii. I lenei lava vaitaimi o loo tatalo pea lenei itumalo faatasi ma nuu i tua, le auala i Lemafa i le agai i tua i auala i Fagaloa. O mea lava ia e tataua ona silasila totoa i ai le tatou Malo, o le tulaga aafia lea o le soifuaga o tagata o le Malo, aua o le upu, e maua Malo e maua foi auala ae le maua le soifua o le tagata. Ia lafo atu i lau Afioga i le Minisita poo lau Afioga i le Palemia. O se talosaga, a alu atu nei le faaleleiga o le auala lea e tau i Falefa, aua nei toe foi. Sa ou vaai i se tasi aso ua tala atu ou aao i tua. Masalo sa e lagona se fefe, ioe, ou te faamaoni i lea lava fefe e tasi, a o matou e malaga i aso uma e faalausosoo lava. Ou te matua talosaga atu ai, silasila i le soifua o tagata o le Malo. Ia lafo atu i lau Afioga i le Minisita.

Lau Afioga i le Minisita o Atiina Ae o loo tauaveina le popo ma le koko, e fesili atu poo fea o tu ai le Ofisa o le popo ma le koko? Sa ou sau i se tasi aso i le fesiitaiina o le fua, ae tei ua faapea o Sogi lea ou te sau i ai; ae ou fesilisili maea ma ou iloa ai e le o se fale o le tatou Malo lea e fai ai le Ofisa, o le fale o le ua tofia e le tatou Malo e avea ma Failautusi o le Komiti o le Popo ma le Koko. Lau Afioga i le Minisita, e lei tataua ea ona fai se ofisa tutotonu o le Popo ma le Koko, o le tamaoiga e faasilisili i finagalo o Samoa. E tele maota o le tatou Malo, e le lotoleaga le taofi vaeane lo outou paia, ae ailoga o se mea tataua le tauaveina o mea a le tatou Malo faatasi ma le manuia o loo ona taua atiaeina, e lau atu i lau Afioga i le Minisita.

O le tauvaga. E tolu faaupuga ou te taua ai le mea lenei o le tauvaga. O le tauvaga, o le taaloga, o le faatosina. Ua tele ni finagalo o Sui ua faaalua i lea lava mataupu, ae pei ona ou taua, afai e tele ni tootoo e faaalua lea mataupu o lona uiga o loo i ai le finagalo o Samoa. Ou te fesili atu pe mai fea le tupe lea e fai ai le tauvaga. Afai o se tupe faaagaaga o le popo tuu loa la e faalelei ai le popo. Ae afai o se vaegatupe a le Malo tuu pea ia e faalelei ai le popo. Atonu o i e tofutofusia ai le aufaifaatoaga o le atunuu i le faamanuiaga ae lafo atu i lau Afioga i le Minisita.

O le Minisita o Faatoaga. E fesili atu i lau Afioga pe aisea ua fetuunai ai le tau o le pusa talo. Atonu e maua sou masaloga, afai e pau le laumeavale i le atunuu ua maua le alu o le tau, ae afai e tamaoiga le atunuu ona toe tuu foi lea i lalo. A ou faalogo i le Sui lea e lauga mai i le Ofisa e tau maligi ou loimata pe a ou faalogo i saunoaga. E pei lava o lau faatusa foi lea i le tautua, tautua i aso e tele ae tasi le aso e sese ai faaali mai loa le sese. Atonu o i ai ni sese se tele i totonu ae le mafai ona saunoa atu le atunuu. A silasila, o le aufaifaatoaga o tupu ma tamalii o Samoa, ae a lauga loa le sui lea atonu ua aafia ai tupu ma tamalii, ae tasi le tagata e agasala. Lafo atu i lau Afioga i le Minisita lea mataupu.

Le Afioga i le Minisita o le Soifua Maloloina. Ona o au o se Sui o le Komiti o le Itumalo faa-falemai i Aleipata, ou te fia tautala ai i le itu lea i le falemai o le itumalo o Aleipata. E tusa nei e 10 tausaga talu ona leai se falemai o le itumalo, ae ou te matua faamatala atu i le taimi lenei, ua uma ona matou feiloai ma le Faatonu Sili ma le Minisita o le Falemai. E faapea le faaupuga, a outou usitai mai i le aveese ma Tapaga o le falemai ae ave i se fanua i uta o le a fai e le Malo lo outou falemai. O faaupuga ia o loo i ai nei. Mai le 10 tausaga o lea e i ai nei le faaupuga. Silasila foi, o nai toeaiina i tua e taofi faaupuga, e tataua la ona faapea e faaeteete i faaupuga a ni Sui e o atu, aua e le mafai ona sese le faamaumauga a toeaiina. I le taimi lenei lau Afioga i le Minisita, ua ou matua vaai o lau Afioga o se tagata fai mea maea. Ou te lafo atu lenei mataupu i lau Afioga.

Lau Afioga i le Minisita o Tupe, ua ou matua malie lava au i le Tala Faatatau o Tupe ona o lea ua tele se vaega e fuafua ai le manuia o nuu i tua. Faafetai i le galuega maea ua saunia e lau Afioga ae na o se fautuaga sei e silasila totoa i le Faletupe lea o le Atiina A'e o loo i ai le mea faapea, a ou alu atu e fai sau nogatupe e muamua ona ou totogi le tupe. Ou te fesili atu pe ave i fea le tupe lea ae ese foi le tului lea e i ai e tele? Sa ou fesili i le Ofisa e lei maua mai se tali ia te au. Sei silasila la i lea faiga. Ma le isi, ina ua ou alu atu e aitalafu sau tupe, pe le tataua ea ona fai se va ona totogi atu lea o le aitalafu. O le mea lea o loo i ai nei, a alu atu i le masina nei ma maua le aitalafu e amata lava ona toe totogi i le masina nei, a o au na ou alu atu ona o le faaleleia o lau atiina ae. O fea la e maua ai le tupe lea e vave manao i ai. E tataua ona fai se va. Ia lafo atu ia i lau Afioga i le Minisita lea mataupu. Lau Afioga i le Palemia ma le mamalu i Minisita, atonu o lea ua matou avatu ni fautuaga. E le o ni mea na outou faia

Saunoga Faataupou a Sui Usufono 1976-1978

ae silasila totoa i ai i mea o loo faaletonu ina ia avea ai lo outou taimi e faapea ua faaleleia ai ia mea. Ia manuia lo outou seei i le tofi.

Le mamalu o le Palemene, ia tatou fetufaai le tofa ma le faautaga, ia fetuutuunai le tofa ma le faautaga ina ia maua se sologa lelei mo le tatou agai i luma aua le tolu tausaga lenei ua tatou savalia. Ia manuia lau Afioga i le Fofoga Fetalai. Ia manuia Sui mamalu o le Palemene.

Tofa TAGOIA'EGA POLOGA



Itumalo Faaalaalafaga:

Aana Alofi Nu.3

Filifilia:

5 Mati 1976

Faatauto:

18 Mati 1976

Lauga Faataupou:

5 Aukuso 1976

Lau Afioga i le Fofoga o le Fono ma le mamalu o le Palemene, ua ou tulai atu foi e faaali se manatu poo ni fautuaga e avatu i lau Afioga i le Fofoga o le Fono. E muamua ona ou faafetai i lau Afioga i le Minisita o Tupe ona o le tala maeaea o le tupe ua uma ona tuuina mai i totonu o le Maota. Pau lava le mea talosia ia manuia uma fuafuaga ua e saunia.

Ou te fautua atu pe ou te talosaga atu i lau Afioga i le Palemia, atonu sa faafofoga Sui mamalu o le Maota i le fatu ma le aano o lou finagalo. Sa e saunoa ona o fua o le eleele, ae paga lava lea, e pei lava ona saunoa nisi o Sui ona o eleele ua migoi atu ii o le Esetete Tausi o le Malo. Ou te le tautala faapito i lou itumalo a o le atunuu atoa. O le mea e sili ona ou faanoanoa ai lou nei Sui Usufono ona ua faoa ma avea uma e le Malo ma le Esetete Tausi eleele ae le o faatoaina. Ua na ona toso le uaea a o loo vaomatua e oo mai lava i le taimi nei. O le mea lea ou te talosaga atu ai i lau Afioga i le Palemia, sei e silasila totoa ane sei fai se faiga e foia ai le faafitauli o le atunuu. Atonu o loo tele nisi o le atunuu o loo leai ni galuega, o loo leai foi ni mea e galulue i ai ma ua fai le tafafao vale. O le mea lea ou te talosaga atu ai, sei e silasila totoa ane lau Afioga.

Lua, o le faauoga a Samoa ma Niu Sila. E itiiti lava se mea ou te fia talosaga atu ai. O aso ia sa 6 masina ma le 3 masina, a o aso nei ua na o le 6 masina ma le 30 aso. O le mea la e sili ona faanoanoa ai lou Sui, afai e uaea mai se isi o Niu Sila o se faalavelave matautia poo se maliu poo se faaipopoga, ua alu atu e fai pepa ma ua uma pepa o

le a alu, ae tapa foi le Ofisa o Niu Sila i se \$100 e faa-siaki aua le tausiga o lē o le a malaga. O le mea e sili ona faanoanoa ai, e le tutusa le faiga o le atunuu ma tatou vaeatu le upu to ia te au. Afai e malaga se tagata taulia e le tapa se \$100, ae a malaga se isi o le atunuu, seiloga lava e avatu le \$100 e ave e faa-siaki i le Faletupe ona faatoa malaga lea. A o fea foi o le a aumai ai lenei \$100 ua na o le pasese lea e taumafai i ai, aua e taugata? O le mea lea ou te talosaga atu ai i lau Afioga i le Palemia, sei e silasila totoa ane i lea faafitauli.

E fia avatu foi se fesoasoani i le Afioga i le Minisita o Galuega. Atonu o le tele o Sui ua uma foi ona saunoa i ai ae le tuuina ifo foi i lou manatu. O mea tau vaipaipa. Atonu ua leva tausaga i le amata atu i Malue seia paia Aiga i le Tai o loo mafatia tele i le faafitauli o vaipaipa, tulou o le upu to ia te au, ua na o atigipaipa e faalalava i luga ae leai ni suavai. Atonu ua silia i le 5 tausaga ma ua ou vaai foi i le Tala Faatatau o le Tupe o loo talosagaina se vaegatupe ona o le faaleleia o vaitaumafa poo le fofoga taumafa o le atunuu. A o le faafitauli o i ai nei, seiloga e ta le 12 i le po ona faatoa sinasina mai lea o le paipa. O le taimi lena e faatoa maua mai ai ni vai o lenei talafatai i Sisifo, a o le aso atoa e aunoa ma se vai e sau i le paipa. O le mea lea ou te talosaga atu ai lau Afioga i le Minisita, sei e silasila totoa ane. Ona o le faalavelave na ou vaai foi o eli le paipa i gauta o Faleasiu i ia tausaga ua mavae, lea foi ua alu alu toe taatia foi ma ua toe sii foi fai isi galuega. Ae atonu ana fai faalelei ia galuega, atonu o i e foia ai le faafitauli, aua na o le pamu lea e i Leulumoega lea e taumafai e faasau ai le vai i ia itumalo uma.

Ou te fia tautala foi i ala galue, e tasi lenei faafitauli o loo tele i alaalafaga ma itumalo o ala galue. Sa talosaga mai foi nuu ma itumalo ona o le matitiva e leai ni tupe e tanu ai auala galue. O le faalavelave pe tolu pe fa aso e sua ai e se masini tulou, ona toe foi foi lea o le masini ua leai se vaegatupe. Ae a timu ia ua palapala lava ua le mafai e taavale ona feoi ai. Ana sei mafai ona teuteuina lelei, ma o loo i ai masini e eli ai autu ma teu i ni maa, atonu o iina e foia ai lea faafitauli.

Ou te fia fesoasoani i lau Afioga i le Minisita e Pulea Tagata Faigaluega a le Malo. Atonu o silafia uma e le Maota o nisi o alo ma fanau a le atunuu sa auina atu i atunuu i fafo ma ua foi mai ma le tomai faapitoa, o le faalavelave ua tupu ua na o le taitasi o tausaga ma toe faamavae ma le galuega a le Malo. Atonu o loo silafia foi e se isi Sui o loo i le Maota, o nisi o alii papalagi ua faamavae ma latou galuega mai atunuu mamao a o loo aumai faafaigaluega i le

Saunoga Faataupou a Sui Usufono 1976-1978

tatou atunuu. Po ua ave i ai se totogi e sili atu i le \$6,000, a o na tofiga e umia e alii papalagi o loo mafai ma tutusa lelei ma nisi o alo o le atunuu, a o le faalavelave na o le tai \$2,000 e tuu mo alo o le atunuu ui ina tutusa lelei galuega. Pe leai ea se faiga e foia ai lea faafitauli? O le fua foi lea e le atoa le tausaga faamavae nisi o le atunuu. O le mea lea ou te talosaga atu ai i le Malo sei fuafua ane lea mataupu.

Ou te fia tautala foi i le Ofisa o Tupe. Lau Afioga i le Minisita o loo ona vaaia le Matagaluega lea, o se vaaiga faanoanoa o loo i ai i lea ofisa. Ua masani ona ou vaai i ai i nisi o le motu tele i Salafai pe afai e malaga mai mo le talaina o ponesi o niu. A ulu mai i totonu o le Ofisa o le Tupe, o loo tusia mai i luma o le laulau le mea e fesili i ai, a o le faalavelave e leai se isi e vaai i ai, aua o lena Ofisa ua pupuni atoa i tioata mea e i ai tagata faigaluega. Ae toatasi lava la le alii o loo ona vaaia lena faafitauli na o le alii o Uati Rasmussen. O lea ou te talosaga atu ai i lau Afioga, poo i ai se faiga e foia ai lea faafitauli ona o le alofa i le atunuu.

O lenei lava atiina ae o le popo, o se atiina ae e sili ona lelei i le atunuu. Peitai ane, e pei lava ona saunoa nisi Sui, o le pa'ū o le fua o le popo, atonu o lea se faafitauli tele. Ae ou te talosaga atu i le Malo ina ia faia se fuafuaga pe mafai ona toe siitia i luga le tau o le popo, aua e tele le popo i le atunuu.

O lau talosaga mulimuli i le paia o le Maota i Sui mamalu, tautuana lenei tolu tausaga. O lenei ua tapuai le atunuu ae lafo mai le avega i le Maota e faatautaia lenei tolu tausaga ma ia tatou o faatasi ma tatou taumafai ina ia maua se lelei mo le atunuu atoa. O le fautuaga lea e avatu i le mamalu o le Palemene.

Tofa Hon TALAMAIVAO NIKO



Itumalo Faaalaalafaga:

Vaa o Fonoti

Filifilia:

5 Mati 1976

Faatauto:

18 Mati 1976

Lauga Faataupou:

2 Tesema 1976

Lau Afioga a le Fofoga Fetalai faapea le mamalu o Sui Usufono, ou te faafetai atu i le avanoa ua tuuina mai e fai ai sau faamatalaga e tusa i timaiga foi poo fautuaga i faitioga foi ua tuuina mai e fesoasoani i galuega ua tofia ai au ou te tautua ai i le Malo.

Muamua, sa ou faalogo o faapea se saunoaga a se tasi Sui mamalu, atonu o le lipoti a le Minisita o Tupe atoa ma le saunoaga, o le tele o ia mea ma fuafuaga peiseai ua na o ni tala faaalaloaga. Ou te faamalulu atu ai, e tele foi fesili sa fa mai e sui mamalu e aafia ai ni fuafuaga e lei faataunuuina i le taimi lenei, ae ui lava i lea o ni fuafuaga loloto ua faia ma le agaga naunautai ina ia mafai ona faatinoina le gasolosolo atu i luma. E pei lava ona silafia, a i ai se galuega faigata ma taua ma taugata, e tatau lava ona muamua ona faataatia le alafua, ma fai ni fuafuaga loloto i itu eseese uma e aafia i lea galuega. Faapea la le tulaga o loo i ai nei pei lava ona outou silafia, ua tofia nei au e vaaia le Komiti e Pulea o tatou Tagata Faigaluega, o le Matagaluega o Leoleo ma Falepuipui faapea le Matagaluega o Leipa ona o le agaga lava ma le fuafuaga ina ia mafai se faiga e talafeagai ma tatau ai i le faaleleia o Matagaluega uma lava o lo tatou Malo.

O le a ou taumafai nei e tali atu i fesili a Sui mamalu. O le fesili muamua, sa talosagaina au i le tulaga o totogi o tagata faigaluega o le Malo. O le taimi nei pei ona silafia, ua tofia se tasi o alo o le atunuu e tauaveina le tulaga taitai i le Komiti e Pulea Tagata Faigaluega a le Malo; ma o le agaga lava o loo i ai ina ia taumafai se faiga e le gata ia sailiili ai agavaa e talafeagai ma lea galuega ma lea galuega o alo o le atunuu o loo tautua i le Malo, ae faapea foi ona tuuina atu le totogi e talafeagai ma le galuega a le tagata ma le tulaga o loo galue ai i le Malo. O lea la galuega o se galuega faigata lava, ma atonu e i ai se taimi o i luma o le a fofoa ai le mamalu o le Maota i ia fuafuaga.

O se tulaga sa taua e se Sui mamalu e faapea ua pasia i le tausaga ua mavae le 50% e faaopoopo i totonu o tagata faigaluega, atonu pe le sao lea faaaliga. O le tulaga moni e 5% na faaopoopo i totogi mai ia Ianuari i le tausaga talu ai, ma o lea la faaopoopoga e aafia ai e anata mai i Ulu o Matagaluega sei tau atu lava i le vaega leipa poo tagata pito maualalo o latou tulaga o loo galulue ai i le Malo. E le gata foi i lea, sa fai se sailiiliga faapitoa e tusa i totogi o i latou e pulea tagata faigaluega ua siitia ai totogi o Ulu o Matagaluega, ma o lea siitaga e oo atu lava i le 30% e pei ona i ai nei. E pei foi ona ou taua o loo i ai fuafuaga ma sailiiliga a le Ofisa e Pulea Galuega a le Malo ina ia fai lava se fuafuaga e tusa i le mafatia foi i lenei vaitaimi i le taugata o le soifuaga; atonu o loo i ai se taimi o i luma ona faafofoga lea o lo outou mamalu.

Sa faapitoa lava se fesili a se tasi Sui mamalu i le tulaga i le Ofisa o Leoleo faapea ma le Ofisa o Falemai ma Aoga. Atonu o ia foi fautuaga ua

Saunoga Faataupou a Sui Usufono 1976-1978

fesoasoani foi i lou tagata atoa ma e o loo matou galulue faatasi ma ou te tau atu ai, o loo i ai lava se fuafuaga e foia ai e tusa ai ma le tau o le soifuaga o i ai nei. A e pei lava ona outou silafia, o nei lava fuafuaga uma ma te fai mea ma galulue faatasi ai ma lou uso a Minisita le afioga a Vaovasamanaia, aua e tele le manao ae pei lava ona silafia e le mamalu o le Maota, o tupe lava e faataga mai ma mafai ona tatou tago aao i ai, o lea e faatino ai fuafuaga faapenei.

O le tasi fesili sa tuuina mai sa saunoa ai se tasi Sui mamalu e faapea. E lelei le fuafuaga lea ua ou faia e faafealofani ai tagata o loo galulue i le Malo ma taumafai ai se faiga e galulue faatasi ai. Ae sa i ai le fautuaga faapea, atonu e le o se mea ua lelei le faatagaina o le tuusaoina mai o talosaga a tagata faigaluega, po o ni lipoti a tagata faigaluega i mea o loo atugalua ai o latou finagalo i le Minisita. Sa faapea le saunoaga a le Sui mamalu, e tatau lava ona ui atu i le Komiti o Tagata Faigaluega e tusa ma le tulafono ma le faavae. Ou te tali atu i le fesili a le Sui mamalu e faapea. E moni lava, o le Komisi lea pei ona tofia e le Tulafono Faavae a Samoa, o latou ia e tumaoti lava i le Ofisa e vaavaia tagata faigaluega a le Malo. Ui lava i lea, ina ua tofia au ou te vaia le Komisi lea, sa ou sailiili ni faafitauli ma ni faigata o loo aafia i lea matagaluega; ma o lea ua ou iloa ai, e i ai lava faafitauli e tatau ona vave foia, ma sa filifili lou mafaufau po o le a le auala e talafeagai ona ou faaogaina ina ia taumafai e foia ai ia faafitauli?

E i ai auala e masani ai papalagi i lo latou faiga o tagata faigaluega ae ua ou filifilia lava le auala e sili atu ona taua i le aganuu ma le tu faa-Samoa – o le agaga lea faale-aiga po o le agaga e tausi ai aiga ma nuu uma ma alaalfaga. O le tulaga lea o le feutagai ma le talatalanoa ma sailiili faafitauli o i ai ma sue mai se auala e foia ai ia faafitauli. O lea sao ua tapa ai Ulu o Matagaluega uma atoa foi ma e lagolago i ai latou ma fai se matou talanoaga faale-aiga pei ona ou taua. O lea la e lei faia foi lea talanoaga sa i ai lava nisi o i latou; ma ao lei faia foi lea talanoaga sa i ai lava nisi o le afaigaluega a le Malo sao o mai ia te au ma faaali mai faafitauli o loo mafatia ai. O lea la na ou faapea atu ai loa, e moni lava o le faavae e tumaoti le Komiti e Pulea Tagata Faigaluega a le Malo, ae ui i lea, o le tulafono foi e faataga mai ai le aia tatau a soo se tagatanuu lava o Samoa e faaoga e lou tagata aua o au o le Minisita ua tofia e puipui ma vaavaai la outou galuega.

O le mea la o loo fai ai nei, a i ai se mea e faigata i se tagata faigaluega a le Malo ona talanoa ai i le Komisi lea ona o mafuaga e le maaalofia, ia ua ou avanoa lava e ui mai i ai. O le tulaga la o loo i ai

nei, ua matagofie lava laasaga o mea uma. Ua mafai ona o mai le mamalu o le atunuu o loo tautua i le Malo ma faaoga lou tagata ou te faufautua ma faufautua foi i le Komisi i se mea e faaletonu ai se tasi e tusa lava o le tulaga o le tatou atunuu ma le agaguu.

O le taimi nei, o le a ou taumafai ou te tali atu i tulaga o mea tau Autalavou, Taaloga ma Taleni Faale-aganuu. E toatele ni Sui sa saunoa i le tulaga i le Autalavou. Sa i ai se tasi Sui sa faapea mai, pe le o se mea tatau ona tuu atu pea Autalavou i le vaavaaiga a le Aufai-lotu po o le mamalu foi o Faifeau ma Ekalesia? Atonu o le a ou taumafai e faamalamalama le tulaga o loo i ai le finagalo o le Malo. A uma lau faamalamalama ou te manatu o le a faamalieina le finagalo o le Sui lea. O le agaga ma le fuafuaga a le Malo o loo iai, e leai se manatu e aveeseina le taitaiga o Autalavou o le atunuu mai le mamalu o Ekalesia poo Ulu foi o Ekalesia, o loo latou faia lea galuega ma le naunautai mo le lelei atoatoa o tupulaga o le atunuu. Pau lava le tulaga o loo taumafai i ai le Malo o le fesoasoani atu lea ina ia faaleleia ia galuega lelei ua mafatia ai Ekalesia o loo latou tautua i le atunuu i lea tulaga.

O le a outou tagai i ai i fuafuaga o le tulafono lea o le a tuuina mai aua e aafia ai fuafuaga uma a le Malo ma o loo faatuina ai se manatu faapea, ia faia se Faalapotopotoga po o se Aufono. O lea Aufono e le filifilia e le Malo o latou Sui, e leai; a o Ulu lava o Autalavou o Ekalesia taitasi. O i latou ia o le a avea ma Usufono i lea fono mamalu. O lona uiga la pei ona outou tagai i ai, e leai se aia a le Malo e faapea le mea lea, ua tuu lava i Ekalesia latou te filifilia o latou Sui, ma o Taitai lava ia o Autalavou o Ekalesia taitasi. Ona i ai lea ma le fuafuaga a le Malo, o le a faatasitasi le malosi ma taumafaiga ia a alo o le atunuu, ave atu i ai ma faamanuiaga a le Malo i fesoasoani e talafeagai ai ma o ia fesoasoani pei ona outou silafia e mafai ona ala mai ai ni faamanuiaga mai Malo i fafo, aua o le tele o Faalapotopotoga i Fafo e auala mai latou fesoasoani ina ua latou tagai mai ua tuufatasi taumafaiga a le Malo ma Ekalesia o loo galulue i Samoa. E mafai foi ona faafaigofie i ai latou ona tuuina mai ni a latou fesoasoani e atiina ae ai lea itu faigata po o lea itu sili ona taua i le atiina ae o le tatou atunuu.

O le fuafuaga foi e pei ona fautuaina ai au faapea, o se mea tatau ona taumafai e atiina ae tulaga o le galueaina o le laueleele i tamaiti aoga atoa ma le vaega talavou e le aoga. O le agaga lava lea o i ai ma ou te faafetai atu ai lava i Sui mamalu e tusa ma a latou fautuaga. Ae pei lava ona outou silafia, o Autalavou e faavaeina lava e Ekalesia pei ona i ai

Saunoga Faataupou a Sui Usufono 1976-1978

nei. O atugaluga ma a outou fautuaga e tusa o le taitai atu i tu ma aganuu faa Samoa atoa foi ma le agaga faa-kerisiano i le faitauina o le Tusi Paia, ia o le tulaga lava lea o le a i ai. Ou te faamalo ma ou faafetai atu ai i fautuaga a Sui mamalu.

Sa faitioina e se tasi Sui mamalu le tulaga e tusa ai i le tausia o le Sapatu po o le Aso Sa. Sa faapea se tasi Sui i lana saunoaga, pe le o se mea ua tatau ea ona taofia le faia o tifaga i le aso Sa, ae faaavanoa le aso Sa o le aso e tapuai ai le atunuu i lo latou Atua. O sauniga lotu foi ia e fai i le afiafi mai le Uaealesi Faasalalau, ua le mafai ona maua ona o tulaga o tifaga ma uiga faapea o loo faia pea e le atunuu i lenei vaitaimi. Ou te faafetai atu lava i le Sui lea aua o se fesili taua lava lea. O tatou ma lo tatou tulai mai i le tatou tutoatasi, o lea lava tatou te mulimuli i faiga faavae sa amata mai i Peretania i le tulaga tau aganuu faakerisiano ma pulega lava faa-Peretania, O le faiga faavae e mulimuli ai atunuu e i ai Niu Sila ma isi atunuu faapea i lalo o le Taupulega a Peretania e talitonu i le Atua, o le aso Sa o le tulaga lava lea e i ai. E leai ni faafiafiaga e faia i le aso Sa. E vagana lava ona o sauniga i ni faiga e maua mai ai tupe e fesoasoani i le tulaga o mea faa-falemai ma mea faapea; tulaga foi ia e saili ai tupe e fesoasoai ai i tagata puapuagatia. O le tulaga foi lea i lou lava talitonuga ua tatau ona i ai Samoa.

Ou te le faaaloalo atu i le Sui lea atoa ma le mamalu o le Maota Foo ma le atunuu, ae pei lava ona ou taua, o loo fai nei i ai le fuafuaga ma afai lava o le tulaga lea o le a i ai e tatau ona tatou mulimuli i le mea na faavae mai ai atunuu o loo i lalo o le Taupulega a Peretania, pe o atunuu foi e talitonu i le Atua, o lona uiga o le mea lava lea o le a tatou i ai.

Sa i ai se Sui mamalu sa taua i saba lauga le tulaga i mea tau eleele sa faapea ai se faaupuga, sa saunoa le afioga a le Tama a Aiga, le afioga lea ia Tupua Tamasese i se vaitaimi ua mavae e tusa ai i le tulaga o le faaaogaina o eleele, po o se fuafuafa foi i le sailia o eleele aua le mamalu o le atunuu. O lea ou te fofoga atu lau afioga faapea le mamalu o le Maota, ua uma na fesiligia le afioga i le Tama a Aiga, ma o lana faaaliga e moni sa fai se saunoaga, ae ui o lea e le o le tulaga lea na saunoa i ai. O lana faaaliga e faapea, e faatuina se Komiti e sailiilia le tulaga o loo i ai eleele o le atunuu i le vaitaimi nei, pe fia le eleele ua aafia i tulaga Esetete Tausi ma le Malo ae pe fia foi le vaega eleele ua aafia i tulaga foi nei e taua o eleele tau papalagi po o eleele tumaoti, ia pe fia foi vaega eleele o loo i le aganuu pea.

Sa i ai le fuafuaga atonu a maoti mai lea tulaga ona agai atu lea o le Malo i se fuafuaga e talafeagai ai e

faamalieina ai ia talosaga ua tuuina mai e le tele o le mamalu o le Atunuu. Ae pei ona silafia, o le Komisi lea e suesueina eleele foi nei e lei matua tumaoti mai tulaga. Ua faapitoa lava la i eleele foi nei e lei matua tumaoti mai le tulaga o loo i ai. Ua le iloa po o le eleele Samoa faamaoni po o eleele foi ia e taua o eleele faapapalagi. O eleele la faapena e i ai eleele ia na faatau ae lei matua faia i ai se faiga maoti o eleele tonu lava ia ua sailiili e le Komiti lava lea, pe ua talafeagai ona tuuina tonu lava ia ua sailiili e le Komisi lava lea, pe ua talafeagai ona tuuina tonu lava ia ua sailiili e le Komisi lava lea, pe ua talafeagai ona tuuina mai i totonu o le vaega eleele lea e taua o eleele e pulea taitoatasi.

Le Fofoga o le Fono, faafetai lava i le fesili a le Sui mamalu. Pei lava na silafia, o le tulaga tonu lava lea na ala ai ona ou tali atu ona ua aafia mea tau Komisi Suesue; pei ona silafia o le Komisi Suesue o le a faauluulu i ai o le Faamasino Sili lea a le Malo, ma o le Ofisa lava o le Faamasinoga e faaautu i ai le tulaga o le sailia o latou e aafia i le suesuega faapea. Ae pei la ona saunia le Sui mamalu i le Komisi lea e sailiilia eleele, o le mea lava foi na faia i aso ua mavae ina ua laga le tulaga lea e uiga i fanua o Samoa foi ia faapea, ua faatau i tagata papalagi po o isi foi a sa aafia ai. O lea la sa faia ai le Komisi lea ina ia sailiilia na puipua aia tatau a le mamalu o le atunuu.

Faafetai lava i lau afioga, O le tulaga lava lea sa ou fesili ai i le aso ua mavae i se fautuaga a le Ofisa o le Loia Sili ma o le mafuaga lea ua ala ai ona ou tautala i le mataupu. Sa ou fesili foi i le uso a Minisita i le taeao nei i le tulaga lea, ma ua uma ona talanoa i ai. E aafia la le Ofisa o le Faamasinoga pei ona silafia ma ou malamalama atu i le mafuaga o le eseesega o Komisi. O le Komisi lea, pau lava le latou matafaioi o le sailiili po o fea tonu le tulaga o loo i ai lea eleele? Pe faamanuiaina le talosaga ina ia avea lea eleele o le eleele e taua o eleele pulea taitoatasi, ia pe taatia lava i tulaga faale-aganuu pei ona i ai.

Sa fesili se tasi Sui e tusa o le tulaga ua ala ai ona umi le taimi e faatali ai le mamalu o le atunuu, amata mai i le taimi e faaulu ai la latou tagi i le Ofisa o Fanua ma Suafa i le faiga o a latou faamasinoga? Sa fesili foi se tasi Sui e faapea, pe i ai se fesoasoani a le Ofisa o Fanua ma Suafa i le mamalu o le atunuu ina ia latou malamalama tonu i le tulaga e tatau ona fai a latou talosaga i faamasinoga ona ua aliali mai o faaiuga o faamasinoga o loo tuuina mai e ala mai i le faaupuga o le talosaga. Ua uma ona matou talanoa foi ma le Ulu o le Matagaluega ma o le fuafuaga la

Saunoga Faataupou a Sui Usufono 1976-1978

ua i ai i le lumanai, o le a taumafai lava ina ia tuuina atu le fesoasoani i e o le atunuu, latou o le a talosagaina lea fesoasoani ina ia matua malamalama lava i le faaupuga ma le uiga o le mea o loo i o latou finagalo. Pau lava le mea e popole ai lo tatou ofisa, ona o le aia tatau a latou e aafia i suafa po o fanua e fai ai lava a latou faaupuga i o latou lava finagalo e aunoa ma le faatosinaina po o le fulisia o latou finagalo i fautuaga e aunoa ma le Ofisa. O le mea faigata lava lea, ae ui i lea, e taumafai lava le Ofisa e fai se faiga ina ia mafai ai ona fesoasoani i le mamalu o le atunuu.

Faafetai lava i fautuaga a le Sui mamalu. Ia outou silafia foi, o faaiuga amiotonu a le Faamasinoga e mulimuli lava i molimau ua tuuina mai. Ou te faatusa le Faamasinoga i se taavale nofoa afi e alu i luga o le auala foi lea ua uma na saunia. O le mea lava e pio i ai le auala o le mea lava lea e alu i ai le tino o le nofoa afi. O lona uiga o molimau ua tuuina mai i luma o le Faamasino o i lava e fai atu ai le fuafuaga o le faaiuga. Afai la e faatamala le ua atugaluga foi ma sulu mai i le ofisa i le sauniuniga o ana faamatalaga sao ma le tonu, atonu o se tulaga foi lea o faafitauli e mafai ona oo i ai. E aveatu ai lava lau fautuaga i le Sui mamalu atoa foi ma Sui mamalu o le atunuu, o le tulaga lava lea e i ai. Afai ua latou fia talosagaina le fesoasoani a le Faamasinoga po o le Ofisa foi o le Faamasinoga, e tatau lava ona faavae ia tulaga po o le Ofisa foi o le Faamasinoga, e tatau lava ona faavae ia tulaga i talosaga po o tagi i luga foi o ni molimau ua mautinoa lelei ma maumaututu e faafaigofie ai le galuega.

E pei lava ona ou faasilasila atu, afai o se faamasinoga e mafua mai i se tagi ona o se atugaluga o se tasi o le atunuu i se mataupu tau eleele, po o se mataupu tau suafa, ona iloilo lea e le Ofisa o tulaga uma e tusa ai ma le Tulafono, po o ua talafeagai ona tuuina atu i luma o le Faamasinoga lea tagi po o lea talosaga e iloilo ai na fai i ai se faaiuga. Afai e iloilo atu e mafai ona latou teuteuina le mataupu ma tausia ai le fealofani o aiga po o e foi aafia ai, ona faapea lava lea ona fai. Afai e aliali mai e le mafai ona oo atu i se tulaga faamanuiaina, a o le mataupu e tatau ona tuuina atu i luma o le Faamasinoga, o le a faapea lava ona tuuina atu i luma o le Faamasinoga. O le iloilogaga a le Faamasinoga e pei lava ona ou fai atu, e le gata ina ia fai fuafua i molimau na tuuina atu i luma o le faamasinoga ae faapea foi ona fai fuafua i le tulafono o loo faavae ai ia suesuega. Afai o le faaiuga o le faamasinoga ua malo Pai, malolo Seve, ona aumai lea o le latou faaiuga.

Ae ui lava ina malolo Seve, ae i ai foi aiaiga o le tulafono e mafai ona toe talosaga atu Seve, pe afai e i ai se mafuaga tatau e tatau ai ona toe talosaga. E tele lava ni mafuaga e talafeagai ai. O se faaitaiga e faapea: Afai ua aliali mai ua ala ona sese le Faamasinoga ona ua tautala le sao pe tautala le amiotonu molimau sa latou tuuina atu ia faamatalaga i luma o le faamasinoga, ma ua avea lea ma mea ua sese ai le faamasinoga, ona faapea loa lea o le Faamasino Sili ua tatau ona toe faia se suesuega i lea mataupu, aua ua aliali mai sa le sao ona faia ma ua faaseseina ai i latou sa aafia i le faamasinoga. O lea la, e mafai ai ona toe tatala le avanoa e toe fai ai le faamasinoga ina ia maua le mea sao ma le tonu. O lau tali puupuu lea ma le faamalamalamaga e fesoasoani ai i le Sui, atoa foi ma le mamalu o le atunuu o loo faafofoga mai i lenei taimi.

O le a ou see atu loa i le fesili lea na tuuina mai e le mamalu o Sui e uiga i tulaga o faafiafiaga o le Tutoatasi ia Iuni i le tausaga nei. Sa taua e ni Sui se toalua e faapea sa le manuia le tulaga o faleaitu e pei lava ona faafofoga i ai le atunuu. Ia ou te faamaonia atu i le tulaga lea, ma e avatu ai foi lau faamaluluga ma lau faamaualaloga ona o le tulaga na oo i ai lea fuafuaga, atoa foi ma le faafofoga a le atunuu. Pau lava le mea, e le fia faatauina sou ola. O le tulaga na i ai e tusa e tolu vaiaso ae tuuina mai ia te au le taumafaiga o se polokalame ina ia fai ai fuafuaga o le Tutoatasi e pei ona i ai. Sa matou taumafai atu lava ma le agaga naunautai ina ia fai se polokalame e matagofie ma maua ai le avanoa i le mamalu o le atunuu aemaise alo o le atunuu e maimoa ai i fuafuaga foi ma taleni a nisi o alo o le atunuu ua tomai i tulaga tau faafiafiaga.

Sa faia foi se Komiti e aofia ai nisi o tagata lauiloa ma le faatuatuaaina e le atunuu latou te pasia ma fuafuaina faleaitu e pei ona i ai. Ao le mea ou te faanoanoa ai, ua ese ia faleaitu ma tala na pasia e le Komiti, ese taga ia ua o mai fai i luma o le mamalu o le atunuu. E ui lava i lea e pei foi ona silafia e nisi sa matou faatasi i lea vaitaimi, na aliali mai loa lea tulaga le manuia, ou fai atu loa i ai e taofi ma o lea sa taofi ai loa ia fuafuaga. E moni lava foi o lea e faafofoga mai le mamalu o le atunuu ma i latou foi latou te faia ia faafiafiaga tau faleaitu, ia tautuana ma outou lo tatou agai atu i luma, aua o Samoa o le atunuu faigata. Ae avatu lau faafetai ma lau faamalo i Sui na laga lea tulaga.

O le tasi fesili sa laga o le mataupu lea tau le Ofisa o Leoleo. Sa i ai se saunoaga a se tasi Sui mamalu e faapea, ua faanoanoa ina ua ou “kolaina” le Leoleo a o faataunuu lona tiute. Sa i ai foi ma se isi faaupuga

Saunoga Faataupou a Sui Usufono 1976-1978

faapea, ua faanoanoa foi ona ua aveese le avetaavale i le malaga a le Tupu Tonga lea na asiati atu i Savaii, ae ua ou aveina le taavale. O lona finagalo o le tulaga o le Minisita e le tatau ona faia se galuega mauualalo faapea. Ia e muamua lava ona ou faapea atu lau afioga a le Fofoga Fetalai ma le mamalu o le Fono, o lou talitonuga o le Maota lenei o le tasi lea o faamasinoga aupito sili ona maualuga i totonu o Samoa. O tulaga o tulafono e puipuia ai le mamalu o faamasinoga, e peiseai e faavae lava i le tulaga lenei, e le tatau ona faatagaina se molimau na te avatu se faamatalaga e le sao. O lona uiga o se faamatalaga lea e le mafai ona molimauina ma faamaonia ona o se mea na tagai, po o se mea vaeatu le paia na sogisogi i ai, po o se mea na tagotago i ai, po o se mea na faalogo i ai, po o se mea na tofotofu i ai.

A faapea la o le Sui mamalu ua saunoa faapea ua ou “kolaina” le leoleo, aua o le upu “kola” e pei e mulimuli mai i le faa-Peretania, e pei ona silafia – o le uu lea o le kola ma fai i ai se faiga faapea e pei ona e silafia. Ou te faaeteete i le mamalu o le atunuu ma o lea ou te faapea atu ai, ua tatau ona aveeseina mai i le pepa po o lipoti faamaumauina a le Fono mamalu.

Faafetai lava i lau afioga, faafetai foi i le Sui mamalu ma lana faauilavea. E leai la sou agaga e fai se ma finauga ma le Sui mamalu, ae pei lava foi ona silafia e i ai le isi tulafono o le Faamasinoga e faapenei. Afai ua fai mai le tasi molimau e le ioe, ae fai mai le isi molimau o le leai; ona vaavaai lea i tulaga po o fea le molimau e faatuatuaina. O le mea lava lea e tuu atu i le mamalu o le Maota Fono ma lau afioga e iloiloina lea tulaga po o le fea o faamatalaga e faatuatuaina, ma e mafua mai i molimau. E gata mai ai la lau faamatalaga i le tulaga la lea e tali atu ai i le fesili a le Sui mamalu.

O le isi mataupu lea e faapea ua ou aveese le avetaavale ae ou aveina le taavale. Ia atonu ua ou fiafia i le fesili lea ma le fautuaga lea. O au na tofiaina e le Kapeneta ou te vaaia le malaga a le Tupu mamalu o Tonga, sa talimalo ai le Ao Mamalu o le tatou Malo. O le agaga o le Palemia ma le Kapeneta o loo i ai nei, o faaaloaloga mauualuga e avea lea i le Ao o le Malo, e ave lea i le Sui Ao o le Malo. O matou, vae atu le paia o tagata faigaluega; o matou e tautuaina le atunuu. O le tulaga na i ai le polokalame na matou malaga ai i Savaii, o le ta o le 11 i le po ae ou maua le faamatalaga ua sui le finagalo o le Tupu ua sui foi le finagalo o le Ao o le Malo, o le a le malaga i le vaalele i Savaii ae o le a faimalaga atu i le “Limulimutau”. O se mea faigata ia te au aua o malaga faapenei, e pei lava ona ou fai atu e taua ma e faigata le puipuiga. E fai lava i ai le

mea e mafai e le tagata; ma ou te faafetai ona o le avanoa ua tuuina mai ia te au ou te puipui ai pea lea malaga ma ou vaaia lea malaga.

Sa fai loa ia fuafuaga ma o le tulaga sa i ai, o au sa ou muamua ma le tagata foi lea e puipuia le Tupu. Ua ma malaga i Savaii faatasi ma se sui o le Malo. O le uiga o le malaga ia tapenaina mea uma lava e tusa ma le polokalame o le afio atu o le alii ma le Ao o le Malo i tulaga eseese. Ina ua matou taunuu i le Potelate i Asau, sa matou matamata i le tulaga foi i fuafuaga a le Potelate i mea e fia afio i ai le alii ma le Ao Mamalu o le Malo e maimoa ai. Ia ona matou faatonuina loa lea o le polokalame e talafeagai ma le mamalu o le malaga. E leai ni mea gaogaosa e i ai aua o le malaga o le malaga mamalu e pei ona silafia. Sa tonu ai loa i le matou vaega lea e faapenei. A taunuu atu loa le taavale i le faitotoa o le Potelate, ia o mea moni e le silafia e le avetaavale le tulaga i le fuafuaga ua matou i ai. E lua la mea e tatau ona matou faia. Muamua, o le taofi o le taavale a le Tupu mamalu ma le Ao Mamalu o le Malo ae sei fai le matou faamatalaga i le avetaavale ina ia silafia le mea e alu agai i ai le taavale. Lona lua o le alu ane o se isi o matou e ave le taavale e mulimuli i fuafuaga ua uma ona matou faataatiaina.

Faafetai lava i lau afioga. E pei ona ou taua o au na tofia e le Palemia ma le Kapeneta ou te aafia i le tulaga mamalu o le malaga a le Tupu o Tonga, a o le tulaga lea na ou faia i Savaii o mea lava e fai i lou mafaufau ma lou aoaoga na aoaoina ai i mea faapenei, ia ma lou malamalama i le tulaga o le mea e tatau ona fai e talafeagai ma le finagalo o le Malo lea o loo i ai. O le a faaauau la lau faamatalaga. Ua taunuu atu loa le taavale ou fai atu i le avetaavale, sau ina faatali atu ae aumai le taavale sei ou avea ona o le fuafua lava lea e i ai.

Ia o le atugaluga o le Sui mamalu faapea o Minisita e mamalu, ia o lea ua uma ona ou taua o matou o tagata faigaluega vae atu lava le paia. E leai ni o matou saili mamalu e faia ia matou galuega. A palasi foi i tu ma aganuu faa-Samoa, ia ou te le iloa pe ou te toe maua se avanoa matagofie faapea e faaali atu ai i le Tupu o Tonga ma le Ao Mamalu o le tatou Malo, lou agaga lea. Ua ou faafetai lava ua taua lenei mea ua silafia ai e le atunuu le agaga moni lea ia te au – o vae ma lima i tulaga faapea. Ou te manatu foi a na afio le Palemia ma se isi foi o ou uso a Minisita, o le tulaga lava lea e i ai e faaali atu ai la tatou tautua i le tatou Ao o le Malo ma ana malo faaaloaloga, e faaali atu ai foi lo tatou aiaili faatamalii. O le tali atu lea i lau afioga ma le mamalu o le Fono ma le aufaafofoga.

Saunoga Faataupou a Sui Usufono 1976-1978

E le gata foi i lea, o lou tulaga Minisita o le tagata faigaluega a le Malo e aofia ai le Ofisa o Leoleo ma i latou uma lava. I lou a talitonuga moni lava, atonu o le tasi lea aoaoga matagofie lava e tatau ia te au lea e taitaia le matagaluega ona solomua ona ou faia. Ua tatou maua soo faaaliga ma ua fofoga soo foi i ni faitioga a le atunuu e faapea, o tagata faigaluega e faapea ma faapea. Atonu lava o le mafuaga o lea tulaga, ona o le agaga la lea – o le alu i le galuega ao la e mafaufau o ia o le tamalii mai fea, po o ia e faapea mai fea. Ae manatua foi o tagata faigaluega a le Malo o tagata e tautua, e auauna i le atunuu. O lea foi ou te mana'o ai e avatu se ata faataitai i matagaluega i lalo o lau vaavaaiga o lea agaga tautua i le atunuu. O le agaga lea. Afai e le i le tagata le agaga lea, ia ua le tatau ona ave'a o ia o se tagata faigaluega a le Malo aua e le ave'a i ai ni uiga fia tamalii o se tasi; e le ave'a i ai ni uiga fia maualuga, ae ia alu e tautua i vae ma lima e auauna ai i le atunuu ma le Malo. O le agaga lava lea e pei ona ou fai atu. O lau faataitai lea. E le gata la i upu ou te tautala ai ao amioga ma au mea e fai.

O le isi fesili a le tasi Sui mamalu sa faapea mai, pe ai se a o le a fai ai le suesuega a le Komisi Suesue i le Ofisa o Leoleo? Ua faapea le saunoga a le Sui mamalu, o lana ia tagai i ai, o loo lelei mea uma ma e leai foi se lipoti a le Ofisa o Suetusi ua faitiaina ai le Ofisa o Leoleo. E pau lava lau tali, ou te faafetai atu i le Sui mamalu na laga lea tulaga. O le lelei ma le lelei o le Ofisa o Leoleo e mafai ona tatou iloa pe a outou tagai i tulafono e faavae ai le Ofisa o Leoleo, le tautoga ma mea uma faapea. A tagai i ai, ona tatou fesili lea pe o faamalieina le fea vaega, a o le fea vaega e le o faamanuiaina? I le taimi nei o loo i ai foi se fuafuaga i le Malo ma ni fautuaga mai a nisi e faapea, pe ua le talafeagai i le vaiataimi lenei ona tuueseese le vaega o Falepuipui ma le vaega o Leoleo. Ia o le suesuega lea o loo fai nei aafia uma ai lava ia tulaga.

Lau afioga ma Sui mamalu, faafetai lava mo le fautuaga. O le Komisi Suesue lea o loo taua i totonu o le Tulafono a Leoleo 1969 e peiseai e ese foi le mea e faatatau i ai. E faatatau lava lea i le vaega foi lea o le “Pule ma le Vaai”; se mea ua faaletonu i le va o le matagaluega. O lona uiga o se faamatalaga poo i ai se isi ua tagi faasaga i leoleo, pe o se fasiga e se leoleo vae atu le paia po o le a lava se tulaga o sese ai leoleo. Ia ona fai lea o se suesuega faapea. E le gata foi i lea, po o se isi ua fia siitia lona tulaga i luga po o se satini po o se tulaga faapea ae ua le siitiaina a ua uma ona pasia ni ana suega po o ni mea faapea, o le vaega la lea o le tulafono e faaogaina e le Minisita o Leoleo e fai ai ia

suesuega. A o le suesuega lea e i ai nei, e pei o le finagalo o le Malo ia matua faia lava se sailiiliga e matua faataatia mai le tulaga o lo o i ai le Ofisa o Leoleo, ma silafia ai e le Malo po o le a se fuafuaga e faaleleia ai le tulaga i le Ofisa o Leoleo. E fuafua la lea ile agai atu i luma ma tulaga faafitauli ua tatau ona fuafua i ai aua le atiina ae. O le tulaga lava lea.

O le uiga o le mea, e le lava le malosi o le Komisi lea e i totonu o le tulafono latou te auiliilia ma fai mai se lipoti ma ni fautuaga i le Malo, ina ia mafai ona mulimuli ai le Malo aua le agai atu i luma o tagata. O le mafuaga tonu lea ua i ai le fuafuaga ia faia lava se suesuega; ma o le a i ai se aso o i luma o le a outou tagai ai i le agaga tonu o le Malo ua fautuaina ai le Komisi e sailiilia mea e tatau ona sailia i tulaga o aoaoga o Leoleo, le siitaga o totogi o leoleo, le agavaa ma le faaleleia atili o galuega a leoleo, atoa ma le aoaoga o leoleo i nuu i fafo ma tulaga faapea. E pei o le agaga lea o le Komisi. O lau faaaliga puupuu lea i le mamalu o lau afioga, faapea le Maota Fono.

Ou te faamalo foi ma ou faafetai atu i Sui sa latou fautuaina au; e le gata foi i le Maota mamalu nei, ia ae faapea lava i le Ofisa o loo ou galue ai ma tautua ai i le Malo. O le a talia lava ma le fiafia ni a outou fautuaga, e pei foi lava o nisi Sui o loo afitio atu ma matou talatalanoa ma faufautua mai i tulaga o faiga o tiute o le Malo, o loo tofia i ai au. O lau faamatalaga lea e avatu ai lau faamalo ma lau faafetai i lau afioga a le Fofoga Fetala'i e tusa ma lou faafoeina o le tatou galuega. Ia e faamalo foi i Sui mamalu ona o lo outou lagolago mai.

Faafetai lava i le afioga faapea foi le Sui mamalu. O loo i ai fuafuaga ua uma ona faia i se Fale Faamasino fou ma se Ofisa o Faamasinoga fou. Ua uma foi ona faataitiaina se ata fuafua ma le fuafuaga o le tau. O lea foi e i ai le faamoemoe i le uso a Minisita le afioga Vaovasamanaia, e tuu atu i ai ia fuafuaga i lana malaga lea e faamoemoe i se vaiataimi o lumanai. Ia pau lva le mea o le tuitui atu e au o le mulipapaga ma le mamalu o le atunuu. A faamanuiaina mai le malaga a le uso a Minisita, atonu o le a i ai fuafuaga. Ae pei ona ou fai atu o loo i ai fuafuaga e pei ona taua e le Malo, ae sao ua le fia tautala tele i ai ona ou te atugalua lava i le tulaga lea faapea ai foi o nisi faavaloga, ao loo i ai lava fuafuaga e pei ona ou taua.

O le tulaga la i le tumaoti o le Faamasinoga o Fanua ma Suafa, ua ou taua foi i le itula ua mavae o lea ua i le alo lea o Samoa o Filipo Muller, lea ua sui nei ua fai ma taitai o le Komisi o Aufaigaluega a le Malo. O ia lava laasaga uma e aafia i le latou sailiiliga loloto o loo taumafai i ai i le vaiataimi lenei.

Saunoga Faataupou a Sui Usufono 1976-1978

Afai lava e aliali mai o le tulaga lelei lea ma o le tulaga lea e sololelei ai galuega ma le faiga o ia faamasinoga, atonu lava o le a tatou oo atu i ai i se tulaga faapea. A faapea foi o loo lelei lava i le tulaga o loo faasolosolo ai nei, ma e pau le mea e fai o le faaleleia atili, o lea lava.

Lau afioga ma le mamalu o le Fono, faafetai i le fesili a le Sui mamalu. Atonu o le agaga lava lea o le Malo o loo i ai nei i le mamalu o le Malo ma le Kapeneta. E pei ona matou silafia o lea lava ua faamalositia ia fuafuaga mo le faaleleia o le pule a alii ma faipule, ma o ia fuafuaga, atonu e saunoa atu ai le Palemia i se itula. Ae o le a ou fai atu lava se faamatalaga i le mea o lea ou te lagona peiseai o le agaga lea. A oo ina faaleleia ia alaalfaga i tua ma lelei le pulega i lalo o le pulenuu po o le a foi le tulaga o le a oo i ai, ou te manatu lava o le a oo lava ina faamalositia le fesili lea e fesili ai le Sui mamalu i faafitauli foi nei e aliali mai i le va o aiga i tuaoi ma mea faapea. O lea la o le a taumafai le Malo e tuuina atu le avanoa ina ia taumafai ai alaalfaga aua e sili atu lo latou silafia o o latou faafitauli e pei ona saunoa i ai le Sui mamalu nai lo ni Faamasino mai nisi alaalfaga. O lea la ou te tali puupuu atu ai, o le finagalo lava lea o le Malo o loo i ai i a latou fuafuaga aua le lumanai.

Tofa TALIAOA MAOAMA



Itumalo Faaalaalfaga:

Sagaga le Usoga

Filifilia:

5 Mati 1976

Faatauto:

18 Mati 1976

Lauga Faataupou:

4 Aukuso 1976

Lau Afioga a le Fofoga Fetalai, lau Afioga a le Palemia, Afioga i le Kapeneta ma le mamalu o Sui Usufono o le Palemene, faafetai mo lenei foi avanoa ou te manatu o le a mafai ai ona auala atu ni fautuaga mo le tatou Malo o loo tau atiae mai. A o lei tuuina atu ni fautuaga poo ni moomooga i le Afioga i le Palemia, Kapeneta ma le mamalu o Sui o le Palemene ma lau Afioga i le Fofoga Fetalai, e muamua ona ou faapea atu, ou te faafetai i lau Afioga a le Fofoga Fetalai i le tauaveina o lenei foi avega fita ma le mamafa, o le tausia lea o le fonotaga a le Palemene. Ou te faafetai atu foi i lau Afioga a le Palemia, atonu o se lagona maua faatasi lea e le atunuu, a o e lato i le tai a o tapuai Samoa ma matauina fuaitau taitasi o au saunoaga i la oulua felafolafoaiga ma le Palemia o

Niu Sila. Atonu e lagona taitoatasi le fiafia ma faafetai ae. Ma e avatu ai le faamalo ma le faafetai i lau Afioga i le Palemia, i lou finagalo lototele ma lou tuusaoina atu o mea o loo fai ma faafitauli i le tatou Malo i le va faafeagai ai ma Niu Sila. Faafetai, o ou mama na. Ma o le faamoemoe lava e faapea atu ai i lau Afioga i le Palemia, o o tatou taimi ua tatou i ai nei, pe tulaga manuia le Malo o Samoa pe tulaga faaletonu, o le fesili e tuu mai, o taimi o ai? O taimi o le Palemia aupito talavou lea o le lalolagi pe a. O taimi o le Fofoga Fetalai o loo i ai nei; o le taimi o le Kapeneta o loo nofoia nei i le Nofoa; o le taimi o Sui mamalu o le Palemene o loo tauaofia i le Maota lenei. O o tatou taimi na manuia ai, o o tatou taimi foi na le manuia ai.

A o lei tuuina atu se fautuaga e muamua ona ou faapea atu, o mea o loo vaaia i le taimi nei lau Afioga i le Palemia, o mea o loo tau atu ai la outou silafaga le Maota Fono ma la'u foi vaai, e i ai lava ni faafitauli ou te fia tautala muamua i ai a o faafofoga mai le atunuu i le tapuaiga i ponaoo o le atunuu, tamalii ma failauga aemaise le aufaigaluega a le Atua o loo faataumafalia Samoa i ona tulimanu e fia. Ou te faapea atu ai, o le a ou tautala muamua lava i se vaega o loo fai ma vaaiga latalata mai; ma ou te faapea atu, afai foi e i ai nisi o mea o le a aafia i le tautalaga a ua uma ona faasilasila atu e nisi o Sui, ona o le taua e mafua ai ona toe aafia i lau tautalaga. Ma ou te faamalositia atu i itu faapena pe afai foi e i ai se mea o le a sala poo se leo ua faaletonu i le faafofoga, ou te manatu lava o ia mea uma e ala i le tatou naunau mo se vaega lelei o le Malo o Samoa ma o tatou taimi.

Lau Afioga a le Fofoga o le Fono, ou te fia tautala muamua i le vaega lea o le atiina ae poo auala o le atiina ae. O auala o loo faaogaina i le atiina ae, o ala ia poo ala galue, o ala o vaalele, o ala i setima poo le sami foi, ma o tatou auala o loo faaogaina nei i nei lava ona taimi. Ua ou tautala la e avatu ai ni fautuaga ona o ia lava ala o loo tatou matauina nei o loo fai ma faafitauli i le mamalu lautele o le atunuu, aemaise foi o le Maota Fono lenei. A tatou tomanatu i faafitauli ia o loo tulai mai nei i faigamalaga i vaalele, poo auala o vaalele tusa lava pe le o se malaga e fia afe i Tutuila ae pule le auala lea o loo tulai mai nei e afe ai i Tutuila. Ou te le o fia afe i Tutuila, aua foi e leai ni au tupe e totogi ai lau nofo i Tutuila a o le mea lea ua tulai mai nei ua ala ona ou afe i Tutuila ona o auala, auala le lelei. Ua tatou fia maua ni auala tuusao.

Atonu o ia auala tuusao o ni auala e lagolagoina ai le soifua lelei o tagata o le Malo o Samoa i Sisifo. Sa tatau ona maua ni o tatou auala tuusao e agai atu

Saunoga Faataupou a Sui Usufono 1976-1978

ai i Amerika e oo atu ai i Hawaii. Atonu o iina o loo i ai se vaega e mafai ai ona fesoasoani o nei auala tuusasa'o e mafai ona avatu ai a tatou fua o faatoaga i se taimi lava o fou ma faaaogaina e nisi o o tatou uso o loo taumamao, latou te maua ai a tatou faaeleeleaga i se auala lelei ma faigofie. Ma ou te faapea atu ai e fautuaina lau Afioga a le Palemia, le mamalu o le Palemene, ua oo mai le taimi tatou te taumafai ai e saili ni o tatou auala lelei e pei o ni vaalele lelei, ni a tatou vaalele tetele, aua e le o pouliuli foi i la outou silafaga, o o tatou vaa lea e i ai nei o ni vaa ua agai ina tuai. Pe le taumate le tulai mai ai o se faafitauli faigata lava pe feagai foi ma se malaga a nisi o Sui mamalu o le Palemene, pe oo ai ina tupu ai se faalavelave ona tatou oo atu ai lea i se vaaiga faanoanoa. O lea ou te manatu ai, ua oo mai le taimi e tatau ai ona sailia nei ni o tatou auala lelei e ala i le auina atu o fua o faatoaga.

O le Malo Tutoatasi o Toga, ou te manatu e pei e muamua le Malo o Samoa. I le taimi nei e leai so tatou auala i le sami e faigofie ai ona avatu i fafo fua o faatoaga a Samoa, e faigofie ai ona aumai mai fafo meataumafa poo le faaleleia o Samoa i Samoa, talu ai e leai so tatou auala i le sami. Ou te faamanatu atu la le fautuaga i ia lava mea, mea tau auala mo le atiina ae. Ou te talosagaina foi i le mamalu o lau Afioga a le Palemia ma le Kapeneta, e ao lava ina valugalusia aa o le fau i le tofa ia outou Afioga. E ao lava ina i ai se tupe faaagaaga mo le teuteuina o ala nei e taua o ala i faatoaga poo ala galue. Afai foi na ona teuteu i se taimi e fai ai, ua maimau le taimi e fai ai, aua na ona fai a uma ane se taimi e timuga ai ma leaga ai, e oo mai i le aso ua le toe oo le taavale i le mea lea sa uma ona teu muamua. O ala ia faapea ou te manatu o loo aafia ai le tau atiina ae o le Malo o Samoa i ona faaleleiga eseese. Ma ou te manatu lava ua tatau ona tatou taumafai i ni ala lelei. Ia i ai se tupe faaagaaga mo ia lava vaega o ala ina ia lelei ai; ma ia tatou punonou nei e faia loa i le tatou taimi.

Ou te talitonu ma ou faatuatua i lau Afioga a le Palemia. Ua oo mai le taimi e faaatoatoa ai lou tomai i lenei lava faafitauli o loo faafeagai ma le atunuu e o atu i Tutuila. O se tasi tama poo se tasi tina o loo lava ni nai seleni o i ai e mafai ona soifua ai i Tutuila i se taimi e lei fia afea, a o se isi tama poo se isi foi tina e leai se tupe, vagana se tupe na tuuina atu e le fanau, vaeatu le mamalu o le Fono, e taunuu loa lava i Aukilani oso i le taavale ma totogi i le tupe lena. Ona pau lena o le tupe lea o loo faamoemoe e oo ai. Afai o le a taumafa ai i Tutuila e fiu le aiga la e i Niu Sila e tatali ae ua leiloa poo fea le mea ua faatu i ai. O le mea lea ou te tautala atu i

lea vaega ma le matua faaaloalo lava, e fautuaina ai le Malo i lau Afioga i le Palemia ma le tasi vaega e mafua ai ona ou popole i lea lava itu, e le o po se lilo i la outou silafaga, talu ai la le lē lava o auala ia e pei ona ou fai atu, lea la o loo tupu ai nei le faafitauli lea o loo outou silasila ma maimoa i ai i le maketi fou. Afai o au ou te nofo i Aleipata e ta le 4 i le vaveao o le aso Faraile ua ou sauni mai ou te sau i le maketi e sue sou avanoa talu ai le a? Talu ai lou popole aua foi e tóatele tagata. E tóatele tagata la e i ai o loo taumafai e fai ni avanoa e nonofo ai e faatau ai a latou meamata poo fua o faaeleeleaga. Ou te sau foi i lenei 4 i le vaveao o le Aso Faraile, ae ua leva ona i ai isi tagata na omai i le vaveao o le Aso Tofi. E le mafai ona tauva i ai ona o le lē lava o le mea e nonofo ai. O le isi faafitauli o loo tulai mai nei, e tiga lava ona laina i le aso atoa, ae le mafai ona le alu atu le tama foi lea e aumai le 40sene o le totogi o au mea na e faatau. O faafitauli ia e pei e faapea ai se manatu poo silafaga i ai le Minisita o Eleele, sei faia se faiga e aupito sili ona vave ma latalata mai mo le faaleleia o le mamalu lautele o le atunuu i mea o loo tatou o i ai. Ua ou fautua atu lava au i mea o loo tau atu ai la outou silafaga faatasi ma le tatou vaai.

O se tasi vaega o loo faapopoleiina ai ma ou te fia tautala lava i ai, o le vaega lea e mafuli i ai le Maota nei i lo tatou va lea ma Rusia poo se feagaiga ma Rusia. O loo i ai lava le popolega faatasi o le atunuu, atonu pe fulisia foi lenei Maota i ai. E popole aua e eseese a tatou aga ma tu a Rusia. E ui lava ina pei ua faatausua i aso ua fano se tasi o Sui sa taua mai ai le vaega lea “e muamua lava ona faauma faifeau”; ae ou te talitonu o se mea moni aua o latou ia e mafai ona latou faamatala lelei i le atunuu ma ē e le o malamalama i le auala e togafiti ai. Ona faapea lea o le manatu o Rusia, e sili ona faauma muamua faifeau e taofi ai lo latou faamatala o le lelei ma le manuia i tagata. Lea ou te faapea atu ai au, na sei mavae atu nei lava tausaga sa outou silafia ai ua leva ona tau i le taulaga le vaa sutesue a Rusia, ma ou te manatu o le vaega a Rusia lea sa i ai nei i ni nai taimi, ua uma ona latou sailia lo latou alititai poo le gataifale. Atonu o loo i ai ni auro poo a ni maa taua, lea la ua tau monomono mai nei ia lima o Rusia e fia uo ia Samoa, e faauouo i faigafaiva, pe faauouo o a lava mea o le a fai ai. Ae pei ona fai atu o Rusia o le isi lea Malo faituina ua oo i le masina, a o tatou pei lava o lea tatou te i ai nei. A leai lava afitusi, sei vaeatu le mamalu o le Fono, e sue mai se laau sei sio ai se afi. Ona popole ai lea o le taofi, o Rusia, na ona foliga mai e lelei, ae tatou te popole i le matautia lea.

Saunoga Faataupou a Sui Usufono 1976-1978

Ua uma ona asiasia e Rusia o tatou gataifale ma ni mea e sili ona lelei o i ai, ae ou te faapea atu au i lau fautuaga, sei tuu atu pea le avanoa ia Rusia e alu ese atu ai ma le Malo o Samoa ae aua le tatou talia. O lea foi ua i ai nei i Toga le faamoemoe o Rusia pei ona fausia o le malae vaalele. E lei lava ea iina e afe i ai e utu ai pe a fia maua se suauu poo ni vai ma soo se mea faapena o fia maua. I lo tatou lava atunuu, ou te fautuaina ai lau Afioga a le Palemia, le Kapeneta ma le mamalu o le Palemene, tatou tulei ese lea vaega mai ia Rusia. Aua tatou te talia se vaega e faapopoleina ai. O ia vaega sa taua talu ai, ma ou te talitonu lava i lau Afioga a le Palemia, o se vaega lea ua le mafai ona emo ai ou fofoga. O loo i ai faitioga e lau mai pea ma ou te le talitonu i ia faitioga, aua ou te talitonu lava i lou finagalo i lau faalogo mai i tua ae ou te lei sau i le Maota lenei. E taua ia te au saunoaga a lau Afioga a le Palemia. E i ai pea lou finagalo i mea taua a le atunuu e pei o lenei.

Ou te fia tautala i lafoga a faifeau. O a tatou mea sili uma lava, ma e i ai le faalupega fou lea ou te faalogo lava au i ai, e le se mea sa masani ai le atunuu: a i ai se Faifeau i se mea o loo potopoto ai nisi, e faasilisili lava ia i latou se mea faale-Atua. E faatatau lea ia i latou o loo tauavea le galuega a le Atua poo tau momolia talosaga mo le Maota Fono lenei. Ona mafua lea o le lagona e faapea, tuusaoloto atu ia o tatou Faifeau e leai ni o latou totogi; ma ou te manatu foi o nisi o meaalofa ma tupe o loo latou mauaina, o tupe ua uma ona lafoina ai lafoga a tatou i le Malo. E moni lava o se mea ua uma ona pasia pe a i lau faalogo mai tua, ae ou te fautuaina lau Afioga a le Palemia, aveese lagona o tagata o loo manatu o mea lava ia o loo faafinagaloina ai le Palemia, ae leai o se mea ua uma ona fausia e se tasi o vaega o le faigamalo. Atonu o se mea na fausia i ona po o Tama a Aiga, ae le o malamalama foi le lautele o le atunuu. O loo i ai lo latou manatu o lea ua nofo loa lava le Palemia fou lenei o lea ua tulai mai ai ia mea. O lea ou te talosaga ai ma ou fautuaina, ia faasaoloto ia Faifeau o soo se ituaiga lotu mai lafoga. Ua lava la latou galuega o le tatalo mo tatou.

O le tasi vaega e fia oo atu i ai lau tautalaga, o le vaega lea o le Falemai. Lau Afioga a le Minisita o le Falemai, e le o se mea mamafa tele ae ou te talitonu e ono aafia ai finagalo o tagata, le vaega foi lenei o loo gasolo atu i ai siigamai. E muamua la ona faafetaiai e se tamaitai, o nisi foi o tamaitai o tamaitai laiti, vaeatu le mamalu o le Fono. E faapea la se upu: “O le a le mea e te manao ai?” O upu ia a le tamaitai ae faapea a le mai; “Faamolemole o au ou te mai. Ou te fia vaai i le fomai.” “Ia o le a lou

mai?” Ona faamatala faamatala lea o le mai i le tamaitai lenei e le se fomai, ona fai lea o le pepa tuu ai. “Alu laia ina alu. O lea o le a matou tuu atua le pepa.” O se tasi mai pe faapea o le tasi na taunuu ae fetaiiai ma le fomai. Ua tea le 3.00 a ua foi. O lenei le amio masani lava pei ona outou silafia.

Ua ou tautala i lea vaega ona sa ou vaai i ai i le aso ananafi. Sa i ai se gasegase sa ou avatua i le Falemai ma ou vaai ai i se foliga faanoanoa faapena, ona o le e masani ma ia lea, le tamaitai laitiiti lea, lea ua faia nei talanoaga, ona sau lea o le na faatoa sau, alu atu alu i le fomai, sau le isi alu i le fomai, a o lenei lava e uu le pepa a lenei loomatua. O se vaiga faanoanoa ona o se tina matua e tataua ona faamuamua pea. E i ai lava le lagona o le atunuu e mafai ona faapea, afai o se gasegase tigaina e le tau fai atu se isi i se isi, a mea la muamua. Leai e maua fua le maliega o tagata e tuu atu ai le avanoa i le gasegase tigaina e faamuamua i le fomai. O le mea lea ou te fautua atu ai i le Afioga a le Minisita o le Falemai, sei tautuana ma oe sei e silasila ane i lea vaega. Ua na o le fou o le falemai a o nisi o loo galulue ai, e tauvatea ma tau afaina ai le mea atoa i o latou vaivaiga faapena.

O le vaega lea ua ou fia fautuaina ai le Malo, o le vaega lea e uiga i autalavou ma le aganuu. Lau Afioga a le Palemia ma le mamalu o le Kapeneta, o se mea o loo tuufesili ai le mafaufau, pe se vaega e tataua ona aafia i le Faigamalo, pe se vaega e tataua ona tuuina mai e faalapotopotoga i totonu o upufai faa-Malo. Atonu e le faapea ua ou fai atu ia aua le aumaia a o le mea lea ua ou popole ai, afai e aumai ou te talitonu e le afaina le autalavou. Afai foi e le aumaia, ou te talitonu lava e le afaina le autalavou. O lenei se vaega sa mafua mai i Faifeau, ma o ia lava faiga o faiga sa teuteu ai lea itu ma e pei e foliga mai e mafuli i le faalelotu le vaega lea o le autalavou. Ae talu ai la ona ua ou vaai pea ua aapa i ai le Malo, ou te manatu foi o le mea lea ua tupu nei, a fai atu poo fea e alu i ai, ae fai mai e alu i le autalavou.

A outou silasila totoa i le Aso Sa, e gasolo mai le autalavou ma pate i le eleele fou ona fai ai lea o taaloga faale-autalavou, ma ou te talitonu lava o le a le suia le aganuu pe afai e taatia ai pea i le tulaga lea ua i ai. Lalo atu pea i Faifeau ma tatou tuu faafeagai ai lava e tusa o puipuiga faaleaganuu i le matai ma lona aiga e fautuaina ai le taulealea, fautuaina ai le tama talavou i lo le tuuina mai iinei ona fai lea ma mea o le a tele ai le avega a le Malo. O mea ia o loo popole atu ai ma e fautua ai i le Malo, lau Afioga a le Palemia, o ia lava mea o mea ia e faamamafa

Saunoga Faataupou a Sui Usufono 1976-1978

lima pe avea ma faaopoopoga o nisi avega i mea taua o loo i ai nei i le Malo ma le faafoeina.

Ou te fia tautala i le vaega lea e uiga i le tulafono toe teuteu o le Ao o le Malo. O nei lava manatu e fai atu ma le faaaloalo lava i lau Afioga a le Palemia ma le Kapeneta, o ni mea e faufautua ai. E le o se mea ia faia ai se finauga pe faapea o le a fai ma feteenaiga, leai. O le mea lava ua fuafuaina tatau ma tatou te talitonu i o tatou taimi. Afai o le a le tulaga manuia pei ona ou fai atu, o tatou taimi e tautala mai, vaeatu le mamalu o le Fono. E tau e le isi aso i le isi aso, o le isi po i le isi po, o taimi ia o le Palemene lea sa i ai Taliaoa lea na tatou oti faasasao ai. O le taimi lea sa i ai Taliaoa, lea sa manuia ai le atunuu. O vaega la na o loo popole ai ma atugalua i ai le taofi aua o lea e tau mai o le toe teuteuga o Tulafono o le Ao o le Malo, a o vaega uma i lau faitau atu i ai, pei e faapea o le Fono a Sui Tofia. Ma afai o le tulaga lava lea e fai ai, o le a le afaina lea i lou mafaufau. Ui i lea, e manaomia lava le mea moni ma faaoga tonu i ai. O le toe teuteuga o le Ao o le Malo, o lea ou te tau atu tailo ua ou leiloa ua le lava se taimi e faitau ai uma lenei lalolagi na i ai, a o lou au i ai, o le toe teuteuga o le Sui Ao, ae le o le teuteuga o le Ao o le Malo lea e tulai mai. Ona faapea lea ou te ioe lava au, afai lava o le Sui Ao.

Sei faatali lava. E le faasaoa e se Sui lou tootoo seia uma, ona o lau faatagaga lea ua aumai ou te lauga ai. A i ai la se mea e fia faasao e le Sui, sei oo i lona lava taimi ona faasao lea.

Faafetai atu i lau Afioga i le Fofoga Fetalai, o lea lava la o loo manino le Sui lea sa faalavelave nei e lei aumaia le vaega lea, ae o lea e i ai pepa i ou luma ma o le ala lea o lou fai atu. Ae o vaega ia ua ou fai atu ai, pe afai ua malie le Sui lea sa faalavelave, pei e faapea lava se lagona ona o le manumanu a o lou taofi. O lea la ua maua atu nei se isi vaega e faamalalama ai le mataupu lea. O mea uma lava ia e aafia ai le Sui Tofia, o mea lava o loo pepese ai nei le tele o tagata e faapea: “O lea ua matou tau ane ii i le pepa alii Taliaoa, a o lea ua aliali mai e leai se mea faapena ua outou faia i le Ao o le Malo.” O le ala lea ua mafua ai ona ou fai atu i se vaega e fautuaina ai ina ia manino lelei i le atunuu ma le faafofoga mai.

O le isi mea e fia agai i ai lau tautalaga o le vaega lea o le palota o le 21 tausaga. Pei lava ona ou faamalulu atu, o ia lava mea o mea e matua popole tele ai nisi o afioaga, e matua popole tele i le tau ane i le upu lea palota 21. Sa i ai se mea na tupu i lou itumalo ma o le a ou faamatatala atu. Sa i ai se fonofono sa faatasi ai lou itumalo, ona amia lea o au. O au ua fai si popole, ua ou manatu o le a toe fao le faipule ua te

au ae tuu i se isi. Ua ou alu atu ma ou nofo, ua potopoto lou itumalo ona saunoa mai lea faapea: “Ua amia oe Taliaoa ina ia tatou feiloai poo le a le mea lea ua tupu nei? O mato una matou ioe faatasi e ave oe e fai ma o matou Sui i faigaupu a le Malo. O le faia o tonu i soo se mea lava e agai i ai fuafuaga a le Malo, ua uuma ona ioe le itumalo o oe lava o le a fai ma Sui. A o le a le mea ua e nofonofono ai? O oe ea ua fai se tafaoga ma e nofonofono ae fai faigaupu a le Malo?”

O au ua fai si popole ma le malamalama poo le a le mea lea ua tupu. Na o le mea ua tupu ua mafua ai nei mea uma, atonu o loo i ai se Komiti na tofia latou te faafeiloai itumalo ma nuu. O lea la ua faateia ai lou itumalo, ma aumai ai le faaupuga faapea: “O le tatou tofi e leiloa poo fea o i ai a o lea e fai mea ia? Lea ua oo mai nei le fuafuaga e talanoa ia mea tau pulenuu, talanoa mea tau le aganuu, ae leiloa poo fea le mea o i ai lo tatou Sui.” O au sa matua popole aua ua matua tele lava nisi fautuaga ua aumai faatasi ma le matua agaga ootia o le itumalo i lenei lava vaega o le palota o le 21. Ona ou tali lea faapea: “Lou itumalo e, e moni atoatoa mea uma ia ua outou saunoa mai ai. E tatau ona outou faapea ane, o le Sui lea o la lava e tafao. Ua na ona tatou talia i le palota e alu e tauto ma agai sona finagalo i upufai a le Malo, a o lea e le malamalama i mea ia e fai. Poo fea la? Ai o tifaga.” Sa matua ou faamalie lelei i lou itumalo. “Lou itumalo e, o lo outou mamalu ou te matua faaeteete i ai, ae ou te faamalulu atu e faapea, ou te le o malamalama. E fai foi o lo outou le malamalama, a o lou foi le malamalama. Ou te le malamalama poo fea e sau ai le faaupuga lea ua outou vevesi ai nei ma tatou feeseeseai. Ae ou te faamalie atu, o le a ou toe foi pea sei vaai poo fea le mea lea e tupu ai le mea lea ae ia malie, e leai ou te lei tafao, ou te lei tifaga foi, sa ou nofo lava ma faatalitali o le a le taimi e faapea mai ai le afioaga a le Palemia, poo lau afioaga a le Fofoga Fetalai, Sui Usufono o le a amata le fonofono. O le mea la lea ou te faapea atu ai i lou itumalo, faamalie atu le itumalo, e leai se mea faapena e tasi na ou iloa, atonu o loo i ai lava ni Komiti laiti latou te fuafuaina ia mea.

O lea la o le taofi na tupu i lea aso, ou te faasilasila atu ma le faaaloalo e fautuaina ai lau Afioga i le Palemia ma le mamalu o le Kapeneta, Sui Usufono o le Palemene, lau Afioga i le Fofoga Fetalai, i lenei lava palota o le 21. O se mea e matua mamafatu i le atunuu, e le fia maua le 21, ma o iina o le a oo mai ai se maseiga poo fevaevaeaiga o aiga ma nuu i lea lava vaega o le 21 tausaga, ma o le a le toe iloa ai foi oe le Sui iinei i le 21. A fai atu lau faaupuga ae fai

Saunoga Faataupou a Sui Usufono 1976-1978

mai foi e leai e tutusa taua i le ekisi; e leai se mea e te faafinau mai ai ia te au; aveese au mea ma mea na; e pule au aua o la foi ua fai lau ekisi. O itu ia o loo popole i ai le atunuu aemaise lou itumalo pei ona ou fai atu.

O se vaega e fia oo atu i ai faamolemole, lau afioga o le Fofoga o le Fono ma le mamalu o le Palemene, ou te fia tautala ma avatu se fautuaga i le ofisa lenei o Faamasinoga, aemaise o le faamasinoga lea e i Mulinuu nei. I lau lava matau i ai vaeatu le mamalu o le fono, o se fale pei e foliga mai e le se mea taua e fai ai, e le gata i le lē lelei o le tulaga lea e i ai nei, pisapisao o taavale vaeatu le mamalu o le Fono, a o le lē lelei o le fale. Ua outou silasila i ai ma tofu silafia le mamalu o le atunuu, o le fale lea o loo faaoga nei e le ofisa, ia vaeatu le mamalu o le Fono o le upu e to ia te au, na ona tuu lava i ai o ni atigitaga falepopo loa. O le matua leaga lava! A o le fale la lea, a fai mai se faaiuga pei lava ona silafia faamasinoga pe a fai ai, a fai mai se faaiuga e ese le matuitui. E pei lava e gase mai i tamaivae e tau i le ulu o se tamalii poo se failauga, pe a sau se iuga o lea faamasinoga. E fai utā o le sala. Pe fia lava, e mafai lava ona sue se tupe, a o le faamasinoga lea e i Mulinuu, a oo mai le faaiuga a le faamasinoga e matuua lulu atoa ita e le faamasinoga, e le gata i lea, a o lota aiga; ae o le tulaga lea e i ai nei, o se tulaga matua maualalo tele. Faamolemole lau Afioga a le Palemia, sei silasila totoa i lea vaega. Afai ua le maea ona faaleleia i le tulaga lea ua i ai nei, sei tuu atu lava i se vaega e faasaogalemu ai mai le pisapisao faatasi ai ma le lē lelei.

Ia faafetai. O le itu lava lenei i totogi o tagata faigaluega. Ua 100% le totogi lea ua tulai mai nei mo le Fono a Sui Tofia, ma ou te manatu lava e le tatau ona sii tatou totogi, ae alofa i le afaigaluega a le Malo, o fomai, leoleo ma faiaoga, aemaise alii Faamasino o le tatou Malo. Fai i ai se fuafuaga ina ia lava ni o latou totogi. Atonu o le mea foi lea e fai fai musu, tei ua alu lea sue se Matagaluega e feoololo totogi e alu i ai, ae le maopoopo ai mea a le tatou Malo. Ona o lou taimi ua puupuu, a o le anoano na ou sauniuni i ai e tusa ai ma folafolaga a le Fofoga Fetalai, ona ou faapea lea, ia faamalieina le Fono. Lau Afioga a le Fofoga Fetalai, lau Afioga i le Palemia ma le Kapeneta, le mamalu o le Palemene, a i ai se mea ua faaletonu i lo outou faafofoga ona o le agaga naunau lava i le matagofie ma le lelei o lo tatou taimi. Ia soifua le Fono.

Afioga TIATIA TU'IULI



Itumalo Faaalaalafaga:

Aleipata Itupa i Luga

Filifilia:

5 Mati 1976

Faatauto

18 Mati 1976

Lauga Faataupou

3 Tesema 1976

Faafetai lava i lau Afioga a le Fofoga o le Fono, ua maua foi se avanoa e fia fesoasoani ai i fautuaga a le alii Palemia ma le aiga Minisita. O le a le oo sau tautalaga i le tele lava o mea e pei ona fautuaga atu ma avatu foi ni fautuaga i lau Afioga a le alii Palemia faapea foi le mamalu i le aiga Minisita, ae na o ni nai mea ou te fia fesoasoani atu ai i mea o loo naunau i ai lou taofi e tusa ma lenei vaitaimi – ma mea o loo i ai le soifuaga i lo tatou atunuu.

E mamafa lava lou taofi i mea o loo aafia ai le soifua lautele o le atunuu. O le mea la ou te manatu o loo aafia i lea vaega, e i ai mea tau vai i Falemai, aemaise foi auala pe afai e pefu, e aafia ai lava le soifuaga lautele o le atunuu mai le pepe sei oo lava i le tagata matua. Ma ou te manatu foi e fesoasoani atu i lau Afioga a le alii Palemia ma le aiga Minisita. O se mea lava lea e tatau ona uluai fai ma teu i lou lotoifale faamautu mea i lou atunuu. E le fiasia lo'u taofi i le aapa atu o lo tatou malo i fafo ae lei mautu lo tatou atunuu ma lo tatou lotoifale. E i ai lava lou manatu ma lou fesoasoani atu e faufautua atu i le alii Palemia ma le aiga Minisita, ia outou alofagia sei teu muamua lo outou lotoifale; teu muamua lava lo tatou atunuu ia lelei vaega eseese; ia soifua mai i se soifuaga lelei mai le pepe e oo lava i tagata aupito matua.

O mea tau Vai. E le o po se lilo i le silasila a lenei Maota, e fanau mai loa le pepe e aafia lona soifua i mea tau vai, pe afai e le lelei. E faapena foi i mea tau falemai. E soifua mai lava le pepe o le falemai. A ma'i e faapena. E fesoasoani le falemai i le soifuaga vaivai o le pepe e oo lava i le tagata matua. So o se tagata lava o loo soifua i le atunuu o le falemai lava e faalagolago i ai. E ui lava i le tele o matagaluega a le Malo e i ai foi aoaoga, ou te manatu e leai foi se aoga o le potu pe afai e ma'i. E le aoga le potu pe afai e mai aua foi o la e fai mai le tusi, e le aoga foi lona potu ma lona atamai e faaoga i se galuega. O lou lava lea talitonuga ma lau fesoasoani atu i le aiga Minisita ma le Palemia. O mea lava ia ia alofagia ia faataunuu ma faamautu

Saunoga Faataupou a Sui Usufono 1976-1978

aia le soifuaga lautele o lo tatou atunuu, o lo tatou lotoifale ia lelei muamua.

O le isi vaega o mea nei tau Auala i le pefu o loo i ai nei – ma ou te faasao atu i le taimi lenei le saunoga a le Tootoalii i se aso ua mavae sa faapea, amuia Aleipata ua faata. Leai, e lei faataina Aleipata, o le ta lea sa taua o lea sa teuteu ai alia ma aega o le itumalo o Lotofaga ma le itumalo o Lepa, a o Aleipata leai, o la e lava e taumafa i le pefu e oo mai i le aso. Ou te fautua atu ai foi i le alii Minisita ma le aiga Kapeneta ma lau Afioga a le alii Palemia, e a pe a sui se isi faiga, faata muamua lava tau o aai; mea o loo nofoia e tagata ma ola ai ma soifua, a o le tele lava o mea e le o nofoia ia sei taatia ia sei faifai malie.

Faafetai lava i lau Afioga a le Taitaifono. O se tasi itu ou te fia tautala i ai o itu ia i mea tau tiute o oloa e taunuu mai i le atunuu, aua o se tasi foi lenei vaega e aafia tele ai le soifuaga o tagata lautele o le atunuu mai lava i le pepe sei oo i tagata matutua. Afai o tulaga ia o le a alualu ai pea tulaga o loo tatou i ai, ou te manatu e pei lava ona ou tau atu, e afaina tele ai le soifuaga o lenei atunuu mai le pepe sei oo i tagata matutua. E pei lava ona ou talatalanoa atu, e tele mea sa ou fia talanoa atu i ai ae ua ou manatu foi, o lea ua fola atu i lumamea i le tele o fautuaga ma saunoga foi i sui o le Maota. Ia ou te manatu ua tele foi ma faulalai i luga o le Laulau a le alii Palemia ma alii Minisita o le a falute. A falute atu nei, ona pei lea o le tamaitiiti foi lele ua fafaga fafaga, ua oo vaeatu le paia o le Maota, ua tauau ina toe faasuati mai pe oo ina tiga le manava, ona oo atu lea ina toe luai mai mea ua avatu.

O le tulaga foi i le va ma Malo i fafo, e ui lava ina taofi mai foi e le Fofoga Fetalai ae tele lou matua fia tautala i lea vaega – ma ou te manatu foi e leai se malosi o le Fofoga Fetalai na te taofia ai lau lauga. Ae ui lava o lea, o le a ou faaaloalo atu. O le a tuu lou manao ma o le a ou manatu ma lau fesoasoani. Ia manuia le Fono.

Tofa TIMU KOLIO



Itumalo Faaalaalafaga:

Gagaifomauga Nu.1

Filifilia:

5 Mati 1976

Faatauto:

18 Mati 1976

Lauga Faataupou:

2 Tesema 1976

Lau Afioga i le Fofoga Fetalai ma le mamalu o le

Fono Aoaofaitulafono, le Malo o Samoa i Sisifo. O tulaga faalupelupeina o le Maota i le paia o le Palemia ma le Kapeneta faapea foi le mamalu o afioga a alii Faipule, Tootoalii faapea foi pona-oo o le atunuu. Ou te momoli atu lau faafetai i uso a tootoo i le aso ananafi seia oo mai i le taimi lenei. Faamalo saunoga, faamalo faafetai. O lou iloa o le toatele o Sui Mamalu ua lava le tomai, lava le masani i le Maota lenei, o e foi sa avea ma tulaga o Minisita faamoemoeina o ia tulaga ua mavae atu. O lenei ua tatou paia mai le uluai Fono lenei a e le o lafoaia e le aufai-lotu o e o semaina le manuia o le atunuu, e faapea foi i le Ao o le tatou Malo faapea foi i le Sui Ao. A o le mamalu o le atunuu e le tuua i a latou talosaga i le aso lenei mai le aso ananafi. O tulaga ou te lagona, o le sulu tele o le mali'o o le a maua ai figota eseese. O mea uma e pei ona matau mai e tootoo o le motu i Salafai o lenei lava matou te ave atu ona o le mafatiaga i le motu i Salafai. Ia o lena ua lau atu e na tootoo ma o le a ou le toe oo iai.

O le mea tau le popo o le oa lava lea o tagata uma o le atunuu. O lea la e faapea atu ai, ia outou alofagia le koko. O nisi atiina a'e ia ua outou silafia e naunau i ai, tulou o le upu e to ia te au, e naunau i togafai oo mai faamai ua le iloga le mea ua tupu. E le o se mea e tumau mo le atunuu a e ona pau lava lea o le mea e faapea ai lou nei tootoo, maumau lava pe a na sei faamatafai ona tatou alu, ona tautaua ai lava lea o lenei tulaga i lenei tolu tausaga. A fai ua tatou alu i mea tau auala, o lea ua faafofoga lau afioga faapea foi le afioga i le Palemia ma le Kapeneta i manaoga uma o auala ma moliuila. Atonu a tatou mafaia lea tulaga, o le a pepese tagata uma o le atunuu o le a manuia le atunuu. O le a le mapu ai foi le tautaua o le tatou tolu tausaga lenei. E pei ona taua atu e se isi tootoo o galuega e fai nei i le motu o Savaii ia na ona faatafuna, faatafuna. A fesili atu i ai po o le a le mea ua tupu ae fai mai ua uma o latou vaiaso e lua. A e po o ai a faia ia mea? O lea la e talosaga atu ai i le Kapeneta ma lau afioga i le Palemia, le mamalu o le Maota ia alu atu ia i alo faiva. O lea ua tatou faatautaia e pei ona taua nei e le uso a tootoo, aua nei tatou naunau i le ia ae manumanu i le upega. O le a le tolaulau atu e lou tootoo lea matata ma lea matata o lo outou Kapeneta, a o lena ua avatu finagalo o tootoo o le Maota ia tautuana ma outou. E fai atu lau folafolaga o le tulaga faapena o le a mapu e ave ma tala tuufaasolo o le atunuu, le tulaga lenei i tatou alu i le tolu tausaga lenei.

Ou te manatunatu pau lava lea o mataupu e lua e pei ona taua e nisi uso a tootoo ou te fia faamamafa atu i lau tautalaga. O le mataupu lea o le palota o le

Saunoga Faataupou a Sui Usufono 1976-1978

21 ou te masalo o le uso moni lava lea. O le faatoilaloina lea o le pule a alii ma faipupe. Ae ou te manatunatu i fono faavae aua o lou nei tootoo ua ou tau mai nei ua tau le masani i le tele o Tulafono o le Maota, ao lou nei tootoo po o le 9 i le 10 tausaga o ou i ai pea i le Maota. Aua afai o tusitusia i pepa a Mulinuu ma lenei le upu “saili naki – o le motu lenei” o ona po ia o le utufono o le atunuu e fia fai se malo tutoatasi. A o malaga mai le vaa i Savaii e malaga mai i le 4 i le afiafi alu le po atoa faatoa taunuu iinei ua tea le 12 i le ao, ae le mafai ona tuua. O le mea lea e avatu ai le talosaga ia malie o lea ou te talosaga o auala uma lava ae ou te le talosaga faapito i lou itumalo. O le mea la lea ia outou alofagia o lea tulaga. Afai o le a taunuu le tulaga lea e pei ona taua o le a palota le 21, ou te fai atu ua le aoga le pule a alii ma faipule. Ou te fai atu, silasila i le fesoasoani malosi lea i le malo. Aua o malo uma e pei ona outou faafofoga i ai, ia e tali laitiiti le malo i le vasega o leoleo. A o le tatou malo o se malo lafulemu, matagofie, pe toatasi lava se leoleo i se itumalo e tolu pe lua a e faatuatua le pule a alii ma faipule. O lea e matua mamae ai lou nei tootoo mo lea lava tulaga.

E le tuua foi ona ua maua foi i Uso a tootoo ona o le upu lea o le a fai lafoga a auauna a le Atua. Ia tatou manatua e faatumutumu le Malo i le Atua. O le Atua mo Samoa mo le Atua. O lea e faamaulalo atu ai lou nei tootoo, afai o se Tulafono ua leva ona pasia, ia faamolemole lenei tolu tausaga, taatia aua le faagaoioia. Ia alofa le mamalu o le Fono faapea foi le mamalu o le Kapeneta ma le afioga i le alii Palemia, na pau lava lea o mea aua sa tonu ou te le tu atu. Ua lava ma totoe vagaga ma saunoaga a alii faipule. Ia tau ina matuu atu i le laulau a fono latou te iloilo ina mea lelei e lelei ai le Malo o Samoa. Afai foi o tula e pei ona tau faalogo atu i nisi tulaga o taua le Ao o le tatou Malo faapea foi le Sui Ao, ia o mea lelei lava na e pei foi ona faatu le lafo e le alii Palemia, ona o le agaga lava lenei ia faapena ona fai.

Ia lau afioga, o le a le tulia ou minute ua lava lau lauga. Manuia le Fono.

Tofa TOAILOA SIAOSI



Itumalo Faaalaalafaga:

Vaimauga Sasae

Filifilia:

5 Mati 1976

Faatauto:

18 Mati 1976

Lauga Faataupou:

6 Aukuso 1976

Faafetai lava mo le avanoa. Ma lou faaaloalo ou te faatulou atu ai i le paia o lenei Maota Fono, lau Afioga a le Fofoga Fetalai ma le Sui Fofoga Fetalai, le Palemia foi ma le Aiga Kapeneta, le mamalu o Sui Usufono o le Palemene o le Malo o Samoa i Sisifo. Ia magalo mai foi o matou leo, i matou o Sui fou faatoa ulufale mai i le Maota. Ia magalo mai foi o matou leo, i matou o Sui fou faatoa ulufale mai i le Maota. Ia na o ni nai sao lava e lagolago atu ai foi ma fia fesoasoani ai lava mo se lelei o le tatou Malo.

E muamua lava ona ou tautala i lenei lauga taua sa saunia e le Minisita o Tupe, le Afioga ia Vaovasamanaia. Ou te faitioina se vaega e tasi o lea saunoaga taua ma le saunia lelei. Talu ai ona o au foi o se isi tagata e masani ma le galuega lea o le kamuta, afai lava o se ata ou te tusia, e le o taitai ona malamalama uma ai ni tagata vagana o au o le kamuta. Ae le tino mai, ou te iloa lava foliga o lea mea o le a fausia, poo se fale vaeatu le paia. Atonu ou te talitonu i ai e pei o le upu lea na faapea atu ai le tamaitai o Apikaila ia Tavita, malie o le tagata lea o Napalu e faapea lava o lona igoa e faapea foi ona uiga! Ou te manatu la au, o lenei tamalii o le atunuu e tulai mai le Afioga ia Vaovasamanaia, e lilia foi lou tagata i lou tautala i uiga taua o ia suafa, ae na ona ou faapea atu i ni nai laina pupuu, ua manaia ona ua tulai mai ai le Afioga ia Vaovasamanaia na te faafoeina lenei matata taua poo le fatu foi lea o le Malo. Ou te faapea atu ai, tau ia ina ia manuia fuafuaga uma ua faia e lo tatou Minisita o Tupe. Ou te faapea atu foi i le Aiga Minisita i o latou paia le popo poo paia masani i upu o le atunuu, e le aafia lea i lau tautalaga, ae ona o upu faa-faigamalo ma tofi ua latou seei ai ua alagatau i lou Sui Usufono ona oo atu i ai sou leo e faapea: La outou Aiga Minisita ma lau Afioga i le Palemia, e i ai le upu faapea ou te manatua: E faigata, e te taumafai. E lua la taunuuga, o le isi taunuuga, e le mafai; a o le isi e iu ina mafai.

E lagona i lou mafaufau a o faagasolo mai saunoaga a Sui o lenei Maota, ua faatu atu ai lava ma fofola atu ai i luma o lo outou paia le tele o

Saunoga Faataupou a Sui Usufono 1976-1978

manaoga o le atunuu, o loo taitai lava ma faapea ifo lo outou paia pe a, pe mata o le a faapefea ona faatino? Pe a ou toe tepa i tua i ia gasologa ua mavae, sa le mafai foi ona faatinoina iuga e tele na pasia i totonu o lenei Maota, i le tele o manaoga. O lenei foi Paeaiga ua mavae, e leai lava ma se mea e faatino e oo mai i ona po nei i le tele o nisi manaoga o le atunuu. E mafua le moni o lea vaega ua ou taua, o loo seei pea ma ave ma Sui i totonu o lenei Maota nisi sa latou aoina foi le tulaga Minisita i aso ua mavae.

E le faapea la ua aliali atu sou manatu, ae na o se fia faamaoniga o lea manatu. O manaoga sa i lenei foi itumalo, sa matou fesootai ma upu faatasi ma Minisita sa tauaaoina ia Matagaluga ma faaiu ai faaiuga o le a faia, o le a faia. E oo mai i le aso e leai lava se mea e tasi ua faia, ona ou lagona lea atonu pe le ona o le lē lava o tupe ma atugaluga foi ia lea na mafua ai ona ou tau atu ia upu e faamautu ai lau tautalaga: E faigata ona o la outou taumafai e iu ina mafai nisi mea, ae le mafai nisi mea. Ui lava i lea, lau atu pea ia lagona o le atunuu ua ave ai Sui mamalu latou te faaleo atu ni mafatiaga ma le faamoemoe i le upu lea a Ieremia o loo faapea – ‘O le peni uamea ma le mata o le samira’. O le talitonuga la o lou agaga e iva peni e sili ona taua o peni uamea i totonu o le Maota lenei, ae sefulu i le peni a le Ao o le Malo. O iina e maua ai le manuia o le Malo o Samoa.

Ia le paia e o le tou Aiga Minisita, o a outou peni, o peni e sili ona maai, e taua ma fia maimoa atu le atunuu po ua saini mai iina le ioe; ma manaoga o lea faipule ma lea faipule, lea ua tusi mai iina o le leai. Ia, o le taulaiga lea o le vaaiga a le atunuu, o lea ua outou tauaaoina o manaoga o Samoa ua faataatia atu.

Sei afe ane lava lou leo i le tele o nisi mea o le atiina ae. O nei atiina ae ua faaleoina i totonu o lenei Maota, o fua o le laueleele, o alatele o le Malo, o falemai. O a lava nisi atiina ae e tasi lava sau fesoasoani atu ma sau fautuaga i luma o le Palemia ma le Aiga Kapeneta, ona pau lava lea o le vaifofo e tasi ou te iloa e au, sii le tau o le popo. E leai lava se popo e mafai ona toe liu oo i le laueleele; e leai foi se niu e mafai ona toe vaoa; e leai foi se tasi e le toe faia se toganiu fou pe a sii le tau o le popo. O le fai o lea auala ma lea auala o loo gaoioia e le Ofisa o Faatoaga ma le Minisita. A sii le tau o le pusafai, vaeatu le paia o le Maota ma lau Afioga a le Fofoga o le Fono, e oo atu lava i tua o le fale le togafai atoa, aua foi ua silafia e le atunuu o tupe ua tele ina maua i fafo. Afai foi ua sii le tau o pusatalo, e leai lava se mea e toe tu ai se tiapula. E le tau faia la ni unaiga

poo le a lea faiga. E leai lava i lou lagona e toatasi aua e matua ae fua lava ia taumafaiga pe a le siia foi le tau o pusatalo.

A o agai atu la lou leo i fua o le laueleele e ao ina faapea se fesili: O le a la se togafiti a o le a se fofo? Le paia o lau Afioga a le Palemia ma le Aiga Minisita, o lau vaifofo lea e tuuina atu i o outou tafatafa ane, ia muamua ona faatele lo tatou malae vaalele. Lona lua, afio ia lau Afioga a le Palemia ina e tagi savali i le auala i le va o Malo e faatagisia ni o tatou vaa tetele. Se a le aoga tatou te taumafai ai e toto le fia afe o mea i le eleele ae leai ni mea e ave ai i fafo? O le numera muamua lena ou te loto au e taumafai, e taumafai ni auala lelei. O le malae vaalele ia taunuu mai i ai vaalele tetele e auala ai isi vaega o fua o le laueleele; ma ia faia ni o tatou lava vaa e alu tonu i ana gasologa e masani ai nai lo tatou faatalitali sei taunuu mai ni vaa o ia Malo mai fafo, ona faatoa mafai lea ona ave i fafo. Ia o lau fesoasoani lea i mea tau atiina ae.

O auala, faamolemole e taua ia te au pe a faapea, ina alo ia lo outou paia aemaise lava le Minisita o Galuega e faasoo muamua ia lava le taamilomilo o le alatele ia Upolu, ia Savaii, poo le tataua ona liliu faapea au upu, ia Savaii ma Upolu ona faatoa fai ai lea o le faaliliu ane lea i mea e igoa o auala galue. Ia faanumera muamua lou taofi le soo lelei o nei motu aina tetele e lua i ona auala ua matua mautu ona saunia. A o le tatou liliu atu e taumafai auala ia soo le atunuu ma toe taumafai foi ma alagalua latou, ou te lagona o lea lava e masani le mamalu o le atunuu mo le tau aumaia pea, pe amo foi vaeatu le paia o le fono poo nisi lava auala vaivai e taumafai mai ai fua o le laueleele. Ia atonu o loo talafetaui lava aua na o mea o loo aumai ma faufaulalai i le tatou maketi. Ae pe a oo loa ina mautu auala i le taamilo o motu e lua ma maua ni avanoa poo ni auala mai fafo, ia o iina o le a mafai ai loa ona taufai saili loa auala galue ia e faafesootai ai le felauaiga fua, aua ua tele mea o le a tatou faafeagai, o lea maketi ma lea maketi. O le a lafo atu lava la outou avega e sailia ni maketi i fafo, a ua i ai ni tatou meafaigaluega e lua, o ni vaalele ina ua faateleina lo tatou malae vaalele ia ma ni vaa tetele e lau ai i le sami ni fua o le laueleele nai lo tatou le iloa poo le a le mea e fai, pe muamua ona atiae faatoaga, pe muamua ona saili ni auala e ave ai i fafo. Afai foi o le a maua ni maketi i fafo ae le maua ni auuala e ave ai, atonu e leai se manuia e mafai ona faamalieina ai lenei atunuu. Ma talu ai la o au o le isi tagata o le Komiti lea o loo taua pea i saunoga na mafua ai foi ona uunaiina lou manatu ou te tautala.

Saunoga Faataupou a Sui Usufono 1976-1978

Sa i ai lava i lou manatu o mea uma lava sa i lou agaga lea lava na aafia uma i saunoga a Sui mamalu, ae ao foi ona fai sou leo e faaleo atu ai aua o lenei mataupu, e le faapea ua tuuina atu aloaia a matou taumafaiga vaivai i luma o le Palemia e maua ai sona malamalama e tuuina mai se tali o ia vaega o loo aafia. Ia malu foi le vai ia te outou Sui mamalu ina nei faapea ane poo le manatu o le sui lea o ia o se Palemia. E leai, ma lou faaaloalo ona o au o loo aafia ai e faapea ai ona ou faatino i sina faamaninoga pe le malamalama le mamalu o le Maota, ae ao pea ona ou taumafai i se mea e pau ai lou mafai.

O lenei tulaga o loo matou taumafai lava ma fuafua loloto talu ai lava le naunautai o le agaga pei lava o uluai saunoga a lo tatou Maota, e mamae i la tatou agaifanua o le mea moni lava lea. O le agaifanua a Samoa ma le pule mamalu a alii ma faipule, ona pau lava lea o le mea ou te taua e au, o le au lea o le uili e taulai uma i ai le aso o le uili, ma o iina tonu e maua ai le manuia moni o le Malo lenei o Samoa. E ui lava i ni taumafaiga a lo tatou Ofisa o Leoleo ae tasi lava le too e sili ona malosi e folau ai le vaa o Samoa, o le pule a alii ma faipule. O le mea lea ou te faapea atu ai, sa matou galulue i se tulaga faapenei. O nuu uma o le atunuu ma nuu mavae e tasi lona faalupega. E leai se isi nuu poo le atunuu ua sili atu le faitauaofai i le nuu o loo numera muamua, o le afioaga lea o le Faletolu ma Aiga i le nuu o Faleasiu, e 2,740.

Faafetai. O le a agai loa sau tautalaga i mea tau atiina ae eseese, o mea tau laueleele. Ona o au o se isi Sui o loo aafia tele le itumalo i mea tau laueleele, o le faaupuga sa avatu e nisi Sui, ia avea foi lena ma au foi upu; ae pau lava le mea ou te fia faamanatu atu i lau Afioga a le Palemai, o ni nai vaega eleele matou te faatagisia sei ola ai o matou nei itumalo. Pe 100 eka o le a tuuina atu mo le nuu o lena 100 eka o loo i ai ni niu ma ni manupapalagi vaeatu le mamalu o le Fono. Afai lava o le a naunau pea lou finagalo i na mea e lua e sili ae i lo nai nei nuu ua tau leai ni mea e nonofo ai faatasi ma le galulue ai, e leai lava se loto o nei itumalo e fai, e matou te usiusitai lava. Ae lafo atu ma le faamoemoe o lau silasila ae le faapea o se matou tauanau atu. E oo foi lava i le afioaga o Faleata, Aiga i le Tai, soo se tulimanu o Samoa o faaletonu afioaga e matua lagolagoina e lou Sui. Ia silasila totoa, silasila sautuafia i ai lo outou mamalu i lau Afioga i le Palemia ma le Minisita o Eleele poo le a se faiga e manuia ma ola ai ia afioaga.


E fia fai lava nai au upu puupuu i le mea lea e tau o le tatou va ma fafo i Malo tetele, i nai o tatou uso i

Niu Sila ua saina ai le tatou va faauo. Ou te manatu lava au o le amio lava lea a uo e uo ma foa, uo ma foa le isi i le isi. Ae afai tatou te faapalepale ona maua ai lea o le lagona lea na ou tei ai i lenei taeao i le faatonuga o le a tatou faapai atu i le Atua i le tatalo. O le vaega taua lea o loo ia te au o le tatalo, ia tatou faamagalalo atu i e ua agaleaga mai aua o iina foi o le a faamagaloina ai o tatou sese. E leai se mea o i ai aua o le sese a Niu Sila e mafua i le tele o o tatou sese. O o tatou sese ia ua tatou sautuafia lava ona malaga atu i Niu Sila ma tatou vaaia aga ma tu masani a outou alo ma a tatou fanau ia ua avea lea ma lagoon leaga ua faaleaga atu ai fua le atunuu atoa. Ona i ai foi lea o le isi manatu, afai ua faaletonu le feagaiga na muamua, sauni lona lua.

Sa faapea foi le faasolo mai o le lalolagi tuai anamua. Na latou silafia ua le lava le feagaiga lea na osi i le toto o manu, sauni mai loa i le lagi le isi feagaiga ua osi i le toto o Iesu. Ou te manatu la, aua tatou te faatoina le tatou uo o Niu Sila. O Niu Sila lava sa tomua i mea uma. Atonu foi o aoga a Niu Sila ua amata mai ai ona atamamai nisi o alo ma fanau. Ae faapea atu ai lou manatu, o lea e taoto mai le isi Malo tele o Amerika poo se isi foi Malo ua silafia. Sauni sina a lua feagaiga. Lafo i ai le vaivai o le atiina ae o Samoa. Ia tago mai Amerika e matua fau Samoa ia lelei, fau lava ia matagofie.

O le itu i tagata faigaluega, ou te matua fai atu o le tasi lea o mea ua aao mai ai le Afioga a le Atua. E le ona o au o se faifeau, a o au e malosi e faitau tusi. O le upu a le Perofeta o Ieremia, le Malo o Samoa, ia faavae i le Atua, a o lo alaga mai le afu o tagata e le talafeagai le totogi. O ai a lafo i ai lea mea? Lea ou te fai atu ai ma le faaaloalo i luma o lau Afioga a le Palemia ma lau Kapeneta, e faigata, taumafai i ai ae mafaufau i iuga o mea e lua poo le mafai poo le lē mafai. Ae oute faamoemoe e mafai mea uma i le faatasi atu o le Atua i la outou galuega fita. Faatasi ai ma o matou leo ia viia pea le agaga o le Atua e taitai i lenei fonotaga mamalu. Soifua lau Afioga a le Taitaifono, ola foi le Maota.

Tofa TUIMASEVE FAASALAFI



Itumalo Faaalaalafaga:

Satupaitea

Filifilia:

5 Mati 1976

Faatauto:

18 Mati 1976

Lauga Faataupou:

3 Aukuso 1976

E manatuaina e lou loto

Saunoga Faataupou a Sui Usufono 1976-1978

upu e fai i le atalii o le tama lea o Laloinuma. E paia lenei aso aua e paia le Atua le e ona le aso. Ua mamalu Tiafau ma le Fale o Samoa aua ua ee le mamalu o lau Afioga le Fofoga o le Fono, aemaise foi le mamalu maualuga o lau Afioga i le Ao o le Malo, faapea foi le Afioga i le Sui Ao. Tainane foi o Pule ma Tumua, Aiga i le Tai ma le Vaa o Fonoti, ae tainane foi ia Samoa i Sasae, Sua ma le Vaifanua, Fofu ma Aitulagi, le Launiu na Saelua, o Saole ma Saleaamua, faapea foi Tama a le Manua Tele ma Tootoo o le Faleula. O le faafofoga foi a le aufaigaluega paia a le Atua, o e o lo o tapuaia faiva o Samoa, na uluai toto le niu i le tuaoi aua le va le oia ma lo tatou Matai o lo o afio i le lagi.

A o lenei aso, o le a nuunuu ia faatini o tausala o Sa ma Faiga, le paia o Sui mamalu ma le maualuga o lau Afioga le alii Palemia aemaise o le aiga Minisita. O le a avea ia lenei avanoa muamua e momoli atu ai le faamalo ma le faafetai. Lau Afioga i le alii Minisita o le Tupe, talu ai le saunoaga o lo o i lumamea, e leai se mea o faanefu. O lau saunoaga ua tauaaoina nei e le Fono Faitulafono o le a faaalua i ai ni finagalo, aua ua matua lava ma talitonu lou faamoemoe i talaga faale-tupe e pei ona sau ai le tele o tausaga. I tausaga ua mavae sei pai mai i le tausaga lenei, o lea ua maua i ai ua i ai lou faamoemoe, talu ai ona o se tasi vaega-tupe feololo e faauneina lea mo le tausaga lenei. O lea la ua faaopoopoina ai lava talu ai ona o lau Afioga o se tasi foi o tamalii maualuga o le atunuu, e faatuatuaina foi e le atunuu. O le mea la lea e faaopoopoina ai lava le matua talitonu o le a matua atoatoa le lelei o mea uma.

O lenei ua e tulai mai lau Afioga Vaovasamanaia, faalagolago foi i ai le atunuu i lona vaivaiga o lo o i ai nei, talu ai e tele ni itu loloto o lo o i ai le agaga o le atunuu a ua lava lou sialfia atoa foi ma lou masani i tulafono. O ni fautuaga lava la e tuuina atu i lau afioga aemaise foi o le mamalu o le atunuu o lo o faauluulu i ai nisi foi Matagaluga, e leai se mea e mafai e le Fono vaeane le mamalu, na o le taulagai i le Fofoga o le Fono a o lau afioga ma le mamalu o le atunuu o lo o faauluulu i ai mea tau tupe a le Malo, o le faatuatuaga lava lea. E leai foi se mea o lilo pe faanefu, o lea ua manino ma malamalama mea uma.

E pei ona ou tautala atu ma lou faaaloalo, talu ai ona o le saunoaga ua taatia nei ma ua tauaaoina e le Fono ua maua ai sou malamalamaga i le tulaga ua i ai mai le 1973, 1974, 1975. O lea la ua aliali mai e ui lava foi ina i ai sona eseese, aua ua maoae le tupe lea o lo o i ai le faamoemoe o lau afioga mo lenei tausaga, ae afai lava o se tupe o le a ono ma

tatau ai i tulaga po o le atiina ae o le atunuu, o se mea ua talafeagai ai lea fuafuaga ua e faamoemoeina. O lea la na o ni fautuaga matou te tuuna atu i luma o lau Afioga, aemaise fo le mamalu o le atunuu o lo o tauaveina foi lea fita, aua e mamafa le avega; e mamafa le avega o lo o faafeagai ma lau Afioga, aemaise foi le mamalu o le atunuu o lo o faauluulu i ai ma faamoemoe i ai. A e le gata foi i lea, o lo o tulai mai foi i se tulaga nisi o fita ma tuga o lo o faafeagai ma le Ofisa o Suetusi, o le faalagolagomaga lava lea o mea uma a le Malo, e pei ona o lea ua matauina i ai. O ai tonu lava le faamoemoe iina ia mafai ona maopoopo, ia mafai ona atoatoa le lelei. O le mea la lea e fai atu ai se fautuaga i lau afioga, ia tautuana ma lau Afioga. E i ai lava le faatuatuaga o le atunuu i lou tulai mai o le a mafai ona faaleleia ia mea uma.

Ia o lenei la taimi ma se manatu e faaalua, talu ai ona o le vaega tau tupe, o lenei la ua faaopoopoina atu ai ona o lenei tupe ua e faamoemoe i ai. Afai lava o se tupe e mafai ona faaleleia ai ia soifuaga o le atunuu e pei ona o le tulaga o lo o i ai nei, ia ou te manatu o se mea ua talafeagai ai. O lea la le fautuaga e tuuina atu i lau Afioga aemaise foi le mamalu o lo o faafoeina ia matata eseese o mea tau tupe a le Malo. Afai o le a mafai ona maua ia vaega ia, muamua o le amiotonu, faamaoni, e tupu mai ai le alofa. O lenei la taimi ma le fautuaga, na ona faaoo atu i lau Afioga ma le mamalu o ofisa eseese o mea tau tupe a le Malo. Ia soifua.

Tofa TUISALEGA SEMU



Itumalo Faaalaalafaga:

Salega

Filifilia:

5 Mati 1976

Faatauto:

18 Mati 1976

Lauga Faataupou:

3 & 4 Aukuso 1976

Faafetai lava mo le avanoa ua maua. Atonu i lenei aso ma lenei taeao o le talitonuga i lou iloa e le toe faaopoopoina pe toe tuuina i lalo le paia maualuga o lenei Maota Fono, mai le tulaga mamalu i lau Afioga a le Palemia faapea foi lau Afioga a le Fofoga o le Fono, Afioga i Minisita ma le mamalu o le Palemene. I lenei lava taeao, o se mitamitaga o le agaga ona o le faamoemoe ua taunuu. Atonu foi o se tasi manatu, afai tatou te mafafau i tua i le faasologa mai o le tutoatasi o Samoa, o lou talitonuga i lenei nofoaiga fou o se suiga fou ua i ai nei i le faatautaiga o le Sa

Saunoga Faataupou a Sui Usufono 1976-1978

o Samoa sa masani na o Tama a Aiga sa faatautaia i aso ua mavae. Mai lenei vaitaimi poo lenei nofoaiga ua tulai mai i le faatautaia o le Malo o Samoa i se tasi o Afioga poo le paia i Tupu ma Tamalii o Itumalo e pei o le tulaga o i ai. I le moomooga maualuga la o lou taofi, ua matua faalagolago le agai atu i luma ma le faamoemoe o lenei nofoaiga mo se tulaga manuia ma le matagofie. I lou lava taofi, atonu sa ese la outou silasila ma la matou vaai ma le faafofoga foi o le atunuu i le tulaga fetotoai sa i ai; ma i lenei vaitaimi ua faalaeiauina atili lenei Maota Fono i nisi o saunoaga ma fetalaiga ma o iina o le a maua ai le tasi ma le fealofani; atonu foi o iina le manuia o le Sa o Samoa ma lona faatautaiga mo lenei vaitaimi.

E i ai la se mataupu o loo i ai lou taofi, atonu, vaeatu ma le faaalalo o le taeao nei, pe paopapa foi le leo, o le talitonuga o fautuaga aua laei mo le Sa o Samoa i lenei tolu tausaga ua tatou i ai. Muamua, ou te faapea atu, ona o le Tala o le Tupe, ua ia te au foi i lou Sui Usufono le agaga faamalieina e tusa ma lau vaai poo le matauina foi o saunoaga a le Minisita o le Tupe e tusa ma le tala ua i o tatou luma. I se tasi la itu o loo ou matauina nei, atonu i totonu o le Tala o le Tupe o loo tele lava ni tulaga faavaloga o loo tatou matamata i ai; ma o ia tulaga faavaloga ou te matua talitonu e faailoga fesili i lou manatu le faataunuuina ma le lē faataunuuina. Ae e i ai lava le faamoemoe e tasi, afai o le a tatou galulue faatasi ma finagalo ina ia uunaiina le faamautuina ma le faaleleia atili o nisi tulaga, o le a taunuu nei valoaga ma nei moomooga ua i totonu o le saunoaga a le Minisita o Tupe.

O lona lua o mataupu ou te fia faaalua, o le tulaga lea mo se Maketi mo Savaii. Atonu o le tasi lava lenei o tulaga o loo matauina nei i tualumaga ua mavae o loo masani ona tautau pea. Sa faia foi se tasi faaaliga i Savaii sa ou matua faalogo foi e tusa ma le saunoaga a le Minisita i lea taimi, ia fuafuaina se tulaga faapena e lagolagoina ai lenei faafitauli i le motu i Savaii i le tau aumaia o fua o faatoaga e faatau i le Maketi i Apia nei. Lea la ou te toe faamanatu i le Minisita o loo faafeagai ma lenei mataupu le fautuaga. Pe le tusa ea ma tatau i lenei vaitaimi ona faaauau ia o se isi o tatou maketi i le motu o Savaii e faaitiitia ai le felauaiga o le tele o fua o faatoaga? O lou foi talitonuga afai e faataunuuina lea, atonu o le a faaosofia foi le aufaifaatoaga e faatauina le tele o tamaoiga o loo gaoioia ona ua maua se tulaga vavalalata. I lou manatu atonu e tupu lea agaga i le tele o faifaatoaga le fia faatauina o le tele o le tamaoiga ua maua, a ua fuafuagata ona o auala i le felauaiga. Ua

matauina nei e lo matou faaitu poo le motu i Savaii, o le pasese agai mai i Salelologa ma le toe aumaia i le vaa, ma le toe aumaia faatoa taunuu i le Maketi, a fuafuaina le tupe faaalua, po ua lata i le luasefulu ma ona tupu tala i le felauaiga. Ona ou manatu ai lea, a finagalo ai, atonu o le a faaitiitia le tupe alu a le aufaifaatoaga mai lea tulaga pe afai e fai se maketi i Savaii.

O se tasi foi tulaga ou te fia lagolagoina, atonu foi a matauina e lenei Fono pe faapea ua tele ni tootoo ua latou faaalua nisi o manaoga atonu ona o le taua o ia manatu e fia tuuina atu. O lea ou te fia tuuina atu ai le mataupu i auala, ona ua tele ona pai atu o saunoaga mai Sui usufono i tulaga o auala a le Malo i Savaii. Atonu na ona faaopoopo i lalo, ae ua uma ona oo atu ia finagalo o Sui Usufono. Pe le i finagalo ea le alii Minisita o i ai i lea tulaga e faaauau ia le faaleleia o auala o Savaii poo tua foi i lenei vaitaimi, aua o loo matauina o le tele lava o mea a le Malo o loo muamua lava i Upolu nei? Atonu foi o se tasi mafuaaga ona o le taulaga, ae tatau ona manatu i afioaga ma alaafaga poo le atunuu i tua mo sina isi faaleleia atili mo lenei vaitaimi. O le mea la lea ua i ai nei i lou taofi e tuuina atu pe finagalo i ai. Ua tatau ona teuteuina ala i Savaii aua ua ou matauina foi ma faalogo o faasavali ane le ta mai nisi nuu i le motu o Savaii e i ai le Itu o Tane. Ia o loo faailoga fesili lenei mea i lou taofi aua e leiloa poo fea le masina a o fea le taimi e oo ane ai i lo matou itu. O le fautuaga la, e tuuina atu i luma ina ia alofagia ia faaauau lenei galuega nei ave ave foi tuu i le Itu o Tane ae faaavanoa foi le Itu o Salega ma Asau ma le faasolo mai.

O loo matou vaai foi ma iloa i Faasaleleaga, e moni lava e pei ona taua e nisi Sui, o loo ave faamutumutu lenei tulaga. O le mea o loo i ai le fale i le togavao ua faata iina, a o ona tala atu ua faaavanoa. O le mea la lea ou te fautuaina ai le faataina o le auala i Savaii ina ia aveave loa. Ou te talosaga atu foi, atonu o lenei e afio le Afioga a le Minisita o le Itu i Salega, o loo i ai le faamoemoe mo le matou falemai e fia umusaina ia Oketopa. O le talosaga la, e tatau ona tatala ma faaoga lenei falemai ae ua faata le auala iina, aua atonu o se tasi lenei afaina o le soifuaga o lenei itumalo pe afai e tatala le falemai ae lei faataina le auala o i ai. O le tasi lenei manatu e tuuina atu i luma pe afai e finagalo ai.

O se tasi mataupu ou te fia taua, ona o le tulaga lava lenei o le Popo. I lou lava Sui Usufono ma le tóatele o nisi ua ou talatalanoa i ai, o loo tulai mai lava se faitioga tele e tusa ma lenei tulaga ona o le

Saunoga Faataupou a Sui Usufono 1976-1978

tau o le popo ma le mea o i ai. O le mea la lea i lou Tootoo Usufono, ou te tuuina atu se fesili, atonu o se taimi ona maua lea o se tali. Poo le a le tulaga o le a i ai, poo le a se iloiloga a le Minisita o loo fitoitonu i ai le Matagaluega o le Popo ma le Koko faatasi ma le Komiti o loo i ai o le a se latou iloiloga i se siitaga o le pauna popo ua i ai mo le vaitaimi lenei i le mea lea o loo fai ai tauvaga, ma sa latou iloiloga i le taimi e lei faia ai ni tauvaga? Ou te matua avatu lou taofi, o le tele o le popo o loo i ai nei, o loo le fiafia le tele o tagata e faagaoioi ona o le tau o loo i ai nei. Ona i ai lea o lou taofi e pei lava ona tuuina atu ai le faafesili, afai e maua se iloiloga a le Minisita o le Matagaluega lea mo le Komiti, ua siitia le tulaga o pauna popo e maua i le mea o loo faia faatauva, ua lelei lena. Ae afai e iloilo e le fetau, o lou taofi pe a finagalo ai le Minisita lea ma le Komiti, e sili ona faasee ane le \$1,000 lea ma le tau o loo faatau ai le vaaafi ma ona totoga ma tulaga uma o tau i le tauvaga lea e siitia ai le tau o le popo pe maua ai se \$10 i le 100 pauna.

O lou lava taofi o loo iina le faamalieina atoa o le atunuu aua o le a matua sali faatasi e tagata uma le popo pe afai o le a faaleleia le tau i tulaga faaauau faapena. Pei lava ona avatu ma le faaaloalo le taofi, afai ua iloilo ina e le Minisita ma le Komiti e sili atu le mea o i ai, o le a le faia foi lou taofi. A o lau fautuaga lena, afai e sili ona lelei le tuuina atu ia faalelei le tau o le popo, o le mea lea ua ono ma tataua ona fai ai la tatou popo mo le vaitaimi lenei, faapea foi le tau o le koko. Atonu pei ona taua e nisi Sui o le tulaga femoumouai, atonu e i ai foi lou malamalamaga e ala ona faapea ona e le o se mea e pule ai tatou iinei ae mafai lava ona tatou fuafuaina ni tau lelei pe a maea ona sainia feagaiga ma maketi i fafo. O le mea lea e tataua ai lava ona saunia se tulaga faaleleia o tupe faaleoleo ina ia mafai ona maua se sologa lelei o le tau o popo ma koko uma nai lo lenei lava mea o le alu i luga ma le alu ifo i lalo. Ia o se manatu lea e tusa ma lea tulaga.

Ou te fia taua foi le mataupu i auala galue. Atonu i lou itumalo ma lou foi nuu, o loo i ai galuega mo le fia faaleleia atili o auala ia. Ina ua faatuina le Komiti o Atiina A'e e aumai i ai manaoga o afioaga ma alaalafaga, na fofogaina loa le atunuu e le Komiti lea, tusi talosaga loa lo matou nuu. O le tali ua tuuina atu ua i luma o le Komiti lea, a o le a i ai se taimi. O lenei lava e faatali le nuu mo lena tulaga ona o lo matou auala galue na o le tasi le vaiaso na faagaoioi ai ae tali mai le na ia taitaia ua uma le tupe, ua leai foi ma le tupe na totogi e le nuu. O le mea la e talosaga atu ai, pe le tataua ona sei faaauau lenei galuega ona ua ave ave ona tuu lea i se tulaga

faaletonu faapea. Ou te tautino atu foi i lou tulaga faa-Sui, afai e faigata i le Malo, e mafai lava e lou nuu ona faaauau le galuega i le totogiina atu o se tupe pe afai ua faigata i le Minisita ma le Ofisa o Galuega se fuafuaga i lea itu.

E fia taua foi i lou taofi le mataupu lea i mea o ava. Atonu e le toe tau faamatalaina atu e lou foi Sui lo matou itu i Salega faasolo atu i Falelima ma agai atu ai. O nuu e matua matautia, lea foi sa outou fofoga lata mai nei, o loo i ai se tasi failauga na tafia ai iina ona o tulaga le manuia o ava. O nuu lava nei e matua afaina i tulaga faapena. O le mea la lea e fautuaina ai pe le tataua ona sei faasolo atu se galuega a lea lava Matagaluega sei faaleleia ava ina ia mafai ona faaogaina aemaise lava mo le atiina ae o faigafaiva i le atunuu; aua o le mea ua i ai nei, na o le faatau o le vaafagota ma avatu le afi i le tau tele, ae le o faaogaina ona o le faigata o ava. O lea e manatu ai, ana mafai ona faaleleia lea itu, semanu o vaiaso uma lava e alu ai faiva ma maua ai se tulaga manuia o ia itumalo.

Faafetai lava mo le avanoa ua tuuina mai ia te au i lenei foi aso fou ma lenei taeao fou. I le mamalu ma paia o le Maota Fono, ou te talitonu ua tatou oo i luma o le Atua e ala i le tatou taulaga e pei ona saunia e le Fofoga o le Fono. A o le taimi nei, o le a agai tonu ia le taofi o le Sui e tusa ma le tulaga sa faapea mai ai i aso ananafi.

I le aso ananafi, sa muta ai lau tautalaga i le tulaga lava lenei o le popo, i le mea o loo i ai le tulaga i le tauvaga. Ma o se tasi la faamatalaga ou te tuuina atu, atonu o le ala lea o le faaitiitia o le lē fiafia o tagata e saliina le popo, ona o le tulaga o loo i ai i le tauvaga lenei. O se tasi foi manatu ia te au, atonu o le tele o le atunuu e le o fiafia e sali le popo ona o le tulaga faatauva o loo i ai ona o lenei le mea, e galulue se vaega o afioaga ma alaalafaga ae le o galulue lava isi tagata faatasi ma le tele o ē e lei mafai ona galulue. Aua foi lenei, afai e maua le aofaiga o le pauna popo mai le afioaga ona tuuina atu lea e fai i ai le fuafuaga mo tagata uma lava. O le mea la lea ou te talitonu ai foi i lea itu, e le o maua se maliega autasi i le atunuu poo nuu o loo fai ai le tauvaga mo le faaauauina o le saliina o le popo ona o se tulaga e le o fetau lelei ma le fuafuaga o loo i ai. O le mea lea e tuuina atu ai le talosaga poo se manatu, afai e silafia e le Komiti ma le Taitaifono o le Komiti o le Popo e le fetau lea tulaga, ua sili ona faasee ane le \$1,000 lea e siitia ai le tau o le popo ina ia faafiafiaina le atunuu e faamalosi ai lenei tamaoiga o le popo.

O le isi itu ou te fia tautalagia, atonu o le tasi foi lenei mataupu sa i luma o le Fono i le aso ananafi

Saunoga Faataupou a Sui Usufono 1976-1978

ona o le tulaga lava lenei i le Komiti lea ua tofia latou te iloiloaina le palotaina o le Palemene. Afai i lou taofi i lenei lava Komiti ae faamautuina ni a latou iloiloaga, e i ai lava le popolega o le taofi. Afai ae manumalo le palota o le 21 tausaga, ona ou manatu lea ua leai se tulaga manuia o le atunuu i le tulaga o le tuu ese o le upu “matai”. O le mea lava lea o loo i ai le taofi ma le atugaluga, ma ona o lenei tulaga atonu o le tasi lenei auala o le a matua lepeti ai le tulaga matagofie o loo i ai le Malo o Samoa ma ona faaupuga o loo i ai – O le Malo e faavae i luga o le aganuu poo le tulaga faa-matai.

O se tasi foi itu ou te fia tautalagia, o le tulaga lea i fale o loo fau i luga o le uafu i Salelologa ma Mulifanua. I lau lava matau i nei fale, atonu po ua tolu nei tausaga o faagasolo ia galuega. O se mea lava e popole ai le taofi ona o loo matauina ma vaaia, e le matua iloga ona tino mai i taimi uma le galueaiina o nei fale. Ae ou te manatu ai o le tasi lenei vaega o loo tele ona toesea ai tupe a le atunuu. Na i ai lea o le talosaga, o le a se finagalo i lea lava tulaga i le Matagaluega, o loo i ai le Minisita na te pulea ma vaaia lea itu. Ua tatau ona faanatinati ina ia faamutaina le tele o le tupe o loo alu ai i ia galuega ua faaumiumi. O se manatu lea e tusa ma lea tulaga.

O le tasi mea ou te fia logoina atu, atonu ia te au lava ia poo lou foi itumalo, o loo manatunatu atili i lenei lava tulaga. O le mea la lea ou te fia tuuina atu ai se fesili i luma o le Afioga a le Minisita o Falemeli ma Uaealesi. Faamolemole pe i ai lava se telefoni o totoe sei avatu ma le Itu Salega. Ou te talitonu ua toetiiti lava soo le atunuu ae lei i ai lava se telefoni i lenei itu. O le mea lava lea e tuuina atu ai i luma le taofi, a finagalo ai o le manaoga maualuga lena. Afai foi e fuafua i nisi tulaga, e faigata i auala faanatinati poo auala e manaomia ai le vave, ia ae taumafai mai lava i Salelologa e fia talanoa mai i Upolu nei ona o tulaga faapena. Ona ou manatu ai lea, afai e amanaia e le Afioga i le Minisita lou leo ae faia se telefoni i lenei itu, atonu o le a faaitiitia ma faapuupuuna le femalagaai o tagata ona o tulaga i mea o loo manaomia ai fuafuaga faanatinati.

O le tasi foi mea ou te logoina atu ona o se tulaga lava i se Falemeli mo lenei itumalo. Ou te manatu i le tele o nisi itumalo, ua savali atu nei i le tai tolu tai lua Falemeli o loo i ai, a o lenei lava itumalo ua ou faaali atu i luma o le mamalu o le Fono i le taeao nei e lei oo lava i se tulaga faapena. O le mea la lea, a finagalo ai le Minisita o Falemeli ma Uaealesi, ia o lena ua avatu se taofi e tusa ma ia tulaga o loo

manaomia atili ma moomia e lenei itumalo se telefoni faatasi ma sona Falemeli.

O se tasi foi manatu ou te fia faaali atu, o le tulaga lenei i mea o tifaga i Aso Sa. O se fautuaga lava e le o se faatonuga poo se poloaiga a o le fautuaga. Sei toe silasila le Minisita e tulai tonu ai lenei mataupu. Silasila i lenei lava Matagaluega poo lenei foi Komiti ona o lenei tulaga i tifaga i Aso Sa. I lou lava taofi pe a finagalo ai, e a pe a faaauau ia tulaga ua i ai i aso uma o le vaiaso, a o le Aso Sa o le aso lava lea tatou te manatunatu ai i le alofa o le Atua e pei ona aumaia i totonu o Fale Tapuai o le atunuu. I lou lava manatu, o le a le avaavau o le Faifeau i lana lauga i le Aso Sa, ae afai e uma le Aso Sa ae oo i le po faaoso mai le tifaga, e toe see ese uma le mea sa faamau e tagata, le mea sa manatua e tagata pe sa faalaeiau ai foi e le Faifeau i le Aso Sa i le tulaga tapuai. Aemaise foi la lenei tulaga, o lea o loo faafogafoga le atunuu i le auauai mai poo le autovaa mai o le afaigaluega i le atunuu latou te avatua le finagalo o le Atua i luga o le ea mo le atunuu. I lou taofi, atonu o sina vaega o loo faafogafoga nei i lauga a Faifeau poo Aso Sa, a o le tóatele o le atunuu ua fulisia i tifaga i po. Ona i ai lava lea o le fautuaga a finagalo ai, e a pe a faaauau tifaga poo sailigatupe a le afaipisinisi i aso uma o le vaiaso, a o lenei lava aso ua tatau ona faaavanoa lelei sei tapuai le atunuu i le Atua aua o le Atua o loo faavae ai le Malo o lenei atunuu o Samoa.

O se tasi foi manatu ou te fia tuuina atu i luma, atonu o le tasi foi lenei mea, o loo faavaatua ai le afaigaluega a le Malo ona o totogi. Atonu sa aafia foi i se finagalo o se tasi Sui mai le aso ananafi, na ona ou toe lagolagoina pe a finagalo ai. E a pe a toe siisii i luga le totogi o le afaigaluega a le Malo. O le tatou Maota nei e leai sou taofi i lea itu, na o lau lava fautuaga a finagalo ai, toe faapoopo le totogi o le afaigaluega a le Malo ina ia faafiafiaina tagata o le atunuu e galulue ma faaleleia galuega.

O le tasi mataupu ou te fia tuuina atu i luma, o se fautuaga i le Afioga a le Minisita o Faamasinoga. Atonu o le tulaga lenei, ona o le faateleina o le faa-matai i totonu o le atunuu. Afai lava i lau vaavaai ma lau faitau i le faagasologa o Savali o loo i ai nei, o se tasi lava faasalalaua o matai e sili atu i le selau ma ona tupu. E leai ea se fautuaga sei tau faaitiitia ai lenei mea ona o lenei tulaga e pei ona maua i se saunoaga i le aso ananafi, ua agai atu i se tulaga faafitauli le atunuu i le lē maua e tupulaga o le vafealoai. Ua mafua lea i lou lava manatu toatasi, ona ua tele ni matai laiti ua faauouo ma le tupulaga i tulaga o le masaniga. Atonu o iina foi o loo maua ai se avanoa e talatalanoa ai ma le tóatele o tupulaga i

Saunoga Faataupou a Sui Usufono 1976-1978

afioaga ma alaalfaga, o loo fai ma ala e tulai mai ai le teteina o le pule mamalu a alii ma faipule. E avatu ai se fautuaga poo se fuafuaga, o le a se finagalo i le Minisita o le Matagaluega lea, e a pe a fai se faatautu ina ia tau faaitiitia. Atonu o lena lava le mea o loo faateleina ai foi le fefinau ai o le atunuu i nei aso ona ua matua faateleina le tulaga i matai.

I lou foi taofi i se isi itu afai ua uunaia lena fuafuaga ona o le faateleina o matai aua tulaga tau palota, o ou lava taofi vaeatu le paia o le Fono, afai o le itumalo na o le selau matai o loo i ai mo le palota, e mafai lava ona ou malo pe afai e tolima ni Sui e omai ia te au poo le 10 i le 15. Ae pei ua avea le manaomia o le tulaga i le tofi ma mea ua saga uunaia ai le faateleina o suafa matai i le atunuu. O le fautuaga lea ma le faaaloalo pe afai e finagalo ai le Minisita o Faamasinoga ona o ia tulaga.

O se tasi foi manatu e pei lava ona taua i le aso ananafi, atonu o moomooga maua lava ia o Savaii ona o tulaga i se maketi. Afai foi la e manatunatu ma mafaufau atonu e mafai ona tulai mai e faapea e lei tusa ma tatau se maketi mo le motu i Savaii, ona e faalelava le fefaatauaiga i le faaitiitia o le tele o tagata. Ona fautuaina ai lea pe a finagalo ai, atonu e mafai ona faaauu se maketi i le motu i Savaii e a pe a faalua atu i ai le Sone Saoloto lea e fai nei? Avatu se isi vaega i Savaii e faatulai ai i Salelologa. Atonu e talafeagai lea ma fuafuaga e tatau ai ona fai se maketi. O le a avea lena ma tulaga e faateleina ai le atunuu e nofoi ai. Ma ou te manatu foi afai e faataunuuina lea manaoga, atonu o le a fai Salelologa ma tapuvae tasi o le motu tele i Salafai mo le faaleleia o sona maketi pe afai o le a i ai.

I se tasi foi manatu ou te toe fia faamanatu atu ona o le tulaga lava lena o loo faatagisia e le motu tele ia Salafai, o auala lava. Ona manatua ai lea i le taofi se tasi faalapotopotoga o loo i ai iinei i le lalolagi. E a pe a talosagaina se faalapotopotoga o loo taua o le EEC, pe le maua ai se vaegatupe tele e tuuina atu e fausia ai ia ala i le motu i Salafai, faatasi ma lona faaleleia atili o nisi tulaga o loo manaomia e le motu i Salafai ona o auala lava. O le mea la lea i le manatu, afai e finagalo ai o le a talafeagai ma lelei lea tulaga, pe afai e taulia moomooga ua folasia nei i luma. Ma le faaaloalo lava ia manuia le aso ma ona taualumaga o le fonotaga mamalu. Faafetai.

Tofa TUGAGA MAULALO



Itumalo Faaalaalafaga:

Gagaifomauga Nu.2

Filifilia:

5 Mati 1976

Faatauto:

18 Mati 1976

Lauga Faataupou:

4 Aukuso 1976

Lau Afioga i le Fofoga o le Fono faapea foi le mamalu o le Palemene o Samoa, ua ou tu atu foi e fia fai se manatu e tusa ma le saunoaga e uiga i le Tala Faatautu o le Tupe na saunia e le Afioga a le Minisita o Tupe. E muamua ona ou faamalie atu i lau Afioga a le Fofoga o le Fono, pe afai foi o le a se faafofoga a le Maota ae toe oo atu se matou tautalaga i nisi foi o mataupu ua uma na laga; ia ae moni lava le finagalo o le Sui faatoa maea nei ona sausaunoa, o nei foi mea ua tulai mai, e le o ni mea fou, o mea ua leva na i ai i totonu o le Maota lena ma e oo mai lava i le taeao lena, o loo tatou tau saili se vaifofo ina ia faaleleia atili ai. O le mea la lea ou te faamalulu atu ai i lea tulaga pe afai foi o le a toe oo atu i ai se matou tautalaga.

Muamua, o lea ua tauaoina nei le saunoaga a le Minisita o Tupe ma o loo faamanino mai ai iina se ata malamalama lava e uiga i le tulaga tau tupe. A tatou manatu foi i se tasi itu, atonu o le fatu lava lea o faigamalo a le lalolagi o le tupe, aua e le mafai lava ona atiae se Malo poo se faalapotopotoga poo a nisi fuafuaga faapena e aunoa ma le tupe. O le tupe lava la lena e mafua ai le fausia o soo se finagalo o i ai se faamoemoega i soo se atunuu o le tupe lava le tulaga autu. Ma e faapea foi la i le tatou Malo, o loo tatou sailiili vaifofo nei mo le faaleleia o lea tulaga.

Ina ua tutoatasi le tatou Malo, atonu i ona tua atu o lea vaitaimi sa mama i le tatou faalogo foi poo le faafofoga a le atunuu le upu Atiina A'e. Ina ua tulai mai Samoa ma lona Malo tutoatasi i le 1962, o iina tonu na faamalosi ai le upu lena o le "Atiina A'e". Ma e oo mai lava i le taeao lena, ua fai ma upu suamalie i le atunuu le upu "Atiina A'e". O le a ea lona uiga? E atiina ae se atunuu mo le faaleleia o tulaga uma. A tatou vaavaai totoa la e tusa ma le faamatalaga poo le saunoaga a le Minisita o Tupe, o lea ua faalia mai ai fua o le lauelele o Samoa.

O le tatou vaai la i le agai i luga faatasi ma lona tulaga fai ifo, o le mea muamua, a tatou vaavaai i le fuainumera o le fai mai na ona po a o tatou faifaimea faatasi ma le Malo o Niu Sila, sa le mafai ona faumatia e tatou na faamanuiaga, aua sa tele lo tatou avanoa i le mea tau fai. Ma o lea foi sa

Saunoga Faataupou a Sui Usufono 1976-1978

faamanuiaina ai le Malo o Samoa. A o le a le mea ua tupu i nei ona po? Ia ua na o se mea e faanoanoa ai le mafaufau pe a tatou vaavaai totoa e tusa ma tulaga o i ai nei. Fai o le lē fetai o fuafuaga a le tatou Malo e tusa ma lea atiina ae, a o le tulaga foi ua i ai fafo ua faapea foi ona afaina tele ai Samoa. A outou faafofoga foi e pei o faasalalauga a le 2AP lea e ala mai i le Matagaluega o Faatoaga, Samoa e, tautuana le atiina ae o le fai, ia faaleleia le fai.

O lea ua tali mai itumalo ma nuu o le atunuu e tusa ma saunoga foi poo faaaliga mai le Ofisa o Faatoaga, ae o le a le mea ua tupu nei? Ua pagatia le atunuu. Fai o le faatamaia o togafai i le tele o nei mau vailaau ma faamai, ia ae o le faalavelave ua faaitiitia foi le tatou maketi. O tulaga la faapea, poo fea lava le mea tatou te saili i ai ina ia mafai ona foia mai nisi taumafaiga ou te manatu lava au, a tatou vaavaai mai le amataga ma le mea sa i ai le tatou atunuu, sa le afaina tatou mai le tele o faamai ua aafia ai nei. A o le mea ua tupu mai nei, tatou te manatu o fesoasoani mo le faaleleia o le tatou eleele, ae tatou te le iloa o iina o le a tupu ai le matautia. O lona uiga o le a le faaogaina o tatou laueleele nai le faamanuiaga sa i ai aua ua aveesea lona tamaoaiga talu ai le tele o mea faalelei eleele lea ua i ai.

O le isi foi tulaga pe a tatou vaavaai i ai o a tatou talo. O le tasi lava lenei o mea ua fai ma faafitauli i lenei vaitaimi. Ua na ona avatu o faaaliga e toto le talo, toto le talo, ua lelei, o lea foi ua fai le matou pitolaau o le totonu o le talo. A o le a ea le mea ua faapenei ai le lē maua o ni maketi. A matou faafesili mai foi i le Matagaluega e faafoeina lea tulaga e fia maua ni a matou pusa se fia ni selau, a o le tali e avatu pe na o le 20 ni pusa, a o lenei taumafaiga na matou faafesootaia po ua atoa le 6 masina. Ona matou manatu lea, afai ua tuai le 6 masina atonu o le a maua le mea na matou talosaga ai. A faapefea la ona tupu lo tatou tamaoaiga i le tupe e pei ona taumafai nei i ai lo tatou atunuu, ae na o le 20 i le 30 pusa e mafai ona faaavanoa atu? O le mea lea e avatu ai se fautuaga i Minisita o loo fetai ai tonu ma lenei tulaga sei tautuana ma outou, afai tatou te galulue faatasi, ia o le a manuia le tatou taumafaiga. Ae afai ona pau lenei na ona avatu i luga o le ea, faasaga le atunuu e toto mea ia, ae leai foi sa outou galuega o faia i lea tulaga, o le a faapefea nei la. O le mea lea e avatu ai sa matou fautuaga, ia tautuana ma outou. Saili ia tele ni o tatou maketi. Amata atu i Niu Sila, o Toga, o Fiti, pe afai lava ua le maua i nisi mea. Tou te silafia lelei tulaga o mea faapena e faamanuiaina ai le taumafai o Samoa e pei ona tatou i ai nei.

O le mea tau niu. Faamalo faafetai i lau Afioga a le Minisita o loo faafeagai ai foi ma lea tulaga. O le mea moni e ese foi le manaia o lea faatosina, ua i ai nei tauvaga ia e pei ona fofoga foi le atunuu e pei ona faagasolo; pe tusa ma le lua ni taunuuga ua oo i ai lau fuafuaga. Ia e moni lava o le tasi lenei o auala, ae fautuaina lau Afioga e le o le vaifofo lea. O le vaifofo e pito sili ona taua e faapea, afai o le agaga maualuga lea i lau Afioga a le Minisita, o le sii lea o le tau o le popo. Taatia mea ia o tauvaga ia e fai. Silasila foi o le tauvaga lea e fai e le o aafia ai le atunuu aoao, na o se vaega o ni itumalo ma ni vaega o nuu. Ae o le mea moni ou te tau atu, o le anoano o le popo o le atunuu lea ua lalau i le taimi lenei, aua foi e le fiafia le atunuu e tusa ma tulaga ia o loo i ai.

Pau lava le mea e manaomia e le atunuu o le sii i luga o le tau ona e talitonu lea ma o le a faamaonia le upu lea ou te fai atu, o le a matua tamaoaiga tatou i le mea tau tupe e ala mai i le popo. Aua poo le a lava nisi a tatou sailiga i ai ou te fai atu o le niu ua ao ai Samoa. Ma e le tutusa foi le malosia o aiga taitasi. Pau lava le mea lea e faalagolago latou i ai, a siitia i luga le tau o le popo, ou te fai atu le upu e le toe i ai se popo e maumuaina. Aisea? Aua o le mea lava lea na masani mai ai le Samoa ia mai le amataga o le niu. Ma o lea lava la e mafai ona tatou faamaonia lea mea moni, e pei o lau saunoga lea e i ai. A tatou vaai i ai poo le a se tulaga o le alamanuia i totonu o le atunuu, e leai lava se tasi mea e mafai ona faaluaina le niu. O le mea lea e avatu ai se fautuaga aua tatou te le maua i fafo poo nisi auala e togafitia ai vagana ua siitia i luga le tau o le popo i se tau ua fuafuaina e tatau ai, poo le \$6 poo le \$7 e faataitai ai mo le tolu tausaga, ona e talitonu lea e le gata o le a tele ni tatou popo e lauina i fafo, ae o le a faapea foi ona tele ai le tatou tupe maua. Afai e fautuaina le \$6 i le 100 pauna popo, o le a faamaonia lava lenei faamoemoega.

O le tasi itu, e fia avatu ai foi se manatu o a tatou laupapa. E pei foi ona faaaliga e se tasi Sui i lenei taeao, sa i ai le agaga maualuga o le atunuu, o se tasi lea faaola totoga i totonu o Samoa aua foi o lea faatoa taunuu lo tatou atunuu nei i tulaga atiae, ua le gata i totonu o le taulaga i Apia nei ae faapea foi alaafaga i tua ma e aoao ai lava le atunuu atoa i lenei mea. O le mea la sa tupu mai i manatu o le atunuu, faafetai ua i ai lenei Ili Laupapa o le a mafai ona fesoasoani e tusa ma le vaivai, a o le a le mea ua tupu i le taimi lenei? Ia sei tulou o le upu e to ia te au, na amata laupapa o lelei i le faaogaina i galuega, a o le taimi nei ia ou te fai atu le upu moni ua matua agai atu la tatou laupapa i se tulaga le manuia. O le isi tulaga matautia ua aliali mai, e fai o

Saunoga Faataupou a Sui Usufono 1976-1978

le lē manuia o le laupapa lava ia ae a fuafua atu i le tau, ua le taitai ona tutusa le tau ma le mea na i ai i le amataga. A tatou vaavaai i le tau, toeitiiti lava tutusa le tau o le tatou laau ma le laau mai fafo, ma o le mea la lea ua tupu i ona po nei, ua toe agai le atunuu e faatau mai laau mai fafo. E mafua i se a? Aua foi o tatou, tatou te mananao i mea lelei. O lea e atiae o tatou aiga, sei vaeatu le mamalu o le Palemene, tatou te mananao e atiae i mea lelei a ua tulai mai nei, ua matua le manuia le tulaga o le tau o le tatou laupapa. O le mea lea e avatu ai se fautuaga, afai ua le mafai ona faalelei le laupapa lava ia i tulaga e tatau ona i ai, e pei o tatou laau e maua mai fafo, sei alofa sei tagai ane i le tulaga i le tau, sei tau fai sina faapau ifo ona ua matua taugata tele le laau. Faafetai i nisi ili a kamupani o loo i ai i mea tau laupapa o lea ua sulufai i ai le atunuu aua e feoloolo le tau, a o le laupapa na faamoemoe i ai lo tatou atunuu o le a tupu mai ai so tatou manuia, ia ua agai atu ina le manuia i le tulaga lenei.

O le tasi itu e fia avatu ai se manatu o le mea tau Uaealesi Faalogologo. O se tasi lava lenei o mea matautia i le tulaga ua i ai nei. Silasila foi, o le polokalame faatino a le Malo mai lea lima tausaga ma lea lima tausaga, ou te manatu na amata mai lava ona tautalagia o taua ai Uaealesi Faalogologo. E oo mai lava la i le taimi lenei, o loo tautalagia pea atiina ae. Ia faafetai ua maua nisi alaleo e lua o le tatou uaealesi, a o le mea ou te fai atu, se e matautia le lē manuia o le tulaga o le uaealesi i le itu matou te i ai. Silasila foi, a ki le tatou laau i le tatou 2AP e tei lava ua oso mai Tutuila, oso mai Toga, Hawaii, oso mai ma isi motu ona faoa uma lava lea o le leo o le tatou Fale Uaealesi. Ia o le uiga o lea mea, ua matou le maua faamatalaga i mea o loo alu atu ai la tatou faasalalauga, a ua maua e matou ia Hawaii ma na atunuu. O se tulaga matautia tele lea mea. O le mea foi lea ua le mafai ai ona maua tonu e nisi foi o le mamalu o Sui o le Palemene ni feau fauaealesi ia i latou i taimi e manaomia, ona e faigata tele ona latou maua lea laasaga i Savaii. O lea e avatu ai se fautuaga i lau Afioga a le Minisita o loo fitoitonu i ai lea tulaga, faamolemole sei faanatinati ona foia lea mataupu ona uma ai foi lea.

O le tasi mea, o le tatou Ofisa lea i Niu Sila ma e avatu ai lava le faamalo ma le faafetai foi i le utaga loloto ona ua mafai ona toe tulai mai lenei mataupu, aua o le mea moni lava ua le toe po se lilo i totonu o le paia o le Palemene e tusa ma le tulaga o loo i ai lo tatou atunuu i Niu Sila. E tele tulaga o faafitauli o loo fetaiiai ma tagata o lo tatou atunuu i Niu Sila. A oo ina fetaiiai tatou ma tulaga faapea ona maua lea o i latou i le fememeai. Aisea? Aua foi ua tuua o latou

aiga, ia vaeatu foi le paia o le Palemene, ua na o ni tama ma ni teine ua leai ni o latou matua o mafaia ai ona maua ni fautuaga lelei. Ae ou te manatu o se tasi lenei o auuala taua ma ua leva foi ona tatau ona faia e le Malo o Samoa. Ia fai lea nofoaga e tua i ai le atunuu. Afai foi tatou te maua ni faamatalaga pei o le faiga a Niu Sila lea ua fai ai, o le tasi lea o mafuaaga aua ua le maua e Samoa poo fea le mea a maua ai se fesoasoani. O lea la e faatulai mai nei lo tatou ofisa i Niu Sila, ia faamalo atu faafetai e tusa ma lea tulaga.

A o tatou i ai pea i Niu Sila, e tusa na taua foi e nisi o Sui le tulaga ia Rusia. Ia ou te manatu au e sao foi lea fautuaga aua o le mea moni, na tupu foi se tasi mea faapea i le tausaga talu ai a o ou i ai i Niu Sila. Sa fai la le saililiga a le Malo a Niu Sila ma le sui o le Malo o Rusia sa i totonu o Niu Sila. E faapea se faamatalaga o mea faalilolilo a le Malo o Niu Sila, ua uma ona tuuina atu e lenei Sui o Rusia i lo latou Malo o Rusia. Ma atonu la o ia tulaga uma tatou te iloa ai le tulaga faigata pe afai o le a fetaiiai ma se atunuu, ma o le mea foi lea ua fautua ai e tusa ai ma lea tulaga. Afai foi ua oo mai i lo tatou laufanua Rusia, tali lelei pea e tusa ma tulaga ma lo tatou va fealoaloai, a o se tatou faamoemoe e tusa ai ma le agai i luma o le tatou atunuu, ia ou te manatu e pei ona fautuaina e le tele o Sui, faataatia ifo faapea pea.

Lau Afioga a le Fofoga o le Fono, e fai le malologa a o tatou i ai pea i Niu Sila. O lea la ou te fia tautala ai foi e tusa ma le tatou feagaiga foi lea faauo ma le Malo o Niu Sila. Ou te manatu o lenei se mea e matua tele lona taua, e le gata i le Malo o Samoa ae faapea foi i le Malo o Niu Sila ma o foliga vaaia la ia o le tatou galulue vavalalata ma Niu Sila. E le gata ina aveia Niu Sila ma tatou paaga totino a o tausaga e Niu Sila lo tatou atunuu i le 50 talu ona tutoatasi lo tatou Malo. Ma ou te manatu lava la e tusa ma le faagasologa o le tau atiaeina o le tatou Malo Tutoatasi e tusa ma auala fesoasoani a Niu Sila e avatu ai se fautuaga faapea; aua le faavaivai aemaise lau Afioga a le Palemia faapea le Aiga Minisita e tusa ma lenei itula. O mea uma lava e tatau ona manaomia e lo tatou Malo, e tatau ona tatou fesili pea ia Niu Sila e tusa ma lana fesoasoani, aua e le o se fesoasoani faapea e fai fua, poo se fesoasoani e ala i luga o ni fuafuaga e lei i ai ni tusitusiga. E tatau ona aloaia e le Malo o Niu Sila e tusa ma a tatou feagaiga ua i ai nei.

O le mea foi lea e i ai i lou lava taofi toatasi e avatu ai se fautuaga; aua le fiu. O a lava mea ua manatu i ai lo tatou Malo e tusa ma le atiina ae, tatou alu pea ia Niu Sila ae tusa ma lo tatou va fealoaloai. E ui foi

Saunoga Faataupou a Sui Usufono 1976-1978

ina tatou vaaia nisi tulaga matautia ua tulaga mai e tusa foi ma lea faasaga, a o le mea moni e faapena lava le taulumaga ma le gasologa o aso. O se vaitaimi e taugamalie ai o se vaitaimi tatou te oo ai foi i faigata; a o le lagona e tuputupu pea i le mafaufau e tatau ona faamalosia pea Niu Sila. Afai ua vaai Niu Sila ua le faataunuuna nisi o ona tiute pei ona tatou i ai, o le tatou matafaioi lea e tatau ona tatou tuuina atu pea se tulaga aloaia ma le malamalama ina ia latou silafia ai e le mafai lava ona see ese le Malo o Samoa e tusa ma le laina tusitusia lea. O le fautuaga lea e tusa ma lea tulaga ina ia faamalosia pea ona tausia o le tatou va ma Niu Sila e tusa ma auala o fesoasoani.

O le tasi itu, e fia oo atu foi i ai se manatu o mea nei o autalavou, ma o lea ua faatulai mai i lea tausaga mo le faamalosia o tulaga o autalavou. O se manatu lelei lea ua ae mai nei e tusa ma le faamalosia o lea foi vaega o tupulaga o le tatou atunuu; ma o le mea moi lava, afai o le a aunoa a tatou fanau poo tupulaga o le atunuu ma ni tulaga e puipuia ai e tusa ma le olaga faa-Samoa moni, ou te manatu o se tasi lea o auala o le a mafai ai ona afaina pe foua foi le pule mamalu a alii ma faipule i alaafaga o le tatou atunuu. Ma a outou silasila totoa i ai ma vaavaai foi i lenei vaitaimi ma le faasologa mai o lenei foi tausaga ua tatou i ai, ma ia tausaga ua tuanai, ua tei ua fou mai ni uiga faapea i totonu o le atunuu, e pei ona tatou vaaia ai lauao ma foga uumi; ae le gata i lea o soesa foi poo ava; tulaga faapena faatasi ma nisi o teuga tatou te mafaufau ai pe tupu mai fea ia tulaga? Ma o le mea moni e le mafaia e le Malo o Samoa ona faalagolago ma tuu tasi i tulafono pei ona fausia nei. E tatou te iloa le ata malamalama o lea tulaga pe afai tatou te vaavaai i le taulaga ma tatou iloa ai ituaiga foliga eseese poo ituaiga tagata. Ona tatou manatu lea, atonu e le o ni tagata ia o le tatou atunuu. Ma e mafua uma ia tulaga faapea ona o faiva ma tu ua oo mai i ona po nei. A o faafofoga foi pe silasila totoa i itumalo ma alaafaga i tua, ua matua tapu lava lenei mea. Aisea? E manumanu Samoa i ana measina. O a measina? O le tu ma le agaifanua a Samoa.

O le mea moni, o le tele o nisi alaafaga e pei foi ona taua i le tele o Sui, ua foua le pule mamalu a alii ma faipule. Ae paga lea, a tatou vaavaai i lo tatou Malo, e leai se tasi faavae, o lea e faavae tonu le Malo o Samoa i lana tu ma lana agaifanua. O le a lea tulaga? O le amio pulea. O le mea la lea e avatu ai se fautuaga ia tautuana, e le gata ina ia aoaoina tupulaga ma autalavou i ona po i mea e tatau ai, a o le tulaga e aupito sili ona maua i lea maua le amio pulea, ia iloa faaloalo e tusa ma le tulaga tatau, aua

o le mea moni, e iloa lava Samoa ia i ana lava tu ma agaifanua. O le mea foi lea sa saafiai mai ai le tele o a tatou paaga o loo tatou taulata aemaise foi o le lalolagi e tusa ma la tatou tu e masani ai Samoa. O le mea la lea, e avatu ai se fautuaga pei ona avatu le agaga moni, o le mea e pito sili ona maua i ia faufuaga uma, o le amio pulea. A mafai ona amio pulea o tatou tupulaga, ua faapea foi ona agai atu lo tatou atunuu i se tulaga manuia.

O le tasi laasaga, o tatou fale foi nei na taua e nisi Sui. E le faapea matou te toe fia taualoa lea ogasami ua uma na i ai nisi o manatu, ae peitai ane, e lagona le tele o le ma atonu o se tasi foi lea auala e fai ma mea e ono afaina ai le mea tau tupe, o tatou fale nei i luga o uafu. Aua o le mea moni lava, e ofo foi le mafaufau i le matua lea ona faagaoioi o lea galuega. O le mea o loo vaaia pea seia oo mai lava i lenei taeao, o la lava e tu mai fale e lei maea. Atonu o le manatu mama o ē o loo vaaia lea tulaga nei tei ua leai se galuega, ae manatua, o iina foi e ono saofia ai foi auala ma tulaga faalemanuia ia i latou o loo latou faia, e fenumiai foi a latou penitala, tei foi ua avane i ai se vaegatupe toe tuu atu i lea mea, ae lei faatinoina lava galuega nei. Ma o le mea moni a outou silasila, o le tele o Sui o le Maota lenei e malaga mai Savaii, ae le gata foi i lea o tatou vaa ia e i le uafu i Mulifanua ma Salelologa; o le motu lava o Salafai o loo asaina lea faigata. O le mea moni, a na matou fai atu, maimau pe ana sei outou faia lea laasaga o le malaga atu, malaga mai i aso taitasi o le vaiaso poo le masina ona outou iloa lea o le faigata o le mea o loo i ai matou. O le mea la lea e avatu ai sa matou fautuaga e tautuana, sei faanatinati ia galuega. Ua mataga foi i le silasila pea i ai o le atunuu aemaise foi o Malo mai fafo. O lea ua faigofie femalagaaiga i lo tatou vaa ma ua tele ina tafafao atu e mai fafo ma maimoa; ae a vaavaai i le tulaga lea e i ai, o se mea e faanoanoa ai le mafaufau e tusa o lea laasaga.

O se tasi itu o o tatou auala galue. Poo le a lava lo tatou fia fai mea lelei ma lo tatou agaga fia atiae a o le mea moni lava, a aunoa tatou ma le faaleleia o tatou auala galue ou te manatu foi o le a le mafai ona taunuu le agaga ma le faamoemoe o le Malo. O le mea la lea e avatu ai se talosaga vaivai poo se fautuaga i le Matagaluega o loo fitoitonu i ai tatou, i mea tau auala sei tautuana ma outou a fausia le auala, lelei le fau ia uma, ae leaga le fai fai ona taatia lea aua o le mea moni na ona amata na sua nei i le auala ona alu alu lea pe afa, tei lava lea ua motusia ona taatia ai lava lea pe tausaga pe lua tausaga o tauanau mai e le Matagaluega se i faamaea nei mea. Aua silasila, ou te le o malamalama lelei i

Saunoga Faataupou a Sui Usufono 1976-1978

le tulaga o loo i ai le pologa o tatou nuu i tua. O nisi e mafai ona maua taavale e fesoasoani ia i latou a o le tele o nuu, o loo tauaveina pea le pologa lea o le amoina o mea mai uta i faatoaga. O le mea la lea e avatu ai se fautuaga sei tautuana, a vave ona tatou taunuu i le faaleleia o o tatou auala, o le vave foi lea ona fua mai ia taumafaiga aua e leai lava se tasi o o tatou faamoemoega maualuga i totonu o Samoa vagana ai lava lo tatou faasaga ifo e matua galulue i lo tatou eleele ona maua ai lea o fua e tusa ma le manaoga lea ua tatou agai nei i ai e tusa ma fuafuaga a le tatou Malo.

O le tasi foi mataupu e fia avatu ai se manatu, i tulaga o mea Telefoni ma Falemeli. O lenei foi manatu ua uma lava ona oo i ai ni finagalo o Sui o le Maota. Peitai ane, e ala ona matou avatu lenei manatu ona o se mea e taua tele. Afai e silasila ma maimoa lelei aemaise lava le tele o o tatou uso a faipule aemaise foi o lau Afioga a le Palemia ma Minisita o loo alaala nei foi i Apia, amuia outou soifuaga na o le aapa ane lava maua lea, tago ane maua lea, a o le mea o loo i ai nei matou i tua, o se tulaga pagatia. O le mea lea matou te soso atu ai ma le matou fautuaga sei alofagia, se o se mea matagofie le oo foi o matou i lenei tulaga aua o le tatou Malo e le faapea o loo fausia na o Apia. O lenei lava o loo aafia atoa lo tatou atunuu e tusa ma le taumafaiga o le tatou Malo, ma e mafai ona faapine ia mea e tusa foi o se vaitaimi e lei mamao atu, na alu atu ai foi le malaga o le sugatupe a le Au Lakapi. O le a la sa outou faitau ma le matau i lea tulaga? Na faatamala ea le motu ia Salafai? E leai se leaga o le motu e masani i le suemalo; tusa lava pe matou te iloa pe tasi pe toalua se matou tama e tau ai le matou motu ia Salafai o loo i ai i le Au, ae matou te faamaopoopo aua le tautuaina o le Malo o Samoa. O le mea lea matou te fai atu ai, aua tou te faatamala i le matou motu, nei mama i o outou finagalo faapea e atiina ae pea Apia. A tatou vaavaai i le tulaga o loo i ai le taulaga i Apia, ia e atiina ae ma toe soloi; atiae ma toe soloi. Ae maimau pe ana sei faaauau atu nai seleni sei faaleleia ai mea ua matou taumafai nei i ai.

Ia faamalo faafetai i lau Afioga a le Minisita o Galuega, ua matou vaia se isi laasaga fou e tusa ma le faatamala o o tatou auala. Ae o le mea foi la ua ou vaai atu i le tulaga lea, ua nofo foi lea galuega. Na ona amata amata lava, oo loa i le taimi lenei ua nofo. Ua matou le iloa foi la, poo le nofo a lea o le galuega lenei sei aulia foi lea tausaga poo fea se mea e oo i ai. O le mea lea matou te fautuaina ai, a fai se galuega, fai ia uma aua o le mea foi lea e ala ai ona tele ni manatu faatasi ma a tatou tupe alu ona

o le fai fai tuu. O lea e avatu ai se agaga vaivai i se matou fautuaga, a tapena se galuega fuafua tata. A maea loa ona fai, fai ia maea. O lona uiga taotu te le toe foi mai lava i lea tulaga pei ona tatou i ai.

O lea foi la e avatu ai se vaimalu i lau Afioga a le Fofoga Fetalai, aemaise foi le mamalu o le Aiga Kapeneta ma le Afioga a le Palemia ma le mamalu o le Palemene. Afai foi o le a se leo e tusa ai ma la outou faafofogaaga, ia faamolemole ia faamagalo e tusa ma lea tulaga. A o moomooga maualuga o Sui o le Palemene pei ona tatou aofia, tatou galulue faatasi. A tatou galulue faatasi ona manuia lea o le faamoemoe o Samoa mo lona Malo. Ia soifua ma ia manuia le Palemene.
